

# Jeremías

## *Tlen quipyia ni amatlapohuali*

<sup>1</sup> Ni amatlapohuali quipyia nopa tlajtoli tlen Jeremías, icone Hilcías. Jeremías elqui se tlen nopa totajtzitzí ipan altepetl Anatot ipan tlali Benjamín. <sup>2</sup> TÓTECO achtohui quinojnotzqui Jeremías huan quimacac tlajtol para tlayolmelaahuas quema Josías, icone Amón, yahuiyaya para majtlactli huan eyi xihuitl para tlanahuatis ipan tlali Judá. <sup>3</sup> Huan teipa TÓTECO quisenhuiquili quimacac tlajtoli miyac huelta quema Joacim, icone Josías, elqui tlanahuatijquetl ipan tlali Judá huan hasta quema Sedequías, tlen nojquiya icone Josías, quiaxiti itlamiya nopa majtlactli huan se xihuitl ipan itequi queja tlanahuatijquetl. Elqui ipan nopa xihuitl quema ajsicoj tocualancaitacahua ipan nopa metztli macuili ipan tocalendario israelita [1:3 Ipan agosto o septiembre 586 a.C. ipan tocalendario tlen ama.] huan quiyahualoqque altepetl Jerusalén huan quinhuicaque Jerusalén ehuan ilpitoque para tlatequianotij ipan seyoc tlali.

## *TÓTECO quitequimacac Jeremías*

<sup>4</sup> TÓTECO nechnojnotzqui huan nechmacac ni tlajtoli, nechilhui: <sup>5</sup> “Na nimitzixmatqui hasta quema aya nimitzchijchijtoya ipan iiji monana. Huan quema aya titlacatiyaya, nimitzlapejpeni huan nimitziyocatlali para titlayolmelahuas tlen

na ica tlacame tlen ehuani nochí tlaltini ipan nochí tlaltepactli.”

<sup>6</sup> Huan na nijnanquili: “¡Ay, TOTECO, ta Tlen Más Tijpiya Tlanahuatili, ax huelis nicamatis para ta pampa tlahuel niconetelpocatl!”

<sup>7</sup> Pero TOTECO nechilhui: “Amo xiquijto para sanoc tieli se titelpocatl, pampa ta tiyas campa na nimitztitlanis huan tiquijtos nochí tlen na nimitznahuatis. <sup>8</sup> Amo xiquinimacasi nopa tlacame pampa na, nimoTECO, niitztos mohuaya para nimitzmanahuis.”

<sup>9</sup> Huajca TOTECO quixitlajqui ima huan quiajsic nocamac huan nechilhui: “Xiquita, na nimitztlalilijtoc notlajtol ipan mocamac. <sup>10</sup> Huan ama nimitztequimacatoc para tijpiyas tlanahuatili ica tlanahuatiani huan inintlanahuatijcayo para tiquijtos tlachque ininpantis. Sequin tiquinquixtilis tlen campa itztoque huan tiquintzontlamiltis. Sequin tlanahuatijcayotl tiquinxolehuas huan tiquinmajcahuas. Huan sequin tiquintlalanas huan tijchihuas ma mohueyichihuase.”

<sup>11</sup> Teipa TOTECO sampa nechnojnotzqui huan nechilhui: “Jeremías, ¿tlachque tiquita?”

Huan na niquilhui: “Niquita se imacuayo nopa cuahuitl tlen itoca almendro.”

<sup>12</sup> Huan TOTECO nechilhui: “Quena, ya nopa quinequi quiijtos para nitlachixtoc huan melahuac nitetlatzacuiltis senquistoc queja niquijtohua.”

<sup>13</sup> Teipa TOTECO ica ompa nechtlahtlani: “¿Tlachque tiquita ama?”

Huan na niquilhui: “Niquita se chachapali ica atl tlen molontoc huan motlalijtoc tlen norte para toyahuis ica tlani.”

<sup>14</sup> Huan TOTECO nechilhui: “Nimantzi quisas tlen fiero huan tlahuel temajmati tlen nopa tlaltini ica norte huan quinajsis nochi tlacame tlen itztoque ipan ni tlali Judá. <sup>15</sup> Quena, na niquinnotzas nochi nopa tlanahuatiani huan ininsoldados tlen nopa tlaltini tlen mocahuaj ica norte para ma hualaca mosehuiquij ipan ininsiyas yejyectzi para tlanahuatise campa ipuertajyo altepetl Jerusalén huan quitehuise. Nopa soldados ma quiyahualoquij itepa ni altepetl huan ma pehua quicoyonica. Nojquiya ma quintehuica nochi nopa sequinoc altepetini tlen tlali Judá. <sup>16</sup> Queja nopa niquintlatzacuiltis notlacajhua pampa nechtlahuelcajque. Quinhueyichijque huan quinmacaque tlacajcahualistli nopa totiotzitzi tlen yajuanti quinchichijque ica ininma. <sup>17</sup> Pero ta, Jeremías, ximoquetza, ximocuallali huan xiya xiquinilhuiti tlacame nochi tlen na nimitznahuatis. Amo xiqunimacasi, pampa intla timajmahuis, huajca na nimitzpinahualtis iniiexpa. <sup>18</sup> Xiquita, ama ni tonali na nimitzchihuas titetic para axaca huelis mitztlanis. Nimitzchihuas titemachtli queja se altepetl tlen moyahualojtoc ica tepamitl tlen tilahuac huan yeca axaca hueli quiitzquia. O nimitzchihuas queja se tlaquetzali o se tepamitl tlen nopa tepestli bronce tlen axaca hueli quixolehuas, pampa axaca huelis mitzchihuilis se tlamatli tlen fiero. Huan ax huelis motlalis mohuaya niyon se nopa tlanahuatiani tlen tlali Judá, niyon inintlayacanc-

ahua, niyon inintotajtzitzi, niyon inintlacajhua.  
 19 Yajuanti mitztehuise, pero ax huelise mitzlanise pampa na niitztos mohuaya para nimitzmanahuis. Queja nopa na niimoTECO niquijtohua.”

## 2

### *Israelitame ipan Judá quitlahuelcajtoque TOTECO*

<sup>1</sup> Huan TOTECO sampa nechcamahui huan nechilhui: <sup>2</sup> “Xiya huan xitlayolmelahuati chicahuac ni tlajtoli ipan calles ipan altepetl Jerusalén para nochima quicaquica. Xiquinilhuiti israelitame: ‘Ya ni tlen niimoTECO niquijtohua: Na niquilnamiqui para huecjajquiya imojuanti tlahuel inquinequiyyayaj innechpaquilismacase queja se ichpocatl quinequi quipaquilismacas nopa telpocatl tlen quicuitoc. Nojquiya niquilnamiqui quejatza innechicneliyyayaj huan innechtoquiliyyayaj ipan nopa huactoc tlali campa ax tleno eli.’ <sup>3</sup> Ipan nopa tonali israelitame eliyayaj tlatzejzeloltique huan tlaiyocatlalilme san para na. Queja se achtohui ejquetl tlen más quiselis tlatiochihualistli tlen itata, israelitame itztoque nopa tlacame tlen más niquinmacatoc tlatiochihualistli tlen sequinoc tlali ehuani. Huan nochim tlen quintlaijiyohuiltyayaj israelitame, niquinitayaya para quihuicayayaj tlajtlacoli huan niquintlatzacuiltyayaya chicahuac. Na niimoTECO nimechilhuía ya ni.”

<sup>4</sup> Xijtlacaquilica tlen TOTECO quiijtohua, nochí imojuanti inisraelita tlacame [2:4 O ichaj Jacob.]. <sup>5</sup> TOTECO quiijtohua: “¿Tlachque tlajtlacoli quipantijque ipan na imohuejcapan tatahua tlen quinchihualti ma nechtlahuelcahuaca? ¿Para tlen tlahuel huejca nechcajque? Yajuanti quinhueyichijke totiotzitzi tlen ax tleno ipati, tlen san tlacame huihuitique quinhueyichihuaj. Huan yeca mohuihuichijke ininseltitzitzi. <sup>6</sup> Yajuanti ax nechtemojque. Ax quiijtojque: ‘¿Canque itztoc TOTECO tlen techquixti ipan tlali Egipto ica cuali huan techyacanqui ipan nopa huactoc tlali campa ax tleno eli? Techyacanqui campa tlatepexico campa ax onca atl huan campa tlahuel tlafiero huan mahuilili. Nopano campa axaca itztoya huan campa axaca pano, techyacanqui huan tipanoque ica cuali.’

<sup>7</sup> “Quena, na niquinhuacac imohuejcapan tatahua nochí nopa ojli hasta niquinclalaqui ipan se tlali tlen tlahuel tlaeliltia para ma quicuaca nochí tlen nopano eli. Pero yajuanti hualajque huan quisoquihuijque notlal ica nochí tlamantli tlajtlacoli. Huan queja nopa quichijke notlal ax tlapajpactic noixpa. <sup>8</sup> Hasta nopa totajtzitzi nojquiya ax mocueso jque nopampa na, niyon ax nechtemojque. Nopa tlamachtiani tlen notlanahuatilhua quichijke queja ax nechixmatiyayaj. Nopa tlayacanani mosisinijke ica na. Huan nopa tiocamanalohuani quihueyichijke nopa teteyotl Baal, huan tlayolmelajque ipan ya itoca tlen tlamantli moilhuíaj para hualas. San motonalpolo jque ica teteyome tlen axaca quinpalehuíaj.

<sup>9</sup> “Yeca na niquixnextis imotlajtlacolhua iniixpa nochí huan nijsenhuiquilis nimechteilhuis. Nimechteilhuis imojuanti, huan imoconehua huan imoixhuihua tlen tlacactiyase teipa pampa innechtlahuelcajtoque queja imohuejcapan tatahua. <sup>10</sup> Xitlachiyaca yahualtic huan xiquitaca intla inquipantise se tlamantli quej ni. Yonque se tlachiyas hasta occidental campa nopa pilatlitzitz tlen mopantíaj ipan hueyi atl o yonque inquititlanise se para yas hasta tlali Cedar, ax oncas niyon se lugar quej ni. <sup>11</sup> Xiquitaca intla onca seyoc tlali campa itlacajhua quinpatlatoque inindios tlen quiixmatiyayaj hasta huejcajquiya ica sequinoc tlen yancuique. Axaca quipatla itotiotzi yonque nopa totiotzitz ax tleno ininpati. Pero notlacajhua nechtlahuelcajtoque na niininDios tlen nieliyaya niininyejca para quinhueyichijque teteyome tlen ax tleno ininpati. <sup>12</sup> Tlen itztoque ipan elhuicactli momajmatijque ipampa ni hueyi tlamantli. Pejque huihuipicaj ica majmajtli quema quiitaque. Queja nopa na, niimoTECO, niquijtohua.

<sup>13</sup> “Notlacajhua quichijtoque ome tlamantli tlen ax cuali. Achtohui nechtlahuelcajque na tlen nitztoc queja atl tlen temaca yolistli. Huan teipa yajuanti mochijchihuilijque piletas tlen ax huelis quitequihuise para quitecase atl pampa cocoyocatoc.

<sup>14</sup> “¿Para tlen inisraelitame inmocueptoque intlatequipanohuani? Quema inquipehualtijque inmochihuaj se hueyi altepetl tlen tlacame, ax intlatequipanohuayayaj. Huajca, ¿para tlen inmechilpise huan inmechhuicase huejca ipan

seyoc tlali para intlatequipanotij san tlapic? <sup>15</sup> Na niquinita miyac soldados tlen hualahuij para quitehuise altepetl Jerusalén. Nanalcatihualahuaj queja leones para quintlamimajcahuase huan quintlamixolehuase nochí nopa altepetini ipan tlali Judá. Nojquiya quintlatise huan ayoc aca mocahuas nopano. <sup>16</sup> Niquila motlalanaj nopa soldados tlen tlali Egipto para quitehuise Jerusalén. Nochi tlen ehua nopalipano ipan altepetl Menfis huan Tafnes hualahuaj para quiixpolihuiltise imohueyitilis huan imochicahualis inisraelitame. <sup>17</sup> Pero nochí ya ni panos pampa innechtlahuelcajque na, niimoTECO Dios, quema nijnequiyaya nimechyacanas huan nimechnextilis noojhui. <sup>18</sup> ¿Tlachque inquitlantoque ica nopa tlajtoli tlen inquisencajque ica nopa egiptome huan nopalipano asirios? <sup>19</sup> Imotlajtlacolhua quichihuas para xijselica tlatzacuiltli. Huan huajca inmomacase cuenta para nelía elqui fiero para inmosisinijque ica na niimoTECO Dios huan innechtlahuelcajque. Imojuanti niyon ax innechimacasque. Queja nopa niquistohua, niimoTECO Tlen Niquinyacana Noelhuicac Ejcahua Ma Tlatlanitij.

### *Israelitame mosisinijke ica TOTECO*

<sup>20</sup> “Huejcajquiya quema intlatequipanohuayayaj ipan tlali Egipto, nimechmaquixti huan nimechcotonili nopa cadenas tlen ica inmechilpiyayaj, pero imojuanti inmosisinijke ica na huan innechhuejcamajcajque. Inquistojque: ‘Ax tijtequipanose TOTECO.’

Huan ax inquinezque innechtlepanitase. Huan ipan nochí tepetini huan tlatzintla tlen sesen cuahuitl inmotlancuaquetzque iniixpa teteyome huan inquinhueyichijque. Initzyoque queja se ahuiñenca sihuatl tlen quicahua ihuehue para itztos ica tlen hueli tlacatl. <sup>21</sup> ¿Para tlen panoc ya ni? ¿Quejatza elqui? Quema nimechchijqui para inelise se altepetl tlen tlacame, njchijqui queja se tlen quitoca se xocomeca mili. Nijtlapejpeni nopa xinachtli tlen más cuajcualtzi. Pero ama inmochijtoque tlacame tlen tlahuel fieroxtique. <sup>22</sup> Huan yonque inmopajpacasquíaj ica xapo tlen nelía cuali, ax quema ixpolihuis nopa mancha tlen imotlajtlacolhua. Pampa inquihuicaj tlajtlacoli tlen ax quema huelis ixpolihuis. Quena, eltos noixpa para nochipa. Queja nopa niquijtohua niDIOS Tlen Más Nijpiya Tlanahuatili. <sup>23</sup> Huajca ¿quejatza huelis inquijtose para ax inmosoquihuijtoque huan ax inquinhueyichijtoque teteyome? Xiyaca huan xiquitatij nochí nopa tlamayamitl campa hueli. Ipan sesen nopa tlamayamitl inquichijtoque tlajtlacoli tlen tlahuel huejhueyi. Initzyoque queja se sihua camello tlen motlalojtinemi campa hueli para quipantis se camello tlen oquichíli. <sup>24</sup> Initzyoque queja se sihua burro tlen nemí cuatitla huan tlainectinemí pampa quimonequilía para quipantis se oquich burro. ¿Ajqueya huelis inmechtzacuilis para amo xijchihuaca tlen hueli? Tlen hueli oquich burro tlen quinequis nopa sihua burro, ax monequi quitemojtinemis, pampa ya iselti yas campa ya itztoc. Queja nopa initzyoque huan queja nopa inquitemohuaj imototiotzitzí.

**25** “¿Para tlen ax inquintlahuelcahuaj nopa totiotzitzí? Pero inisraelitame inquijtohuaj: ‘Amoxisiyahui xicamatí ica tojuanti. Ax tleno hueli tijchihuase pampa tojuanti tlahuél tiquinixtocaj huan tiquinicnelíaj inintotiotzitzí nopa sequinoc tlaltini. Huajca ax hueli tiquintlahuelcahuase.’

*Israelitame quinamiqui quiselise tlatzacuiltonili*

**26** “Queja se tlaxtejquetl mopinahua quema quipantíaj quiichtectoc se tlenijqui, queja nopa nojquiya inmopinahuase inisraelitame. Huan nojquiya mopinahuase nochí israelita tlanahuatiani, tlayacanani, totajtzitzí huan tiocamanalo-huani. **27** Inquiilhuíaj se teteyotl tlen tlachijchihuali ica cuahuitl: ‘Ta tinotata.’ Huan se teteyotl tlen tetl inquiilhuíaj: ‘Ta tinonana.’ Pero quema huala imopani se tlaijiyohuilstli, nimantzi innechtzajtzilíaj na para ma nimechmanahui. **28** Nimechtlajtlani quema huala tlen ohui, ¿para tlen ax inquintzajtzilíaj nopa teteyome tlen imojuanti inquinchijchijtoque para ma inmechmanahuica intla huelij? Imojuanti inquinpiyaj teteyome queja imiyaca nopa altepetini tlen onca ipan ni tlali Judá. **29** ¿Para tlen innechtlijilhuíaj na? Elque imojuanti tlen tlahuél inmosisnijque noixpa. Queja nopa niquijtohua na niD-IOS. **30** Na niquintlatzacuiltonili imoconehua, pero san tlapić pampa ax quinpalehui para moxitlahuase. Quejipa ax quinequij tlatlepanitase. Huan imojuanti inquinmictijtoque imotiocamanalojcahua tlen nimechtitlanili. Inquinchihuilijque queja se león tlen quimictía seyoc tlapiyali para quicuas.

**31** “Ay innotlacaiahua tlen ama initztoque, xijtla-caquilica notlajtol niDIOS. ¿Huelis ax nimechchi-huilijtoc tlen xitlahuac? ¿Innechitaj nieltoc queja se tlali campa ax tleno eli, o se tlali campa san onca tzintlayohuilotl? Huajca, ¿para tlen innot-lacaiahua inquijtohuaj: ‘Tojuanti ayoc tiitztoque imaco TOTECO huan ayoc quema timocuepase ica ya?’ **32** ¿Para tlen queja nopa inquichihuaj ica na? ¿Huelis se ichpocatl quiilcahuas nopa tlen ica moyectlalis quema monamictis? O ¿quiilcahuas canque quitlali iyoyo? Pero ica notlacaiahua, quena. Para miyac xihuitl innechilcajtoque na tlen más niipati para imojuanti.

**33** “Inisraelitame, tlahuel inquiixmatij ica tlachque inquinyoltilanase imomecahua. Hasta nopa ahuiulenca sihuame tlen más tlalnamiquij noja huelij quiyecose miyac tlamatli tlen imojuanti pampa imojuanti más inquimatiij.

**34** Nochi imoyoyo inquisoquihuijtoque ica inieso tlacame tlen teicneltzitz huan tlen ax tleno quichijtoyaj. Inquinmictijque yonque ax inmechixpanoque. **35** Pero yonque inquichijtoque tlen fiero, imojuanti inquijtohuaj: ‘Tojuanti ax tleno tijchijtoque. TOTECO ax huelis cualantos ica tojuanti ica niyon se tlamatli.’ Huan inquijtohuaj: ‘Ax titlajtlacolchijtoque niyon quentzi.’ Huajca pampa inquijtohuaj ax intlajtlacolchijque, nimechteilhuis huan nimechlatzacuiltis chicahuac.

**36** “Imojuanti san innentinemij nica huan neca para campa hueli inquitemojtinemij ajqueyajuanti inmechpalehuise, pero san tlaptic. Nopa tlali Egipto ehuani inmechtlahuelcahuase

huan inmechpinahaultise ihuical queja achtohuiya inmechchihuili que nopa tlali Asiria ehuani. <sup>37</sup> Huan tlen tlali Egipto inhualase ica pinahualistli huan ica imoma ipan imoxayac quema sequinoc inmechyacantiyase ipan seyoc tlali para intlatequipanotij. Pampa niquinhuejcamajcajtoc nopa Egipto ehuani tlen ipan inmotemachiyayaj huan ax cualquias para imojuanti yonque yajuanti inmechpalehuisquíaj.”

### 3

#### *Israelitame tlahuel quiixpanotoque TOTECO*

<sup>1</sup> TOTECO quijtohua: “Onca se tlanahuatili tlen quijtohua intla se tlacatl quicahua isihua huan nopa sihuatl monamictis ihuaya seyoc tlacatl, huajca teipa nopa sihuatl ayoc huelis mosejcotilis ica tlen achtohui ihuehue pampa ya nopa se hueyi tlaixpanoli. Pero yonque inisraelitame tlen ineliyayaj queja nosihua innechtlahuelcajtoque huan inmosejcotilijtoque ica miyac imomecahua, na nimechtlajtlanijtoc miyac huelta para ximocuepaca ica na. Queja nopa niimoTECO niquijtohua.

<sup>2</sup> “Ximotlajtlachilica huan xiquitaca intla inquipantise ipan nochimoojhui se lugar campa ax innechixpanotoque huan inquinhueyichijtoque teteyome. Inquintemohuaj totiotzitzti para inquinhueyichihuase queja se ahuilnenca sihuatl tlen tlali Arabia mosehuía ipan ojtli ipan nopa huactoc tlali huan quitemohua ajqueya ihuaya itztos. Inquichijtoque tlen fiero iixpa teteyome campa huéli huan inquinopolojtoque nochimoojhui.

tlali. <sup>3</sup> Huan yeca ayoc tlaahuetzis quema mon-equi intocase pampa inquichijtoque queja se ahuilnenca sihuatl tlen ax pinahua huan tlahuel innechixpanotoque. <sup>4</sup> Pero yonque inquichihuaj ya nopa, innechilhuijaj: ‘Ta tiTotata. Nochipa timochijtoc titonelhuampo huan titechiyacantoc hasta huejcajquiya. <sup>5</sup> Huajca temachtli ax ticualtos ica tojuanti. Huan nojquiya timotemachíaj para tiquilcahuas totlajtlacolhua.’ Ya nopa inquij-tohuaj pero inquisenhuiquilíaj inquichihuaj tlamantli tlen ax cuali.’

*TOTECO quinilhuía israelitame ma moyolcuepaca*

<sup>6</sup> TOTECO nechnojnotzqui quema tlanahu-atiyaya Josías huan nechilhui:

“¿Tiquitztoc tlachque quichihuaj nopa israelitame ipan tlali Israel ica norte? Queja se ahuilnenca sihuatl ajachica motemactilía ica seyoc tlacatl, queja nopa israelitame quinhueyichijtineneque teteyome ipan campa hueli tepetini huan tlatzintla sesen cuahuitl.

<sup>7</sup> Nimoilhui para teipa quema ya quichijtosquíaj nochí ya nopa, nopa israelitame sampa mocueptosquíaj ica na huan sampa eltosquíaj noaxcahua, pero axtle. Huan iniisraelita icnihua tlen itztoque ipan tlali Judá quiitaque nochí tlen quichijque, pero ax mocuepque ica na.

<sup>8</sup> Yajuanti quiitaque quejatza niqintlahuelcajqui nopa israelitame ipan tlali Israel. Nijchijqui queja se tlacatl tlen moamaxolehua ihuaya isihua tlen momecatía. Pero yonque israelitame ipan tlali Judá quiitaque nochí ya nopa, ax

moyolilhuijque, niyon ax quichihuili que cuenta. Huan ama nopa israelitame ipan tlali Judá nojquiya nechtlahuelcajtoque para quintoquilise totiotzitz. Motemactilijtoque para quinhueyichihuase teteyome queja se sihuatl motemactilía ipan ahuilnencayotl.<sup>9</sup> Israelitame ipan tlali Israel moilhuijque ax tleno quichihuilia intla quinhueyichihuase teteyome tlen tetl huan cuahuitl. Huan yeca nopa tlali mocajqui ijtlacajtoc huan mahuispolojtoc.<sup>10</sup> Pero yonque israelitame ipan tlali Judá quiitaque tlen panoc ica iniicnihua ipan tlali Israel ica norte, ax quichihuili que cuenta. Huan Judá ehuani ax nelia moyolcuepque ica nochí ininyolo, san nechcajcajyajque. Queja nopa niinintECO niquijtohua.”

<sup>11</sup> Huan TOTECO nechilhui: “Huan ama nesi para nopa israelitame ipan tlali Israel ica norte tlen nechtlahuelcajque, quipiyaj pilquentzi tlajtlacoli, pero israelitame tlen tlali Judá ehuani, huejhueyi tlajtlacoli quichijtoque pampa mochijque queja noaxcahua, pero san nechcajcajahuayaya.<sup>12</sup> Huajca ama xiya huan quej ni xiquinylmehahuati nopa israelitame ipan tlali Israel ica norte. Xiquinilhuitij: ‘Intlajtlacolchijca israelitame tlen ayoc innechneltocaj, ximocuepaca ica na, pampa na tlahuel nitetlasoijtla. Ax nicualanis imohuaya para nochipa. Queja nopa niimoTECO niquijtohua.<sup>13</sup> Xijmachilica imiyaca nochí nopa tlajtlacoli tlen inquihuicaj noixpa na niimoTECO Dios huan xinechpohuilica nochí nopa tlajtlacoli tlen inquichijtoque. Xiquijtoca para melahuac innechixpanoque huan inquinhueyichijtoque teteyome

tlatzintla sesen cuahuitl. Nojquiya xinechilhuica xitlahuac queja ax inquinequiyayaj innechtoquilise, niyon ax inquichihuayayaj tlen nimechnahuati xijchihuaca. Quej ni niimoTECO niquijtohua.’”

<sup>14</sup> Huan TOTECO quijito: “Huajca imojuanti, innoconebla tlen inmossisiníaj ximoyolcuepaca, pampa na niimoTeco. Se tlen imojuanti njcuis nica huan ome neca hasta nimechtlamiquixtis tlen nochi tlaltini campa hueli nimechsemantoc.

<sup>15</sup> Huan nimechmacas tlayacanani tlen inmechmocuitlahuise queja na nechyolpactise huan inmechyacanase ica miyac tlalnamiquilistli huan ica cuali.

<sup>16</sup> “Huan quema imotlal sampa temitos ica tlacame, ayoc inmocuesose huan inquiilnamiquise nopa cuali tonali tlen panoque huejcajquiya quema inquipixtoyaj nocaxa, niimoTECO, tlen quipiyayaya notlanahuatilhua. Ayoc inquinequise nopa tonali, niyon ayoc inquiilnamiquise. Huan ax monequis ajqueyajuanti ma sampa quichijchihuase seyoc caxa pampa na noselti niitztos imohuaya.

<sup>17</sup> Huan ipan nopa tonali quitocaxtise altepetl Jerusalén: ‘Altepetl Campa Mosehuía TOTECO Para Tlanahuatis.’ Huan tlacame tlen ehuani nochi tlaltini hualase ipan Jerusalén huan ayoc quichihuase tlen ininfiero yolo quipactía ma quichihuaca.

<sup>18</sup> “Huan ipan nopa tonali nopa tlacame tlen tlali Judá huan tlali Israel mocuepase sentic tlen nopa tlali ica norte campa tlatequiapanohuayayaj. Huan hualase ipan ni tlali tlen na niquinmacac

ininhuejapan tatahua para ma moaxcatica para nochipa.

*Inintlajtlacol israelitame*

**19** “Niquilnamiqui quema nimoilhuiyaya para nelia yejyectzi elis para nimechpixtos queja innoconebla. Nijnequiyaya nimechmacas ni tlali tlen mas cuali huan mas yejyectzi tlen nochil tlapactli. Huan nimochiyayaya ica paquilistli para innechtocaxtisquiaj: Totata. Huan nimoilhuiyaya para ax quema innechtlahuelcahuasquiaj. **20** Pero inisraelitame, inquichijque queja se ahuilnenca sihuatl tlen quicajtehua ihuehue. Innechtlahuelcajque huan inmotemactilijque ica sequinoc dioses. Queja nopa niimoTECO niquijtohua.

**21** “Na nijcajqui tlen chocayayaj huan tzajtziyayaj ipan nopa tepetini campa ax onca cuatini. Eliyayaj israelitame tlen nechilcajtoyaj huan mohuejcaquixtijtoyaj tlen noojhui niininTECO Dios. **22** ¡Ay inisraelitame, innoconebla tlen insentlamique! Xihualaca campa na huan na nimechchicahuas ipan imoyolo tlen quinequij tlajtlacolchihuase. Queja nopa niimoTECO niquijtohua.”

Huan imojuanti inquijtohuaj: “Quena, timocuepase ica ta, pampa ta tiTOTECO. **23** Ya ticuesijque tiquinhueyichihuaj teteyome ipan tepetini huan tlen hueli tijchihuaj iniixpa. Nochi ya nopa san tlapic. Pampa san TOTECO toDios hueli techpalehuis huan techmaquixtis nochil tojuanti tiisraelitame. **24** Hasta quema tieliyayaj ticoneme tojuanti tiquitaque para

tlantiyajque nochí tlen totatahua tequitque para quipiyase. Quinpiyayaj borregojme, huacaxme, telpocame huan ichpocame, pero nochí ya nopa quinpolo que pampa quintlamimacaque nopa totajtzitzi huan teteyome. <sup>25</sup> Huan yeca ama timopantíaj ipan cuesoli huan ipan pinahualistli pampa hasta quema ticonetzitzi titlajtlacolchijque inihuaya totatahua huan timitzixpanotoque TOTECO Dios. Ax quema timitzlepanitztoque queja monequi.”

## 4

<sup>1</sup> Huan TOTECO quijtohua: “Israelitame, intla inquinequij inmocuepase, ximocuepacica na. Xiquintlahuelcahuaca imoteteyohua huan ayoc ximocuapolo ca ipan seyoc ojli. <sup>2</sup> Xitlateshigojquetzaca san ica na notoca, niimoTECO huan xijpiyaca se yolistli tlen cuali, xitlahuac huan tlapajpactic. Quej inelise se tlatiochihualistli para nochí tlaltini ipan tlapactli huan yajuanti hualase Jerusalén huan nechhueyichihuase na.”

### *Soldados hualase para moaxcatise tlali Judá*

<sup>3</sup> TOTECO quej ni quinilhuía nopa tlacame tlen tlali Judá huan tlen altepetl Jerusalén: “Xijyamanilica imoyolo tlen tlahuatl tetique para huelis inquicaquise notlajtol. Pampa intla axtle, elis queja ni tlajtoli huetzis ipan se tlali campa onca huitzli huan ax hueli quipiya itlajca huan inmechpalehuis. <sup>4</sup> InJerusalén huan inJudá ehuani, xijtlapajpacchihuaca imotlalnamiquilis huan imoyolo noixpa na, niimoTECO. Pampa intla

axtle, huajca nohueyi cualancayo inmechtzontlamiltis noch i mojuanti ipampa noch tlen ax cuali inquichijtoque. Nocualancayo eltoc queja se hueyi tlitl tlen axaca huelis quisehuis.

<sup>5</sup> “Xitzajtzilica altepetl Jerusalén huan Judá ehuani, huan xitlayolmelahuaca ica tlapitzali ipan noch nopa tlali. Xiquijtoca: ‘Xicholoca para inmomana huise pampa hualahuij imocualancaitacahua. Ximotlatitij ipan nopa altepetini tlen quinpiya tepamitl tlen quinyahualohuaj.’ <sup>6</sup> Xijtlalanaca se bandera ipan altepetl Jerusalén huan xiquinilhuica: ‘¡Xicholoca, ayoc ximochiyaca! Pampa na, niimoTECO, niquinhuilicas campa imojuanti nopa tlaxolejquetl tlen más fiero. Hualas tlen nopa tlali tlen mocahua ica norte.’ <sup>7</sup> Yajaya tlen hualas tlen nopa tlali nelmosisinía queja se león huan cuali quimati quejatza quinxolehuas tlaltini. Quisqui ipan ilugar huan huala ica noch ichicahualis para quixolehuas imotlal. Huan imoaltepehua mocahuase tlaxolejtos huan tlatzitzicatos. <sup>8</sup> Huajca ama ximotlalilica imoyoyo tlen sosoltic para ma nesi inmocuesohuaj. Huan ximochquilica ipampa nopa tlaijiyohuilistli pampa nohueyi cualancayo niimoTECO ya ajsitihualla ipan imojuanti huan ax inmechcahuas. <sup>9</sup> NiimoTECO niquipijtohua para ipan nopa tonal quema ajsis nocualancayo, nopa tlanahuatijquetl huan nopa tlayacanani huihuipicase ica majmajtli. Huan nopa totajtzitzi huan tiocamanalohuani, majmahuise chicahuac.”

<sup>10</sup> Huajca na niJeremías niquijto: “¡Ay, noTECO

Dios! Nelía teicneltique ni tlacame tlen tlali Judá huan altepetl Jerusalén ehuani pampa eltoc queja san tiquincajcayajqui ica tlen tiquinilhui. Ta tiquintlajtolcahuili tiquinmacas tlasehuilistli, pero ama nopa machete ya eltoc tlacualtlalili para quintzontlamiltis.”

<sup>11</sup> Ya huala se tonali quema TOTECO quinilhuis nopa tlacame ipan Jerusalén: “Se ajacatl tlen totonic hualas campa huactoc tlali. Huan ax elis se pilajacatzi para inmechseselis tlen ajhuiyac inquimachilise o se ajacatl tlen cuali quema inquiaj-comajcahuaj iyol trigo, <sup>12</sup> pero elis se hueyi ajacatl tlen na nijtitlanis. Huan hualas ica nochí ichicahualis para ica nimechtlatjolsencahuas huan nimechtlatzacuiltis.”

*Inincualancaitacahua  
quinyahualose*

*israelitame*

<sup>13</sup> Huan nopa israelitame quiijtohuaj: “Xiquitaca, tocualancaitacahua hualahuij topani queja se hueyi ajacatl tlen tlaxolehua. Inincarros motlalohuaj chicahuac queja se ajcomalacatl, huan inincahuayos motlalohuaj más chicahuac huan ax queja patlani se cuajtli. ¡Nelía titeicneltique pampa ya techxolehuase!”

<sup>14</sup> Huan TOTECO quiijtohuá: “¡Ay inJerusalén ehuani! Ximoyolpajpacaca tlen nochí tlen ax cuali inquichihuaj para noja hueli inmomaquixtise. Ayoc xijpiyaca se imotlalnamiquilis tlen fiero. <sup>15</sup> Pampa hasta nepa ipan tlali Dan huan hasta ipan nopa tepetini tlen tlali Efraín caquisti para nechcatitoc imotlazacuiltylis.

**16** “Xiquinyolmelahuaca inintlacajhua nochí tlaltini tlen mocahuaj nechca huan nojquiya xiquinilhuica Jerusalén ehuani para nopa tlatehuiani ya hualahuij tlen nopa tlaltini tlen mopantíaj huejca. Huan tzajtzitihuahuij para quitehuiquij altepetl Jerusalén huan nochí altepetini tlen tlali Judá. **17** Yajuanti quiyahualoquij altepetl Jerusalén queja elisquíaj tlamocuitlahuiani tlen quinyahualohuaj tlapiyalime ipan se cuatitlamitl para quinmocuitlahuise. Huala inintlatzacuítillis ininpani pampa notlacajhua mosisinijoque ica na. Queja nopa niininTECO niquijtohua.

**18** “Nochi ni tlaijiyohuclistli hualajtoc ipampa imotlajtlacolhua huan pampa inquitoquilijtoque se fiero ojtli huan inquinhueyichijtoque teteyome. Huan ni tlatzacuítlistli elis queja se pajtli tlen tlahuel chichic huan ajsis queja se cuchillo tlen calaquis ipan imoyolo, pero queja nopa quinamiqui.”

### *Jeremías moyolcueso ipampa Judá ehuani*

**19** Nelía nitlaijiyohuía ipan noyolo huan nimomimlohua ica tlacuajcualocayotl. Noyolo huihuitoca chicahuac huan ax hueli nimocahua san queja niitztoc pampa nijcactoc inintlapitzal tocualancaitacahua. Quena, tzajtzitihuahuij nopa tlatehuiani. **20** Niquinita hualahuij tlahuel miyac tlatehuiani ipan ni tlali para quitlamixolehuase, huan teipa hualahuij tlahuel miyac más. Huan quema sampa nitlachiya, niquinita noja más tlen hualahuij. San ipan se tlalochtli mocahuas tlaxolehuali nochí caltini huan nopa yoy-

oncaltini campa tlacame chocaj. <sup>21</sup> ¿Quesqui tonali huejcahuas ya ni? ¿Hasta quema noja niquitas motlalantoc nopa bandera huan noja nijcaquis nopa tlapitzali pampa noja onca tlatehuijcayotl? ¿Hasta quema tlamis ni miquistli?

<sup>22</sup> TOTECO quijito: “Tiquitas ni tlaijiyohuilistli hasta quema notlacajhua quicahuase ininhuihuiyo, pampa yajuanti huihuitique huan ax quinequij nechtlacaquilise. Yajuanti tlahuel tochontique huan ax tleno quimachilíaj. Yajuanti cuali quimatij para quichihuase tlen fiero, pero ax quipiyaj tlalnamiqulistli para quichihuase tlen cuali.”

*Jeremías quiitac nopa tlatzacuiltylistli tlen quiaj-sis Jerusalén*

<sup>23</sup> Na nitlachixqui ipan nochí ni tlali hasta campa hueli, pero nochí mocajqui tlaxolehuali huan cactoc. Huan niquitac elhuicactli huan ax quipiyayaya tlahuili. <sup>24</sup> Nitlachixqui ipan nopa tepetini huan niquitac huihuipicayayaj huan mo-huihuisohuayayaj. <sup>25</sup> Nitlachixqui huan ayoc niq-uitac niyon se tlacatl ipan nochí ni tlali. Huan nochí totome ya cholojtoyaj. <sup>26</sup> Nijtlachili nochí nopa tlamayamitl tlen tlahuel tlaeliltiyayaj, pero mocajque queja huactoc tlali huan nopa altepetini mocajque xolejtoque pampa TOTECO quinmajc-ahua ica ihueyi cualancayo.

<sup>27</sup> Ya ni tlen quijito TOTECO: “Nochi ni tlali mocahuas xolejtoc, pero ax nijtlamixolehuas. <sup>28</sup> Elis queja nochí ni tlali chocas huan elis queja ipan elhuicactli nochí elis yayahuic pampa quipiyas cuesoli ipampa notlacajhua huan ipampa nopa

tlajtoli tlen niquijtojtoc. Niquijtojtoc para niquintlatzacuiltis huan ax nimoyolcuepas ica tlen niquijtojtoc nijchihuas. <sup>29</sup> Quema tlacame tlen itztoque ipan altepetini quicaquise nopa tlahuelpihualistli tlen nopa soldados tlen hualahuij, cholose huan motlatise campa cuatitlamitl huan campa tepetini. Nochi altepetini mocahuase tlatzitzicatoc, pampa nochi tlacame cholojtose ica majmatli.

<sup>30</sup> “Yonque inJerusalén ehuani inmoquentise imoyoyo tlen más cuali huan inmotlalilise nochi tlamantitzi tlen yejeiectzitzi huan inquipase imoixtiyolhua para inquinnotzase nopa soldados tlen hualahuij para inmechtlaosjtlase, san tlaptic. Pampa tlen inquintemohuaj para elise imomecahua inmechcualancaitaj huan mocualtlalíaj para inmechmictise. <sup>31</sup> Na nijcaqui se choquistli queja tzajtzi se sihuatl quema quiipyas iachtohui cone. Pero nopa tzajtzilistli eltoc ininchoquilis notlacajhua. Quiijtohuaj: ‘¡Ay xinechpalehuica pampa ya nechmictise ni temictiani!’ ”

## 5

### *Inintlajtlacolhua Jerusalén huan Judá ehuani*

<sup>1</sup> TOTECO quiijtohu: “Xiyaca ipan nochi calles ipan altepetl Jerusalén huan xijtemoca campa hueli intla inquipantise se tlacatl tlen itztoc xitlahuac huan tlen tlatlepanita. Xijtemoca ipan nochi tianquis, huan intla inquipantise se, huajca

nijtlapojojpolhuis nopa altepetl huan ax nixolehuas. <sup>2</sup> Pampa itztoque miyac tlen nechtestigotlalíaj, pero ax quichihuaj tlen quijtohuaj. San istlacatij huan tlacajcayahuaj ica inintlajtol.”

<sup>3</sup> NoTECO, ta tiqintemohua tlacame tlen temachme. Tiquintlatzacuiltytoc motlacajhua pampa tijnequiyaya ma tlatlepanitaca, pero yajuanti ax quipatlaque ininyolis. Nojquiya tiquinechcapantlalijtoc motlacajhua pero ax quicajtoque inintlajtlacolhua. Quipiyaj ininxayac tetic queja se tetl. Huan yeca ax quinequij moyolcuepase tlen inintlajtlacolhua. <sup>4</sup> Pero teipa na niquijto: Ni tlacame itztoque teicneltique. Monejnemiltíaj fiero pampa tlen más huihuitique. Ax quiixmatij iojhui TOTECO huan tlen xitlahuac huan yeca ax tlatlepanitaj. <sup>5</sup> Huajca ama niyas campa itztoque nopa tlayacanani tlen más huejhueyi huan niquincamahuis pampa yajuanti, quena, quiixmatij iojhui TOTECO huan quimati para nochí tlamatli tlajtlacoli quíhualica tlatzacuiltyli.

Pero san tlapiç pampa yajuanti nojquiya quitlahuelcajtoque ininTECO. <sup>6</sup> Yeca TOTECO quichihuas para leónes tlen itztoque cuatitla huan nopa tepechichime tlen itztoque ipan huactoc tlali ama quintzontlamiltiquij nopa tlacame campa cholojejtoque. Huan nopa huejhueyi tecuanime tlen inintoca leopardos quinyahualojtinemise inialtepueha. Huan queja nopa, ajqueya hueli tlen quisas calixpa tlen nopa altepetini, miquis imaco nopa tlapiyali. Pampa inintlajtlacolhua ni tlacame tlahuel miyac huan tlahuel miyac mosisini-jtoque nohuaya.

<sup>7</sup> TOTECO quijtohua: “¿Quejatza nimechtlapoipolhuis nochí ya ni? Pampa hasta imoconehua nojquiya nechtlahuelcajtoque huan quinhueytlalíaj teteyome tlen ax nelía Dios. Na niquinmacac miyac tlacualistli, pero yajuanti ax motlascamatque. Yajuanti motemactilijque ica ahuilnencayotl. Huan ilhuichijtenenque ipan nochí caltini tlen onca ipan nopa altepetl campa tlen hueli quichihuayayaj ica inintlacayo iniixpa teteyome. <sup>8</sup> Yajuanti itztoque queja cahuayojme tlen tomahuaque tlen quitemojtinemij se yehua. Sesen yajuanti quitoquilijtinemi ihuampo isihua. <sup>9</sup> ¿Huelis ax quinamiqui niquintlatzacuiltis ipampa nochí inintlajtlacol? Quena, quinamiqui niquincuepilis ni tlacame tlen ni tlali ipampa nochí tlen nechchihuilijtoque. <sup>10</sup> Inincualancaitacahua tlejcose ipan inintepa huan quinxolehuase inaltepehua. Quichihuase queja se tlen quixolehuas imacuayohua se xocomeca mili, pero quicahuas se ome tzontli. Queja nopa quichihuas pampa nopa xocomeca mili tlen quinnextia noisraelita tlacajhua ayoc noaxcahua. <sup>11</sup> Nopa tlacame tlen tlali Israel huan Judá tlahuel nechcajcajyajtoque. Queja nopa niininTECO niquijtohua.

### *Tlayolmelahua tlen tlatzacuilitlistli*

<sup>12</sup> “Yajuanti istlacatique tlen na pampa quijtoque: ‘TOTECO ax techtlaijiyohuiltis. Ax hualas topani niyon se tlamantli tlen ax cuali. Ax tijpan-tise mayantli niyon tlatehuijcayotl.’ <sup>13</sup> Nojquiya quijtohuaj: ‘Nopa itiocamanalojcahua TOTECO san quinpactia tlahuelchihuaj, pampa TOTECO ax

quinnojnotztoc. Nopa tlatzacuiltili tlen yajuanti quijtohuaj para hualas topani, huetzis ipan yajuanti. Pero ax huetzis topani.’ Queja nopa quijtohuaj nopa Judá huan Jerusalén ehuani.

<sup>14</sup> “Huajca nimoTECO Tlen Niquinyacana Noelhuicac Ejcahua Ma Tlatlanitij, quej ni nimitzihuía, tiJeremías: ‘Pampa quijtoque ya nopa tlen tiocamanalohuani, na nijtlalis notlajtol ipan mocamac. Huan notlajtol elis queja tlilt huan nopa tlacame elise queja cuahuitl. Huan nopa tlilt quintlamitlatis.’”

<sup>15</sup> Huan TOTECO quijito: “Xiquitaca inisraelitame, na niquinhualicas campa imojuanti miyac tlacame tlen se tlali tlen mopantía huejca. Se tlali tlen tlahuel quipiya chicahualistli huan tlen huejcajquia eltoc. Se tlali tlen ax inquimachilise inintlajtol. <sup>16</sup> Nochi yajuanti tlahuel motemacaj tlatehuise huan quihualicaj tepostli tlen tetzontlamiltia. <sup>17</sup> Yajuanti quicuase nochi tlen inquitoque tlen eltoc para inintlacualis imoconehua, imoborregojhua huan imohuacaxhua. Quicuase imohigos huan itlajca imoxocomeca milhua. Huan nojquiya quintlamixolehuase nopa altepetini tlen moyahualojtoque ica tepamitl tlen ipan inmotemachíaj.

<sup>18</sup> “Pero yonque queja nopa nijchihuas, ax nimechtzontlamiltis nochi inisraelitame. Queja nopa niimoTECO niquijtohua. <sup>19</sup> Huan, Jeremías, quema nopa tlacame mitztlajtlanise: ‘¿Para tlen TOTECO Dios techchihuilá nochi ni tlamantli tlen fiero?’ huajca ta xiquinnanquili quej ni: ‘Imojuanti inquitlahuelcajque TOTECO huan inmotemactilijque ica sequinoc totiotzitzí ipan

imotlal. Huajca ama inquintequipanose sejcoyoc ehuani ipan inintlal.’ ”

**20** “Nojquiya xiquinilhui nopa tlacame tlen tlali Judá huan Israel quej ni: **21** ‘Xijtlacaquilita, intlacame tlen inhuihuitique tlen inquipiyaj imoixtiyolhua, pero ax intlachiyaj. Huan inquipiyaj imonacas, pero ax intlacaquij. **22** Na niimoTECO nimechtlajtlanía: ¿Para tlen ax innechtlepanitaj niyon se pilquentzi? ¿Para tlen ax inhuihuipicaj niyon se quentzi noixpa? Na tlen huejcajquia niquinnextili nochi hueyi atl tlen onca ipan nochi tlaltepactli hasta canque tlamise huan nopano nijtlali xali. Huan hasta ama yajuanti ax hueli quiixpanoj ininnepa yonque tlahuel mosisiniáj o tlahuel mojmoliníaj. Huajca, ¿ax quinamiqui innechimacasise huan innechhueyichihuase?’ **23** Pero axtle, ni tlacame tlahuel yoltetique huan tlahuel mosisiniáj, pampa mohuejcatlalijtoque tlen na huan yajque quinhueyichihuatoj teteyome. **24** Huan niyon quentzi ax moyolilhuijtoque: ‘Ma tiquimacasica TOTECO Dios pampa yajaya tlen techmaca nopa atl quema ipohual titocaj huan tipixcaj huan quichihua ma onca pixquistli.’ **25** Huan pampa inisraelitame ax innechtlepanitaj, nimechquixtilijtoc nopa huejhueyi tlatiochihualistli tlen nimechmacatosquía. Imotlajtlacolhua quichijtoc para ma nimechquixtili nochi tlamatli tlen cuali. **26** Campa notlacajhua, itztoque tlacame tlen fiero ininyolis, tlen tlapijpiyaj ixtacatzi queja se tlapejquetl. Quitlalíaj tlaquetztli para quinmasiltise sequinoc tlacame. **27** Huan queja se caja temitoc ica piy-

ome, queja nopa nojquiya ininchaj temitoc ica tlamantli tlen quiichtectoque. Huan yeca yajuanti mohueyichijtoque huan moricochijtoque. <sup>28</sup> Motomajtoque huan moyejeccchijtoque, huan tlahuels miyac tlamantli tlen fiero quisenhuiquílaj quichihuaj. Ax quintlajtolsencahuaj icnotzitz queja xitlahuac, niyon ax quinpalehuíaj tlen tecneltzitz para ma quiselica tlen quinamiqui. <sup>29</sup> ¿Huelis ax quinamiqui niquinmacuepilis tlacame tlen queja nopa quichihuaj huan niquinmactilis inintlatzacuiltylis? Quena, quinamiqui. Queja nopa niimoTECO niquijtohua.

<sup>30</sup> “Ipan ni tlali panotoc se hueyi tlamantli tlen tlahuels fiero huan temajmati. <sup>31</sup> Nopa tiocamanalohuani istlacatij ica tlen tlayolmelahuaj para panos huan nopa totajtzitz tlanahuatía chicahuac ica san tlen yajuanti inintequivuejcayo. Huan queja nopa quinpactía notlacajhua. Pero ¿tlachque quichihuase quema ajsis nopa tonal tlen tlazacuiltylistli?”

## 6

### *Inincualancaitacahua israelitame quiyahualohuaj Jerusalén*

<sup>1</sup> “¡Ximochololtica iniconehua Benjamín! ¡Xijchihuaca campeca para inmomaquixtise nochí tlen inhuelise! ¡Xquisaca ipan altepetl Jerusalén huan xicholoca! Xijpitzaca tlapitzali ipan altepetl Tecoa huan xijchihuaca pocli para ma quiitaca ipan altepetl Bet Haquerem. Quena, xiquinyolmelahuaca nochí tlacame para hualahuíj miyac soldados tlen nopa tlali tlen mopantía ica norte para quixolehuase

ni tlali. <sup>2</sup> Nijchihuas para ma quixolehuaca altepetl Jerusalén huan itlacajhua yonque tlahuol yejyectzi queja se ichpocatl. <sup>3</sup> Hualase tlamocuitlahuiani tlen imocualancaitacahua tlen mochantise yahualtic tlen nopa altepetl huan moaxcatise. Quitlajcoitase nopa potreros para quintlamacase ininborregojhua. <sup>4</sup> Huan imocualancaitacahua quiijtose: ‘Ximocuallalica para titlatehuise ica tlajcotona. Pero teipa momacase cuenta para ya tiotlac para pehucas se tlatehuijcayotl. <sup>5</sup> Huan nopa tlatehuiani quiijtohuaj: Ma tiyaca tiquintlaxtequilitij ica tlayohua huan ma tixxolehuati inincaltlanahuatil huajca ajachica inmajmahuise.’”

<sup>6</sup> Pampa TOTECO Tlen Quinyacana Ielhuicac Ejcahua Ma Tlatlanitij quej ni quinilhuijtoc: “Xijtzontequica cuatini para ica inquicojcoyonise itepa altepetl Jerusalén para incalaquise. Ya ni nopa altepetl tlen monequi inquitlatzacuiltise ipampa nochi itlajtlacolhua. <sup>7</sup> Queja se ameli ax quema huaqui, queja nopa nojquiya ipan altepetl Jerusalén quisenhuiquiliitoque quichijtinemij tlajtlacoli huan nochi tlamantli tlen ax cuali. Ax tleno tlen cuali caquisti ipan nopa altepetl. San caquisti tlatehuijcayotl huan tlaxtequistli. Mojmostla nijtlachilijtoc inincocolis huan inintlacuajcualol tlen huala tlen itlajtlacolhua. <sup>8</sup> Ximoxitlahuaca, inaltepetl Jerusalén ehuani, para ax nimechtlahuelcahuas huan nimechtzontlamiltis huan nijchihuas imoaltepe queja se huactoc tlali campa axaca itztos.”

*Ya nechca nopa tlatzacuiltyli*

<sup>9</sup> TOTECO Tlen Quinyacana Ielhuicac Ejcahua Ma Tlatlanitij quijjtohua: “Imocualancaitacahua quichihuase queja se tlacatl tlen quitequi xocomecatl itlajca huan quionpahuía quitemohua tlen noja mocajtoc hasta ax mocahuas niyon se. Queja nopa nojquiya quitemose sesen inisraelitame campa inmotlatise hasta axaca mocahuas. Huan ax mocahuas niyon se.”

<sup>10</sup> Huan niJeremías niquijto: “Pero, ¿ajqueya nechtlacaquilis quema niquinolmelahuas tlen nochí tlen panos? Nochi yajuanti quipixtoque inintlacaquilis tzactoc huan ax quinequij nechtlacaquilise. Quema niquinpohuilá motlajtol, TOTECO, yajuanti cualanij. Ax quinpactía, niyon se pilquentzi. <sup>11</sup> Yeca nitemitoc ica mocualancayo. Nelohui para nijpiya noyolo ininhuaya huan ax niquintlatzacuiltylis pampa tlahuel nicualani.”

Huan TOTECO quijto: “Na nijmajcahuas nocualancayo ipan nochí Jerusalén ehuani. Huan nijchihuas ma huetzi ipan coneme tlen mahuiltijtinemij ipan calles, ipan telpocame tlen nemij san sejco para quichihuase tlen ax cuali, ipan tlacame tlen mosihuajtijtoque, ipan sihuame tlen monamictijtoque huan ipan huehuentzitzti. <sup>12</sup> Huan nopa seyoc tlali ehuani moaxcatise ininchajchaj, ininmilhua huan ininsihuajhua, pampa na nimomatlalanás para niquintlatzacuiltylis nochí tlacame tlen itztoque ipan ni tlali. Queja nopa nimoTECO niquijtohua.

<sup>13</sup> “Pampa nochí nopa tlacame queja tlen más pilisiltzitzti hasta tlen huejhueyi, quiixtocaj moaxcatise tlen seyoc iaxca huan quitlaxtequilíaj. Huan

tlen nopa tiocamanalohuani hasta nopa totajtzitzi, nochí tlahuél tlacajcayahuaj. <sup>14</sup> Yajuanti quincajcyahuaj notlacajhua pampa quinilhuíaj para onca tlasehuilistli huan para nochí eltos cuali quema senquistoc oncas tlatehuijcayotl. <sup>15</sup> ¿Huelis mopinahuayaya j notlacajhua quema quinhueyichihuayaya j teteyome? ¡Ax neli! Ax mopinajque niyon se quentzi, niyon ax ixchichili-jque, yeca temachtli huetzise mictoque quema niquintlatzacuiltis. Queja nopa nimoTECO niquijtohua.”

*Quihuejcacajtoque iojhui TOTECO*

<sup>16</sup> Huajca TOTECO quinilhui itlacajhua: “Ximquetzaca campa initztoque huan xitetlajtlanica quejatza elqui nopa ojtli tlen huejcajquiya inquitoquiliyaya j huan sampa xijpantica nopa ojtli tlen cuali o nopa ojtli tlen tlatzejzeloltic tlen inquitoquiliyaya j achtohuiya. Xijtoquilica nopa ojtli tlen cuali huan inquipantise tlasiyajcahuáli para imotonaltzitzi. Pero imojuanti inquijtojque: ‘Ax tijtoquilise nopa ojtli pampa ax techpactía.’ <sup>17</sup> Huajca niquintlali tlamocuitlahuiani ipan nopa altepetl tlen teyolmelahuasquíaj quej ni: ‘Xijtlacaquilise quema molinis nopa tlapitzali pampa ya nopa inmechyolmelahuas para monechcahuía tlatehuijcayotl.’ Pero yajuanti quijtojque: ‘¡Ax tijchihuile cuenta!’

<sup>18</sup> “Huajca nimechilhuía xijtlacaquilica intlacame ipan nopa tlaltini tlen mopantíaj huejca. Xijmachilica tlachque ininpantis notlacajhua ipan altepetl Jerusalén. <sup>19</sup> ¡Xijtlacaquilica intlacame

ipan nochí tlapactli! Na níjhualicas se tlamanli tlen nelía fiero ipan notlacajhua queja quinamiqui ipampa inintlajtlacolhua. Niquintlatzacuiltis pampa ax quinequij quitlacaquilise notlajtol huan quihuejcamajcahuaj notlanahuatil. <sup>20</sup> ¿Para tlen noja innechhualiquiláj nopa copali tlen tlali Sabá huan nochí tlaajhuiyacayotl tlen patiyo tlen inquihualicaj tlen huejca ipan sequinoc tlaltini? Ayoc níjselis imotlacajcahualis tlen inquitlatiyaya noixpa huan tlen ajhuiyac njmatiyaya.”

<sup>21</sup> Huan nojquiya TOTECO quijito: “Xiquitaca, na níjtalis tlazacuiltili ipan iniojhui notlacajhua. Huan nochí sentic motepotlamise. Motepotlamise tetatme, ininconehua, inincalnechcahua huan inihuampoyohua. Nochi huetzise sentic huan tzontlamise.”

<sup>22</sup> Huan nojquiya TOTECO quijito: “Xiquintachilica nopa soldados tlen hualahuij tlen nopa tlali tlen mopantía ica norte. Motlanantoque isolados se hueyi tlali tlen mocahua huejca para inmechtehuiquij. <sup>23</sup> Mocuaultlalijtoque ica inincuahuitolhua huan ica inincuatlaminhua para tlatehuise. Yajuanti quipiyaj ininyolis tlen tlahuel fiero huan ax tetlasojtlaj. Quema ininsoldados nejnentihuahuij cahuajtipa, caquisti chicahuac queja molinía nopa hueyi atl. Tlahuel quinequij inmechtehuiquij inJerusalén ehuani.”

<sup>24</sup> Huan nopa Jerusalén ehuani quijtose se ica seyoc: “Tojuanti tijcactoque para nopa soldados tlen hualahuij techtehuiquij nelía temajmati. Yeca tlahuel timajmahuij huan ayoc tijpiyaj fuerza. Timajmahuij huan titlaijiyohuij queja se sihuatl

tlen ya ajsic hora para conepiyas. <sup>25</sup> Huajca amo xiyaca cuatitla, niyon amo xinejnemica ipan ojtli pampa tocualancaitacahua itztoque campa hueli. Mocualtlalijtoque ica inintepos para techmictise. Yeca onca majmajtli campa hueli.”

<sup>26</sup> ¡Ay inJerusalén ehuani! Ximoquentica imoy-oyo tlen cuesoli huan ximosehuica ipan cuanextli huan ximochquilica queja mictosquía imocone tlen iyojtzli pampa nimantzi hualase soldados campa imojuanti para inmechtzontlamiltise.

<sup>27</sup> Huan TOTECO quijito: “Jeremías nimitztlalijtoc queja se tlacatl tlen quimolonía tepestli para quijitos intla cuali o ax cuali. Xiquinyejyeco notlacaiahua huan xiquintlachili intla cuali tlen quichihuaj huan intla cuali nopa ojtli tlen quihiucaj o axtle.”

<sup>28</sup> TOTECO, nochí yajuanti sentlamique huan tlahuel mitztlaijilhuiáj campa hueli. Nelía yoltetique. Quipiyaj ininyolo tetic queja nopa tepestli bronce huan hierro. Nelía ax cuajcualme. <sup>29</sup> Yonque nopa tepos cilindro tlen quipiya ajacatl tlailpitzasquía chicahuac ipan nopa tepestli, huan nopa tlilti lemenisquía tlahuel para quimolonaltis nopa tepestli tlen ininyolo, san tlapic. Ax onca tlen tlapajpactic ipan ininyolo para tipantise. San onca tlen soquiyó. <sup>30</sup> Cuali niquintocaxtlalis: “Tlacame tlen TOTECO quinmajcajtoc ipan tlasoli queja tepos plata tlen ax tleno ipati.”

## 7

*Jeremías tlayolmelahua ipan tiopamitl*

<sup>1</sup> Sampa TOTECO nechnojnotzqui na, niJeremías, huan nechilhui: <sup>2</sup> “Xiya campa

ipuertajyo notiopa huan xiquinpo huiliti nopa tlacame notlajtol. Xiquinilhuiti ni tlajtol: ‘Intlali Judá ehuaní, xijtlacaquilica itlajtol TOTECO. Quena, xijtlacaquilica imojuanti tlen incalac-toque nica para inquihueyichihuase TOTECO.

<sup>3</sup> Quej ni quijjtohua TOTECO Tlen Quinyacana Iehuicac Ejcahua Ma Tlatlanitij, yajaya tlen Toteco tiisraelitame: Ximonejnemiltica xitlahuac huan xijchihuaca tlen cuali, huan queja nopa, nimechcahuilis initztose ipan imotlal. <sup>4</sup> Ma ax inmechcajcahuase tlen quijjtohuaj para na ax njicahuas ma quixolehuaca altepetl Jerusalén pampa nica eltoc notiopa.

<sup>5</sup> “ ‘San nimechtla sojtlas intla inquicahuase nopa tlalnami quilibistli tlen ax cuali huan nochí imotlajtlacolhua, huan inquinchihiuse tlen xitlahuac nochí sequinoc. <sup>6</sup> Monequi ayoc inquintlajiyohuilitse tlen seyoc tlali ehuaní, huan icnotzitzi huan cahual sihuame. Monequi ayoc intemictise tlen ax tleno quichijtoque huan ayoc inquihueyichihuase teteyome pampa tlahuel inmechchihuila j tlen ax cuali. <sup>7</sup> Intla queja nopa inquichihuase, huajca na nimechcahuilis initztose ipan ni tlali tlen niquinmacac imohuejcapan tatahua para nochipa.

<sup>8</sup> “ ‘¿Inmoilhuíaj ax quema intlajiyohuise pampa nica eltoc notiopa niimoTECO? Amo ximocajcayahuaca ica se istlacayotl. <sup>9</sup> ¿Huelis inmoilhuíaj cuali tlen inquichihuaj? Intlaxtequij, intemictíaj, inmomecatíaj, inistlacatíaj, inquihueyichihuaj nopa teteyotl Baal huan nochí nopa sequinoc teteyome tlen yancuique.

**10** Teipa inhualahuij nica para inmoquetzase noixpa ipan notiopa para innechhueyichihuaj huan inquijtohuaj: Tojuanti timomanahuijtoque tlen tlatzacuiltli. Teipa sampa inyahuij para inquichihuase tlamantli tlen ax cuali. **11** ¿Huelis inmoilhuáj para tlaxtequini hueli mosentilíaj ipan ni tiopamitl tlen quichijque para nechtlepanitase? Na niquitztoc nochi ni tlamantli tlen ax cuali tlen nica inquichihuaj. Queja nopa niimoTECO niquijtohua. **12** Xiyaca ipan Silo, nopa altepetl tlen achtohuiya quipixqui nopa tiopa para nechhueyitlepanitase. Xijtlachilica tlachque nijchihuili nopa lugar ipampa inintlajtlacolhua noisraelita tlacajhua. **13** Huan quema imohuejcapan tatahua quichihuayayaj nochi nopa tlajtlacoli, na nijsenhuiquiliyaya niquinnojnotzayaya para ma moyolcuepaca, pero yajuanti ax nechtlacaquilijque, niyon ax nechnanquilijque.’’

**14** Huajca TOTECO quijtohua: “Na nijxolejqui Silo queja nojquiya nijchihuas ica ni tiopamitl nica tlen inquichijque para ma quihuica notoca. Quena, nijxolehuas ni tiopa tlen ipan inmotemachíaj para inquiselise tlapalehuili huan tlen nimechmacac imojuanti huan imotatahua. Nijchihuas ihuical queja nijchijqui ipan altepetl Silo. **15** Huan nimechtitlanis xitlatequipanotij ipan sequinoc tlaltini queja nijchijqui ica imoisraelita icnihua tlen itztoyaj ica norte ipan tlali Israel [7:15 O campa mocajque iixhuihua Efraín].”

*Tlaixpanotoque israelitame*

<sup>16</sup> “Huajca, ta tiJeremías, ayoc ximomaijto ipampa ni tlacame. Amo xichoca ininpampa, niyon amo xinechtlajtlani ma niquinpalehui pampa ax nimitztlacaquilis. <sup>17</sup> ¿Ax tiquita tlachque fiero quichijtinemij ipan nochí nopa altepetini tlen tlali Judá huan ipan nochí calles tlen altepetl Jerusalén? <sup>18</sup> Nopa coneme quisentilíaj cuahuitl, huan nopa tetatme tlipitzaj para ipan temacase tlacajcahualistli. Ininsihuajhua quixacualohuaj harina huan quichihuaj pantzi para quitencahuilise nopa sihua tlanahuatijquetl tlen elhuicac. Nojquiya quinmacaj tlacajcahualistli tlatoyahuali sequinoc totiotzitzi tlen sequinoc tlaltini para nechcualancamacase. <sup>19</sup> Pero ax na tlen nihuetezis ipan pinahualistli. Eltoc yajuanti tlen más mosoquihuise huan mopinahualtise. <sup>20</sup> Huajca ama njtitlanis nohueyi cualancayo ipan ni lugar. Huan nochí tlacame, tlapiyalime, cuatini huan xihuitl tlamitlatlase ica nocualancayo. Huan nopa tlilt ax sehuis.” Queja nopa quijito TOTECO Tlen Más Quipiya Tlanahuatili.

<sup>21</sup> Huan TOTECO Tlen Quinyacana Ielhuicac Ejcahua Ma Tlatlanitij, yajaya tlen ininTeco israelitame nojquiya quijtohua: “Xijtlalica nopa tlacajcahualistli tlatlatili tlen innechmacaj ica nopa tlacajcahualistli para imototiotzitzi huan xiquincuaca imoseltitzitzi. <sup>22</sup> Pampa ipan nopa tonal quema niquinquixti imohuejcapán tatahua ipan tlali Egipto, ax niquinmacac tlanahuatili tlen tlacajcahualistli o tlapiyalime tlatlatili, <sup>23</sup> pero niquinilhui: ‘Xinechtlacaquilica notlajtol huan na nielis niimoTeco huan imojuanti inelise innotla-

cajhua. Xijchihuaca senquistoc tlen na nimech-nahuatía, huan queja nopa, nochí tlen inquichi-huase, quisas cuali.’ <sup>24</sup> Pero yajuanti ax quine-jque nechtlaquilaque. Huan quisenhuiquilijque quichijque tlen yajuanti quinpactiyaya. Quito-quilijque inintlanamiquilis pampa tlahuel tetic ininyolo huan tlahuel fiero. Huajca yajuanti moicancuepque huan más quichijque tlen ax cuali, huan ax nechtoquilijque. <sup>25</sup> Hasta ipan nopa tonali quema imohuejcapan tatahua quisque ipan tlali Egipto huan hasta ama, na mojmostla nijsen-huiquilijtoc nimechtlanilijtoc notiocamanaloj-cahua. <sup>26</sup> Pero imojuanti ax inquinezque inquint-lacaquilaque. San más inmoyoltetilijque, inmotzon-tetilijque huan inmosisiníaj que imohuejcapan tatahua.

<sup>27</sup> “Huajca, ta tiJeremías, xiquinilhui nochí tlen na nimitzilhuijtoc, pero yajuanti ax mitzt-lacaquilaque. Xiquintzajtzili tlen ininpantis, pero yajuanti ax mitznanquilaque. <sup>28</sup> Huajca xiquinilhui: ‘Imojuanti initztoque tlacame tlen ax in-quinezquij inquitlepanitase TOTECO tlen itztoc imoDios, niyon ax inquinezquij inmoxitlahuase. San inquisenhuiquilíaj inquitoquilíaj nopa ojli tlen ax cuali. <sup>29</sup> ¡Ay inaltepetl Jerusalén ehuani! Initztoque ipan pinahualistli. Ximoximaca huan xijtepehuaca imotzoncal ica cuesoli. Xiyaca xi-mochoquejilica imoseltitzitzi ipan nopa tepetini pampa TOTECO inmechtlahuelcajtoc. Inmech-huejcamajcajtoc nochí imojuanti tlen initztoque ama pampa tlahuel inquicualancamacatoque.’”

<sup>30</sup> Huan TOTECO quiijto: “Nicualantoc pampa nopa tlacame tlen tlali Judá tlajtlacolchijtoque

noixpa, Quintlalijtoque ininteteyohua ipan notiopa campa tlacame nechhueyitlaliyaj huan queja nopa quichijtoque tlahuel ax tlapajpactic noixpa. <sup>31</sup> Nojquiya quicualtlalijque se tlaixpamitl tlen nopa totiotzi Moloc [7:31 O Tofet tlen elqui seyoc itoca Moloc.] ipan nopa tlamayamitl Ben Hinom. Huan nopano quintlatiyayaj inioquichpilhua huan ininsihuapilhua huan quimacayayaj inintotiotzi Moloc queja se tlacajcahualistli tlatlatili. Nelía fiero para quimacase se tlacatl queja se tlacajcahualistli. Axaca niquilhui ma quichihuaca se tlamtli fiero queja nopa, niyon ax quema nimoilhuijtoc para huelis nijchihuas se tlanahuatili queja nopa fiero. <sup>32</sup> Pero ajsis tonali quema nopa tlaixpamitl tlen Moloc huan nopa tlamayamitl tlen itoca Ben Hinom ayoc quintocaxtise queja nopa. Teipa quintocaxtise Tlamayamitl Campa Temictíaj pampa nopano nopa soldados quinmictise tlahuel miyac tlacame. Huan nopano quintlalpachose hasta ayoc oncas lugar campa hueli quintocase. <sup>33</sup> Huan inintlacayo nopa mijcatzitzi mocahuase para quincuase nopa totome huan tecuanime tlen nemij cuatitla. Huan ax mocahuas niyon se tlacatl para quinmajmatis nopa tlapiyalime para ma ax quincuaca. <sup>34</sup> Nijtlamiltis nochí yejyectzi huicatl huan huetzquistli ipan nochí calles tlen altepetl Jerusalén huan ipan nochí altepetini tlen tlali Judá. Nojquiya ayoc caquistis inintos nopa telpocame tlen mocualtlalijtoque para mosihuajtise huan nopa ichpocame tlen mocualtlalijtoque para monamictise, pampa

quixolehuase nochí tlamantli ipan nopa tlali.”

## 8

<sup>1</sup> Huan TOTECO quijtohua: “Ipan nopa tonali nopa tlatehuiani tlen hualahuij quitlapose nochí tlacacahuaya huan ostotl campa quintlalpacho-  
jtoque tlanahtiani huan tlayacanani tlen tlali Judá huan quiqixtise iniomiyohua. Nojquiya quiqixtise iniomiyohua totajtzitzi, tiocamanalo-  
huani huan tlen hueli tlacame tlen itztoyaj ipan Jerusalén huan Judá. <sup>2</sup> Huan quipatlahuase in-  
iomiyohua tlalchi iniixpa tonati, metztli huan sit-  
lalime tlen notlacajhua quinicnelijque huan quin-  
hueyimatque queja elisquíaj dioses. Huan in-  
iomiyohua ayoc quinpejpenase, niyon ayoc quint-  
lalpachose. San quincahuase ma tepejtoca tlalchi  
queja cuitlatl. <sup>3</sup> Huan quema tlamic inintequi  
nopa tlatehuiani, nopa israelitame tlen noja moc-  
ahuase yoltoque ipan ni fiero tlali, quinequise  
miquise para ax yase ipan nopa tlaltini campa  
niqunitlanis para tlatequipanotij. Queja nopa  
niquijtojtoc para panos niimTECO Tlen Niquiny-  
acana Noelhuicac Ejcahua Ma Tlatlanitij.

### *Tlahuel fiero inintlalnamiquilis israelitame*

<sup>4</sup> “Nojquiya Jeremías, xiquinilhui para quej ni niininTECO niquijtohua: ‘Quema se acajya huetzi, nimantzi mehua huan moquetza. Huan quema se acajya mocuapolohua ipan ojtli, sampa mocuepa hasta quipantis nopa ojtli tlen xitlahuac.  
<sup>5</sup> Pero ni tlacame tlen Jerusalén ax tlaneltocaj. Quisenhuiquilíaj quitoquilíaj nopa ojtli tlen ax cuali. Quinequij itztose mocuapolojtoque yonque

ajachica niquinilhuía ma mocuepaca. <sup>6</sup> Na nijcactoc tlachque quijtohuaj ni tlacame, pero ax nijcactoc niyon se tlen mocuesohua ipampa itlajtlacolhua. Axaca moyolcuepa huan quijtohuaj nelía fiero tlen quichijtoc. Nochi motlalotjiyohuij para quichihuatij más tlajtlacoli queja se cahuayo motlalohua para tlatehuiti. <sup>7</sup> Nopa tototl cigüeña quimati quema ajsi tonal para mocuepas itlá pampa tlantoc tlasesecayotl. Nojquiya nopa pichón, huan nopa golondrina huan sequinoc tote me quimati quema mocuepase, pero notlaca jhua ax queja nopa. Yajuanti ax quimati qu ejatza na niininTECO niquintlajtolsencahuas huan niquintlatzacuiltis ipampa inintlajtlacolhua.

<sup>8</sup> “ ‘Huajca, ¿para tlen inquijtohuaj: Tojuanti titlalnamiquij huan tijpiyaj itlanahuatilhua TOTECO? Ax neli inquimati notlanahuatilhua pampa imoistlacatijca tlajcuilojcahua ica inintlajculol quipatlatoque tlen quijtohuaj notlanahuatilhua. Huan ama tlen quijtohuaj nelía se istlacayotl. <sup>9</sup> Pero ipampa inintlajtlacol niquinpinahualtis nopa istlacatica tlajcuilohuani tlen quijtohuaj tlalnamiquini. Niquintemactilis para ma quintlaijiyohuiltica huan ma quinilpica pampa yajuanti quitlahuelcajtoque notlajtol niininTECO. Huajca quimachilise para melahuac ax tlalnamiquij. <sup>10</sup> Yeca nochi ininsihuajhua huan ininmilhua, nijtemactilis ininmaco tlen quintlanise para ma moaxcatica. Pampa nochi yajuanti, yonque pilsiltzitzi o huejhueyi, tiocamanalohuani o totajtzitzi, nochi mojmostla quinequij moaxcatise tlamantli tlen sequinoc iniaxca. Yajuanti tlahuel tlacajcayahuaj. <sup>11</sup> Eltoc

queja notlacajhua quipiyaj se hueyi cocotl, pero nopa tlayacanani san quintlalíaj se pilpajtzi tlen ax tleno ipati. Ya huala tlaijiyohuclistli ipan notlacajhua, pero quinilhuíaj para nochí eltoc cuali huan oncas tlasehuilistli. <sup>12</sup> ¿Huelis mopinahuaj quema quichihuaj tlamantli quej ni? ¡Axtle! Ax pinahuaj niyon se quentzi. Yeca huettzis inintlacayohua ininhuaya nopa sequinoc tlen miquise quema niquintlatzacultis notlacajhua. Queja nopa niimoTECO niquijtohua.’”

<sup>13</sup> Huan TOTECO quijjohua: “Nochi ininxo-comecamil huan ininhigo mil, tlamiixpolihuise. Nochi cuatini tlen temacaj inintlajca, huaquise. Huan nochí tlamantli tlen cuali tlen na nijsenca-jtoya para yajuanti, nimantzi ixpolihuis.”

<sup>14</sup> Huan huajca nopa tlacame quijjose: “¿Para tlen timochiyase para timiquise nica? Más cuali ma tiyaca ipan nopa altepetini tlen moyahualojoque ica tepamitl huan ma timiquica nopano. Pampa TOTECO toDios techtemactilijtoc para ma techmictica. Eltoc queja techmacatoc ma tiquica atl tlen quipiya pajtli tlen temictia pampa tlahuell titlajtlacolchijtoque iixpa. <sup>15</sup> Tojuanti timochiyayaj para tijpiyase tlasehuilistli, pero ax tijpixque. Nojquiya timochiyayaj para timochicahuase tlen campa timococojtoyaj, pero san tijpantijque más tlaijiyohuclistli. <sup>16</sup> Caquisti para ya hualahuij tocualancaitacahua tlen nepa Dan ica norte. Nochi hualahuij ipan cahuayos tlen chicahuac moquijquinohuaj huan yeca ni tlali huihuipica. Monechcahuíaj nopa soldados tlen tlahuell temajmati. Yajuanti quintzontlamiltise nochí tlen quipantise. Quintlamixolehuase

altepetini huan nochí tlamantli nopano huan  
techtzontlamiltise nochí titlacame.”

<sup>17</sup> Huan TOTECO quijito: “Na niquintitlanis  
ni soldados campa imojuanti queja elisquíaj co-  
huame tlen tencocoque tlen ax tleno huelis in-  
quinchihuilise. Yajuanti inmechtzacanise huan  
inmiquise.”

### *Moyolcueso Jeremías ipampa itlacaiahua*

<sup>18</sup> Ax onca pajtli para nimoyoltalis tlen  
notlaijiyohuilis. Tlahuel nechyolcocohua huan  
nimocuesohua. <sup>19</sup> Xijtlacaquilica quejatza chocaj  
notlacajhua ipan nochí nopa tlali. Quiijtohuaj:  
“¿Canque itztoc TOTECO? ¿Axaca ipan altepetl  
Jerusalén? ¿Huelis ya techtlahuelcajqui yajaya  
tlen Totlanahuatijca?” Huan TOTECO quej  
ni quinilhuía: “¿Para tlen innechchijtoque ma  
nicualani ica imoteteyohua huan imototiotzitz  
tlen hualahuij ipan sequinoc tlaltini? ¿Para tlen  
monequi nimechmactilis ininmaco sequinoc para  
inmechtlatzacuiltis?”

<sup>20</sup> Huan nopa tlacame chocaj huan quiijtohuaj:  
“Panoc nopa tonali quema tlatotonía huan ama  
ya panotoc pixquistli huan aya aca hualajtoc para  
techmaquixtis.”

### *Jeremías tlahuel mocuesohua*

<sup>21</sup> Na nichoca ipampa inintlaijiyohuilis notla-  
cajhua. Tlahuel nimomajmatijtoc huan ax hueli  
nijneltoca hasta ax nimolinía. Niitztoc queja se  
nonotzi ipampa nochí nopa tlacuajcualocayotl  
tlen niquita. <sup>22</sup> ¿Ax onca se pajtli ipan tlali Galaad?

¿Ax onca nopano se tepajtijquetl tlen hueli quinpajtis inincocohua notlacajhua? ¿Axaca tlen hueli quinpalehuis notlacajhua?

## 9

<sup>1</sup> Cuali elisquía intla ipan notzonteco mochihuasquía se pila tlen atl para nijpiyasquía noixayo para nichocas noja más. Queja nopa na nichocasquía para nochipa. Quena, nichocasquía tonaya huan tlayohua ipampa notlacajhua tlen mictoque. <sup>2</sup> Cuali elisquía intla nihuelisquía niquincajtehuasquía huan niyasquía niitztoti ipan huactoc tlali ipan se cali para nejnemini. Queja nopa niquinilcahuasquía notlacajhua pampa nochí yajuanti tlahuel momecatíaj huan quichihuaj tlen tlahuel fiero.

<sup>3</sup> TOTECO quijitohua: “Ni tlacame nochipa moilhuíaj quejatza istlacatise. Queja se cuahuitoli quimajcahua cuatlamintli, inincamac quinquixtía senquistoc istlacayotl. Ax quinequij quijitose tlen xitlahuac. Más quichihuaj tlen fiero mojmostla. Huan ayoc nechchihuilá cuenta, niininTECO.

<sup>4</sup> “Se se monequi momocuitlahuis tlen nopa tlacatl tlen itztoc icalnechca pampa ax hueli ipan motemachis. Monequi se se momocuitlahuis tlen iicni pampa ax hueli quineltocas. Amo xiquinpoihuili tlachque mitzpano pampa yajuanti hueli mitzistlacahuise huan mitzijilnamiquise. <sup>5</sup> Se se israelita quimati cuali quejatza tlacajcayahuas huan tetlaijilhuis. Yajuanti senquistoc quichihuaj

tlajtlacoli. <sup>6</sup> Mojmostla quimiyaquilíaj inintlajtla-col huan iniistlacaticayo. Ax quinequij nechixmatisne na.” Queja nopa quiijto TOTECO.

<sup>7</sup> Huajca ama TOTECO Tlen Quinyacana Ielhuicac Ejcahua Ma Tlatlanitij, quej ni quiijtohua: “Na niquinpanoltis ipan se tlaijiyohuclistli tlen elis queja tlitl para niqintlapajpacchihuas. Niquinyejyecos huan niqintlatzejzelolchihuas queja quichihuaj ica nopa tepos plata. ¿Tlachque seyoc tlamantli hueli njchihuas ica notlacajhua? <sup>8</sup> Ica ininnenepil quimajcahuaj istlacayotl tlen tecocohua queja se cuatlamintli. Huan ininhuampo quicamahuíaj ica yejyectzi, pero ipan ininyolo moilhuíaj quejatza quitzontlamiltise seyoc. <sup>9</sup> ¿Huelis ax quinamiqui niqintatzacuiltis ipampa nochi ni tlamantli tlen quichihuaj? ¿Ax quinamiqui nimomacuepas ipampa tlen nechchihuiliitoque ni tlacame tlen ni tlali?” Queja nopa quiijto TOTECO.

<sup>10</sup> “Huan nichocas ipampa nopa tepetini huan nochi nopa cuatitlamitl huan potreros pampa ama nochi quintlatijitoque huan ayoc aca itztoc nopano. Ayoc aqui huacaxme, niyon totome, niyon nopa tecuanime tlen nemij cuatitla pampa nochi cholojque.

<sup>11</sup> “Huan altepetl Jerusalén njchihuas ma eli queja se tlamontomitl tetl. Huan nopano quichihuase iniosto nopa tepechichime. Huan nopa altepetini tlen tlali Judá mocahuase queja se huactoc tlali. Ayoc aca itztos nopano.”

<sup>12</sup> ¿Ajqueya quipyia miyac tlalnamiquistli para quimachilis nochi ya ni tlamantli tlen panotoc? ¿Ajqueya Toteco quinextilijtoc tlen quiijtosnequi

huan huelis innechixtomilise? Ma nechilhuica para tlen ni tlali mocajtoc queja huactoc tlali hasta ayoc aca motemacas nejnemis nica.

<sup>13</sup> Pero TOTECO quijtohua: “Nochi ya ni panoc pampa notlacajhua quitlahuelcajque notlanahuatilhua tlen niquinmacac. Ax quitlepanitaque notlajtol huan ax nejnenque queja niquinilhui. <sup>14</sup> San quichijtinense tlen yajuanti quinpactiyaya huan quinhueyimatque nopa teteyome tlen Baal queja inintatahua quinnextilijque. <sup>15</sup> Yeca na niDIOS Tlen Niquinyacana Noelhuicac Ejcahua Ma Tlatlanitij huan tlen niininTeco israelitame, niquijtohua: ‘Xiquitaca, queja se quinmacas tlacame ma quicuaca se tlamantli tlen chichic, na niquinmacas notlacajhua tlaijyohuclistli huan niquinchihuas ma quiica atl tlen quipiya pajtli tlen temictia. <sup>16</sup> Huan queja se quisemana xinachtli, niquintitlanis campa hueli ipan nochitlapteactli ipan tlaltini tlen yajuanti huan ininhuejcapan tatahua ax quiixmatque. Huan nopano nojquiya quintehuise ica machete hasta quintlamimictise.’”

### *Tlahuel chocase ipan Jerusalén*

<sup>17</sup> Nojquiya TOTECO Tlen Quinyacana Ielhuicac Ejcahua Ma Tlatlanitij quijtohua: “¡Xiquinnotzatij nopa sihuame tlen chocaj quema miqui se acajya! Xiquintemoca yajuanti tlen cuali quimatiq quichihuaj inintequi. <sup>18</sup> Ma hualaca nimantzi huan ma chocaca ipampa israelitame. Ma quisa miyac iniixayo ipan iniixtiyol. <sup>19</sup> Nochi nopa tlacame tlen altepetl Jerusalén chocase ica cuesoli

huan ayoc quimati tlachque quichihuase. Quijijtose: ‘Tlahuel titeicneltique pampa techtlamixolejtoque huan techpinahualtijtoque. Ama monequi tijcajtehuase totlal huan tochaj pampa quitlamixolejtoque.’”

<sup>20</sup> Insihuame tlen inchocaj, xijtlacaquilica itlajtol TOTECO huan xiquinmachtica imoichpocahua huan imocalnechcahua nojquiya ma chocaca. <sup>21</sup> “Miquistli ajsitoc ica noch i chicahualis huan calactoc ipan imochajchaj huan ipan imocaltlanahuatil huan quintzontlamiltijtoc nochi tlacame. Quintzontlamilti coneme tlen mahuiltyayaj ipan calles huan telpocame tlen mosentiliyayaj ipan tianquis. <sup>22</sup> Huan xiquinilhuica ya ni para quej ni niininTECO niqijtohua: ‘Inintlacayohua nopa mijcatzitzi mocahuase tepejtoque queja cuitlatl ipan cuatitlamitl. Eltos queja trigo tlen mocahua campa ya pixcatoque huan ayoc aca quinsentilia. Queja nopa nojquiya axaca quintlalpachos nopa mijcatzitzi.’” Queja nopa quiijtohua TOTECO.

<sup>23</sup> TOTECO quiijtohua: “Tlen tlalnamiqui ma ax mohueyimati ica itlalnamiquilis. Tlen quipiya fuerza ma ax mohueyimati ica ichicahualis. Huan tlen tominpiya ma ax mohueyimati ica itomi. <sup>24</sup> Pero intla se acajya quinequi mohueyimatis, ma mohueyimati pampa cuali nechixmati huan quimati para san na niDIOS. Na nitetlasojtla. Na niitztoc cuali huan nijchihua tlen xitlahuac. Huan quej ni niitztoc pampa queja nopa nechpactia.” Queja nopa TOTECO quiijtohua.

<sup>25</sup> Huan nojquiya TOTECO quiijto: “Ajsis tonali quema ihuical niqintlatzacuiltis

nochi israelitame tlen motequilijtoque nopa machiyotl circuncisión ipan inintlacayo huan nochí tlacame tlen campa hueli tlali tlen ax quichijtoque. <sup>26</sup> Niquintlatzacuiltis egiptome, edomitame, amonitame, moabitame, Arabia ehuani huan nojquiya imojuanti tlen inehuani tlali Judá. Pampa yonque intlacame tlen tlali Judá inmotequilijtoque nopa machiyotl para inquipajpacase imotlacayo, ax inquipajpactoque imoyolo noixpa.”

## 10

*Tlen quinhueyitlalíaj teteyome monequi tlaijyohuise*

<sup>1</sup> Inisraelitame, xijtlacaquilica itlajtol TOTECO. <sup>2</sup> Quej ni yajaya quiijtohua: “Amo xijtoquilica iniojhui nopa tlacame ipan sequinoc tlaltini tlen motemachíaj ipan sitlalime ipan elhuicac para quimatise tlachque ininpantis. Amo xiquinimacasica nopa sitlalime queja sequinoc quichihuaj. <sup>3</sup> Ax tleno ipati tlen yajuanti quichihuaj, san huihuitique. Yajuanti quitzontequij se cuahuitl huan ica quichijchihuaj se teteyotl. <sup>4</sup> Teipa quiyejyecchihuaj itejteno ica plata o ica oro. Teipa quiquetza campa quinequij huan ica se martillo quilavosminaj para ax huetzis tlen ilugar. <sup>5</sup> Huan nopa teteyotl nopano mocahua san moquetztoc xitlahuac queja se tlamajmatijcayotl tlen quiquetztoque ipan mila para quinmajmatis totome. Nopa teteyotl ax hueli camati huan monequi quiuechpanose para quihuicase tlen se lugar hasta sejcoyoc pampa ax hueli nejnemi. Huajca amo xiquinimacasica nopa teteyome pampa ax

tlenó hueli inmechchihuilise. Ax hueli inmechchihuilise tlen fiero, niyon ax hueli inmechchihuilise tlen cuali.”

<sup>6</sup> ¡NoTECO, ax onca seyoc Dios queja ta! Pampa ta nelía tihueyi huan tijpiya nochí chicahualistli.

<sup>7</sup> ¿Ajqueya ax mitzimacasis ta tlen titlanahuatijquetl tlen nochí tlaltini? San ta quinamiqui mitzimacasise pampa ipan nochí tlalnamiquini huan tlanahuatianni tlen itztoque ipan ni tlaltepactli, axaca seyoc queja ta.

<sup>8</sup> Nochi tlacame tlen quinhueyimatij teteyome nelía huihuitique huan ax tleno quimati, pampa se pedazo cuahuitl ax tleno hueli mitznextilis.

<sup>9</sup> Yajuanti nojquiya quihualicaj plata tlen quitejtzontoque tlen tlali Tarsis huan oro tlen tlali Ufaz. Huan quinmacaj nopa teposchihuani para ma quinchichihuaca teteyome. Teipa nopa teteyome quinquentíaj yoyomitl tlen azultic huan moradojtic queja se tlanahuatijquetl tlen quiijtzontoque tlen más quimati yoyonchihuase.

<sup>10</sup> Pero TOTECO, san yajaya nopa Dios tlen melahuac huan tlen itztoc. San yajaya nopa Tlanahuatijquetl tlen itztoc para nochipa. Quema yajaya cualani, nochí tlacame ipan tlaltini huihuipicaj. Quimati ax hueli quijiyohuáj itlatzacuítillis.

<sup>11</sup> Inisraelitame, xiquinilhuica yajuanti tlen quinhueyimatij teteyome: “Nopa teteyome ax nelía dioses huan ax quichichijque ne elhuicactli huan tlaltepactli. Yajuanti tlamiixpolihuise.”

### *Huicatl para quihueyichihuase TOTECO*

<sup>12</sup> Pero tlen tojuanti TOTECO, yajaya, quena, quichichijqui ni tlaltepactli ica ichicahualis.

Huan ica itlalnamiquilis quitlali sesen tlamantli campa monequi. Nojquiya ica itlalnamiquilis quipatlajqui ne elhuicactli. <sup>13</sup> Quema caquisti itos TOTECO, mocojcoxonía nopa atl ipan elhuicac huan tlatomoni. Huan quichihua para ipan ni tlali ma motlalana mixtli. Quititlani nopa tlapetlanilotl ma huala quema quichihua ma huetzi atl. Quiquixtía nopa ajacatl campa quiajcoctoc huan quichihua ma tlaajaca.

<sup>14</sup> Quema tijhuicalotis tlacame ica TOTECO, nochí tlacame san huihuitique huan ax tleno quimachilíaj. Quichihuaj teteyome, pero nopa teteyome quinpinahaultise tlen quinchijchijque. Se istlacayotl para quiijtose nopa teteyome quipiyaj chicahualistli pampa ax quipiyaj yolistli, niyon ax tlaijiyotilanaj. <sup>15</sup> San tlapic nopa totiotzitzí huan teteyome, pampa ax tleno ininpati. Huan ajsis tonali quema TOTECO quinixpolihuiltis. <sup>16</sup> Pero Dios tlen iTeco Jacob [10:16 O Israel.] ax queja se teteyotl. Yajaya nopa Tlachijchijquetl tlen quichijqui nochí tlen onca. Huan yajaya quintlapejpeni israelitame para iaxca. Yajaya itoca TOTECO Tlen Quinyacana Ielhuicac Ejcahua Ma Tlatlanitij.

<sup>17</sup> Huan TOTECO nojquiya quiijtohua: “Xijcualtlalica imotlamantzitzí para inquiitzquise imoojhui pampa nimantzi hualahuij para quiyahualose ni altepetl. <sup>18</sup> Ica se tlalochtli na nimechquixtis tlen ni tlali huan nimechtitlanilis huejhueyi tlaijiyohuilistli. Huan queja nopa inquiyecose nohueyi cualancayo.” Queja nopa quiijtohua TOTECO.

**19** Niteicnelti, pampa nelía temajmati nopa cocotl tlen nijpiya pampa nechcocojqui. Tlahuel nechcocohua huan hueyi notlaijiyohuilis. Nocolis ax quipiya pajtli para caxanis, huajca monequi niquijiyoahuis. **20** Nochaj ixpolijqui huan ax tleno nijpiya para nijsencahuas. Quinhuicaque nocone hua huan ama yajuanti tlamimijque. Ax mocajqui niyon se tlen nechpalehuisquía para sampa nijcualtlalis nochaj tlen yoyomitl huan nijtlalis icortinas. **21** Nopa tlamocuitlahuiani tlen israelitame nelía huihuitique. Ayoc quitemohuaj TOTECO huan yeca ax quisas cuali para yajuanti. Ama nochí ininborregojhua moseman-toque campa hueli. **22** Xijtlacaquilica cuali nopa tlahuelchihualistli tlen hualahuij. Nopa soldados tlen temajmatijque tlen nopa tlali ica norte hualahuij para quinxolehuaquij nochí altepetini tlen ni tlali Judá. Nopa altepetini mocahuase queja se huactoc tlali campa quichihuase iniosto tecuanime.

**23** Jeremías quijtohua: “NoTECO, na nijmati para se tlacatl ax iaxca iyolis, niyon ax yajaya tlen quinahuatis tlen panos ipan iojhui. **24** Yeca xinechtlatzacuilty para ma nimoxitlahuas. Pero noTECO, nimitztlajtlanía amo xinechtlatzacuilty chicahuac. Amo xinechtlatzacuilty ica mocualancayo pampa huelis nimquis. **25** Más cuali xijmajcahua mohueyi cualancayo ipan nopa tlaltini tlen ax mitzixmatij huan tlen ax mitzhueyimatij, pampa yajuanti quitzontlamiltijoque moisraelita tlacajhua huan quichijtoc inintal queja se huactoc tlali.”

## 11

*Quiixpanoque nopa tlajtoli ica TOTECO*

<sup>1</sup> Teipa TOTECO nechnojnotzqui na, niJeremías, huan nechilhui: <sup>2</sup> “Xiquinilnamiquilti nopa tlacame tlen tlali Judá huan altepetl Jerusalén tlen quiijtohua nopa tlajtoli tlen nijchijqui ica ininhuejapan tatahua. <sup>3</sup> Huan xiquinilhui para quej ni niquijtohua, niDios tlen niininTeco israelitame: ¡Tlatelchihuali ma eli nopa tlacatl tlen ax quitlepanitas nopa tlajtoli! <sup>4</sup> Pampa quema niquinquixti ipan tlali Egipto campa tlatequipanohuayayaj san tlapic, niquinilhui: Xijtlacaquilica notlajtol huan xijchihuaca nochí tlen nimechnahuatía. Huan intla queja nopa innechneltocase nochí imojuanti, inelise innoaxcahua huan na nielis niimoTeco Dios. <sup>5</sup> Huan intla innechneltocase, ni jtlamichihuas ica imojuanti tlen niquintlajtolcahuili huan nijchijqui ica imohuejapan tatahua huan nimechmacas para ximocahuaca ipan ni tlali tlen temaca nochí tlamantli tlen cuali, ni tlali campa ipan initztoque hasta ama.”

Huajca na, ni Jeremías, nijnanquili huan niquilhui: “¡Queja nopa ma eli TOTECO!”

<sup>6</sup> Huajca TOTECO nechilhui: “Xiya xitepohuiliti ni tlajtoli ipan nochí calles tlen altepetl Jerusalén huan ipan nochí altepetini tlen tlali Judá. Xiquinilhuiti ni tlajtoli: ‘Xijtlacaquilica tlen quiijtohua nopa tlajtoli ipan nopa tlajtolsencahuiali tlen TOTECO quichijqui ica tohuejapan tatahua huan nochí xijtlamichihuaca. <sup>7</sup> Pampa hasta quema niquinquixti imohuejapan tatahua ipan tlali Egipto huan hasta ama, na nijsenhuiquilitoc

nimechilhuijtihualajtoc inisraelitame para xijtla-caquilica tlen nimechilhuía.<sup>8</sup> Pero imohuejcapan tatahua ax nechtlaquiliijque. Nyon quentzi ax quichijque campeca para nechcaquise. Sesen yajuanti quitoquili nopa ax cuali ojtli tlen quiyol-pactiyaya. Huan pampa ax quinejque nechtlepan-itase, na nijhualicac ininpani nochí nopa hue-jhueyi tlatzacuiltyli tlen na nijtlalijtoya ipan nopa tlajtolsencahuali.”

<sup>9</sup> Teipa TOTECO sampa nechnojnotzqui huan nechilhui: “Nopa tlacame tlen tlali Judá huan altepetl Jerusalén, mosencajtoque san sejco para moyolajcomanase ica na. <sup>10</sup> Yajuanti nojquiya tlajtla-colchihuaj ihuical queja ininhuejcapan tatahua. Ax quinequij quicaquise notlajtol huan quinhueyichihuaj teteyome. Quena, nopa israelitame tlen tlali Israel huan nojquiya tlen tlali Judá quiixpanotoque nopa tlajtoli tlen nijchijqui ininhuaya ininhuejcapan tatahua. <sup>11</sup> Huajca ni-imotECO niquijtohua para ama niquintitlanilis huejhueyi tlaijiyohuclistli huan ax momanahuis niyon se. Huan yonque nechtzajtzilise miyac hueltas para ma niquintlasoxtla, na ax niquintla-caquilis. <sup>12</sup> Huan nochí tlali Judá ehuani huan altepetl Jerusalén ehuani quintzajtzilise ininteteyohua huan quintlatilise copali, pero nopa teteyome ax huelise quinmaquixtise ipan inincuesol huan inintlajiyohuclistli. <sup>13</sup> Pampa inisraelitame tlen tlali Judá, inquinpiyaj miyac totiotzitz queja imiyaca imoaltepehuela. Huan imojuanti ipan altepetl Jerusalén inquintlalijtoque miyac tlaixpamitl tlen se pinahualistli. Inquinpiyaj tlaixpamitl para nopa teteyotl Baal queja imiyaca imocalles huan

nopano inquitlatilíaj copali.

<sup>14</sup> “Huajca, Jeremías, amo ximomaijto ipampa ni tlacame, niyon amo xichoca ininpampa yajuanti. Pampa na ax niquintlacaquilis quema itztose ipan tlaijiyohuclistli huan nechtzajtzilise. <sup>15</sup> ¿Huelis quipiyaj caquihuili notlacajhua tlen niquinicnelía para noja hualase ipan ni tiopamitl quema quichijtoque tlen ax nijnequi niquitas huan quinhueyichijtinentoque teteyome? ¿Moilhuíaj ax niquintlatzacuiltis pampa nechtencahuilijtoque miyac nacatl tlen tlacajcahualistli? ¡Axtle! Ax niquinmacas paquelistli sampa, niyon ax niquincahuilis ma itztoca.

<sup>16</sup> “NiimoTECO niquinitayaya notlacajhua queja se yejyectzi Olivo cuahuitl tlen temaca miyac itlajca. Pero ama niquintlantoc miyac soldados para ma quintlatica hasta mocahuase san cuanextli huan san popocatose. <sup>17</sup> Na, niimoTECO Tlen Niquinyacana Noelhuicac Ejahua Ma Tlatlanitij nijchihuas queja se tlacatl tlen quitoca se Olivo cuahuitl huan teipa tlanahuatis para ma quitlati. Na nijchijqui noisraelita tlacajhua huan ama nitlanahuatijtoc para sequinoc ma quintzontlamiltica. Queja nopa elis pampa notlacajhua tlen tlali Israel huan Judá quintencahuilijtoque copali nopa teteyome tlen Baal huan tlahuel nechcualancamacaque.”

### *Quinequij quimictise Jeremías*

<sup>18</sup> Huan TOTECO nechilhui para nocualancaitacahua quinequiyaj nechchihuilise tlen fiero. Huan nechnextili nochí nopa tlamatli tlen quisencajtoyaj para nechchihuilise. <sup>19</sup> Pero

na niitztoya queja se borrego tlen ax quimati quema quihuicaj para quimictitij, ax nijmatiyaya intla yajuanti quichihuayayaj campeca para nechmictise. Yajuanti quiijtohuayayaj: “Ma tijtzontlamiltica ni tlacatl huan queja nopa ayoc quincamahuis tlacame. Ma tijmictica para ayoc aca quiilnamiquis.”

<sup>20</sup> Pero ta tiTOTEKO Tlen Tiquinyacana Moilhuica Ejahua Ma Tlatlanitij, ta titetlajtolsencahua xitlahuac. Ta tijtlachili ininyolo huan inintlahnamiquilis ni tlacame. Xinechcahuili ma niquita queja tiquintlatzacuiltis ipampa nochi tlen moilhuijtoque nechchihuilise. San ipan ta nimotemachía para tijchihuas tlen xitlahuac.

<sup>21</sup> Huajca TOTEKO quiijo: “Xiquita queja niquintlatzacuiltis nopa tlacame tlen altepetl Anatot tlen quinequij mitzmictise. Yajuanti mitzilhuía: ‘Amo xiquincamahui tlacame tlen TOTEKO para ax timitzmictise.’ <sup>22</sup> Pero ipampa ya nopa, nimoTECO Tlen Niquinyacana Noelhuicac Ejahua Ma Tlatlanitij niquijtohua para miquise inintelpocahua ipan tlatehuijcayotl. Huan inioquichpilhua huan ininsihuapilhua miquise ica mayantli. <sup>23</sup> Huan niyon se tlacatl tlen nopano ax momanahuis. Pampa na nijtitlanis ipan nopa tlacame tlen altepetl Anatot se tlatzacuiltili tlen tlahuel temajmati quema ajsis hora para nitetlatzacuiltis.”

## 12

### *Jeremías quicamahuía TOTEKO*

<sup>1</sup> TOTEKO, ta nochipa tiitztoc tixitlahuac quema niya moixpa para nimitztlajtlanis se tlamantli.

Huajca ama xinechcahuili ma nimitzilhui ni tlamanli tlen nechcuesohua: ¿Para tlen mohueyichi-huaj nopa tlacame tlen fiero ininyolis? Huan ¿para tlen itztoque ica paquilitli nopa tlacame tlen mosisiníaj? <sup>2</sup> Queja se tlen quintoca cuatini tlen nimanzi monelhuayotía, moscaltíaj huan temacaj inintlajca, ta tiquinchijqui nopa tlacame huan tiquintiochijtoc huan quisque cuali. Huan yajuanti quijjtohuaj para mitztlascamatij ica tlen tiquinchihuilijtoc, pero ipan ininyolo ax mitzlnamiquij. <sup>3</sup> Pero ica na ax queja nopa. Pampa ta tiquixmati huan tijyejyecohua noyolo huan ti-jmati para miyac nimitzicnelía. Huajca xiquinhuica ni tlacame queja borregojme tlen quinhuicaj para quinmictitij. Xiquiniyocatlali para ma miquica ipan nopa tonal tlen miquistli.

<sup>4</sup> ¿Hasta quema ayoc elis huactoc ni tlali huan ayoc pilintoc elis nopa sacatl? Ayoc aqui tlapiyalime, niyon totome ipampa nochí tlen fiero ni tlacame quichijtoque. Pero ni tlacame noja quijjtohuaj: “Toteco Dios amo techlatzacultis pampa ax quiita tlen tijchihuaj.”

### *TOTECO quinanquilía Jeremías*

<sup>5</sup> Huajca TOTECO nechnanquili huan nechilhui: “Intla tisiyahui quema timotlalohua ininhuaya tlacame tlen san iniicxipa yohuij, ¿quejatza huelis tiquijiyohuis timotlalos ica tlen cahuatjipa yohuij? Intla campa tlamaya timotepotlamía huan tihuetzi, ¿tlachque tijchihuas quema tiitztos ipan nopa cuatitlamitl nechca atemitl Jordán campa tlahuel tlafiero? <sup>6</sup> Hasta mofamilia

huan moicnihua mochijtoque mocualancaitacahua. Yajuanti quichihuaj campeca para quinyoltilanase nochí nopa tlacame para ma mitzchihuilise tlen fiero. Huajca amo ximotemachi ipan yajuanti, niyon amo xiquinneltoquili inintlajtol yonque mitzcamahuise ica yejyectzi.”

*TOTECO mocuesohua ipampa itlacaiahua*

<sup>7</sup> Teipa TOTECO quiijto: “Na niquintlahuelcajtoc notlacajhua tlen eliyayaj noaxcahua. Huan niquintemactilijtoc ininmaco inincualancaitacahua yonque tlahuel niquinicnelyaya. <sup>8</sup> Pampa notlacajhua tlen niquintlapejpeni, cualanque nohuaya queja se león tlen cualantinemi cuatitla. Huan yeca ama niquinchihuila queja niquincualancaitasquia. <sup>9</sup> Notlacajhua itztoque queja se tototl ica iijhuiyo tlen yejyectzi, pero nopa tzopilome quinequij quicuase. Na niquijtos: Xihualaca tzopilome huan tecuanime tlen nemij cuatitla para ma quicuaquij ininnacayo nopa mijcatzitzi tlen notlacajhua.

<sup>10</sup> “Miyac tlanahtiani tlen sequinoc tlaltini hualase quinenpolose notlacajhua tlen itztoyaj queja noxocomecamil. Ipan moquejquetzque nomil tlen eliyaya nelyejyectzi. Quichihuase queja se huactoc tlali campa ax tleno eli. <sup>11</sup> Quitlamixolehuase nochí huan eltos queja mochoquilía nopa tlali huan mocuesohua pampa axaca moyolilhuiá tlen tlatzacuillistli hualayaya ipan ni tlali. <sup>12</sup> Ipan nochí tepetini hualase soldados tlen tlaxolehuase pampa nopa machete tlen TOTECO quipixtoc imaco, quintzontlamiltis nochí tlacame tlen itztoque ipan nopa tlali.

Huan quintzontlamiltis tlen se lado hasta sejcoyoc huan axaca momanahuis. <sup>13</sup> Eltoc queja notlacajhua quitojque trigo, pero quipixcase huitztl. Tlatequipanojtoque chicahuac, pero san tlapic, pampa ax quieliltise tlen quitojque. San quipantise pinahualistli pampa ihueyi cualancayo TOTECO motlalijtoc ininpani.”

*Tlajtoli para tlaltini nechca Judá*

<sup>14</sup> Huan quej ni quijto TOTECO tlen nochí nopa ax cual tlacame tlen itztoque ipan nopa tlaltini tlen quiyahualohuaj ni tlali tlen TOTECO quinmacac israelitame: “Na nimechquixtis tlen imotlahua ihuical queja nijchihuas ica nopa tlacame tlen tlali Judá. <sup>15</sup> Pero teipa sampa nimocuepas huan nimechtlasojtas nochí imojuanti. Huan sampa nimechhualicas ipan imotlal queja nojquiya niquinhualicas tlali Judá ehuani ipan intital. <sup>16</sup> Huan intla imojuanti nimantzi inquitoquilise nopa ojtlí tlen quitoquilíaj notlacajhua huan innechitase huan innechhueyimatise queja niimoTECO queja inquinextilijque notlacajhua ma quihueyimatise Baal, huajca inquipiyase se cuali lugar tlatlajco notlacajhua huan nochí elis cuali para imojuanti. <sup>17</sup> Pero nopa tlacame tlen nochí tlaltini tlen ax quinequise nechtlepanitase, sampa niquinquixtis huan niquinixpolihuiltis.” Queja nopa quijto TOTECO.

## 13

*Tlanextili tlen nopa tzinquechilpicayotl*

<sup>1</sup> Huan TOTECO nechilhui: “Xiya ximocohuiti se motzinquechilpica tlen tlachijchihuali ica hilo

tlen lino, huan ximotzinquechilpi, pero amo xij-pajpaca nopa tzinquechilpicayotl, niyon amo xij-calaqui ipan atl.” <sup>2</sup> Huajca na nijcohuato nopa tzinquechilpicayotl senquistoc queja TOTECO nechnahuatijtoya huan nimotzinquechilpi. <sup>3</sup> Teipa TOTECO sampa nechcamahui huan nechilhui: <sup>4</sup> “Xjcui nopa motzinquechilpica tlen tijcojqui huan xiya campa nopa atemitl Éufrates huan xijtlati ipan se ostotl ipan nopa tepexitl.”

<sup>5</sup> Huajca na niyajqui campa nopa atemitl Éufrates huan nijtlati nopano senquistoc queja TOTECO nechnahuatijtoya. <sup>6</sup> Teipa quema ya panotoya miyac tonali TOTECO nechilhui: “Xiya sampa ipan nopa atemitl Éufrates huan xijcuiti nopa tzinquechilpicayotl tlen nimitznahuati xijtlatiti nepa.” <sup>7</sup> Huajca na niyajqui campa nopa atemitl Éufrates huan nijquixti nopa tzinquechilpicayotl ipan nopa ostotl campa nijtlatijtoya. Pero niquitac para ya tlamipalantoya huan ayoc huelisquía nijtequihuis ipan niyon se tlamantli. Ayoc tleno ipati eliyaya.

<sup>8</sup> Huajca TOTECO nechnojnotzqui huan nechilhui: <sup>9</sup> “Ya ni quinextía para queja nopa nijxolehuas huan nijtlamiltis ininhueyimatis nopa tlali Judá huan Jerusalén ehuani. <sup>10</sup> Pampa nopa tlacame itztoque ax cualme huan ax quinequij nechtlacaquilise. Quichihuaj senquistoc tlen fiero tlen yajuanti quinpactía huan motlancuaquetzaj iniixta teteyome tlen hualahuij ipan sequinoc tlali huan quinhueyimatij. Huajca yajuanti nojquiya elise queja nopa tzinquechilpicayotl tlen ax tleno ipati. <sup>11</sup> Pampa queja se tlacatl moilpía ica

itzinquechilpica ipan itzinquechtla, queja nopa nojquiya niquinchijqui nopa israelitame ipan tlali Israel huan tlali Judá para ma nechnechcahuica huan ma motlatzquilica ipan na para elise notlacajhua huan para nechhueyitlepanitase. Huan nojquiya para elise queja nohueyitilis huan noyejyejca. Pero yajuanti ax quinejque nechtacaquilise huan mocuapolojque. Queja nopa niimoTECO niquijtohua.

<sup>12</sup> “Huajca xiquinilhui: ‘Quej ni quijtohua TOTECO tlen ininDios israelitame: Nochi imocuetlaxhua temise ica xocomeca atl. Huan yajuanti mitzilhuise: Quena, tojuanti tijmatij para melahuac tocueltaxhua temise ica huino huan tiitztose tiricos.’ <sup>13</sup> Huajca xiquinilhui: ‘Quej ni quijtohua TOTECO: Imojuanti ax inquimachilíaj tlachque quijtosnequi ya nopa. Ya nopa quijtosnequi para na niquinihuintis nochí tlen itztoque ipan nopa tlali. Niquihuintis nopa tlanahuatijquetl tlen mosehuijtoc campa tlanahuatiyaya David, huan nojquiya nopa totajtzitzi, tiocamanalohuani huan nochí nopa tlacame tlen altepetl Jerusalén. <sup>14</sup> Queja se quitacanis se vaso ica seyoc para quinchihuas cuechtic, na njchihuas ica tetatme huan inincone hua. Ax niqintlasojtlas, niyon ax niqintlapojpolhuis. Niyon se tlamantli ax nechtzacuulis para ma ax niqintlatza culti.’” Queja nopa quijito TOTECO.

### *Amo ximohueyimatica*

<sup>15</sup> Israelitame, xijtlacaquilica pampa camatitoc TOTECO. Amo ximohueyimatica. <sup>16</sup> Xijhueyichihuaca imoTECO Dios amantzi quema noja onca tonali. Pero intla ax

inquitlepanitase, yajaya inmechhualiquilis tzintlayohuilotl para ximotepotlamica huan xihuetcica ipan nopa tepetini. Inquitemose tlahuili, pero san inquipantise tzintlayohuilotl. <sup>17</sup> Pero intla ax inquichihuilise cuenta itlajtol TOTECO, nimochoquilis noselti ica cuesoli pampa imojuanti tlahuel inmohueyimati. Chicahuac quisas noixayo ipan noixtiyolhua pampa inmechhuicase imojuanti tlen initlacajhua TOTECO ipan sequinoc tlaltini para intlatequipanotij san tlapic.

### *Tlajtoli para nopa tlanahuatijquetl*

<sup>18</sup> Xiquilhui nopa tlanahuatijquetl huan nopa sihua tlanahuatijquetl: “Xitemoca tlen imosiyas yejyectzi huan ximosehuica tlalchi campa tlaltepoctli pampa nopa yejyectzi corona tlen inquipixtoque nimantzi huetzis tlen imotzontecohua. <sup>19</sup> Nochi nopa altepetini tlen mocahuaj ipan Neguev ica tlani quitzacuase ininpuertas huan axaca huelis calaquis nopano. Pero quinhuicase nochi tlacame tlen tlali Judá ipan sequinoc tlaltini para tlatequipanotij san tlapic.

<sup>20</sup> “Xiquintlachilica nopa soldados tlen hualahuij tlen nopa tlali tlen mocahua ica norte. Inaltepetl Jerusalén ehuani, ¿canque itztoque nopa yejyectzitzi borregojme tlen na nimechmacac para xiquinmocuitlahuica? <sup>21</sup> ¿Quejatza inquimachilise quema nijtlalis queja imotlanahuatijcahua tlen eliyaya imohuampoyohua? Temachtli inmomimilose ica tlacuajcualocayotl queja se sihuatl tlen ajsitoc ihora para quitlacatiltis icone. <sup>22</sup> Huan

huelis timoilhuis: ‘¿Para tlen nechpano nochi ya ni?’ Nochi ya nopa mitzpanos ipampa imotlajtlacolhua. Yeca ama inmechpinahualtise huan inmechtehuise nopa soldados tlen hualahuij.

<sup>23</sup> “¿Hueli mochihuase chipahuaque nopa tlacame tlen tlali Etiopía tlen quipiyaj inincuetlaxo yayahuic? ¿O hueli nopa tigre quiixpolos nopa manchas tlen quipiya ipan iijhuiyo? ¡Axtle! ¡Ax hueli! Queja nopa nojquiya imojuanti tlen ya inmomajtoque intlajtlacolchihuaj ax hueli inquipehualtise para inquichihuase tlen cuali.” <sup>24</sup> Nojquiya TOTECO quijto: “Innechilcajque huan inmotemachijque ipan teteyome tlen ax nelía Dios, yeca ama na nimechsemanas queja trigo itlasolo tlen mosemana ica nopa ajacatl tlen huala tlen campa huactoc tlali. <sup>25</sup> Pampa ya nopa tlen inmechtocarohua. Ya nopa tlen na nijyejyecojtoc para nimechmacas imojuanti. <sup>26</sup> Na noselti nimechpinahualtis queja quema quicuextlalana se sihuatl huan nelía pinahua. Nempa nesis imofiero yolis. <sup>27</sup> Na niquitztoc quejatzainnechtlahuelcajtoque huan innechixpanotoque queja se sihuatl quicahua ihuehue para yas ica seyoc tlacatl. Inquihueyichijtoque teteyome ipan campa hueli mila huan campa hueli tepetini. Inteicnelтиque imojuanti tlen inaltepetyl Jerusalén ehuani. ¿Hasta quema inmotlapajpacchihuase tlen imotlajtlacolhua?”

## 14

*Nopa hueyi tlaahuaquistli*

<sup>1</sup> TOTECO nechnojnotzqui na, niJeremías, huan nechpohuili tlen nopa hueyi tlaahuaquistli huan para tlen ax tlaahuetziyaya. Quijto:

<sup>2</sup> “Xiquila, nochí Judá ehuani chocaj, huan nopa tlanamacani caltzactoque. Nochi tlacame nopal motlancuaquetzaj tlalchi huan nochí altepetl Jerusalén ehuani tzajtzij chicahuac. <sup>3</sup> Nopa tlacame tlen ricos quintitlanij inintlatequipanojcahua campa ameli para ma quicuitij atl, pero quema ajisitoj, ax quipantijque pampa ya tlami-huactoya. Huajca mocuepaj ica pinahualistli huan ica cuesoli pampa nochí ininco cactoc huan ax quimati j tlachque quichihuase. Yeca quitza-cuaj inintzonco ica se yoyomitl para quinextíaj mocuesohuaj. <sup>4</sup> Nopa tlali tlahuuel huactoc huan tlatlapacatoc pampa ayoc tlaahuetzi. Nochi tlacame tlen miltequitij quitzacuaj inintzonco ica cuesoli. <sup>5</sup> Nopa tenan masatl quitlahuelcahua icona pampa ax onca sacatl para quicuas. <sup>6</sup> Huan nopa burrojme tlen nemij ipan cuatitlamitl mo-quetzaj ipan tepetini campa tlahuactoc huan qui-ijiyotilanaj ajacatl queja nopa tepechichime. Íni-ixtiyol hasta quincocohua pampa quitemojtine-mij xihuitl para quicuase, pero ax quipantíaj.”

*Jeremías quinotza TOTECO ipampa nopa israelitame*

<sup>7</sup> TOTECO, nelía titlajtlacolchijitoque miyac huan tlen tijchijitoque techteilhuía moixpa, pero timitzt-lajtlaníaj xitechpalehui para axaca mitzmahuis-polos ipampa tlen fiero tijchijitoque. Tlahuel titlajtlacolchijitoque ica ta. <sup>8</sup> ¡Ay tiTOTECO! Ipan ta tiisraelitame timotemachíaj. Ta titotlamanahuijca

quema tiitztoque ipan laohuijcayotl. ¿Para tlen titechchihuilá queja amo titechixmati? Timochihua queja se tisejcoyoc ejquetl ipan ni tlali o queja se tinejnenquetl tlen mocahua san para se yohuali nica tohuaya. <sup>9</sup> ¿Huelis nojquiya acajya mitzmajmati ta huan ax tijmati tlachque tijchihuas? Ta tijpiya miyac chicahualistli, ¿ax huelis titechmaquixtis? TOTECO, ta tiitztoc tlatlajco tojuanti huan nochí quimati para tojuanti timoaxcahua huan timitzhueyimati. Huajca TOTECO, amo xitechtlahuelcahua.

<sup>10</sup> Ya ni tlen TOTECO quijtohua tlen nopa tlacame: “Quinپacti Judá ehuani para mohuejcatlalise tlen na. Ayoc quitoquiláj noojhui huan ayoc nimechselis queja notlacajhua. Yeca ax nechpactía tlen quichihuaj. Huajca san niquilnam quis nochí tlamantli tlen ax cuali tlen yajuanti quichijtoque huan niquintlatzacuiltis ipampa inintlajtlacolhua.”

<sup>11</sup> Teipa TOTECO sampa nechilhui: “Amo xinechtlajtlani ma niquinpalehui ni tlacame. Amo ximomaijto ininpampa yajuanti. <sup>12</sup> Quema mosahuase noixpa, na ax nijchihuilis cuenta. Huan quema yajuanti nechhualiquilise tlacajcahualistli tlatlatili huan ofrendas, ax nijselis. San niquintzontlamiltis ica tlatehuijcayotl, mayantli huan huejhueyi cocolistli.”

<sup>13</sup> Huajca na niquijto: “¡Ay TOTECO Tlen Más Tijpiya Tlanahuatili! Inintiocamanalojcahua ni tlacame quinilhuíaj para nochí eltos cuali. Quinilhuíaj para ax oncas tlatehuijcayotl, niyon

mayantli. Tlayolmelahuaj para tiquintitlanilis tlasehuilistli tlen huejahuas.”

<sup>14</sup> Huan TOTECO nechilhui: “Nopa tiocamanalo-huani san tlayolmelahuaj istlacayotl huan quijj-tohua ya nopa niquipijtojtoc. Ax niqquintlantoc, niyon ax niquinmacac nopa tlajtoli tlen quijj-tohua j huala tlen na. Ax niquinilhuijtoc niyon se tlajtoli. Tepohuiláj tlen tlanextili tlen ax quiitz-toque, niyon ax quicactoque. Tepohuiláj hui-huiyotl tlen san yajuanti quiqxintíaj ipan ininyolo.” <sup>15</sup> Huan nojquiya ama TOTECO quijijo: “Huajca niqquintlatzacuultis nopa istlacatica tio-camanalohuani tlen tlayolmelahuaj para hualas tlamantli tlen san se istlacayotl. Camatij queja niqquintequimacatoya, pero ax niqquintlantoc. Quijtohuaj para ax oncas tlatehuijcayotl, niyon mayantli. Huajca nopa tiocamanalohuani ininseltitzitzi miquise ipan tlatehuijcayotl huan ica mayantli. <sup>16</sup> Huan nopa tlacame tlen nopa tiocamanalohuani quinyolmelajtoque, inintlacayohua quintepehuase ipan nopa calles tlen altepetl Jerusalén pampa miquise ica mayantli huan ipan tlatehuijcayotl. Huan axaca itztos para quint-lalpachos. Ininsihuajhua, inintelpocahua huan iniichpocahua tlamiixpolihuise, pampa nijtitlanis ipan yajuanti se hueyi tlatzacuultili ipampa inint-lajtlacolhua.

<sup>17</sup> “Huajca, Jeremías, ama xiquinilhui notlaca-jhua quej ni: ‘Tlahuel nichocas tlayohua huan tonaya quema ajsis imotlatzacuultil. Ax huelis nimoyoltalis pampa notlacajhua ya quintzont-lamiltjtose ica machete huan tepejtose tlalchi. <sup>18</sup> Quema niyas cuatitla, nopano nojquiya niqui-

tas tepejtoc inintlacayo tlen quintzontlamiltijque ica machete. Huan quema niyas ipan icalles nopa altepetl, nopano niquitas tlacame tlen miquij ica mayantli huan cocolistli. Huan nopa tiocamanalohuani huan totajtzitzi yahuij campa hueli ipan nopa tlali huan teihuiáj para nochí eltos cuali, pero ax quimatiq tlen quichihuaj.””

*Jeremías momaijtohua ipampa israelitame*

**19** ¡TOTECO! ¿Tiquintlahuelcajqui nochí tlacame ipan tlali Judá? ¿Tijcualancaita altepetl Jerusalén? ¿Para tlen techcocojtoc hasta ax onca pajtli? Tojuanti timoilhuiyayaj para hualas tlasehuilistli huan para ama, quena, TOTECO techchicahuas huan techpajtis campa ticocojtoque. Pero ama campa hueli onca tlaijiyohuclistli huan majmajtli. **20** TOTECO, tojuanti tijmatij para melahuac tlahuel titlajtlacolchijtoque ica ta huan tohuejcapán tatahua nojquiya mitzixpanotoque **21** TOTECO, amo xitechtlahuelcahua pampa intla ya nopa tijchihuas nochí mitztlaijilhuise huan ayoc mitzlepanitase, niyon quitlepanitase nopa siya campa titlanahuatía. Amo xitechilcahua. Amo xijxolehua nopa tlajtoli tlen tijchijqui tohuaya para titechtiyochihuas. **22** Tlen nochí teteyome tlen quinhueyichihuaj ipan nochí tlaltini, niyon se hueli quichihuas ma tlaahuetzi. ¡Niyon se! Axaca hueli quitlalis atl ipan mixtli para ma huetezi, pampa axaca seyoc Dios. San ta tiTOTECO huan toDios. Huan tojuanti timotemachijtoque ipan ta pampa ta tihueli tijchihua ni tlamantli.

## 15

*Tlayolmelahualistli tlen nopa tlatzacuiltli*

<sup>1</sup> Huan TOTECO nechilhui: “Yonque Moisés huan Samuel hualasquíaj huan moquetzasquíaj noixpa para nechtlatjlanise ipampa ni tlacame, ax niquinpalehuisquia. ¡Xiquinquixti ni tlacame noixpa! ¡Ma quisaca! <sup>2</sup> Huan intla israelitame mitzilhuise: ‘¿Canque tiyase?’, huajca xiquinlhui para quej ni niininTECO niquijtohua: ‘Tlen niquintlalijtoc para miquise ica cocolistli, ma miquica ica cocolistli. Tlen niquintlalijtoc para miquise ipan tlatehuijcayotl, ma miquica ipan tlatehuijcayotl. Tlen niquintlalijtoc para miquise ica mayantli, ma miquica ica mayantli huan tlen niquintlalijtoc para quinhuicase ipan sequinoc tlaltini para tlatequipanotij san tlapic, ma quinhuicaca ipan sequinoc tlaltini.’ <sup>3</sup> Pampa ya nisencajqui para niquintitlanilis nahui tlamantli tlen fiero para niquintlatzacuiltis; niquintitlanilis nopa machete tlen temictía, chichime tlen qui-huatanise inintlacayohua nopa mijcatzitz para quinhuejhuelose; tzopilome para quincuase huan tecuanime tlen quitlamiltise tlen noja mocahuaj tlen inintlacayohua. <sup>4</sup> Niquintlatzacuiltis nochí notlacajhua chicahuac ipampa nochí nopa tlajtacoli tlen Manasés, icono Ezequías, quichijqui ipan altepetl Jerusalén quema yajaya elqui tlanahuati-jquetl ipan tlali Judá. Huan tlahuel momajmatise nochí tlacame tlen nochí tlaltini ipan tlaltepactli tlen quitlachilise tlen niquinchihuilijtoc notlaca-jhua.

<sup>5</sup> “Axaca inmechtla sojtlas, inaltepetl Jerusalén ehuani. Axaca chocas imopampa imojuanti quema hualas imotlao huij cayo. Axaca tlatzintocas imopampa imojuanti para quimatis quejatza initztoque. <sup>6</sup> Imojuanti innechtlahuelcajtoque huan innechcajque ica imoica. Huajca ama na nimomatlalanas para nimechtzontlamiltis. Nimitzmacatoc miyac tonali para ximoyolcuepaca hasta ya nisiyajqui. Pero ax inmoyolcueptoque. Queja nopa niquijtohua ni-imTECO. <sup>7</sup> Na nimechquixtili ipan ininpuertas imoaltepehua huan nimechmajcajtoc ipan ajacatl queja se tlen quitzejzelohua trigo quimajcahua itlasolo ajacatipa. Nimechquixtilis noch i tlen inquipyaj yonque tlahuel miyac ipati. Nimechtzontlamiltis noch i innotlacajhua pampa ax inquinezquiyayaj inquicahuase nopa yolistli tlen fiero para inmocuepase ica na. <sup>8</sup> Oncas más miyac cahual sihuame ipan imotlal que xali tlen onca iteno hueyi atl. Teipa nijchihuas ma miquica nopa telpocame quema más quipyaj fuerza inihuaya ininnanahua nojquiya. Ica se tlalochtli nijchihuas ma huala ipan nopa altepetl cuesoli huan majmajtli. <sup>9</sup> Se sihuatl tlen quinpiyayaya chicome iconehua tlapolos pampa quimictilijque noch i conejhua. Elis queja tlamic iyolis quema aya ajsi ihora. Huan nopa tenantzi mopinahuas pampa elis queja ax quema quinpixtosquía iconehua pampa noch i conejhua quinmictise. Queja nopa niinTECO niquijtohua.”

**10** ¡Nelía niteicnelti! ¡Mamá, más cuali nimictosquía quema nitlacatqui! Campa hueli niya nochí nechcualancaitaj. Na axaca nechtlahuiquilía, niyon na axaca nijtlahuiquilía, pero nochí nechtelchihuaj. **11** TOTECO, intla ax nijchijtoc tlen cuali moixpa, ma quisá melahuac tlen quiijtojtoque nopa tlacame tlen nechtelchihuaj. Hasta nimomaijtojtoc moixpa ipampa nocualancaitacahua quema onca cuesoli huan tlaohuijcayotl.

*TOTECO quintlatzacultis israelitame*

**12** “Axaca huelis quipostequis nopa tepestli híerro huan nopa tepestli bronce tlen huala tlen norte. **13** Queja nopa nojquiya ica israelitame. Ininyolo tetic queja tepestli. Yeca ama nochí ininricojo huan nochí tlen quipixtoque niquinmac-tilis inincualancaitacahua ipampa nochí nopa tlajtlacoli tlen quichijtoque. **14** Huan nijchi-huas inincualancaitacahua ma quinhuicase para tlatequipanotij ipan se tlali tlen ax quiixmatij huan campa ax quema itztoyaj, pampa tlahuel nicualani. Huan nocualancayo eltoc queja se tlilt tlen temachtli quintlamitlatis.”

*Jeremías quinanquili TOTECO*

**15** TOTECO, xinechilnamiqui huan xinech-palehui. Xiquinmacuepili nocualancaitacahua nopampa na. Amo xiquincahuili ma nechmictica. Ta tijmati para na nitlaijiyohuía pampa nimitzicnelía. **16** Quema ta tinechcamahui, nijcajqui motlajtol huan nijseli. Huan motlajtol nechmacac fuerza queja elisquía se tlacualistli para notonal. Tlahuel nipaqui pampa motlajtol

nechmacac paquilibrium ipan noyolo pampa na nimoaxca, ta tiTOTECO Tlen Tiquinyacana Moelhuicac Ejcahua Ma Tlatlanitij. <sup>17</sup> Na ax quema nimosehuijtoc inihuaya nopa fiero tlacame tlen tehuetzquiláj huan san moilhuíaj quichihuase tlen fiero. Pampa ta tinechnojnotzayaya, na nimocajtoc noselti huan tlahuatl nicualanqui inihuaya nopa tlacame ipampa inintlajtlacolhua. <sup>18</sup> ¿Para tlen noja nitlaijiyohuía? ¿Para tlen ax hueli pachihuis nococohua? ¿Huelis ax quema tlamis nechcocese? Motlapalehuil eltoc queja se atlajtli tlen quemantzi quihiya miyac atl huan quemantzi mopantía huactoc.

### *TOTECO quinanquili Jeremías*

<sup>19</sup> Huajca TOTECO nechnanquili huan nechilhui: “Intla timocuepas ica na, nimitzchicahuas para huelis tinechtequipanos. Intla ayoc ticamatís tlen ax tleno ipati, pero ticamatís notlajtol tlen hueyi ipati, noja tielis tinotlayolmelajca. Huan israelitame mocuepase ica ta. Ax monequi para ta tiyas campa yajuanti. <sup>20</sup> Na nimitzchihuas queja se tepamitl tlen bronce tlen tetic huan ohui para ajqueya quicoyonis. Tlacame mitzehuise, pero ax mitztlanise pampa na niitztoc mohuaya para nimitzmocuitlahuis huan nimitzmanahuis, queja nopa nimoTECO niquijtohua. <sup>21</sup> Na nimitzmanahuis tlen nopa fiero tlacame tlen tlahuatl mosisiníaj. Nimitzmaquixtis yonque tiitztos ininmaco.”

**16**

*TOTECO quitequihui Jeremías queja se tlanextili*

<sup>1</sup> Teipa TOTECO sampa nechnojnotzqui huan nechilhui: <sup>2</sup> “Jeremías, ta ax hueli timosihuajtis, niyon ax hueli tiquinpiyas mocone hua ipan ni lugar. <sup>3</sup> NimoTECO nimitzilhuis ya ni tlen nijtlalijtoc para ininpantis nopa coneme tlen tlacatise ipan ni altepetl ihuaya nochí ininnanahua huan inintatahua. <sup>4</sup> Nochi miquise. Sequin miquise ica huejhueyi cocolistli tlen tlahuel quincocos. Huan axaca mocahuas para chocas ininpampa yajuanti, niyon axaca quintlalpachos. Inintlacayohua mocahuase tepejtoque tlalchi queja cuitlatl para ma lochonica. Sequinoc miquise ipan tlatehuijcayotl huan ica mayantli. Huan inintlacayohua quincocototzase nopa tzopilome huan tecuanime.

<sup>5</sup> “Pero ta amo xicalaquí ipan se cali campa qui-choquilíaj se tlen mijqui, niyon amo ximocueso ininpampa yajuanti, niyon amo xiquinyolchicahua. Pampa na ayoc niquinmanahuis, niyon niquinmacas notlasehuilis. Huan nojquiya ya niquinquixtilijtoc noteicnelijcayo huan notlasojtlacayo. Queja nopa nimoTECO niquijtohua. <sup>6</sup> Queja tlen huejhueyi huan tlen pilsiltzitzi miquise ipan ni tlali, huan axaca quintlalpachos, niyon axaca quinchoquilis. Inihuampoyohua ax mococose ipan inintlacayo, niyon axaca moximas queja momajtoque quichihuaj para quinextise mocuesohuaj. <sup>7</sup> Axaca quihuicas tlacualistli para quinyoltlalise tlen mocajtose yoltoque, yonque mijqui ininnana o inintata. Niyon axaca quintitlanilis se quentzi xocomeca atl para quinyolchicahuas.

<sup>8</sup> “Huajca Jeremías, amo xiya ipan nopa pililhuitzitz tlen quichihuaj pampa quimatiij huala tlen ohui. Amo ximosehui ininhuaya para titlacuas o titlais. <sup>9</sup> Pampa na, nimoTECO Tlen Niquinyacana Noelhuicac Ejcahua Ma Tlatlanitij huan na tlen niininDios israelitame niquistohua: Xiquita, ipan moyolis na njtlamiltis campa imojuanti noch i huetzquistli tlen onca ipan ni tlali huan noch i yejyectzi huicatl. Ayoc aca quicaquis itos se mosihuajtijquetl, niyon ax quicaquise nopa ichpocatl tlen quichiya para yas ihuaya ipan se nemamictili.

<sup>10</sup> “Quema tiquinyolmelahuas israelitame tlen noch i tlamatli, yajuanti mitztlajtlanise quej ni: ‘¿Para tlen TOTECO techyolmelahuas para techtitlanilis ni huejhueyi tlaijiyohuclistli? ¿Tlachque tlamatli tlen ax cuali tijchijtoque? ¿Tlachque tlajtlacoli tijpiyaj iixpa TOTECO Dios?’ <sup>11</sup> Huajca ta xiquinilhui para niininTECO njchijtoc pampa inintatahua nechtlahuelcajque huan quinhueyichijque totiotzitz tlen sequinoc tlaltini. Nojquiya quintequipanojque huan motlancuaquetzque inixpa. Huan yajuanti nechelcajque huan ax quitlepanitaque notlanahuatilhua. <sup>12</sup> Huan imojuanti noja más fiero inquichijtoque que imohuejcapan tatahua. Nelía inyoltetique huan intochontique. Inquichihuaj tlen hueli imoyolo tlen fiero quinequi quichihuas. Ax inquinequij innechtlaquilise. <sup>13</sup> Huajca nimechquixtis tlen ni tlali huan nimechtitlanis ipan seyoc tlali campa ax quema initztoyaj imojuanti, niyon imotatahua. Huan nopano inquinhueyimatise teteyome

tlayohua huan tonaya queja inquinequij huan na ayoc nimechtlasojtlas niyon nimechpalehuis. Queja nopa xiquinilhuiti.

<sup>14</sup> “Pero ajsis tonali quema tlacame tlen tlatestigoquetzaj ayoc quiijtose: ‘Nijtestigoquetza TOTECO tlen quinquixti israelitame ipan tlali Egipto’, <sup>15</sup> pero quiijtose: ‘Nijtestigoquetza TOTECO tlen quinquixti israelitame ipan nopa tlali ica norte huan ipan nochis sequinoc tlaltini campa quintitlantoya huan sampa quinhualicac ipan inintlal tlen quinmacac inintatahua.’

<sup>16</sup> “Pero ama xiquitaca, na niquntitlanis miyac tlacame para ma quinitzquica israelitame tlen campa motlatijtoque. Huan niquntitlanis miyac tlapehuani para ma quintepotztocaca campa motlatijtoque ipan tepexitl para cholose tlen nopa tlatzacuiltli tlen hualas. <sup>17</sup> Pampa na nijtlachilitjtoc nochis tlen yajuanti quichihuaj huan niqitztoc nochis inintlajtlacolhua. Ax hueli quitlatise tlen ax cuali quichihuaj tlen noixtiyol. <sup>18</sup> Huan niquntlatzacuiltis ome huelta imiyaca ipampa nochis imotlajtlacolhua pampa quisoquihuijtoque notlal ica ininteteyohua tlen na niquinijiya huan quitemitijoque ica inintlajtlacolhua.”

### *Jeremías camati*

<sup>19</sup> TOTECO, ta tinochicahualis huan tinotlamanhuijca. Tinechpalehuía quema nimopantía ipan tlaijiyohuclistli. Hualase tlacame tlen miyac tlaltini huan quiijtose: “Totatahua elque tlahuel huihuitique pampa quinhueyichijque teteyome

tlen ax tleno ininpati. <sup>20</sup> Tlacame ax hueli mochijchihuise dioses para quinhueyichihuase yajuanti, pampa nopa tlamtli tlen quichihuaj ax nelía Dios.”

<sup>21</sup> Huan TOTECO quiijo: “Yeca niquinnextilis noyajatil huan nochicahualis, huan queja nopa quimatise para san na niDIOS.

## 17

### *Inintlajtlacol tlali Judá ehuani*

<sup>1</sup> “Tlacame tlen tlali Judá ajachica tlajtlacolchihuaj. Huan inintlajtlacol eltoc queja se tlanahuatili tlen monequi quichihuase huan yeca quinijcuilojtoque ica cincel ipan ininyolo para ax quiilcahuase quichihuase. Eltoc queja ijcuilijtoc nopa tlajtlacoli tlen quichihuase campa hueli hasta ipan icuacua nopa tlaixpamitl. <sup>2</sup> Imoconehua ax quilcahuase tlajtlacolchihuase. Yajuanti monechcahuíaj ipan sesen tlaixpamitl para quinhueyichihuase teteyome huan quinechcahuíaj sesen cuahuitl tlen inquietztoque ica nopa tlaixcopincayotl para nopa fiero totiotzi, Asera, tlen mopantía campa hueli ipan tepetini huan tlamatayamitl.

<sup>3</sup> Huajca nochí imoricojyo niquinmactilis imocualancaitacahua ipampa nochí nopa tlajtlacoli tlen inquichijtoque. <sup>4</sup> Huan inquipolose nopa yejectzi tlali tlen na nimechmacatoya. Huan nimechchihualtis inquicahuase imotlal. Huan nimechtitlanis para inquintequivapanotij imocualancaitacahua ipan sequinoc tlaltini, pampa tlahuel innechcualancamacatoque huan

nohueyi cualancayo elis queja se tlitl tlen ax sehuis.”

*Miyac tlajtoli*

<sup>5</sup> Huan TOTECO nojquiya quej ni quiijo: “Tlatelchihuali nopa tlacatl tlen motemachía ipan se tlacatl huan mohuejcatlalía tlen na niiTECO. <sup>6</sup> Yajaya elis queja nopa xihui tzontli tlen ax hueli moscaltía cuali pampa eltoc ipan nopa huactoc tlali campa nopa tlali quipiya miyac istatl axaca itztoc para quinpalehuis.

<sup>7</sup> “Pero nijtiochiwas nopa tlacatl tlen motemachía ipan na, niiTECO huan san ipan na mochiya huan san na nechneltocas. <sup>8</sup> Yajaya elis queja se cuahuitl tlen eltoc iteno atemitl huan inelhuayohua yahuij nelhuejcatla hasta quipantía atl. Nopa cuahuitl ax momajmatía quema tlatotonía, niyon ax mocuesohua yonque tlahuaquisquía para miyac metztli. Ixihuiyo nochipa moxoxohuilijtoc huan nochí tonali temaca itlajca.

<sup>9</sup> “Ininyolo tlacame más tlacajcayahua j huan mosisiníaj que nochí tlamantli. Axaca yajati para quiixmatis nochí tlamantli tlen ax cuali tlen quinequi quichihuas ininyolo tlacame. <sup>10</sup> Pero na nimoTECO niquixmati. Na niquijita ininyolo huan inintlalnamiquilis nochí tlacame para niquintlaxtlahuis queja quinamiqui ica tlen quichijtoque ipan nochí ininyolis.”

<sup>11</sup> Se tlacatl tlen moricojchihua ica tlamantli tlen san quiichtectoc eltoc queja se tototl tlen quin-pachohua itequis seyoc tlamantli tototl. Teipa nopa tlacatl quipolos nochí tlen quiichtectoc huan

mocahuas iselti queja tlen hueli huehuentzi tlen huihuitic.

<sup>12</sup> Pero tojuanti timitzhueyichihuaj nopal campa timosehuía para titlanahuatis ipan mosiya. Motlanahuatil eltoc onpano yejyectzi huan onpano hueyi, huan eltos para nochipa. <sup>13</sup> ¡Ay TOTECO! Ta tlen titotemach tiisraelitame. Nochi tlen mitztlahuelcahuaj mopinahualtise huan ax quipiyase niyon quentzi tlatlepanitacayotl. Yajuanti polihuise queja se tlajcUILoli ipan xali, pampa mitztlahuelcajtoque ta, tiTOTECO. Ta tiitztoc queja se ameli campa meya atl tlen temaca yolistli.

<sup>14</sup> Xinechchicahua TOTECO huan nimochicahuas. Xinechmaquixti huan nielis tlamaquixtili, pampa san ta nimitzhueyitlalis. <sup>15</sup> Xiquinita nopa tlacame tlen nechpinajtíaj huan nechilhuíaj: “¿Tlachque ipati itlajtol TOTECO tlen ajachica titlayolmelahua? Intla nochi nopa tlajtoli tlen fiero tlamantli nelía huala tlen TOTECO, ma quichihua ma pano nimantzi.”

<sup>16</sup> Pero yonque nechpinajtíaj israelitame, na ax quema nimitztlajtlanijtoc para xiquintlatzaculti, pampa na ax nijnequi ma tzontlamica ica tlamantli tlen fiero. San ta tijmati tlachque tijchihuas, na ax nijmati. San na niquinpohuilá senquistoc tlen ta motlajtol, queja ta tijmati. <sup>17</sup> Amo xinechtlahuelcahuá, TOTECO. San ipan ta nimotemachía para tinechmanahuis quema nitlaijiyohuía. <sup>18</sup> Xiquinpinahualti huan xiquintlaijiyohuilty nochi tlen nechtojtocaj. Pero na xinechmaca tlasehuilstli. Xiquintlatzaculti nelchicahuac huan xiquintzontlamilti.

*Nopa tonali para mosiyajcahuase*

<sup>19</sup> Huajca TOTECO nechilhui: “Xiya huan xi-moquetzati campa nopa puerta ipan altepetl Jerusalén campa nochí tlacame calaquij huan campa calaqui huan quisa nopa tlanahuatijquetl tlen tlali Judá. Teipa ximoquetzati ipan sesen tlen nopa sequinoc puertas. <sup>20</sup> Huan xiquinilhui nopa tlanahuatiani huan tlacame tlen tlali Judá huan nochí tlacame tlen altepetl Jerusalén para ma quit-lacaquilise notlajtol. <sup>21</sup> Xiquinilhui intla quinequij itztose, ma ax quichihuase tlen hueli tequitl ipan sábado nopa tonal para mosiyajcahuase. Niyon ma ax quipanoltise tlamamali campa ipuertajyo ni altepetl. <sup>22</sup> Nojquiya ma ax quiqixtise tlamantli tlen etic tlen ininchaj ipan sábado. Mon-equi quitlepanitase nopa tonali pampa niquipocatlalijtoc para elis tlatzejtzeloltic. Ni tlanahu-tili niquinmacac imohuejapan tatahua, <sup>23</sup> pero yajuanti ax quichihuilijque cuenta, niyon ax quitlepanitaque. Yajuanti tlahuel moyoltetilijque huan ax quinejque nechtlacaquilise, niyon ax quinejque ma niquinxitlahua.”

<sup>24</sup> TOTECO quijtohua: “Pero intla yajuanti nechneltoquilise tlen na, niininTECO, niquipijtohua huan ax quihiuicase tlamamali ipan sábado, nopa tonal para mosiyajcahuase, huan quitlepanitase nopa tonali pampa tlatzejtzeloltic huan iyoca tlen sequinoc tonali. Huan ipan nopa tonal, ax quichihuase niyon se tequitl huajca yajuanti mocahuase para nochipa. <sup>25</sup> Huan intla queja nopa quichihuase, se iteipa ixhui Tlanahuatijquetl David mosehuis ipan ihueyi siya huan tlanahuatijtiyas

para nochipa nica ipan altepetl Jerusalén. Huan nochipa quihiyase se tlanahuatijquetl huan tlay-acanani tlen tlejcose ipan cahuayoyme huan nentinemise ica yejyectzi huan ica paquilitli ipampa nopa puertas huan tlatlajco ni tlacame. Huan ni altepetl eltos para nochipa. <sup>26</sup> Huan tlacame hualase tlen nopa altepetini tlen quiyahualohuaj Jerusalén huan tlen nopa altepetini tlen tlali Judá. Hualase tlen tlali Benjamín huan tlen nopa tlachiquili huan tepetini huan nopa tlali ica tlaní tlen tlali Judá. Huan quihualicase inintlacajc-ahualis tlen tlatlatili, huan tlen harina huan tlen copali. Huan quihualicase inintlacajcahualis ipan notiopa para nechtascamatise ipampa nochi tlen cuali niquinchihuilijtoc. <sup>27</sup> Pero intla yajuanti ax nechtlacaquilise, niyon ax quiyyocacahua nopa tonali para tlatzejzelotic, o intla quicalaquise tlamamali ipan ipuertas ni altepetl queja elisquía san tlen hueli tonali, huajca niquintlatis nochi nopa puertas. Huan nopa tliltl ajsis hasta ipan nochi tequicaltini huan quintlamitlatis. Huan axaca huelis quisehuis nopa tliltl.”

## 18

### *Tlanextili ipan ichaj nopa soquichijquetl*

<sup>1</sup> Huan TOTECO sampa nechnojnotzqui na, ni-Jeremías, huan nechilhui: <sup>2</sup> “Xiya ipan nopa cali campa quichijchihuaj comitl huan ajpastli huan nopano nimitzcamahuis.”

<sup>3</sup> Huajca na niyajqui ichaj nopa soquichijquetl huan nijpantito tequitiyaya. <sup>4</sup> Pero nopa comitl tlen quichihuayaya ax quisqui cuali queja ya

quinequiyaya. Huajca quixolejqui huan sampa pejqui quichijchihua se tlen más cuali.

<sup>5</sup> Huajca TOTECO nechnojnotzqui huan nechilhui:

<sup>6</sup> “Ax hueli na nijchihua ica inisraelitame queja nopa soquichijquetl quichijqui ica nopa comitl? Inisraelitame initztoque nomaco queja nopa soquilt eltoc imaco nopa soquichijquetl. <sup>7</sup> Ipan se tlalochtli hueli niquijtos para quiyahualose se altepetl o se tlanahuatijcayotl, huan quimajcahuase itepa huan quixolehuase huan queja nopa elis. <sup>8</sup> Pero intla nopa tlacame tlen nopa altepetl quicahuase inintlajtlacolhua, huajca ax nijxolehuas queja nimoilhuijtoya. <sup>9</sup> Huan intla nitlayolmelahuas para nijtiochihuas se altepetl o se tlanahuatijcayotl, huajca nijmacas chicahualistli huan nijhueyichihuas. <sup>10</sup> Pero intla nopa tlacame pehuase tlajtlacolchihuase huan ax nechtlepanitase, huajca na nojquiya nimoyolpatlas huan ax niquntiochihuas queja nimoilhuijtoya.

<sup>11</sup> “Huajca ama xiya huan xiquinylomelahuati nochí nopa Judá ehuani huan Jerusalén ehuani. Xiquinilhuiti para niininTECO nijsencajtoc para niquinchihuilis miyac tlamantli tlen ax cuali. Huajca ma quicahuaca iniojhui tlen ax cuali huan ma quichihuaca tlen cuali.

<sup>12</sup> “Pero yajuanti quijtojque: ‘Amo ximoton-alpolo pampa tojuanti ax tijnequij tijchihuase tlen TOTECO technahuatía. Tojuanti timonejnemiltise queja tojuanti techpactía huan tijtoquilise toteteyohua. Tijchihuase senquistoc nochí nopa fiero tlamantli tlen tijnequij tijchihuase ipan toyolo. Huan axaca techtzacuilis para ax tijchihuase.’ ”

<sup>13</sup> Teipa TOTECO quijito: “Axaca quicactoc tlen se tlamatli quej ni, niyon ipan tlaltini tlen ax nechneltocaj. Notlacajhua quichijtoque se fiero tlamatli tlen axaca quimachilía. <sup>14</sup> Temachtli ax atiya nopa chipahuac sitlal setl tlen huetzi ipan nopa tetini tlen más huejcapantic ipan tlali Líbano. Huan temachtli ax quema huaqui nopa atl tlen sesec tlen meya ipan tepetl Hermón. <sup>15</sup> Pero notlacajhua ax temachtli queja nopa. Axaca hueli motemachis ipan yajuanti. Yajuanti nechtlahuelcajtoque huan quintoquilíaj teteyome tlen ax tleno ininpati huan quintlatilíaj copali. Quicajtoque nopa ojtli tlen cuali tlen huejcajquiya quitoquiliyayaj, huan ama yahuij ipan ojtli tlen fiero campa senquistoc onca tlajtlacoli. <sup>16</sup> Yeca inintlal elis tlaxolehuali. Huan nochí tlen panose nopano san quisentlachilise huan momajmatise. Quitlapose inincamac huan quiojolinise inintzonteco pampa mocahuas tlahuel sosolijtos. <sup>17</sup> Huan niquinsemanas notlacajhua inixpa inincualancaitacahua queja nopa ajacatl tlen huala ica campa quisa tonati huan quisemana tlaltejpocli. Huan ipan nopa tonali quema itztose ipan tlaijiyohuilstli, na niquinnextilis nocuitlapa huan ax niquinpalehuis.”

### *Quinequij quimictise Jeremías*

<sup>18</sup> Huajca nopa tlacame quijtojque: “Ma tiyaca. Ma timosencahuase tlen huelis tijchihuase ica Jeremías. Tojuanti tiquinpiyaj tlen tojuanti totatjitzitzi para techmachtise, huan tlalnamiquini para techconsejomacase huan tiocamanalohuani para techilhuise tlen TOTECO quijtohua. Huajca

ax monequi más itlajtol Jeremías. Ma tijteilhuica iixpa tequihuejme para ma quimictica. Ma ayoc tijchihuase cuenta itlajtol.”

*Jeremías momajito ica TOTECO*

<sup>19</sup> ¡Ay NoTECO, xinechpalehui! Xijtla-caquili tlachque quinequij nechchihuise nocualancaitacahua. <sup>20</sup> ¿Huelis quinamiqui nechtlaxtlahuise ica tlen ax cuali quema na niquinchihuilejtoc tlen cuali? Yajuanti quisencajtoque se tlaquetztlí para ipan nihuetezis para nechmictise. Pero xiquilnamiqui na nimitzcamahuijtoc cuali tlen yajuanti huan nochipa nijchijtoc campeca para niquinmanahuis tlen mocualancayo. <sup>21</sup> Huajca ama NoTECO, ininconebla xiquintemactili para ma miquica ica mayantli huan ma quinmictica ica machete. Huan nopa sihuame ma mocahuaca cahualme huan ma quinpoloca nochí ininconebla. Ininhuehuejbla ma miquica ica cocolistli huan inintelpocahua ma quinmictica ipan tlatehuijcayotl. <sup>22</sup> Ma caquisti nopa choquistli tlen oncas ipan ininchaj ipan nopa tlalochtlí quema tiquintitlanilis soldados para ma quintlaxtequilitij, pampa yajuanti quichijque se ostol para ma nihuetezi iijtic huan ixtacatzi quitlalijtoque tlaquetztlí campa nípano. <sup>23</sup> NoTECO ta tiquixmati nochí tlen yajuanti quisencajtoque quichihuase para nechmictise. Huajca amo xiquixpolo inintlajtlacolhua. Más cuali xiquintzontlamilti moixpa huan

xi quintlatzaculti      chicahuac      ica      mohueyi  
cualancayo.

## 19

### *Nopa comitl tlen tlapantoc*

<sup>1</sup> Huan TOTECO nechilhui: “Xiya ichaj nopa soquichijquetl huan xijcohuati se comitl tlen soquitl. Xiquinhuica mohuaya se ome huehue tlacame tlen ni altepetl huan se quesqui totajtzitzi tlen ya huehuentzitzi. <sup>2</sup> Huan xi quisaca ipan nopa Tepalcatl Puerta ica campa quisa tonati huan xiyaca nopa tlamayamitl Ben Hinom. Nepa xiquinilhuis nochi nopa tlajtoli tlen na nimitzmacas. <sup>3</sup> Quej ni xiquinilhui: ‘Xijtlacaquilica itlajtol TOTECO nochimmojuanti intlanahuatiani tlen tlali Judá huan intlacame tlen altepetl Jerusalén. TOTECO Tlen Quinyacana Ielhuicac Ejcahua Ma Tlatlanitij huan yajaya tlen ininteco israelitame quej ni quijtohua: Na nijtitlanis se tlamantli tlen tlahuel fiero ipan ni lugar. Huan nochi tlen quicaquise tlen nijchihuas tlahuel momajmatise hasta ax huelise tlacaquise.

<sup>4</sup> “Pampa nochi nopa israelita tlacame nechtlahuelcajque huan ni tlamayamitl quitequihuijque para quichihuase tlajtlacoli huan miyac tlamantli tlen quihualica pinahualistli. Huan nopa tlacame quintlatilíaj copali teteyome tlen yajuanti, huan inintatahua huan nopa tlanahuatiani tlen tlali Judá ax quema quinixmatque, niyon ax quema quinhueyichijque. Huan ni lugar quitlamixolonijque ica inieso nopa coneme tlen

ax tleno quichijtoyaj. <sup>5</sup> Nojquiya quichijchihuili-  
jtoque huejhueyi tlaixpantini nopa teteyotl Baal.  
Huan ipan nopa tlaixpantini quintlatíaj inincone-  
hua queja tlacajcahualistli para nopa teteyotl. Ya  
nopa eli se tlamatli tlen na ax quema niquin-  
ahuati ma quichihuaca, niyon ax quema nimoil-  
hui para queja nopa quichihuasquíaj. <sup>6</sup> Yeca ni-  
ninTECO niquijtohua: Ajsis tonali quema ni tlam-  
ayamitl ayoc quitocaxtise: Tofet. Niyon ayoc  
quitocaxtise: Tlamayamitl tlen Ben Hinom. Ama  
quitocaxtise: Tlamayamitl Campa Temictíaj. <sup>7</sup> Na  
nijxolehuas nochí nopa tlacame tlen tlali Judá  
huan altepetl Jerusalén quisencajtoque quichihua-  
se ipan nopa tlatehuilistli. Huan nijchihuas  
ma hualaca soldados para ma quinmictiquij nica.  
Huan inintlacayo niquinmacas nopa tzopilome  
huan tecuanime tlen nemij cuatitla para ma quin-  
cuaca. <sup>8</sup> Huan altepetl Jerusalén niquixpolos tlen  
ni tlali. Huan queja nopa nochí tlen panose nica  
quitlapose inincamac huan momajmatise quema  
quiitase queja nijxolejtoc. <sup>9</sup> Na nijchihuas para  
inincualancaitacahua ma quiyahualoca nopa al-  
tepetl hasta tlamic nochí tlacualistli. Huan queja  
nopa, nopa tlacame tlen itztose calijtic tlen nopa  
altepetl pehuase quincuase inincone huan in-  
inhuampoyohua.’”

<sup>10</sup> Huan nojquiya TOTECO nechilhui: “Huan  
ama, Jeremías, xijtlapana nopa comitl iniixpa  
nopa tlacame tlen tiquinhualicatoc mohuaya,  
<sup>11</sup> huan xiquinilhui para quej ni niquinilhuiá,  
niininTECO Tlen Niquinyacana Noelhuicac Ejca-  
hua Ma Tlatlanitij: ‘Na niquintzontlamiltis is-  
raelitame huan nochí Jerusalén ehuani queja ni-

jtlapanqui nopa comitl huan mocajqui payaxtic. Huan queja se comitl tlen tlapani ayoc hueli quicualchijchihuaj, queja nopa nojquiya elis ica israelitame huan tlen itztoque ipan ni altepetl. Oncas se hueyi miquistli huan quintlalpachose inimijcatzitzti ipan Tofet tlen ax tlapajpactic noixpa pampa ax quiaxilis canque quintlalpachose nica pampa tlahuatl miyac miquise. Huan inintlacayohua quinmontonose ipan ni tlamatayamitl.

<sup>12</sup> Altepetyl Jerusalén nijtlamiltis huan nijcahuas ax tlapajpactic queja nijchijqui ica nopa tlamatayamitl Tofet, pampa altepetl Jerusalén nojquiya nijtemitis ica mijcatzitzti. <sup>13</sup> Huan na niquinxolehuas nochi nopa caltini tlen altepetl Jerusalén huan nojquiya inincaltlanahuatil nopa tlanahtuati tlen tlali Judá. Niquinxolehuas nochi caltini campa quitlatijque copali para quinhueyimatise sitlalime huan nochi campa quitojajque tlacajcahuastli para sequinoc totiotzitzti huan nochi nica mocahuas ax tlapajpactic noixpa queja nopa fiero tlamatayamitl tlen Tofet.’ ”

<sup>14</sup> Teipa na niJeremías niquisqui tlen nopa tlamatayamitl Tofet campa TOTECO nechtitlantoya ma niquinilhui tlacame itlajtol tlen panos teipa. Huan teipa niyajqui nimoquetzqui iixmelac itiopa TOTECO huan quej ni niquinilhui nochi nopa tlacame: <sup>15</sup> Quej ni quiijtohua TOTECO Tlen Quinyacana Ielhuicac Ejcahua Ma Tlatlanitij huan tlen toTeco tiisraelitame: “Na nijtitlanis ipan ni altepetl huan ipan nopa altepetini tlen mocahuaj nechca nochi nopa tlamatli tlen ax cuali tlen niquijtojtoc nijtitlanis, pampa yajuanti tlahuatl moyoltetiliytoque para ax nechtlacauilise.”

**20***Nopa totajtzi Pasur, icualancaitaca Jeremías*

<sup>1</sup> Huan Pasur, icone Imer, tlen eliyaya totajtzi huan eliyaya se tlayacanquetl ipan itiopa TOTECO quicajqui tlen na, niJeremías, niquijtohuayaya. <sup>2</sup> Huan nechitzqui huan tlanahuati ma nechhuitequica huan ma nechmetzcuapachoca ica cuahuitl nechca nopa puerta Benjamín nechca itiopa TOTECO.

<sup>3</sup> Huan hualmostla Pasur nechmalacani huan niquilhui: “TOTECO quipatlatoc motoca huan tlacame ayoc mitztocaxtise Pasur. Ama mitztocaxtise Magor Misabib tlen quiijtosnequi: ‘Nopa Tlacatl Tlen Itztoc Ipan Hueyi Majmajtli.’ <sup>4</sup> Pampa TOTECO quititlanis se hueyi majmajtli ipan ta huan ipan nochí mohuampoyohua. Huan tiquitas quejatza nochí yajuanti miquise ica machete ininmaco inincualancaitacahua. Nochi Judá ehuani niquintemactilis imaco nopa tlanahuatijquetl tlen tlali Babilonia. Sequin yajaya quinhuicas ipan itlal para quitequipanotij san tlaptic huan sequin quinmictis nimantzi. <sup>5</sup> Huan niquincahuilis para mocualancaitacahua ma quitlaxtequilica altepetl Jerusalén. Nochi tlamantzitz tlen patiyo tlen quipiya ni altepetl, nochí nopa piltetzitz tlen tlahuel pajpatiyo, nopa oro huan nopa plata tlen iniaxca nopa tlanahuatiani; nochí quihuicase tlali Babilonia. <sup>6</sup> Huan ta, Pasur, huan mochan ehuani huan nochí moteixmatcahua intlatequipanotij san tlaptic ipan tlali Babilonia huan nepa inmiquise. Nopano timquis ta, huan nochí tlen

tiquincaj caya jqui huan tiquinyolmelaj qui istlacyotl para noch i quisasquía cuali.”

*Jeremías quitlajilhuía TOTECO*

<sup>7</sup> NoTECO, ta tinechchihualti ma nieli nimotio-camanalojca. Huan na nimotemaca para nijchihuá. Tiitztoc más chicahuac que na huan tinecht-lanqui. Pero xiquita, ama noch i tlacame ipan ni altepetl san nechhuetzquilíaj huan nechpinajtiaj.

<sup>8</sup> Pampa sesen huelta quema nicamati, monequi niteyolmelahuas tlen tlatehuijcayotl huan tlaxole-hualistli. Huan yeca ipampa nopa tlajtoli tlen tinechmacatoc, tlacame nechpinajtiaj huan nech-huetzquilíaj. Huan noch i quitequihiúaj notoca queja se ahuitlajtoli. <sup>9</sup> Pero ax hueli nijcahuas para niquincamahuis tlacame motlajtol. Ax hueli niquijtos para ayoc nicamatis nopa tlajtoli tlen ta tinechmaca o ayoc nimitzilnamiquis pampa mot-lajtol eltoc ipan noyolo queja se tlitl tlen quitlatía noomiyohua. Huan yonque nijchihuá campeca para niquijiyohuis huan ax niquincamahuis tlacame, ax nihueli.

<sup>10</sup> Campa hueli nijcaqui para tlacame nechijilnamiquij huan tlahuel onca majmajli campa hueli. Quiijtohuaj para nechteilhuise. Hasta nopa tlacame tlen eliyayaj nohuampoyohua nech-pipijpiyaj pampa quinequij quiitase para nijchihuas se tlenijqui para huelis nechteilhuise. Huan quiijtohuaj: “Tiquitase intla se hueli quicajcayahuas huan tiquitzquise huan timomacuepilise.”

<sup>11</sup> Pero ta, TOTECO, tiitztoc nohuaya queja se hueyi tlatehuijquetl tlen axaca hueli quitlanis. Huan moixpa motepotlamise noch i tlen

nechtepotztocaj. Huajca yajuanti ax huelis nechtlanise. Ta tiquinechcapantlalis huan tiquinpinahualtis. Quena, itztose ipan pinahualistli para nochipa. <sup>12</sup> ¡Ay NoTECO! Tlen Tiquinyacana Moelhuicac Ejcahua Ma Tlatlanitij, ta tiquinyejyeco tlen xitlahuaque moixpa huan tiquixmati inintlunamiquilis huan ininyolo. Xinechcahuili ma niquitas quejatza tiquinmacuepilis ni tlacame tlen nechjilnamiquij pampa na nijtlalijtoc momaco nochi tlen yajuanti nechchihuiliytoque.

<sup>13</sup> Nihuicas para nijtlascamatis TOTECO. Ni-jhueyichihuas TOTECO pampa na tlen niteicneltzi nechmanahui ininmaco tlen nechtlaijyohuiltyayaj.

### *Jeremías mocuesohua*

<sup>14</sup> Tlatelchihuali ma eli nopa tonali quema nitlacatqui. <sup>15</sup> Tlatelchihuali ma eli nopa tlacatl tlen quiyolmelahuato notata para ya tlacatqui se ioquichpil. <sup>16</sup> Ma tzontlami nopa tlayolmelajquetl queja nopa altepetini tlen Sodoma huan Gomorra tlen huejcajquiya TOTECO quintlamixolejqui, niyon ax quintlasojtlac. Nopa tlayolmelajquetl semilhuitl ma quicaqui tzajtzilistli tlen tlatehuijcayotl, <sup>17</sup> pampa ax nechmicti quema nitlacatqui. Más cuali nimictosquía ipan iijti nonana. Queja nopa, iijti nonana eltosquía queja notecacahua. <sup>18</sup> ¿Para tlen nitlacatqui? Pampa ipan nochi noyolis san nijpantijtoc tlaijiyohuulistli huan tlacuajcualocayotl. Huan tlamis noyolis ica pinahualistli.

**21***Quixolehuase Jerusalén*

<sup>1</sup> Huajca nopa Tlanahuatijquetl Sedequías quiti-tlanqui Pasur, icone Malquías huan nopa tota-jtzi Sofonías, icone Maasías para ma nechitaquij na, niJeremías, huan para quej ni ma nechil-huiquij: <sup>2</sup> “Xijtlajtlani TOTECO para ma techpale-hui pampa Tlanahuatijquetl Nabucodonosor tlen tlali Babilonia hualajtoc para techtehuis. Huan huelis TOTECO techtlasojtlas huan quichihuas se chicahual nescayotl queja quichijqui huejca-jquiya, huan ica ya nopa quichihuas para Nabu-codonosor ma quinijcueni isoldados para amo techtehuise.”

<sup>3</sup> Huan na niJeremías niquinilhui: “Xiyaca sampa campa Tlanahuatijquetl Sedequías huan xiquilhuica, <sup>4</sup> para quej ni quijtohua TOTECO Dios tlen israelitame: ‘Sedequías na nijchihuas para nochimotepos tlen ica intlatehuíaj ma elica ax tlen ininpati. Huan yeca ax huelis inquinte-huise nopa Babilonia ehuani huan nopa caldeos tlen inmehyahualojoque. Huan niquinhualicas imocualancaitacahua hasta tlatlajco ni altepetl, <sup>5</sup> huan na huan yajuanti timechtehuise ica nochimohueyi chicahualis pampa tlahuel nicualantoc ica imojuanti. <sup>6</sup> Huan niquinmictis nochim tlen itztoque ipan ni altepetl. Miquise nochim tlacame huan tlapiyalime ica se hueyi cocolistli tlen na nijtitlanis.’” <sup>7</sup> Huan teipa TOTECO quijito: “Ni-jtemactilis Sedequías tlen tlanahuatia ipan tlali Judá imaco Tlanahuatijquetl Nabucodonosor tlen tlali Babilonia. Nojquiya niquintemactilis imaco

nochi isoldados Sedequías huan itlayacancahua huan nochí nopa tlacame tlen noja mocahuase ipan ni altepetl huan tlen ax mijque ica cocolistli, tlatehuijcayotl huan mayantli. Huan Nabucodonosor quintlamimictis. Ax quintlapojpolhuis, niyon ax quintlasoxtlas.

<sup>8</sup> “Nojquiya xiquinlhui tlacame para quej ni niquijtohua, niininTECO: ‘Xiquita ama nijtlalijtoc imoixpa nopa ojtlí para yolistli huan nopa ojtlí para miquistli para inquitlapejpenise. <sup>9</sup> Pampa nochí tlen mocahuase ipan ni altepetl miquise ipan tlatehuijcayotl, ica mayantli huan ica cocolistli. Pero nochí tlen quisase tlen ni altepetl huan motemacase ica nopa caldeos, quimanahuise ininyolis. <sup>10</sup> Pampa na nijtlapejpenijtoc para senquistoc nijxolehuas ni altepetl. Na nimochijtoc niicualancaitaca ni altepetl huan ax niihuampo. Yeca hualas nopa tlanahuatijquetl tlen tlali Babilonia huan quitlamitlatis.’ ” Queja nopa quiijtohua TOTECO.

### *Itlatzacuítillis nopa tlanahuatijquetl tlen Judá*

<sup>11-12</sup> Nojquiya TOTECO quiijto: “Xiquilhui nopa tlanahuatijquetl tlen tlali Judá tlen itztoc se iteipa ixhui David quej ni: ‘Xijtlacaquili itlajtol TOTECO. Yajaya ya mocualtlalijtoc para mitztlajtolsencahuas nimantzi ipampa nochí tlamantli tlen ax cuali tlen tijchihua. Huajca mojmostla xiquinchihuili tlen xitlahuac nopa tlacame tlen tiquintlajtolsencahuas. Xijpehualti xijchihua tlen xitlahuac semilhuitl. Xijmanahuica tlen ax quipiya fuerza

ininmaco tlen quintlaijiyohuiltía para nocualancayo ax huetzis mopani queja se tlilt tlen axaca huelis quisehuis.

*TOTECO quintlatzacuiltis Jerusalén ehuani*

<sup>13</sup> “‘Pampa xiquita, inaltepetl Jerusalén ehuani, na nimochijtoc imocualancaitaca. Nimechtehuis yonque imoaltepe mosehuía huejcapa huan inmohueyimatij huan inquijtohuaj: Tojuanti titztoque temachtli ipan ni tepetl. Nica axaca huelis calaquis para techtehuis. <sup>14</sup> Pero na noselti nimechtzontlamiltis para nimechtlatzacuiltis ipampa imotlajtlacolhua. Huan nojquiya nijtlicuiltis nochí cuatitlamitl huan quitlatis nochí tlen nechca. Queja nopa niimoTECO niquijtohua.’”

## 22

*Tlajtoli para Tlanahuatijquetl Sedequías*

<sup>1</sup> Teipa TOTECO nechilhui: “Xiya ipan ichaj nopa tlanahuatijquetl tlen ni tlali Judá tlen mosehuía ipan isiya David tlen huejcajquiya huan xiquilhuiti: <sup>2</sup> ‘Xijtlacaquili itlajtol TOTECO, ta titlanahuatijquetl tlen tlali Judá tlen timosehuijtoc ipan isiya Tlanahuatijquetl David tlen huejcajquiya. Nojquiya ma quitlacaquilica nochí motlatequipanojcahua huan motlacajhua. <sup>3</sup> TOTECO inmechilhuía: Xijchihuaca nica tlen xitlahuac huan tlen cuali. Xiquinmanahuica tlacame tlen tlaijiyohuíaj ininmaco tlen quintlaijiyohuiltíaj. Amo xiquincajcayahuaca niyon xiquintlaxtequilica nopa sejcoyoc ehuani, niyon tlen icnotzi o tlen cahual sihuame.

Xiquinchihuilica tlen cuali. Huan ayoc xiquinmictica tlacame tlen ax tleno quichijtoque. <sup>4</sup> Intla inquicahuase nochí nopa fiero tlamantli tlen inquichihuaj, na njimanahuis ni tlali huan sampa niquintlalis tlanahuatiani tlen mosehuise ipan isiya Tlanahuatijquetl David. Huan imotlanahuatijcahua calaquise ipan ipuertas ni altepetl ipan carros huan ipan cahuayojme inihuaya inintlapalehuijcahua huan oncas paquelistli para nochí tlacame. <sup>5</sup> Pero intla imojuanti ax inquichihuise cuenta notlajtol, huajca na nimotestigojquetza noselti huan niquijtohua para ni caltlanahuatili mocahuas xolejtoc. Queja nopa niimoTeco niquijtohua.’”

<sup>6</sup> Pampa TOTECO quej ni quiijtojtoc tlen ni caltlanahuatili: “Niquicnelía ni caltlanahuatili queja nopa yejyectzi tlali Galaad huan queja nopa yejyectzi cuatitlamitl tlen xoxohuic tlen tlali Líbano. Pero njtlamixolehuas huan nijcahuas queja huactoc tlali huan ayoc aca itztos ipani. <sup>7</sup> Na niquinnotzas tlacame tlen tlaxolehuaj para ma hualaca ica inintepos huan ma quixolehuaca. Yajuanti quiqxtilise nochí nopa yejyectzitzí cuatetomitl tlen nopa caltlanahuatili huan quintlalise ipan tliltl para ma tlatlaca.

<sup>8</sup> “Huan miyac tlacame tlen miyac tlaltini panose ipan ni altepetl tlen xolejtoc huan moilhuise se ica seyoc: ‘¿Para tlen TOTECO quichijqui ya ni? ¿Para tlen quixolejqui ni hueyi altepetl?’ <sup>9</sup> Huan quinnanquilise quej ni: ‘Quixolejqui ni altepetl pampa tlacame tlen itztoyaj nica quiilcrajque inintECÓ. Quiixpanoque nopa tlajtoli tlen TOTECO Dios quichijtoya

inihuaya huan quinhueyichijque huan  
quintequipanojque totiotzitz tlen sequinoc  
tlaltini.’”

*Jeremías camati tlen Joacaz*

<sup>10</sup> Amo xichocaca ipampa nopa Tlanahuatijquetl Josías tlen mijqui, niyon amo ximocuesoca ipampa ya. Más cuali xichocaca ipampa nopa tlanahuatijquetl tlen quihiuicase ipan seyoc tlali huan ayoc quema mocuepas sampa ipan itlal campa tlacatqui. <sup>11</sup> Pampa TOTECO camatitoc tlen Tlanahuatijquetl Salum [22:11 O Joacim. Itoca eliyaya Joacim, pero quitocaxti Salum pampa queja Salum tlen achtohuiya itztoya tlanahuatijquetl, ax huejcajqui tlanahuati.], icone Josías tlen pejqui tlanahuatí ipan tlali Judá quema mijqui itata. Huan quej ni quijito: “Salum ayoc quema mocuepas nica ipan itlal, <sup>12</sup> pampa miquiti ipan seyoc tlali campa quihiuicaque para tlatequipan-oti san tlapic.”

*TOTECO camati tlen Joacim*

<sup>13</sup> “Fiero elis para Tlanahuatijquetl Joacim pampa quinfuerzajhui ma tequitica chicahuac nopa tlacame tlen quichijchihuiljque icaltlanahuatil, pero ax quintlaxtlahui. Yeca nijtlatzacuiltis.

<sup>14</sup> Yajaya quijito: ‘Nimochijchihuilis se hueyi caltlanahuatili tlen quipiyas miyac cuartos huan nijchijchihuilis miyac ventanas. Nopa tlapamitl nijchijchihuas ica tiocuahuitl huan nijpas ica chichiltic.’

<sup>15</sup> “Pero Tlanahuatijquetl Joacim, ax tielis se cuali tlanahuatijquetl pampa tijpiya tiocuahuitl

tlen mitzyahualohua ipan se yejyectzi caltlanahuatili. Motata Josías huecajqui tlanahuati pampa yajaya quichijqui tlen cuali huan ax quinchicoicneli itlacaqhua. Quichijqui tlen xitlahuac ipan nochi tlamatli huan yeca nijtiochijqui. <sup>16</sup> Yajaya quinpalehui tlen teicneltzitzli tlen ax tleno quipixque huan quintlajtolsencajqui queja xitlahuac. Huan nochi tlen motata quichijqui, quisqui cuali. ¿Ax ya nopa tlen quinequi quiijtos para nechixmati? Queja nopa niDIOS niquijtohua.

<sup>17</sup> “Pero ta, san timoilhuía quejatza huelis timoaxcatis tlamatli tlen sequinoc iniaxca huan san titlacaqcayahua. Tiquinmictía tlen ax tleno quichijtoque. Tiquintlaijiyohuiltía tlen teicneltzitzli. Huan titlanahuatía chicahuac huan ica miyac cualantli.”

<sup>18</sup> Huan nojquiya TOTECO quiijto ya ni tlen nopa tlatzacuiltli tlen quititlaniliyaya ipan Joacim, icono Josías, tlen pejqui tlanahuatía quema mijqui itata. Quiijto: “Ma axaca chocas ipampa Joacim quema miquis. Ifamilia ax quiijtos: ‘¡Ay, panotoc tlen fiero huan mijqui toicni!’ Huan itlacaqhuma ma ax mocuesoca quema quiitase ya mijqui inintlanahuatijca. <sup>19</sup> San quitlepanitase itlacayo queja elisquía se burro. San quihuahuatzase para quiquixtise calixpa tlen altepetl Jerusalén. Huan quicahuatij campa quitepehuaj tlasoli huan cuitlatl.”

*Tlajtoli tlen altepetl Jerusalén ehuani*

<sup>20</sup> InJerusalén ehuani, xichocaca pampa ayoc onca nochi nopa tlaltini tlen inmechpalehuiyayaj.

Xiquintemoti ipan tlali Líbano, huan xiquintza-jtziliti chicahuac ipan tlali Basán o xiquintemoti campa atemitl Jordán. Nelía nimechilhuía para ayoc inquin pantise pampa nochí ya mijque. Huan ax mocajqui niyon se para inmechpale-huis. <sup>21</sup> Quema initztoyaj ica cuali na nimechy-olmelajqui tlen imopantisquía teipa, pero imojuanti innechnanquilijque: “¡Amo xitechcuato-toni!” Huan queja nopa inquichijtihualajtoque hasta quema pejqui altepetl Jerusalén. Senquistoc ax inquinequij innechcaquise. <sup>22</sup> Huan ama nochí imotlayacancahua ixpolihuise. Elis queja quinhuicas se hueyi ajacatl huan quinhuicase nochí imohuampoyohua ipan sequinoc tlaltini para tlatequipanotij san tlaptic. Huan huajca quena, inmomacase cuenta tlen nochí imotlajtlacolhua huan tlahuel inmopinahuase. <sup>23</sup> Ama nopa tlanahuatijquetl paqui pampa itztoc ipan se yejyectzi caltlanahuatili tlen tlachijchihuali ica nopa tiocuatini tlen onca ipan tlali Líbano. Pero ax miyac tonali polihui para yajaya chocas huan tlaijiyohuis queja se sihuatl tlen ya ajsic hora para quitlacatiltis icones.

### *TOTECO quitlajitolsencahuas Jeconías*

<sup>24</sup> Huan ta tijeconías [22:24 O Conías.] tlen ti-icones Joacim tlen tlanahuatijquetl tlen tlali Judá, yonque tielisquía nopa anillo ica nosello tlen njhuica ipan noma nejmatl, nimitzquixtis. <sup>25</sup> Huan nimitztemactilis ininmaco tlen tlahuel tiquinimacasi tlen mitztemohuaj para mitzmictise. Nimitztemactilis imaco nopa Tlanahuatijquetl Nabucodonosor tlen tlali Babilonia huan ininmaco

nopa caldeos. <sup>26</sup> Ta huan monana tlen mitztlacatilti, nimechquixtis tlen ni tlali huan nimechtitlanilis ipan se tlali tlen ax inquiixmatij huan nopano inmiquise. <sup>27</sup> Huan yonque tlahuel inquinequise inmocuepase sampa ipan ni tlali campa intlacatque, ax quema inmocuepase.

<sup>28</sup> Pampa ni tlacatl Jeconías ayoc tleno ipati. Eltoc queja se plato tlen tlapanoc huan tlen axaca quinequi. Yeca ya huan iconehua niquinquixtis huan yase ipan seyoc tlaltini tlen mopantíaj huejca para tlatequipanotij. <sup>29</sup> ¡Nochi tlacame ipan ni tlali, xijtlacaquilica itlajtol TOTECO! <sup>30</sup> TOTECO quiijtohua: “Xiquijcuilo para ni Jeconías ax quinpixqui iconehua. Quitlamipolo noch tonali ipan iyolis. Huan niyon se icone ax quema mosehuis ipan isiya David para tlanahuatis ipan tlali Judá.”

## 23

### *Teipa se ome mocuepase tlen nopa sejcoyoc*

<sup>1</sup> TOTECO quiijtohua: “Fiero elis para nopa tlayacanani tlen israelitame tlen inintequi elqui para quinmocuitlahuise notlacajhua tlen itztoque queja noborregojhua. Yajuanti ax quinmocuitlahuijque, san quintlamiltijque huan quinsemanque.”

<sup>2</sup> Huajca ama TOTECO tlen toDios tiisraelitame quej ni quinilhui nopa tlacame tlen quinmocuitlahuíaj itlacajhua: “Quinamiquiyaya inquinhuicasquíaj notlacajhua ipan se lugar campa itztosquíaj temachme. Pero imojuanti ax ya nopa inquichijque. Inquintlahuelcajque huan inquintonjtocaque. Huajca ama na nimechtlatzacuiltis

ipampa nochí tlamanatl tlen ax cuali tlen inquinchiuilijque noisraelita tlacajhua. <sup>3</sup> Pero se tonal na niquinsentilis noisraelita tlacajhua tlen noja mocajtoque ipan campa hueli tlaltini campa niquintlantoya, huan sampa itztose queja noborregojhua huan niquinhualicas ipan ni corral campa quipiyase miyac tlacualistli. Huan nopano notlacajhua momiyaquilise huan moscaltise. <sup>4</sup> Huan na niquintlalis tlamocuitlahuiani tlen temachme para ma quinmocuitlahuica. Huan queja nopa ayoc majmahuise, ayoc polihuise, niyon ayoc mocuesose. Queja nopa niimoTECO niquijtohua.”

<sup>5</sup> TOTECO quiijtohua: “Ajsis tonali quema na nijtlalis para tlanahuatis ipan isiya David se iteipa ixhui tlen xitlahuac queja David itztoya. Yajaya elis se tlanahuatijquetl tlen tlanahuatis xitlahuac huan ica miyac tlalnamiquilistli. Huan yajaya tlatlajtolsencahuas queja cuali huan nojquiya quichihuas para nochí sequinoc ipan itlal ma quichihuaca tlen xitlahuac. <sup>6</sup> Huan ipan nopa tonali Judá ehuani elise ica temachili huan tlali Israel quipiyas tlasehuilistli. Huan quitocaxtise nopa tlanahuatijquetl: ‘TOTECO Tlen Techchihua Tixitlahuaque Iixpa.’”

<sup>7</sup> Huan TOTECO quiijtohua: “Ipan nopa tonali tlacame ayoc quiijtose: ‘Nitlatestigojquetza TOTECO tlen quinquixti israelitame ipan tlali Egipto.’ <sup>8</sup> Pero quiijtose: ‘Nitlatestigojquetza TOTECO tlen quinquixti israelitame tlen nopa tlaltini campa quinhuicatoya huan sampa quinhualicac ipan inintla.’”

*Tlajtoli para nopa istlacatica tiocamanalohuani*

<sup>9</sup> Na tlahuel nimoyolcuesohua ipampa nopa tlacajcayajca tiocamanalohuani pampa yajuanti senquistoc istlacatij. Nochi noomiy o huihuipica huan nelia nimajmahui hasta nimomimilohua queja se ihuintiquetl, pampa tlahuel fiero ininpantis nopa tlacajcayajca tiocamanalohuani pampa TÓTECO quiijtojtoc tlajtoli tlen tlatzejzelotic tlen yajuanti huan nopa tlatzacuiltyli tlen quiajsis. <sup>10</sup> Ni tlali temitoc ica momecatiani. Quicajtejtoque TÓTECO para quinhueyichihuase teteyome huan yeca TÓTECO quintelchijtoc. Ni tlali cactoc huan nochi nopa potreros huactoc pampa ni tlacame senquistoc quinequij quichihuase tlen fiero. Huan nopa tlacame tlen quipiyaj tlanahuatili ax quichihuaj tlen xitlahuac.

<sup>11</sup> “Nopa tiocamanalohuani huan totajtzitzi mosisiníaj huan niyon quentzi ax quittlepanitaj TÓTECO. Na niquitztoq nochi nopa fiero tlamantli tlen yajuanti quichihuaj nica ipan notiopa. Queja nopa niimoTÉCO niquijtohua. <sup>12</sup> Yeca ama nijchihuas iniojhui ma eli tlaalahua huan nopano oncas tzintlayohuilotl. Na niquntojtocas huan motepotlamise huan huetzise, ipan nopa tonali quema na niquntitlanilis tlatzacuiltyli tlen quinamiqui ipampa inintlajtlacolhua. Queja nopa niimoTÉCO niquijtohua.

<sup>13</sup> “Na niquinitztoq inintlajtlacolhua nopa tiocamanalohuani tlen tlali Samaria tlen tlahuel ax tlatlepanitaj. Quinilhuiyaj tlacame tlen panos teipa huan quiijtohuayayaj para nopa teteyotl Baal quimacayayaj inintlajtol. Queja

nopa quinchihualtijque noisraelita tlacajhua ma tlajtlacolchihuaca huan quihueyichihuase Baal. <sup>14</sup> Pero noja más fierojtique quichihuaj nopa tiocamanalohuani tlen altepetl Jerusalén. Tlahuel momecatíaj huan mojmostla istlacatitinemij. Quinyolchicahuaj nopa tlacame tlen quichihuaj tlen fiero. Ax quinequij aca ma moyolcuepas huan quicahuas itlajtlacolhua. Para na nopa tiocamanalohuani itztoque tlahuel fiero queja nopa tlacame huejcajquiya tlen altepetl Sodoma huan Gomorra.

<sup>15</sup> “Yeca na niimoTECO Tlen Niquinyacana Noelhuicac Ejcahua Ma Tlatlanitij niquijtohua: Na niquinmacas ma quicuaca xihuitl tlen chichic huan niquinmacas ma quiica atl tlen quipiya paji li tlen temictía. Pampa tlen ni tiocamanalohuani ipan Jerusalén momajtoc tlajtlacoli campa hueli ipan nochí ni tlali. Ininpampa yajuanti tlen quichihuaj ome ininxayac, ni tlali temic ica tlamantli tlen tlahuel fiero.” <sup>16</sup> Huajca ama TOTECO Tlen Quinyacana Ielhuicac Ejcahua Ma Tlatlanitij, quej ni quinilhuía israelitame: “Amo xiquintla-caquilica nopa tiocamanalohuani quema inmechcamahuíaj pampa inintlajtol ax tleno ipati. Yajuanti san quiyolitíaj tlen quincamahuía tlacame. Na ax niquinnojnotztoc. <sup>17</sup> Yajuanti quinpo-huilijtinemij tlacame tlen nechcualancaitaj: ‘¡Ax tleno imopantis!’ Huan nopa tlacame tlen san quitoquilíaj tlen fiero tlen quinequij quichihuase, quinilhuíaj: ‘¡TOTECO quijjtohua para inquiipyase tlasehuilistli huan ax tleno tlen ax cuali panos!’”

<sup>18</sup> Huan na niquijto: Niyon se tlen nopa tiocamanalohuani quiixmatij TOTECO, niyon tlen ya-

jaya ixtacatzi moilhuía. Yeca ax huelis quicaquis itlajtol. Niyon se yajuanti ax quichijtoc campeca para quitlacaquilis intla TOTECO quinotzayaya. <sup>19</sup> Xiquitaca, icualancayo TOTECO hualas queja se hueyi ajcomalacatl tlen quinassis ipan inintzon-teco nopa ax cuajcualme. <sup>20</sup> Icualancayo TOTECO ax tlamic hasta quintlamitlatzacuiltis nopa tlacame tlen fiero ininyolis, senquistoc queja yajaya moilhuijtoc para quichihuas. Teipa quema altepetl Jerusalén ya huettos, israelitame sampa quimachilise nochi ya ni.

*Itlajtol TOTECO para nopa istlacatica tiocamanalohuani*

<sup>21</sup> “Na ax niquintlantoc nopa tiocamanalohuani, niyon ax niquinmacatoc niyon se tlajtoli, pero yajuanti quiijtohuaj para tlayolmelahua na notlajtol. <sup>22</sup> Intla yajuanti elisquíaj na notiocamanalojcahua, quimajtosquíaj tlen nimoilhuía ixtacatzi ipan noyolo huan quicactosquíaj notlajtol. Nojquiya quinpohuilisquíaj notlacajhua huan quinyolcuepasquíaj tlen inintlajtlacolhua.

<sup>23</sup> “Na ax niDios tlen niitztoc san ipan se lugar. Na niquila nochí tlen inquichihuaj ica huejca. <sup>24</sup> Axaca hueli motlatis para ax niquitas. Na niitztoc campa hueli. Nijtemitía elhuicactli huan tlaltepactli. Queja nopa niwijtohua niimoTECO.

<sup>25</sup> “Na nijcactoc nopa tiocamanalohuani quiijtohuaj: ‘Xijtlacaquílica ni temictli tlen TOTECO nechnextili ipan ni yohuali.’ Huan teipa tepohuilíaj istlacayotl huan quiijtohuaj na niquinmacac nopa tlajtoli, pero axtle. <sup>26</sup> ¿Hasta quema ni tiocamanalohuani tlacajcayahuase

huan tepohuilise tlajtoli tlen san yajuanti quiyolitíaj ipan ininyolo? <sup>27</sup> Moilhuiáj ica nopa temictli tlen yajuanti tepohuilíaj, quichihuase para notlacajhua ma nechtlahuelcahuaca queja nechtlahuelcajque inintatahua para quinhueyichihuase nopa teteyome tlen Baal. <sup>28</sup> Pero xiquincahua nopa istlacatica tiocamanalohuani ma tepohuilica inintemic. Huan xiquincahua notlayolmelajcahua tlen temachme ma tepohuilica xitlahuac sesen tlajtoli tlen na niquinmaca. Itlasolo nopa trigo ax tleno ipati, pero iyol nopa trigo, quena, miyac ipati. Queja nopa niimoTECO niquijtohua.” <sup>29</sup> Huan TOTECO quijito: “Ax tetlatía notlajtol queja tlilt? Quena, notlajtol quipiya chicahualistli queja se martillo tlen quitlapana tetl.

<sup>30</sup> “Xiquitaca nimochijtoc niinincualancaitaca ni tiocamanalohuani tlen quiichtequilíaj tlajtoli se ica seyoc huan quijtohua para na niquinmacac nopa tlajtoli. <sup>31</sup> Nimotlalía niinincualancaitaca nopa tiocamanalohuani tlen camatij yejyectzi para más quincuapolose notlacajhua huan quijtohuaj: ‘¡TOTECO quijtojtoc ni tlajtoli!’ <sup>32</sup> Nojquia nimochijtoc niinincualancaitaca yajuanti tlen tepohuilíaj temictli tlen san istlacayotl pampa san yajuanti quiyolitíaj. Ica ya nopa quincuapolohuaj notlacajhua huan quinchihualtíaj ma tlajtlacolchihuaca. Na ax niquintitlantoc huan ax niquinmacatoc niyon se tlajtoli para quinyolmelahuase notlacajhua. Yajuanti ax quinpalehuíaj notlacajhua niyon quentzi. Queja nopa niimoTECO niquijtohua.”

*Quejatza ma nitepohuilis itlajtol TOTECO*

<sup>33</sup> Huan nojquiya TOTECO nechilhui: “Huan intla se tlacatl, o se istlacatica tiocamanalojquetl, o se totajtzi mitztlaijilhuis huan mitzilhuis: ‘¿Tlachque tlajtoli o tlamamali tlen etic tijhualica ama tlen TOTECO?’ Huajca xiquinnanquili quejni: ‘Imojuanti initztoque nopa tlamamali tlen etic huan TOTECO inmechtepexihuis tlen icuitlapa.’ Queja nopa xiquinilhui. <sup>34</sup> Intla se istlacatica tiocamanalojquetl, se totajtzi o se tlacatl mitztlaijilhuis huan quiijtos: ‘Na nijpiya se tlajtoli tlen etic tlen TOTECO’, nijtlatzacuiltis yajaya huan noch i familia. <sup>35</sup> Cuali para inmotlajtlanise se ica seyoc quej ni: ‘¿Quejatza mitznanquiljtoc TOTECO? ¿Tlachque quiijtojtoc?’ <sup>36</sup> Pero ma axaca quitequihui nopa tlajtoli tlen quiijtohua: ‘Nijpiya se tlajtoli tlen TOTECO tlen etic o tlen quihualica cuesoli.’ Pampa intla ajqueya quitequihuis, nijchihuaultis ma eli para ya se tlamamali tlen tlahuel etic huan tlen quihualica cuesoli. Pampa nopa tlacame tlen mitztlaijilhuiáj huan queja nopa quiijtohuaj, teipa quipatlase notlajtol, na nimoTeco huan na tlen niitztoc huan Na Tlen Niquinyacana Noelhuicac Ejcahua Ma Tlatlanitij.

<sup>37</sup> “Jeremías, ya ni tlen tiquinilhuis nopa tiocamanalohuani: ‘¿Tlachque quiijtohua TOTECO? ¿Tlachque mitzilhuijtoc?’ <sup>38</sup> Huan intla mitztlaijilhuiise huan mitznanquilise ‘¿Tijpiyaj se tlajtoli tlen TOTECO tlen etic huan tlen quihualica cuesoli?’ yonque niquinilhuijtoc para ax quiijtose nopa tlajtoli, <sup>39</sup> huajca niquinquixtis tlen nica noixpa huan niquinquixtis tlen ni altepetl tlen nimechmacac imojuanti huan imohuejcapan

tatahua. <sup>40</sup> Huan niquintlalilis pinahualistli huan niquinechcapantlalis para nochipa huan nochiquinhuetzquilise para nochipa.”

## 24

### *Tlanextili tlen nopa higos*

<sup>1</sup> Tlanahuatijquetl Nabucodonosor tlen tlali Babilonia quihuicac Jeconías, icono Joacim, tlen elqui tlanahuatijquetl tlen tlali Judá ipan tlali Babilonia inihuaya nochi nopa tlayacanani, cuaximani huan teposchihuani. Huan quema ya quinhuicatoya, ipan se tlanextili TOTECO nechnextili ome chiquihuitl tlen higos tlen eltoya iixpa nopa tiopamitl ipan Jerusalén. <sup>2</sup> Se chiquihuitl quipiyayaya higos tlen cuajcuali, tlen sanoc icsitoya. Huan nopa seyoc chiquihuitl quipiyayaya higos tlen ya lochontoyaj hasta ayoc aca huelisquía quicuas.

<sup>3</sup> Huajca TOTECO nechilhui: “¿Tlachque tiquita, Jeremías?” Huan na niquilhui: “Niquita higos. Sequin tlahuel cuajcuali huan sequin tlahuel nepolijtoc hasta axaca hueli quicuas.”

<sup>4</sup> Huan TOTECO nechnojnotzqui huan nechilhui: <sup>5</sup> “Quej ni nimoTECO huan niinDios israelitame niquijtohua: Nopa higos tlen cuajcuali quinixnextía nopa tlacame tlen niquinquixtijtoc tlen tlali Judá huan niquintitlanqui ipan tlali Babilonia campa itztoque nopa caldeo tlacame. Niquinquixtijtoc para niquinchihuilis tlen cuali. <sup>6</sup> Na niquinmocuitlahuis para ma quinchihuilica tlen cuali huan sampa niquinhualicas ipan inintlal. Niquinpalehuis huan ax niquincocos. Elise

queja toctli tlen nijtocas huan ax nijhuihuitlas.  
<sup>7</sup> Huan na niquinmacas se tlalnamiquilistli para ma nechixmatica para na niDIOS huan niininTECO. Yajuanti elise notlacajhua huan na nielis niininTeco pampa mocuepase ica na ica nochiniyolo.

<sup>8</sup> “Pero nopa higos tlen lochontoque quiixnextía Sedequías, tlen ama tlanahuatijquetl tlen tlali Judá. Huan quinixnextía nojquiya itequiticahua, huan nochí nopa Jerusalén ehuani tlen noja mocajtoque ipan ni tlali huan nochí tlen yajque ipan tlali Egipto. Yajuanti niquitas queja nopa higos tlen lochontoque hasta ayoc aca hueli quicuas.  
<sup>9</sup> Na nijchihuas para tlacame ma quinijiyaca ipan nochí tlaltini. Quinpinajtise huan tlen hueli quinilhuise. Campa hueli campa na niquintitlanis, nochí tlacame quintase para tlatelchi-hualme. <sup>10</sup> Huan na niquintitlanilis tlatehuijcayotl, mayantli huan cocolistli hasta tlamimiquise ipan nopa tlali Israel tlen niquinmacac yajuanti huan ininhuejcapan tatahua.”

## 25

*Israelitame tlatequipanose 70 xihuitl ipan sequinoc tlaltini*

<sup>1</sup> Ni tlajtoli TOTECO nechmacac quema Tlanahuatijquetl Joacim, icone Josás, yahuiyaya para nahui xihuitl tlanahuatis. Huan ni tlajtoli eliyaya para nochí tlacame tlen tlali Judá. Ya ni nojquiya elqui ipan nopa xihuitl quema Nabucodonosor pejqui tlanahuatía ipan tlali Babilonia.

<sup>2</sup> Huan na niJeremías quej ni niquinilhui nochí nopa tlacame tlen tlali Judá huan nochí tlen itztoyaj ipan altepetl Jerusalén: <sup>3</sup> “TOTECO nechcamahuijtoc para 23 xihuitl. Pejqui quema Josías, icone Amón, yahuiyaya para 13 xihuitl tlanahuatis ipan itlanahuatil ipan tlali Judá. Huan sesen huelta quema nechmacac itlajtol, nimechilhuijtoc, pero imojuanti noja ax inquitlacaquilijtoque.

<sup>4</sup> “Ipan nochí nopa tonali, TOTECO ajachica inmechtitlaniliyaya itiocamanalojcahua, pero imojuanti ax inquichihuilijtoque cuenta inintlajtol. <sup>5</sup> Nopa tiocamanalohuani nochipa inmechilhuiyayaj quej ni: ‘Xiquisaca ipan nopa fiero ojtli tlen inquitoquilíaj huan xijcahuaca nochí tlen ax cuali inquichihuaj. Queja nopa huelis inquisenhuiquilise initztose ipan ni tlali tlen TOTECO inmechmacac imojuanti huan imohuejcapan tatahua para ximoaxcatica para nochipa. <sup>6</sup> Amo xiquinhueyichihuaca teteyome, niyon tlaixcopincayome tlen inquinchijtoque ica imoma para ax inquicualancamacase TOTECO. Intla inquitlepanitase TOTECO, ax inmechtlatzacuiltis.’

<sup>7</sup> “Huan ama TOTECO quijjohua: ‘Pero imojuanti ax inquinequij innechtlacuquilise. Tlahuel inyoltetique. Inquinhueyichihuaj totiotzitzí tlen imojuanti inquichijtoque huan ica ya nopa innechchijtoque ma nicualani. Yeca nochí tlamantli tlen hualajtoc imopani eltoc queja imoseltitzi inmotemolijque.’

<sup>8</sup> “Huan yeca ama NiimoTECO Tlen Niquinyacana Noelhuicac Ejcahua Ma Tlatlanitij, inquitjohua: Pampa ax inquitlacaquilijtoque notlaj-

tol, quej ni nijchihuas. <sup>9</sup> Ni quisentilis nopa soldados tlen nopa tlali ica norte tlen quinycana notlatequipanojca Nabucodonosor, yajaya tlen itztoc tlanahuatijquetl tlen tlali Babilonia. Huan niquinhualicas para ma quitehuiquij ni tlali huan nochi nopa tlacame huan nopa tlaltini tlen mopantíaj imonechca. Nimechtzontlamiltis nochi imojuanti huan nijcahuas imotlal xolejtoc huan nochi tlen quiitase momajmatise huan quiijiyase. Queja nopa niimoTECO niquijtohua. <sup>10</sup> Na nijtlamiltis nochi paquelistli huan huetzquistli tlen onca ipan ni tlali. Ayoc quicaquise itos se mosihuajtijquetl, niyon iichpoca ipan se ilhuitl tlen nemamictili. Nochi tlamantli nijtlamiltis. Nochi caltini mocahuase ipan tzintlayohuilotl pampa ayoc oncas aceite para inintlahuil. Ayoc tequitis molino pampa ax oncas trigo para quichihuase harina para pantzi. <sup>11</sup> Ni tlali mocahuas cactoc queja huactoc tlali. Huan nochi tlaltini ipan tlaltepactli momajmatise ipampa tlen ipantis ni tlali. Huan israelitame huan nochi tlen ehuani nopa sequinoc tlaltini tlen quiyahualojoque, quitequipanose nopa tlanahuatijquetl tlen tlali Babilonia para 70 xihuitl.

<sup>12</sup> “Teipa quema nopa israelitame ya tlatequipanojtose 70 xihuitl, na nijlatzacuiltis nopa tlanahuatijquetl tlen tlali Babilonia huan nochi itlacajhua ipampa inintlajtlacolhua. Quena, nijchihuas inintlal nopa caldeos para ma elis se huactoc tlali para nochipa. <sup>13</sup> Huan na nijtitlanis ipan yajuanti nochi tlen fiero tlen nijtencajtoc ipan ni amatlapohuali. Niquintitlanilis nochi nopa tlatzacuiltili tlen Jeremías tlayolme-

lajqui para quinajsisquía nochí tlaltini. <sup>14</sup> Huan niquinmacuepilis nopa caldeos ipampa nochí tlen quinchijtoque notlacajhua. Huan miyac tlaltini huan huejhueyi tlanahuatiani quinchihuase nopa caldeos ma quintequipanoca san tlapic.”

*Tlanextili tlen nopa caxitl*

<sup>15</sup> Huan TOTECO Dios tlen toTeco tiisraelitame, nechilhui: “Xijcui ni caxitl tlen eltoc nomaco. Eltoc queja nopa caxitl temitoc ica nocualancayo. Huan nijnequi xijchihua para ma quiica nochí tlen ehuani nopa tlaltini campa na nimitztitlanis pampa nijnequi niquintlatzacuilton. <sup>16</sup> Huan quema yajuanti quiselise notlatzacuilton, tlahuel huihuipicase huan momimilose ipampa nopa tlatehuijcayotl tlen na niquintitlanilis.”

<sup>17</sup> Huajca na nijcuic nopa caxitl tlen eltoya imaco TOTECO, huan niquinmacac ma quiica nochí nopa tlaltini campa TOTECO nechtitlanqui. <sup>18</sup> Huan altepetl Jerusalén ehuani huan nochí tlen ehuani nopa altepetini tlen tlali Judá quiijke tlen nopa caxitl tlen icualancayo TOTECO. Huan nochí inintlanahuatijcahua huan inintlayacancahua quiique. Huan ipan nopa tlalochtli pejque para ma mocahua xolejtoque nopa tlaltini, huan ipan pinahualistli huan tlatelchihuali. Huan queja nopa mocajtoque hasta ama. <sup>19</sup> Nojquiya niyajqui ipan tlali Egipto. Huan nopa Faraón huan itlatequipanojcahua, nopa tlayacanani huan nopa tlacame, <sup>20</sup> quiique tlen icualancayo TOTECO ininhuaya nopa sejcoyoc ehuani tlen itztoyaj nopano. Nojquiya quiijke nopa tlanahuatiani tlen tlali Uz huan

nopa tlanahtiani tlen nopa tlaltini campa itztoque nopa filisteos ipan nopa altepetini Ascalón, Gaza, Ecrón huan nopa tlacame tlen noja mocajtoyaj ipan altepetl Asdod. <sup>21</sup> Huan nojquiya niquinpaxalo nopa tlaltini Edom, Moab huan Amón. <sup>22</sup> Huan nochí nopa tlanahtiani tlen tlali Tiro huan Sidón huan nojquiya nopa tlanahtiani tlen itztoque ipan nopa seyoc nali tlen nopa hueyi atl Mediterráneo. <sup>23</sup> Nojquiya niyajqui ipan tlali Dedán, Tema, Buz huan ipan nopa sequinoc tlaltini tlen mopantíaj huejca. <sup>24</sup> Huan nochí nopa tlanahtiani tlen tlali Arabia huan nopa tlanahtiani tlen nopa tlacame tlen itztoque maneltic inieso ica sequinoc ipan nopa huactoc tlali. <sup>25</sup> Huan nojquiya nopa tlanahtiani tlen tlali Zimri, Elam huan Media. <sup>26</sup> Huan nochí nopa tlanahtiani tlen mopantíaj ica norte, tlen huejca huan tlen nechca, se huan seyoc, huan nochí nopa tlanahtiani tlen itztoque ipan nochí tlaltepactli. Huan teipa ica itlamiya, nopa tlanahtijquetl tlen tlali Babilonia nojquiya quiic tlen icualancayo TOTECO.

<sup>27</sup> Teipa TOTECO nechilhui: “Xiquinilhui tlacame para nimotECO Tlen Niquinyacana Noelhuicac Ejcahua Ma Tlatlanitij, huan niininTeco israelitame, quej ni niquijtohua: Xiquica nohueyi cualancayo tlen eltoc ipan ni caxitl hasta ininhuintise, inmisotlase huan inhuetzise para ayoc quema inmoquetzase, pampa na nimechtitlanilis huejhueyi tlatehuijcayotl. <sup>28</sup> Huan intla yajuanti ax quinequise quiselise nopa caxitl para quiise tlen

nocualancayo nimoTECO Tlen Niquinyacana Noelhuicac Ejahua Ma Tlatlanitij, huajca xiquinilhui para monequi quiise yonque quinequij o ax quinequij.<sup>29</sup> Xiquitaca, na nipecjtoc niquintlatzacuiltia notlacajhua ipan Jerusalén, nopa altepetl tlen quihuica notoca. Huan intla niquintlatzacuiltia ni altepetl, ¿inmoilhuij insequinoc tlali ehuani inmomanahuise? ¡Axtle! Ax huelis inmomanahuise tlen nopa tlatzacuiltili. Pampa na nijchihuas ma onca tlatehuijcayotl ipan nochi tlaltini. Queja nopa niquijtohua nimoTECO Tlen Niquinyacana Noelhuicac Ejahua Ma Tlatlanitij.

<sup>30</sup> “Huajca ta, tiJeremías, xiquinyolmelahua tlacame nochi ni tlajtoli tlen na nimitzilhuijtoc. Xiquinilhui: ‘Na nicamatis tlen nepa elhuicac ipan nochaj tlen tlatzejtzelotic para niquinteihuis notlacajhua huan nochi tlen itztoque ipan tlaltepactli. Nitzajtzis chicahuac queja nopa tlacame tlen tzajtzij quema moquejquetzaj ipan xocomecatl itlajca. <sup>31</sup> Nitlahuelchihuas chicahuac pampa niquintlajtolsencahuas huan niquintlalilis tlatzacuiltili nochi tlacame hasta campa ontlantoc tlaltepactli. Quena, nijsencajtoc niquintlatzacuiltis tlen ehuani ipan nochi tlaltini. Huan niquinmictis nochi tlajtlacolchihuani.’” Queja nopa quijito TOTECO.

<sup>32</sup> Nojquiya TOTECO Tlen Quinyacana Ielhuicac Ejahua Ma Tlatlanitij quijito: “Xiquitaca, nopa tlatzacuiltili ajsis ipan se tlali huan teipa panos hasta ipan seyoc. Nohueyi cualancayo motlalanas

queja se hueyi ajcomalacatl huan quinajsis nochí tlaltini ipan tlaltepactli.”

<sup>33</sup> Huan ipan nopa tonal quema TOTECO tetzontlamiltis, inintlacayohua mocahuase tepejtoque tlalchi tlen se lado hasta seyoc lado tlen ni tlaltepactli. Elise tlahuel miyac hasta nochí tlaltepactli temis ica mijcatzitzí. Huan axaca quinchquilis, niyon axaca quintlalanás para quintlapachos. Inintlacayohua mocahuase tepejtoque tlalchi queja cuitlatl.

<sup>34</sup> ¡Infiero tlamocuitlahuiani! Xichocaca huan ximocuesoca. Imojuanti tlen inquinacyacanaj tlacame ipan nochí tlaltepactli, ximomimilocá ipan cuanextli para inquinextise imotequipachol pampa ya ajsic hora para inmechtzontlamiltise. Inhuetzise queja sihuame tlen yamanic inintlacayo. <sup>35</sup> Huan niyon se tlamocuitlahuijquetl ax huelis motlatis, niyon ax huelis cholos. <sup>36</sup> Xijtlacaquilica quejatza tzajtzij nopa tlamocuitlahuiani huan nopa tlayacanani. Ayoc quimati j tlachque quichihuase pampa TOTECO quixolejtoc ininpotrero. <sup>37</sup> Quena, TOTECO ica ihueyi cualancayo quixolehuas nochí tlamayamitl ica yejyectzi sacatl. <sup>38</sup> TOTECO quincajtoc itlacajhua queja se león tlen quicahua iosto huan yahui quitemoti seyoc tlapiyali para quicuas. Inintlal itlacajhua mocahuas tlamisosolijtoc ipampa nopa soldados tlen hualase ipan nopa hueyi tlatehuijcayotl huan ica ihueyi cualancayo TOTECO.

*Quinequij quimictise Jeremías*

<sup>1</sup> Ipan nopa achtohui xihuitl quema Joacim, icono Josás san pehuayaya tlanahuatis ipan tlali Judá, TOTECO nechnojnotzqui na, niJeremías, huan nechilhui: <sup>2</sup> “Ximoquetza iixpa notiopa huan xiquincamahui nochí nopa tlacame tlen ehuaj ipan altepetini tlen tlali Judá tlen hualahuíj ipan nopa tiopamitl para nechhueyichihuauquij. Xiquinilhui nochí tlen na nimitzilhuijtoc. Amo xijquixtili niyon se tlajtoli tlen monequi quitla-caquilise. <sup>3</sup> Huelis yajuanti mitztlacaquilise huan quicahuase nochí nopa fiero ojti tlen yajuanti quitoquilíaj, huan huajca na nimoyolcuepas huan ax niquintlatzacuiltis ipampa inintlajtlacolhua queja niquijtojtoya.

<sup>4</sup> “Xiquinilhui para na niininTECO quej ni niquijtohua: ‘Intla ax inquitlepanitase nopa tlanahuatili tlen nimechmacatoc, <sup>5</sup> huan ax inquintlacaquilise notiocamanalojahua tlen na niquintatlantoc ajachica para ma inmechyolmelahuaca ximoyolcuepaca, <sup>6</sup> huajca nijxolehuas ni tiopamitl queja nijxolejqui nopa yoyon tiopamitl tlen eltoya ipan altepetl Silo, huan tlen ehuani nochí tlaltini ipan ni tlaltepactli quitocaxtis altepetl Jerusalén quema quinequise quitelchiuase sequinoc.’ ”

<sup>7</sup> Huan nopa totajtzitzi, nopa tiocamanalohuani huan nochí tlen ehuani ipan ni altepetl quicajque tlen na, niJeremías, niquijto nepa ipan tiopamitl tlen iaxca TOTECO. <sup>8</sup> Huan quema nitlantoya nicamati nochí nopa tlajtoli tlen TOTECO nechnahuatijtoya ma niquijto, huajca nopa totajtzitzi, tiocamanalohuani huan nochí nopa tla-

came tlen mosentilijtoyaj ipan nopa tiopamitl nechitzquijque huan nechilhuijque: “¡Timquis!  
<sup>9</sup> ¿Para tlen tiquijtohua para TOTECO quixole-huas ni tiopamitl queja quichijqui ica nopa yoyon tiopamitl tlen eltoya ipan altepetl Silo? Huan ¿para tlen tiquijtohua para altepetl Jerusalén mocahuas xolejtoc huan nochí timiquise huan axaca momanahuis?” Huan nochí tlacame tlen nopa altepetl pejqui quitemajmatis Jeremías quema moquetzayaya iniixpa ipan nopa tiopamitl.

<sup>10</sup> Huan quema nopa huejhueyi tlayacanani tlen tlali Judá quicajque tlen panoyaya, quisque tlen nopa caltlanahuatili huan mosehuijque san sejco campa nopa yancuic puerta tlen nopa tiopamitl para tlatlajtolsencahuase. <sup>11</sup> Huajca nopa totajtzitzi huan nopa tlacajcayajca tiocamanalohuani quinnextilijque nopa tlayacanani huan nopa tlacame tlen nopa altepetl tlen ica nechteilhuiyayaj. Quiijtojque: “Ni tlacatl quinamiqui miquis pampa camatitoc para tlen fiero quiajsis ni altepetl. Imojuanti inquicactoque tlen yajaya quiijto.”

<sup>12</sup> Huajca na, niJeremías, niquincamahui nopa tlayacanani huan nochí nopa tlacame tlen nopa altepetl, huan niquinilhui:

“TOTECO nechtitlanqui para ma nitlayolme-lahuaqui tlachque ipantis ni tiopamitl huan ni altepetl. Huan yajaya nechmacac nochí nopa tlajtoli tlen niquijtojtoc. <sup>13</sup> Pero intla imojuanti inquicahuase imotlajtlacolhua huan inpehuase inquitlepanitase TOTECO tlen itztoc toDios, huajca yajaya ax inmechtitlanilis nopa tlatzacuillili tlen quiijtojtoya quititlanis imopani. <sup>14</sup> Huan

ica na, nica niitztoc imomaco. Ax hueli nimo-manahuis. Huajca xinechchihuila tlen imo-juanti inquiitaj para xitlahuac. <sup>15</sup> Pero xijmat-ica cuali ya ni: Intla innechmictise, huajca imo-juanti huan ni altepetl huan nochi tlacame inqui-huicase tlajtlacoli pampa inquiimictijque se tlacatl tlen ax quipiya tlajtlacoli. Melahuac nimechil-huía para yajaya TOTECO tlen nechtitlanqui ma nimechyolmelahuaqui nochi tlajtoli tlen inquiaca-jque niquijto.”

<sup>16</sup> Huajca nopa tlayacanani huan nopa tlacame tlen nopa altepetl camatque ininhuaya nopa tota-jitzitzi huan nopa tlacajcayajca tiocamanalohuani, quinilhuijque: “Ni tlacatl ax quinamiqui miquis pampa yajaya techcamahuijtoc ica tlajtoli tlen TOTECO Dios.”

<sup>17</sup> Huajca se tlen nopa huehue tlacame tlen quipixqui tlanahuatili moquetzqui huan quincamahui nochi nopa tlacame tlen quiyahualojtoyaj, quinilhui: <sup>18</sup> “Ya ni nelía xitlahuac, pampa quema Ezequías eliyaya tlanahuatijquetl ipan tlali Judá, nopa tiocamanalojquetl Miqueas tlen ehua Moreset quinyolmelajqui nopa tlacame huan quinilhui para TOTECO Tlen Quinyacana Ielhuicac Ejcahua Ma Tlatlanitij quijtohua para quixolehuas ni tepetl queja quipoxahua se tlali campa quitocase xinachtli. Huan quijto ni altepetl Jerusalén mocahuas queja se tlamontomitl tlen tetl. Huan nopa lugar campa eltoc itiopa TOTECO elis queja se hueyi cuatitlamitl. Queja nopa Miqueas quijto.

<sup>19</sup> “Pero Tlanahuatijquetl Ezequías huan nochi nopa Judá ehuani ax quimictijque Miqueas san

pampa quinilhuijtoyaj ya nopa. ¡Axtle! Yajuanti quicajque inintlajtlacolhua huan momaijto iixpa TOTECO. Huan quitlajtlanijque tlapojojpolhuili tlen inintlajtlacolhua. Huan quena, TOTECO quintla-sojtlac huan ax quintlatzacultí queja quinilhuijtoyaj. Huan intla tojuanti tijmictise Jeremías san pampa techyolmelahua itlajtol TOTECO, huajca TOTECO huelis techchihuolis se tlamanatl tlen noja más fiero.”

<sup>20</sup> Nojquiya itztoya seyoc tiocamanalojquetl tlen itoca Urías, tlen elqui iconē Semaías tlen altepetl Quiriat Jearim. Huan yajaya nojquiya tlayolmelahuayaya tlen ipantis ni altepetl huan ni tlali ipan nopa tonali quema na, niJeremías, niquincamahuiyaya tlacame huan quiijtohuayaya ihuical ipantis Jerusalén queja na.

<sup>21</sup> Pero quema nopa Tlanahuatijquetl Joacim huan nopa tlayacanani tlen soldados huan nochí nopa tequihuejme quicajque tlen Urías quiijtohuayaya, nopa tlanahuatijquetl tlanahuati ma quimictica. Huan Urías momacac cuenta para quinequiyayaj quimictise, majmajqui huan mochololti hasta tlali Egipto. <sup>22</sup> Pero nopa Tlanahuatijquetl Joacim quintitlanqui Elnatán, iconē Acbor huan sequinoc tlacame hasta tlali Egipto para ma quiitzquitij Urías. <sup>23</sup> Huan yajuanti quiqxijque ipan Egipto huan quihuicaque campa Tlanahuatijquetl Joacim. Huan yajaya quimicti ica machete huan tlanahuati ma quitlalpachoca ipan se tlen hueyi ostotl.

<sup>24</sup> Pero quema nechteilhuiyaya na, niJeremías, nechpalehui Ahicam, iconē Safán, tlen eliyaya itlacuilojca nopa tlanahuatijquetl. Huajca ya-

jaya quincamahui nopa tlayacanani para ma ax nechtemactilica ininmaco nopa tlacame para nechmictise.

## 27

### *Jeremías quihuica se cuamaxali ipan iquechtla*

<sup>1</sup> Ipan nopa achtohui xihuitl tlen itequi Joacim, icone Josás, queja tlanahuatijquetl tlen tlali Judá, TOTECO nechnojnotzqui na, niJeremías, huan nechilhui: <sup>2</sup> “Ximochijchihuili se cuamaxali huan xiquilpi moquechtla ica cuetlaxtli queja se tlapatl quiquechilpía se huacax para ma tlapoxtahua. <sup>3</sup> Teipa xiquintitlanili tlajtoli para nopa tlanahuatiani tlen tlali Edom, Moab, Amón, Tiro huan Sidón. Nochi nopa tlanahuatiani ama quinpiyaj tlapalehuiani ipan altepetl Jerusalén para quipaxalose Tlanahuatijquetl Sedequías. Intla tiquinmacas nopa tlajtoli inintlapalehuijcahua huelis quinhuicase inintlanahuatijcahua quema mocuepaj ipan inintlal. <sup>4</sup> Xiquinilhuica imotecohua para TOTECO Tlen Quinyacana Ielhuicac Ejcahua Ma Tlatlanitij, yajaya tlen ininteco israelitame, quintitlanilía ni tlajtoli: <sup>5</sup> Ica nohueyi chicahualis nijchijchijqui tlaltepactli, tlacame huan nochi tlapiyalime tlen itztoque ipan tlaltepactli. Nochi noaxca huan nijmaca tlen na nijnequi. <sup>6</sup> Huan ama nochi imotlalhua na nijmactilijtoc notlatequipanojca Nabucodonosor tlen itztoc tlanahuatijquetl tlen tlali Babilonia. Huan nochi tlapiyalime tlen nemij cuatitla nojquiya nijmactilijtoc para quitequipanose. <sup>7</sup> Huan nochi tlacame ipan nochi tlaltini quitequipanose Nabucodonosor, icone huan iixhui hasta ajsis

tonali quema yajaya nojquiya huetzis ininmaco sequinoc. Ipan nopa tonali tlacame tlen miyac tlaltini huan huejhueyi tlanahuatiani moaxcastise itlal huan quichihuase ma quintequipanotij.

<sup>8</sup> Huajca ximotemaca ica Nabucodonosor huan xijtequipanoca. Xijtlepanitaca nopa tlanahuatili tlen tlali Babilonia. Pampa nochí tlaltini tlen ax quinequise quitequipanose nopa tlanahuati-jquetl tlen tlali Babilonia, na niqintlatzacultis ica tlatehuijcayotl, mayantli huan cocolistli hasta motemactilise imaco Nabucodonosor.

<sup>9</sup> “Yeca nimechilhuía para amo xiquinnelto-quilica nopa istlacatica tiocamanalohuani, tetonalitani, tlatemiquini huan tetlajchihuiani tlen inmechilhuíaj para ax inquitequipanose nopa tlanahuatijquetl tlen tlali Babilonia. <sup>10</sup> Pampa nochí yajuanti san istlacatij. Huan intla imojuanti inquinnequilise tlen yajuanti quijtohuaj huan ax inquinnequise inmotemacase ica nopa tlanahuatijquetl tlen tlali Babilonia, huajca na nimechquixtis ipan imotlal huan nimechtitlanis huejca huan nopano inmiquise. <sup>11</sup> Pero nochí tlacame tlen motemacase ica nopa tlanahuatijquetl tlen tlali Babilonia, na niquincahuilis ma itztoca ipan inintlat para tlapoxahuase huan quitocase ininxinach queja momajtoque quichihuaj. Queja nopa niimoTECO niqijtohua.”

<sup>12</sup> Huajca na, niJeremías, nojquiya nijpohuili ya ni nopa tlanahuatijquetl tlen tlali Judá tlen itoca Sedequías, niquilhui:

“Intla tijnequi tiitztos, huajca ximotemaca ica nopa tlanahuatijquetl tlen tlali Babilonia. <sup>13</sup> ¿Para tlen timquis ininhuaya nochí motlacajhua ipan

tlatehuijcayotl, o ica mayantli huan cocolistli? Pampa TOTECO quijtojtoc quititlanilis tlatehuijcayotl, mayantli huan cocolistli tlen hueli tlali tlen ax quinequi motemacas ica nopa tlanahuati-jquetl tlen tlali Babilonia. <sup>14</sup> Huajca amo xiquintlacaquili nopa tiocamanalohuani tlen mitzilhuíaj para ax tijtequipanos nopa tlanahuatijquetl tlen tlali Babilonia pampa nochi yajuanti san istlacatij. <sup>15</sup> Na ax niquntitlantoc nopa tiocamanalohuani yonque yajuanti quijtohuaj niquinmacac inintlajtol. Huan intla ta tijsenhuiquilis tiquin-neltoquilis, nimitzquixtis tlen ni tlali huan tim-iquis ipan seyoc tlali sentic ica ni istlacatICA tiocamanalohuani.”

<sup>16</sup> Nojquiya niqunincamahui nopa totajtzitzi huan nochi nopa tlacame huan niquinilhui:

“Quej ni quijtohua TOTECO: ‘Amo xiquinneltoquilica nopa istlacatICA tiocamanalohuani tlen inmechilhuíaj para nopa tlamantzitzi tlen oro tlen quiquirijque ipan itiopa TOTECO huan quihiuicaque ipan tlali Babilonia nimantzi inmechcuepilise, pampa nochi ya nopa senquistoc istlacayotl. <sup>17</sup> Amo xiquintlacaquilica. Más cuali ximotemaca para inquitequipanose nopa tlanahuatijquetl tlen tlali Babilonia para initztose. ¿Para tlen inquichihuase para ma nijxolehuas ni altepetl huan para ma mocahuas queja huactoc tlali? <sup>18</sup> Huan intla nopa tlacame nelia itiocamanalojahua TOTECO, ma momaijtoca ica TOTECO Tlen Quinyacana Ielhuicac Ejcahua Ma Tlatlanitij. Ma quitlajtlanica para ma ax quinhuicaca ipan tlali Babilonia nopa tlamantzitzi tlen oro tlen

noja mocajtoc ipan ni tiopamitl, huan ipan icaltlanahuatil nopa tlanahuatijquetl tlen tlali Judá huan ipan nopa caltlanahuatili tlen altepetl Jerusalén.’

**19** “Pampa quej ni quijito TOTECO Tlen Quinyacana Ielhuicac Ejcahua Ma Tlatlanitij tlen nopa tlaquetzali tlen bronce tlen eltoc iixpa nopa tiopamitl, huan nopa pileta tlen bronce campa quitecaj atl tlen eltoc calixpa tlen nopa tiopamitl huan nochí sequinoc tlamantli tlen mocahua ipan ni altepetl. **20** Nabucodonosor, tlanahuatijquetl tlen tlali Babilonia, ax quinhuicac ni tlamantli quema quinhuicac itlal Tlanahuatijquetl Jeconías, icone Joacim, huan nopa tlayacanani tlen tlali Judá huan altepetl Jerusalén. **21** Pero TOTECO Tlen Quinyacana Ielhuicac Ejcahua Ma Tlatlanitij, huan tlen toTeco tiisraelitame quijtohua ni tlen nochí nopa tlamantzitzi tlen mocajque ipan tiopamitl huan ipan caltlanahuatili tlen tlali Judá huan altepetl Jerusalén: **22** ‘Quihuicase ipan tlali Babilonia nochí ni tlamantli tlen noja mocahuaj. Huan nepa mocahuase hasta quema na nitlanahuatis para sampa ma quinhualicaca ipan altepetl Jerusalén.’ Queja nopa quijtohua TOTECO.”

## 28

### *Jeremías huan Hananías*

**1** Se tonali ipan metztli macuili ipan toisraelita calendario [28:1 Ni metztli elqui ipan agosto huan septiembre 593 a.C. ipan tocalendario tlen ama.], quema Sedequías yahuiyaya para nahui xihuitl tlanahuatía ipan tlali Judá, Hananías, icone Azur,

nechcamahui. Hananías eliyaya se istlacatica tiocamanalojquetl tlen tlali Gabaón huan nechcamahui tlamiyacapa ipan itiopa TOTECO iniixtla nopa totajtzitzi huan nochí nopa tlacame. Nechilhui:

<sup>2</sup> —TOTECO Tlen Quinyacana Ielhuicac Ejcahua Ma Tlatlanitij huan yajaya tlen toTeco tiisraelitame quijtohua: ‘Na nimechtojtomas tlen nopa tlanahuatili tlen ica inmechilpitoc nopa tlanahuatijquetl tlen tlali Babilonia. <sup>3</sup> Tlen nica para ome xihuitl sampa nijhualicas ipan ni notiopa nochí nopa tlamantzitzi tlen motequihuiyaya nopano tlen Tlanahuatijquetl Nabucodonosor quinhuicac ipan tlali Babilonia. <sup>4</sup> Huan nojquiya sampa nijhualicas Jeconías, icone Joacim, nopa tlanahuatijquetl tlen tlali Judá. Huan niquinhualicas nochí nopa sequinoc tlacame tlen quinquixtijtoque huan itztoque ipan tlali Babilonia. Huan nijtlamiltis nochí nopa tlanahuatili tlen ohui tlen ica inmechilpitoc nopa tlanahuatijquetl tlen tlali Babilonia.’ Queja nopa quijto TOTECO.

<sup>5</sup> Huajca na, nitiocamanalojquetl Jeremías, nijnanquili nopa istlacatica tiocamanalojquetl Hananías iniixpa nopa totajtzitzi huan nochí nopa tlacame tlen itztoyaj ipan itiopa TOTECO, huan niquilhui:

<sup>6</sup> —Se paquelistli intla queja nopa elisquía. Nipaquisquía intla TOTECO quichihuas queja titlayolmelajtoc huan quihualicas nochí nopa tlamantzitzi tlen eltoya ipan itiopa huan nochí nopa tlacame tlen quinhuicatoque tlali Babilonia. <sup>7</sup> Pero ama xijtlacaquili ni tlajtoli tlen na nimitzilhuis iniixpa nochí ni tlacame:

<sup>8</sup> Nopa tiocamanalohuani tlen tlayolmelajque huejcajquiya quema ta huan na aya titlacatiyaya, yajuanti tlayolmelajque para ipan miyac tlaltini san oncas tlatehuijcayotl, mayantli huan cocolistli. <sup>9</sup> Huajca se tiocamanalojquetl tlen tlayolmelahua para oncas tlasehuilistli monequi quinextis para melahuac TOTECO quititlantoc. Quena, intla hualas tlasehuilistli queja quiijtojtoc, huajca nochí quimatise para itlajtol melahuac hualajqui tlen TOTECO.

<sup>10</sup> Huajca Hananías, nopa istlacatica tiocamanalojquetl, nechcuili nopa cuamaxali tlen nihuicayaya ipan noquechcuayo huan quipostejqui. <sup>11</sup> Huan quej ni quiijto iniixpa nopa tlacame tlen mosentilijtoyaj nopano:

—Ax panos ome xihuitl hasta TOTECO quej ni quipostequis nopa cuamaxali tlen tlatequipanoj-cayotl tlen Tlanahuatijquetl Nabucodonosor tlen tlali Babilonia quitlalía ininquechcuayo nochí tlaltini huan nochí quinmanahuis tlen amantzi tlatequipanohuaj san tlapic.

Huan ipan nopa tlalochtli na niquistejqui huan nimohuejcatlali. <sup>12</sup> Teipa quema Hananías ya quipostectoya nopa cuamaxali tlen nihuicayaya ipan noquechcuayo, TOTECO nechnojnotzqui na, niJeremías, huan nechilhui: <sup>13</sup> “Xiya campa Hananías huan xiquilhui para quej ni niimoTECO niquijtohua: ‘Ta tijpostejqui se cuamaxali tlen cuahuitl, pero ama ni tlacame quipiyaj se cuamaxali tlen tepostli ipan ininquechcuayo. <sup>14</sup> Pampa niimoTECO Tlen Niquinyacana Noelhuicac Ejcahua Ma Tlatlanitij niquijtohua: Na niquintlalilijtoc ininquechtlá nochí tlacame

tlen nochí ni tlaltini se cuamaxali tlen tepestli. Huan niquinchihualtis ma yaca quitequipanotij Tlanahuatijquetl Nabucodonosor tlen tlali Babilonia. Huan ni tlanahuatili axaca quipatlas pampa hasta nochí tlapiyalime nojquiya njimactilijtoc ya.’”

<sup>15</sup> Huajca na, niJeremías, quej ni niquilhui Hananías, nopa istlacatica tiocamanalojquetl:

—Xiquita, Hananías, TOTECO ax mitztitlantoc. Nelía hueyi tiquincajcajyajtoc ni tlacame pampa yajuanti quineltocaj moistlacaticayo. <sup>16</sup> Yeca ama TOTECO quiijtohua para ta timquis. Quena, timquis ipan ni xihuitl pampa ta timosisinijtoc ica TOTECO.

<sup>17</sup> Huan quena, ica ome metztli, Hananías mijqui.

## 29

### *Jeremías quintlajcuilhui tlen ya quinhuicatoque Babilonia*

<sup>1</sup> Ya ni nopa tlajtoli tlen na, nitiocamanalojquetl, Jeremías ipan altepetl Jerusalén niquintlajcuilhui nopa huehue tlacame totajtzitzi, tiocamanalohuani huan nochí tlacame tlen Tlanahuatijquetl Nabucodonosor quinhuicatoya ipan tlali Babilonia. <sup>2</sup> Ya ni panoc teipa quema Tlanahuatijquetl Nabucodonosor ya quinhuicatoya Babilonia Jeconías huan inana tlen eliyaya nopa sihua tlanahuatijquetl, nopa tlayacanani tlen icaltlanahuatil, nopa tlayacanani tlen sesen familia huan nopa tlacame tlen yajatij quichihuase tlen hueli tequitl. <sup>3</sup> Huan ni amatlajcuiloli nijtitlanqui ica Elasa, icode Safán, huan ica Gemarías, icode

Hilcías, quema Tlanahuatijquetl Sedequías quintilanqui ipan tlali Babilonia para ma quiitatij Tlanahuatijquetl Nabucodonosor. Huan nopa amatlajcuijoli quiijtohuayaya quej ni:

<sup>4</sup> TOTECO Tlen Quinyacana Ielhuicac Ejcahua Ma Tlatlanitij, huan yajaya tlen ininTeco tiisraelitame, quintilanilía ni tlajtoli nochí nopa tlacame tlen quinquixti ipan altepetl Jerusalén huan quinhuicac tlali Babilonia. Quej ni quinilhuía:  
<sup>5</sup> “Ximochihuilica imochajchaj huan ipan xiitztoca. Nojquiya xijtocaca xocomecatl pampa nopano inmocahuase miyac xihuitl. <sup>6</sup> Ximosihuajtica huan xiquinpiyaca imoconehua. Xiquinsihuajtica imotelpocahua huan xiquinnamictica imoichpocahua. Huan xiquinpiyaca miyac imoixhuihua. Quena, ximomiyaquilica. <sup>7</sup> Xitequitica para panquisas huan quipiyas tlasehuilistli nopa tlali Babilonia. Ximomaijtoca ipampa ya, pampa intla tlali Babilonia quipiyas tlasehuilistli, huajca imojuanti nojquiya inquipiyase.”

<sup>8</sup> TOTECO Tlen Quinyacana Ielhuicac Ejcahua Ma Tlatlanitij huan yajaya tlen toTeco tiisraelitame quiijtohua: “Amo xiquincahuilica ma inmechcajcayahuaca nopa istlacatica tiocamanalohuani huan nopa tetlajchihuiani tlen itztoque campa imojuanti. Amo xijchihuilica cuenta nopa temictli tlen yajuanti quiyolitíaj, <sup>9</sup> pampa yajuanti san tlacajcayahuaj

huan quiijtohuaj niquinmacac inintlajtol. Pero na ax niquintitlantoc.” Queja nopa TOTECO quiijtohuaj. <sup>10</sup> Huan nojquiya TOTECO quiijto: “Initzose ipan tlali Babilonia 70 xihuitl. Pero quema ajsitos nopa 70 xihuitl, na nihualas huan nimechtlamichihuilis nochí nopa cuali tlamantli tlen nimechtlajtolcahuilijtoc huan sampa nimechhualicas ipan imotlal. <sup>11</sup> Pampa na nijmati cuali nopa tlamantli tlen nijsencajtoc para imojuanti”, quiijtohuaj TOTECO. “Nijsencajtoc tlen cuali huan ax tlen fiero, para nochí quisas cuali para imojuanti teipa huan para inquiselise tlen inquichiyaj. <sup>12</sup> Huan ipan nopa tonali imojuanti inhualase inmomajtose ica na, huan na nimechtlacaquilis. <sup>13</sup> Huan innechtemose huan innechpantise pampa innechtemohuaj ica nochí imoyolo.

<sup>14</sup> “Quena, innechpantise, huan na nimechquixtis ipan nopa tlaltini campa nimechtitlanqui para xitlatequipanotij huan sampa nimechhualicas ipan imochaj huan ipan imotlal campa inquisque.

<sup>15</sup> “Pampa imojuanti inquijtohuaj: TOTECO techhualtitlanlijtoc tiocamanalohuani nica ipan tlali Babilonia. Ya nopa quinequi quiijtos inquintlacaquilíaj iniistlacatica tlajtol. <sup>16</sup> Huajca TOTECO Tlen Quinyacana Ielhuicac Ejcahua Ma Tlatlanitij quiijtohuaj: Xijtlacaquilica tlen niquijtohuaj tlen nopa tlanahuatijquetl tlen mosehuijtoc ipan isiya David ipan

Jerusalén huan nochi imoteixmatcahua tlen noja mocajtoque ipan altepetl Jerusalén huan ax yajque imohuaya para tlatequipanotij san tlaptic.” <sup>17</sup> Huan TOTECO Tlen Quinyacana Ielhuicac Ejcahua Ma Tlatlanitij nojquiya quijjtohua: “Niquintitlanilis tlatehuijccayotl, mayantli huan cocolistli. Huan niquinchihuas queja nopa higos tlen pano icsitoque huan ya lochontoque hasta axaca hueli quicuas. <sup>18</sup> Niquintojtocas huan niquinsemanas para ma yaca campa hueli ipan tlaltepactli. Huan nochi tlacame ipan nopa tlaltini campa niquintitlanis quintelchihuase, quinpinajtise huan tlen hueli quinilhuise. <sup>19</sup> Queja nopa nijchihuas pampa yajuanti ax quinejque nechtlacaquilise yonque ajachica niquincamahui ica notiocamanalojcahua tlen nechtequipanohuaj.” Queja nopa quijjtohua TOTÉCO.

<sup>20</sup> Huajca, xijtlacaquilica itlajtol TOTECO nochi imojuanti inisraelitame tlen initztoque ipan tlali Babilonia. <sup>21</sup> TOTECO Tlen Quinyacana Ielhuicac Ejcahua Ma Tlatlanitij huan yajaya tlen toTeco tiisraelitame, quej ni quijjtohua tlen nopa istlacatica tiocamanalohuani tlen inintoca Acab, icone Colaías huan Sedequías, icone Maasías tlen tepohuilíaj istlacayotl huan quijjtohuaj para na niquintitlantoc: “Na niquintemactilis imaco Nabucodonosor para yajaya ma

quinmicti iniixpa nochí tlacame. <sup>22</sup> Huan queja nopa quema se tlacatl tlen tlali Judá tlen itztoc ipan tlali Babilonia quinequis quitelchihuas se acajya, quiilhuise: Ma TOTECO mitztlatis yoltoc queja nopa tlanahuatijquetl tlen Babilonia quichijqui ica Sedequías huan Acab. <sup>23</sup> Pampa ni tlacame quichijque se tlamantli tlen tlahuel fiero iniixpa noisraelita tlacajhua. Yajuanti quinsihuacuiliijque nopa tlacame tlen itztoque inincalnechca. Huan quiyolitía tlajtoli huan istlacayotl huan quijitoque para na niquinmacayaya nopa tlajtoli. Na nijmati para melahuac quichijtoque ni tlamantli pampa niquitztoc huan yeca niquijtohua para melahuac quichijtoque.” Queja nopa quijito hua TOTECO.

### *Tlajtoli para Semaías*

<sup>24</sup> Huan nojquiya TOTECO quittitanqui ni tlajtoli Semaías tlen ehua Nehelam. Nechilhui ma niquilhui ya ni: <sup>25</sup> “TOTECO Tlen Quinyacana Ielhuicac Ejahua Ma Tlatlanitij huan yajaya tlen toTeco tiisraelitame quijito hua: ‘Ta tijtitlanqui se amatlaajcui loli ica ta motoca para nopa totajtzi Sofonías tlen icone Maasías, huan nochí sequinoc totajtzitzi huan nochí tlacame tlen itztoque ipan altepetl Jerusalén. Huan nopa amatlaajcui loli quijito:

<sup>26</sup> “ ‘Sofonías:

“ ‘TOTECO mitztlalijtoc queja titotajtzi para tijpatlas nopa totajtzi Joiada para titlamocuitlahuis ipan itiopa TOTECO. Huan motequi ta para tiquitzquis tlen hueli locojtic

tlacatl tlen tlayolmelahuas huan mochihuas queja se tiocamanalojquetl huan titzacuas ipan tlatzactli tlen eltoc tlatzintla tlali huan tijmetzcuaapachos ica cuahuitl huan tiquilpis iquechcuayo ica tepos cadenas. <sup>27</sup> Huajca, ¿para tlen ax tleno tijchihuilijtoc Jeremías tlen ehua Anatot tlen teyolmelajtinemi queja se tiocamanalojquetl? <sup>28</sup> Pampa yajaya techtlajcuihuijtoc nochi tojuanti tlen tiitztoque nica ipan tlali Babilonia huan quiijtoohua para huejcahuas titlatequipanose nica. Huan nojquia techilhuijtoc para monequi ma timochihuilica tochaj huan ma tijtocaca cuatini tlen temacaj inintlajca, pampa huejcahuas tiitztose nica para tijcuase itlajca.’ ”

<sup>29</sup> Huan nopa totajtzi Sofonías quihualicac nopa amatlajcuiholi campa na, niJeremías, huan nechpohuili. <sup>30</sup> Huajca TOTECO nechnojnotzqui huan nechilhui: <sup>31</sup> “Xiquintitlanili se amatlajcuiholi nochi nopa tlacame tlen itztoque nepa ipan tlali Babilonia huan xiquinilhui para quej ni na, niimoTECO, niquipohuia: ‘Pampa Semaías tlen ehua Nehelam inmechyolmelajtoc queja se tiocamanalojquetl yonque na ax nijtitlantoc huan inmechchihuaulti xijneltocaca iistlacaticayo, <sup>32</sup> huajca ma quicaqui ni tlajtoli. Nijtlatzacuiltis ya huan nochí tlen ehujipan ya ifamilia. Niyon se iixhui ax quiitas nopa cuali tlamatli tlen na nicajcoctoc para notlacajhua pampa yajaya inmechchijtoc para ayoc innechtlepanitase na.’ ” Queja nopa quiijtohua TOTECO.

## 30

*Israelitame sampa mocuepase inintla*

<sup>1</sup> TOTECO sampa nechnojnotzqui na, niJeremías, huan nechmacac seyoc tlajtoli, quijto: <sup>2</sup> “Quej ni nIDIOS huan niimoTECO inisraelitame niquijtohua: Xiquijcuilo ipan se libro nochí tlen nimitzilhuijtoc. <sup>3</sup> Pampa ajsis tonali quema sampa niquinhualicas notlacajhua ipan tlali Israel huan Judá tlen na niquinmacac ininhuejapan tatahua. Huan yajuanti sampa moaxcatise huan itztose ipan inintla para quitequipanose huan quicuase tlen temacas.” Queja nopa quijtohua TÓTECO.

<sup>4</sup> Huan ya ni nopa tlajtoli tlen TOTECO nechmacac tlen tlali Israel huan Judá, <sup>5</sup> quijto: “Campa hueli nijcaqui tzajtzilistli huan majmajtli huan tlacame tlen huihuipicaj. Ax cana nijcactoc se tlajtoli tlen tlasehuilistli. <sup>6</sup> Campa hueli niquinita nochí tlacame ixistaltique huan quiitzquíaj inintzinquech queja se sihuatl tlen cuajcualo quema aysi hora para conepiyas. <sup>7</sup> ¡Ay! Monechcahuía se hueyi tonali tlen tlahuel fiero. Ax quema oncatoc se tonali queja nopa. Elis se tonal tlen tlaijiyohuilstli para israelitame [30:7 O iixhuihua Jacob. Jacob eltoc seyoc itoca Israel tlen ica pejque israelitame.]. ¡Pero teipa, TOTECO quinmanahuis!

<sup>8</sup> “Pampa TOTECO Tlen Quinyacana Ielhuicac Ejcahua Ma Tlatlanitij quijtohua: ‘Ipan nopa tonali, na nijpostequis nopa cuamaxali tlen quintlalilijtoque ipan ininquechcuayo israelitame huan niquinmalacanis tlen nopa tlanahuatili tlen ohui para quitequipanose

Nabucodonosor. Huan queja nopa ayoc quintequipanose tlacame tlen sequinoc tlaltini.  
<sup>9</sup> Pampa noisraelita tlacajhua nechtequipanose na, niininTECO, huan niininDios huan nijtlalis David para elis inintlanahuatijca.'

*TOTECO quinmaquixtis itlacajhua*

<sup>10</sup> "Huajca amo ximajmahuica imojuanti tlen inisraelitame. Na nimoTECO nimechilhuis: 'Amo ximocuesoca pampa na nimechmaquixtis campa amantzi initztoque ipan tlaltini tlen mopantíaj huejca. Huan imoconehua nojquiya niquinhualias tlen campa nimechtitlantoc. Huan nochi imojuanti inmosiyajcahuase huan inquipiyase tlasehuilistli ipan imotlal huan axaca inmechtemajmatis.' <sup>11</sup> NiimoTECO niquijtohua: 'Na niitztos imohuaya huan nimechmanahuis. Huan yonque niquintlamixpolos nopa tlaltini campa nimechtitlantoc, imojuanti ax nimechtzontlamiltis. Pero, quena, nimechtlatzacuiltis ipampa imotlajtlacolhua pampa ax hueli nimechcahuas san quiaja huan ax nimechtlatzacuiltis.'

<sup>12</sup> TOTECO quijijtohua: "Ax onca pajtli para imococo. Imotlajtlacolhua eltoc queja se cocotl tlen tlahuel lochontoc huan ax hueli pachihuis iselti. <sup>13</sup> Axaca mocuesohuayaya para inmechpajtis campa inmococojtoque huan niyon se pajtli ax quinamiqui para quipachihuiltis imotlajtlacolhua. <sup>14</sup> Nochi imomecahua, nopa totiotzitzti tlen inmechicneliyayaj, inmechtlahuelcajtoque. Na tlahuel nimechcocojtoc queja nielisquía niimocualancaitaca. Niyon ax nimechtlaosjtlac pampa imotlajtlacolhua tlahuel miyac huan nelía huejhueyi. <sup>15</sup> ¿Para

tlen intzajtzij pampa nimechtlatzacuiltá? Imotlacuajcualocayo ax quipixqui pajtli. Quinamiquiyaya intlaijiyohuítose para nochipa pampa tlahuél hueyi intlajtlacolchijtoque huan yeca nimechtlatzacuiltijtoc chicahuac.

<sup>16</sup> “Pero nochí tlen inmechtlaijiyohuítayaj nojquiya tlaijiyohuise. Nochí imocualancaitacahua teipa elise tlatequipanohuani ipan seyoc tlali. Tlen inmechtlaxtequilíaj, nojquiya quintlaxtequiliise. Huan tlen inmechtehuíaj, nojquiya quintehuise. <sup>17</sup> Na niimoTECO nimechpajtis campa incocojtoque ipampa tlajtlacoli huan nimechchicahuas. Yonque tlacame quitocaxtise: ‘Ya ni Jerusalén, nopa altepetl tlen quitlahuelcajtoque huan axaca mocuesohua ipampa ya.’ ”

<sup>18</sup> Pero niimoTECO niquijto: “Pero teipa nochí innoisraelita tlacajhua tlen inmechhuicatoque ipan sequinoc tlaltini nimechhualicas sampa ipan imotlal huan na nimechtla sojtla. Huan sampa quicualtlalise altepetl Jerusalén. Huan sampa quichijchihuase nopa caltlanahuatili queja achtohuiya eliyaya. <sup>19</sup> Huan ipan nochí nopa altepetini nechtla scamatilise huan quipiyase miyac paquilistli. Huan na niquinmiyaquilis israelitame huan niquinchihuas se hueyi altepetl tlen tlacame. Nochí israelitame quinitase para miyac ininpati huan nochí quittlepanitase inintla. <sup>20</sup> Ininconehua itztose cuali queja quema tlanahuatiyaya David, huan inintla huan inintlanahuatiycayo eltose temachme noixpa. Huan niquintlatzacuiltis nochí inincualancaitacahua tlen quinequise quintlaijiyohuítise. <sup>21</sup> Huan se inintlanahuatiyca

motlalanas campa yajuanti. Huan ayoc quinnahuatis se sejcoyoc ejquetl. Huan na nijnotzas para ma nechtequipano queja se totajtzi ipan notlaixpa, pampa ax motemacasquía nechnechcahuis intla ax nijnotza. <sup>22</sup> Huan yajuanti elise notlacajhua huan na nielis niininDIOS.” Queja nopa quijjtohua TOTECO.

<sup>23</sup> Xiquitaca. Icualancayo TOTECO huala queja se ajcomalacatl huan quinajsis nopa tlacame tlen mosisinía ica ya. <sup>24</sup> Huan TOTECO ax quisehuis icualancayo hasta quichihuas nochi tlen moilhuijtoc quichihuas. Ipan itlamiya tonali ni tlaltepactli inquimachilise nochi ya ni tlen ama nimechilhuía.

## 31

### *Israelitame sampa mocuepase inintla*

<sup>1</sup> TOTECO quijjtohua: “Ipan nopa tonali tlen hualas, na niitztos niininDIOS nochi familias tlen israelitame huan yajuanti elise notlacajhua. <sup>2</sup> Na niquinmocuitlahuis tlen momanahuijtoque tlen miquistli ica machete ipan sequinoc tlaltini. Huan niquintlasojtlas ipan nopa huactoc tlali huan quema quitemohuaj canque mosiyajcahuase. <sup>3</sup> Pampa huejcajquiya na nimonexti ica israelitame nepa campa huactoc tlali huan niquinilhui: Nimechicnelía ica se tlaicnelijcayotl tlen huejcahuas para nochipa, huan yeca nijsenhuijilitoc nimechchihuilá tlen cuali. <sup>4</sup> Noisraelita tlacajhua tlen nimechicnelía, na sampa nijcualtlalis imotlal. Sampa inquipiyase tlasehuilistli huan immijtotise ica paquelistli quema intlatzotzonase ica panderos. <sup>5</sup> Sampa inquitocase xocomecatl

ipan nopa tepetini tlen tlali Samaria huan inpaquise quema inquicuase itlajca tlen inquito-case.<sup>6</sup> Ajsis tonali quema nopa tlamocuitlahuiani tlen itztoque ipan nopa tepetini tlen tlali Efraín inmechtzajtzilise huan inmechilhuise: ‘Ma tiyaca ipan altepetl Sion [31:6 Jerusalén.] campa itztoc TOTECO Dios.’”

<sup>7</sup> Pampa TOTECO quijjtohua: “Xihuicaca ica paquilibrium ipampa ni tlali Israel pampa Israel eltoc nopa tlali ica itlanahuatijcayo tlen más quipiya tlatlepanitacayotl que nochí sequinoc tlaltini. Huan Israel eltos nopa tlayacanquetl tlen nochí sequinoc tlaltini. Xihuicaca chicahuac ica paquilibrium. Xiquijtoca: ‘TOTECO quinmaquixtijtoc iisraelita tlacajhua tlen noja itztoque.’<sup>8</sup> Na niquinhalicas tlen nopa tlaltini tlen mopantíaj ica norte huan tlen nopa tlaltini campa hueli hasta campa ontلامي tlapactli. Hualase tlen popoyotzitzi, tlen xocuetzitzi. Hualase sihuame tlen conehuejque huan tlen ya quipixque inincone-hua. San sejco mochihuase nelía tlahuel miyac israelitame tlen mocuepase nica.<sup>9</sup> Chocatihualase ica miyac paquilibrium para mocuepase inintlá. Huan niquinayacanas ica miyac tlaicnelijcayotl hasta ajsitij ininchaj. Nejnentihualase iteno atemital tlen quipiya miyac atl huan ipan se ojtili tlen xitlahuac campa ax motepotlamise. Pampa niitztoc niininTata israelitame huan niquinatas nopa israelitame tlen ehuani tlali Israel [31:9 O Efraín.] eltoc queja noachtohui cone tlen más quiselis notlatiochihual.

<sup>10</sup> “Xitlacquaquica intlaltini, xijtlacaquilita itlatjtol TOTECO huan xitepohuilica campa hueli.

Xiteilhuica: ‘TOTECO tlen quinsemanqui iiisraelita tlacajhua, sampa quinsentilis huan quinmocuitlahuis queja se tlamocuitlahuijquetl quinmocuitlahuía iborregojhua.’ <sup>11</sup> Pampa niininTECO niquinmanahuis noisraelita tlacajhua ininmaco nopa tlacame ipan se tlali tlen más quipiyaj chicahualistli que yajuanti.

<sup>12</sup> “Quena, yajuanti sampa hualase ipan inintla huan huicase ica paquillistli ipan nopa tepetini tlen más huejcapantic ipan Jerusalén. Mopaqulismacase ipampa nochi tlamanli tlen niininTECO ica niquintiochihuas. Na niquinmacas cuajcuali pixquistli, trigo, xocomeca atl, aceite, borregojme huan huacaxme. Huan ininyolis elis queja se xochi mili tlen nochipa nicatequía. Huan ayoc quema tlaijiyohuise. <sup>13</sup> Huajca nopa ichpocame mijtotise ica paquillistli, huan nojquiya nopa telpocame huan tlacame tlen huehuentzitzti. Pampa ininchoquilis nijpatlas ica paquillistli huan niquinyolchicahuas. Huan niquinchihuas para nochi ininpinahualis huan inintlaijiyohuilis ma mopatla ica paquillistli. <sup>14</sup> Huan nopa totajtzitzti niquintlamacas ica tlahuel miyac tlacajcahualistli tlen tlacame quinhuiquilise ipan nopa tiopamitl para yajuanti huelis tlacuase cuali. Huan notlacajhua nojquiya niquinmacas miyac tlacualistli. Queja nopa niquijtohua niininTECO.”

<sup>15</sup> TOTECO sampa nechcamahui huan nechilihui: “Onca se hueyi choquistli ipan altepetl Ramá. Raquel [31:15 Raquel elqui se isihua Jacob o Israel huejcajquiya huan elqui ininhuejapan nana miyac israelitame.] choca ipampa iconehua.

Huan ax quinequi moyoltlalis pampa nochí ya mictoque.”

<sup>16</sup> Pero TOTECO quiilhuía: “Ayoc más xichoca. Xijhuatza moixtiyol pampa tijselis motlaxtlahuil ipampa nochí motequi. Tiquinitas mocone-hua sampa mocuepase inintlá tlen nopa tlaltini campa quinhuicatoque, queja nopa nimoTECO niquijtohua. <sup>17</sup> Ximochiya ipan na huan mocone-hua mocuepase campa inintlá. Queja nopa nimoTECO niquijtohua. <sup>18</sup> Nojquiya nijcactoc in-incuesol israelitame [31:18 O iixhuihua Efraín. Efraín elqui icone José huan iixhui Jacob o Israel]. Yajuanti nechilhuíaj quej ni: ‘Eltoc queja ta techhuitectoc queja se quihuítelqui se toro tlen ax quinequi quiselis se cuamaxáli para huelis tijtequihuis para tlápoxahuas. Quena, techtlatzaculti chicahuac para ma timoxitlahuase. Hua-jca ama xitechpalehui para timoyolcuepase huan timitztequipanose pampa san ta titoTECO Dios. <sup>19</sup> Pampa quema timohuejcatlalijque tlen ta, ti-huetzque ipan hueyi cuesoli. Nelía timomaquilijtoque chicahuac ipan totlacayo ipampa tohui-huiyo. Huan tlahuel timopinajque ipampa nochí tlen tijchijque quema tieliyayaj se altepetl tlen yancuic queja se telpocatl.’”

<sup>20</sup> Huan TOTECO quijito: “Israelitame [31:20 Miyac hueltas quitequihuíaj Efraín para nochí israelitame ica norte.] itztoque nocone-hua tlen yejyectzitz. Quena, itztoque queja se tlacatl ioquichpil tlen más quiicnelía. Huan noja niquinicnelía israelitame yonque niquintlatzaculti. Na tlahuel nimoyolcuesohua ipampa nocone-hua, huan niquinicnelía, huan

temachtli niquintlasoijtas.”

<sup>21</sup> Huan nojquia TOTECO quijto: “Israelitame, xijtlalica tlanextili ipan ojtli campa inyajque tlen quinnextilis nochí sequinoc quejatza ma mocuepaca ipan tlali Israel. Xijpiyaca miyac cuidado para inquimatise campa innejamentoque para ax ohui inquipantise nopa ojtli sampa, pampa melahuac sampa inmocuepase ipan imoaltepehua. <sup>22</sup> ¿Hasta quema tlamis para san inmocuapolojtinemise imojuanti tlen initztoque queja se huihui ichpocatl? TOTECO quichihuas ma pano se yancuic tlamantli ipan ni tlali: Israelitame quicuanajnahuase huan quiicnelise ininTECO.”

<sup>23</sup> Huan TOTECO Tlen Quinyacana Ielhuicac Ejcahua Ma Tlatlanitij huan ininTeco israelitame, quijtohua: “Quema sampa niquinhualicas ipan tlali Judá huan ialtepehua, nopa tlacame tlen quinhuicatoyaj sejcoyoc, yajuanti quijtose: ‘¡Ma TOTECO quitiochihua ni tepetl tlen tlatzejtzeloltic campa tlanahuatía tlen xitlahuac!’ <sup>24</sup> Huan nopa tlacame itztose ipan nochí altepetini tlen tlali Judá. Huan itztose miltequihuejme huan tlacame tlen quinmocuitlahuáj inintlapiyalhua huan quipiyase tlasehuilistli. <sup>25</sup> Pampa na niquimacas tlasiyajcahualli nopa tlacame tlen siyajtoque. Huan niquinyolchicahuas yajuanti tlen mocuesohuayaya.”

<sup>26</sup> Huan ipan nopa tlalochtli quema niisac, niquijto: “Nelía cuali nicochqui.”

*Nopa yancuic tlajtolsencahualli*

<sup>27</sup> Huan TOTECO quiijtohua: “Ajsis tonali quema tlahuel niquinmiyaquilis nopa tlacame huan tlapiyalime tlen itztose nica ipan tlali Israel huan ipan tlali Judá. <sup>28</sup> Queja ica miyac cuidado nijhuihuitlac, nijxitini, nijmajcahua huan nijtlamixolejqui ni tlali, ama ica miyac cuidado nijtocas huan nijsencahuas.

<sup>29</sup> “Huan huajca nopa tlacame ayoc quiijtose para se tlacatl tlaijiyohuis para tlen seyoc quichijqui. Ayoc quiijtose: ‘Nopa tlacame quicuajque xocomecatl itlajca tlen xococ, huan ininconehua fiero quimatque ipan inintlancoch.’ <sup>30</sup> Pampa sesen tlacatl miquis ipampa ya itlajtlacolhua. Huan tlen quicuas xocomecatl itlajca tlen xococ, san yajaya quimatis fiero ipan itlancoch.”

<sup>31</sup> Huan TOTECO quiijtohua: “Ajsis tonali quema na nijchihuas se yancuic tlajtolsencahuali ica nopa tlacame tlen tlali Israel huan tlali Judá.

<sup>32</sup> Pero ni tlajtolsencahuali ax elis queja tlen nijchijqui ica ininhuejcapan tatahua, quema niquinmaitzqui huan niquinquixti tlali Egipto, pampa ininhuejcapan tatahua quiixpanoque nopa tlajtoli yonque niquinicnelyaya queja se mosihuajtijquetl quiicnelía isihua. <sup>33</sup> Ya ni elis nopa tlajtolsencahuali tlen nijchihuas ininhuaya israelita tlacame: Na niquijcuilos notlanahuatil ipan ininyolo para ma nechhueyimatica. Huan huajca yajuanti nelía elise notlacajhua huan na nielis niininDios. <sup>34</sup> Huan ipan nopa tonali ayoc monequis para se tlacatl quimachtis seyoc para ma nechixmatise niininTECO, pampa sesen yajuanti tlen huejhueyi huan tlen coneme, nechixmatica cuali. Huan niquintlapojpolhuis

huan niquilcahuas inintlajtlacolhua.” Queja nopa quijto TOTECO.

<sup>35</sup> TOTECO itztoc tlen quitlali tonati para techtlahuilis tonaya huan metzli huan sitlalime para tlahuise tlayohua. Yajaya tlen quichihua ma mojolini nopa hueyi atl huan ma mosisini. Yajaya itoca TOTECO Tlen Quinyacana Ielhuicac Ejcahua Ma Tlatlanitij huan yajaya quijtohua:

<sup>36</sup> “Queja mocahuas tonati huan metzli huan sitlalime para nochipa, queja nopa nochipa noisraelita tlacajhua itztose se hueyi altepetl tlen tlacame ica inintlanahuatijcayo para nochipa. <sup>37</sup> Queja tlacame ax hueli quiyejyecose quesqui ihuexca elhuicactli huan quipantise itzinpehualtil ni tlaltepactli, queja nopa nojquiya ax hueli niquintlahuelcahuas noisraelita tlacajhua ipampa inintlajtlacolhua.”

<sup>38</sup> Huan TOTECO quijtohua: “Ajsis tonali quema nochí nopa altepetl Jerusalén sampa quicualtlalise para na niininTECO. Quicualtlalise tlen campa eltoc nopa huejcapantic cali tlen itoca nopa Torre tlen Hananeel hasta campa nopa puerta campa esquina ipan itepa. <sup>39</sup> Huan quipatlahuase se hilo para tlayejyecos tlen nopano hasta iixco nopa tepetl Gareb huan hasta campa Goa. <sup>40</sup> Huan nochí nopa altepetl, huan nochí nopa tlamayamitl campa campo santo huan campa quitepehuaj cuanextli, elis tlatzejzelotic huan tlaijiyocatlalili para na niininTECO. Huan nojquiya elis tlatzejzelotic para na nochí nopa tlaltini tlen eltoque hasta campa nopa atemitl Cedrón. Huan tlen nopano hasta campa nopa Puerta tlen Cahuayojme tlen mocahua ica campa

quisa tonati tlen nopa altepetl. Huan ayoc aca quiyahualos nopa altepetl para moaxcatise, niyon ayoc aca quixolehuas.”

## 32

### *Jeremías quicojqui se tlali*

<sup>1</sup> Quema Tlanahuatijquetl Sedequías tlen tlali Judá yahuiyaya ipan majtlactli xihuitl ipan itequi ipan itlanahuatil, huan Nabucodonosor yahuiyaya ipan majtlactli huan chicueyi xihuitl para tlanahuatis ipan tlen ya itlanahuatil, TOTECO nechnojnotzqui na niJeremías. <sup>2</sup> Ipan nopa tonali nopa soldados tlen tlali Babilonia quiyahualojtoyaj altepetl Jerusalén huan na nitzactoya ipan nopa tlatzactli tlen eltoc tlalijtic tlatzintla nopa caltlanahuatili. <sup>3</sup> Tlanahuatijquetl Sedequías tlanahuatijtoya ma nechtzacuaca pampa nitlayolmelahuayaya para nopa tlanahuatijquetl tlen tlali Babilonia quiitzquisquía nopa altepetl. <sup>4</sup> Huan nojquiya niquijtohuayaya para quiitzquisquíaj nopa Tlanahuatijquetl Sedequías huan quihuicasquíaj iixpa nopa tlanahuatijquetl tlen tlali Babilonia para quitlajtolsencahuase huan quitlatzacuiltise. <sup>5</sup> Nojquiya ajachica niquilhuiyaya Tlanahuatijquetl Sedequías para TOTECO quiijtojtoya para Nabucodonosor quihuicasquía ipan tlali Babilonia huan nepa quitzacuasquía para miyac xihuitl hasta miquis. Huan niquilhui Sedequías yonque quintehuisquía, ax quintlanisquía huan elis más cuali intla san motemacas ica ya. Queja nopa

niquilhuiyaya. <sup>6</sup> Teipa TOTECO nechnojnotzqui na, niJeremías, huan nechilhui: <sup>7</sup> “Xiquita, momachicni Hanameel, icone motío Salum, hualas mitzitaqui para mitztencahuili qui se tlali tlen quipixtoc nepa altepetl Anatot. Pampa tlanahuatili quijtohua para nopa tlali quinamiqui tijcohuas ta amantzi quema aya quitencahuilíaj seyoc.”

<sup>8</sup> Huajca Hanameel, icone notío Salum, hualajqui nechpaxaloco campa nopa tlatzactli huan nechilhui: “Xinechcohuili nopa tlali tlen nijpixtoc ipan tlali Benjamín pampa totlanahuatil quijtohua para ta mitztocarohua tijcohuas.” Huan queja nopa nimomacac cuenta para nopa tlajtoli tlen nijcajqui melahuac huala tlen TOTECO.

<sup>9</sup> Huajca na nijcohuili itlal nomachicni Hanameel tlen quipixtoya nepa Anatot. Huan nijmacac majtlactli huan chicome plata tomi. <sup>10</sup> Teipa iniixpa testigos nijtlali nofirma, huan nijtzajqui huan nijtlali nosello ipan nopa tlalamatl. Teipa nijyejyeco nopa plata huan nijtlaxtlahui. <sup>11</sup> Teipa nijcuic nopa tlalamatl tlen tzactoc huan quipixqui nosello huan quijto quejatza nijcohuayaya nopa tlali. Huan nojquiya nijcuic nopa iixcopinca tlen tlapoxtoc tlen ax nijtzajqui ica nosello, <sup>12</sup> huan nijmactili Baruc, icone Nerías tlen icone Maasías, iixpa nomachicni Hanameel, huan iniixpa nopa testigos tlen quifirmarojque nopa tlalamatl huan iniixpa nochí nopa Judá ehuani tlen tlamocuitlahuiyaya calixpa tlen nopa tlatzactli.

<sup>13</sup> Huan iniixpa nochí nopa tlacame niquilhui Baruc ni tlajtoli: <sup>14</sup> “TOTECO Tlen Quinyacana

Ielhuicac Ejcahua Ma Tlatlanitij huan yajaya tlen ininTeco tiisraelitame quijtohua ya ni: ‘Xijcui nopa tlalamatl tlen quipiya nosello tlen quinextilia nijcojqui nopa tlali huan xijcui iixcopinca, huan xijtlali ipan se comitl para huejcahuas eltos. <sup>15</sup> Pampa TOTECO Tlen Quinyacana Ielhuicac Ejcahua Ma Tlatlanitij huan tlen ininTeco israelitame, quijtohua: Teipa ni amatl elis miyac ipati, pampa se tonali nochi ni tlacame sampa moaxcatise tlaltini ipan ni tlali huan sampa quicohuase huan quinamacase caltini. Nojquiya quicohuase tlali huan xocomeca milme.’

*Jeremías momaijto ica TOTECO*

<sup>16</sup> “Teipa quema ya nijmactilijtoya Baruc nopa amatini, na nimomaijto ica TOTECO huan niquilhui: <sup>17</sup> ‘NoTECO Dios, ta tijchijqui elhuicactli huan tlaltepactli ica moma huan ica mohueyi chicahualis, pampa para ta ax onca niyon se tlamantli tlen ohui. <sup>18</sup> Ta titeicnelía miyac huan tijpiya hueyi moyolo ica nochi tlacame. Pero nojquiya ta tiquintlatzacuiltia coneme ipampa inintlajtlacolhua inintatahua. Nelía tihueyi huan tiDios tlen tijpiya nochi chicahualistli. Motoca eltoc: TOTECO Tlen Quinyacana Ielhuicac Ejcahua Ma Tlatlanitij. <sup>19</sup> Tijpiya miyac tlalnamiquilistli huan tijchihua huejhueyi chicahualis nescayotl. Tiquita nochi tlamantli tlen quichihuaj tlacame huan tiquintlaxtlahuía queja quinamiqui ica nochi tlen cuali huan ax cuali quichijtoque ipan nochi ininyolis. <sup>20</sup> Tijchijtoc huejhueyi tlamantli ipan tlali Egipto. Huan nochi tlen tijchijqui nopano hasta ama quejipa quiilnamiquij. Tijsenhuiquilitjoc tijchihua

huejhueyi chicahualis nescayotl ipan tlali Israel huan ipan nochí tlaltepactli. Nelía timohueyichijtoc hasta ama nochí quicactoque tlen motoca.

**21** “ Ta tiquinquixti israelitame ipan tlali Egipto ica mohueyi chicahualis huan ica huejhueyi chicahualis nescayotl. Huan nochí yajuanti mitzimacasque ipampa tlen tijchijqui. **22** Huan tiquinmacac ni tlali tlen huejcajquiya tiquintlajtolcahuili ininhuejapanatahua para tiquinmacasquía. Se tlali yejyectzi tlen temaca nochí tlamantli tlen cuali. **23** Huan quena, tohuejapanatahua hualajque moaxcaticoj, pero yajuanti ax quinejque mitztlepanitase, niyon ax quichijque tlen quiijtohua motlanahuatil. Ax tleno quichijque tlen tiquinnahuatiyaya. Huan yeca tiquintitlanilijtoc ni hueyi tlatzacultili.

**24** “ Huan ama nopa Babilonia ehuani quimontonojque tlali campa hueli para ixtlejcose huan quipanose ni tepamitl tlen quiyahualohua ni altepetl. Huan ama tijtlatzacultia ni altepetl ica tlatehuijcayotl, mayantli huan cocolistli. Nochi panotoc queja tiquijto. **25** Ay TOTECO Ta Tlen Más Tijpiya Tlanahuatili, ta tinechnahuati ma nijcohua nopa tlali. Huan nijchijtoc iniixpa ni testigos huan tinechilhui ma niquixtlahua, yonque ni altepetl Jerusalén elis iniaxca nopa caldeos.”

### *TOTECO quinanquili Jeremías*

**26** Huajca TOTECO nechnojnotzqui na, nijeremías, huan nechilhui: **27** “Na niDios, niininteco nochí tlacame ipan ni tlaltepactli, ax onca se tlamantli tlen ohui para na. **28** Na nijtemactilis ni altepetl imaco Nabucodonosor,

tlanahuatijquetl tlen tlali Babilonia. <sup>29</sup> Huan  
nopa Babilonia ehuani calaquise huan quitlatise  
ni altepetl Jerusalén. Nojquiya quitlatise  
nochi nopa caltini campa quitlatiyayaj  
copali para nopa teteyotl Baal, huan campa  
quitencahuayaya j tlacajcahualistli tlen san  
quitoyahuayaya j iixpa huan ica ya nopa tlahuel  
nechcualancamacayaya j. <sup>30</sup> Nochi israelitame  
huan Judá ehuani quichijtoque tlen ax cuali  
hasta quema noja eliyaya j coneme. Huan  
tlahuel nechcualancamacatoque ica nochí tlen  
quichihuaj. <sup>31</sup> Nechchijtoque ma nicualani hasta  
quema pejque quicualtlalíaj ni altepetl huan hasta  
ama. Huajca yeca ama niquixpolos ni altepetl  
Jerusalén.

<sup>32</sup> “Nochi nopa tlacame tlen tlali Israel huan  
tlali Judá, huan nopa tlanahuatiani, tlayacanani,  
totajtzitzí huan tiocamanalohuani, tlahuel tlajt-  
lacolchijtoque. Huan inintlajtlacol nechchijtoc  
ma nicualani. <sup>33</sup> Yajuanti moicancuepque ica  
na huan nechcajque huan ax quinequij nech-  
toquilise. Huan na mojmostla niquinmachtij-  
toc para ma quimachilica tlachque cuali huan  
tlachque ax cuali, pero ax quinejque nechtlepan-  
itase, niyon ax quinejque ma niquintlacahuatl.  
<sup>34</sup> Hasta quichijtoque ax tlapajpactic huan ijtlac-  
ajtoc notiopa pampa nopano quincalaquijque  
teteyome huan quinhueyichijque. <sup>35</sup> Huan quichi-  
jtoque huejhueyi tlaixpamitl para Baal ipan nopa  
tlamayamitl Ben Hinom. Nopano quintlatíaj inin-  
conehua queja tlacajcahualistli para nopa teteyotl  
Moloc. Ya nopa eli se tlamantli tlen na ax quema  
niquinnahuati ma quichihuaca, niyon ax quema

nimoilhui para queja nopa elis. Nelía huejhueyi nopa tlajtlacoli tlen quichijtoque nopa tlali Judá ehuani.

<sup>36</sup> “Huajca ama na niimoTECO Tlen Niquinyacana Noelhuicac Ejcahua Ma Tlatlanitij, huan tlen niininTeco israelitame quej ni niquijtohua tlen ni altepetl: Ni altepetl nijtemactilis imaco nopa tlanahuatijquetl tlen tlali Babilonia huan yajaya quitlaijiyohuultis huan quipantis tlatehuijcayotl, mayantli huan cocolistli. <sup>37</sup> Pero na sampa niquinhualicas notlacajhua tlen nopa tlattini campa niquintitlanis ica nohueyi cualancayo. Huan niquinhualicas sampa ipan ni altepetl huan niquinchihuas ma itztoca temachme huan ma itztoca ica paquilitli. <sup>38</sup> Huan yajuanti elise notlacajhua huan na nielis niininTeco Dios. <sup>39</sup> Huan na niquinmacas se cuali ininyolo huan se cuali tlalnamiquilitli para ma nechimacasica huan ma nechtlepanitaca para nochipa para queja nopa itztose ica yejyectzi huan iniixhuihua nojquiya.

<sup>40</sup> “Huan ininhuaya nijchihuas se yancuic tlajtolsencahualli campa ininca nimocahuas para ayoc quema niquintlahuelcahuas, huan san niquinchihuilis tlen cuali nochipa. Huan ipan ininyolo nijtlalis nopa paquilitli para nechhueyichihuase huan para ax nechtlahuelcahuase. <sup>41</sup> Huan na nelía nimopaquilismacas ininhuaya. Niquinchihuilis tlen cuali huan niquincahuas ma itztoca ipan ni tlali ica yejyectzi.

<sup>42</sup> “Huan queja niquintitlanili nopa huejhueyi tlaijiyohuilitli huan tlatzacuiltili, queja nopa nojquiya ama niquinchihuilis tlen cuali senquistoc

queja niquinilhuijtoc. <sup>43</sup> Huan sampa inquincohuase huan inquinnamacase tlaltini ipan ni tlali campa amantzi ax aquij tlacame, niyon tlapiyalime pampa nopa Babilonia ehuani quixolejtoque. <sup>44</sup> Quena, sampa inquincohuase huan inquinnamacase tlaltini. Huan inquitlalilise imofirma huan imosello ipan tlalamatini iniixpa testigos campa hueli, pampa se tonali na rijchihuas ma mocuepaca noisraelita tlacajhua huan quico-huase tlaltini ipan tlali Benjamín, ipan ni altepetl Jerusalén huan ipan altepetini tlen tlali Judá. Quicohuase ipan nochí nopa tlali campa onca miyac cuatitlamitl huan ipan nopa tlamayamitl tlen tlali Filistea huan ipan nopa altepetini tlen tlali Neguev. Queja nopa niimoTECO niquijtohua.”

## 33

### *Tlatiochihualistli tlen hualas teipa*

<sup>1</sup> Quema na, niJeremías, noja niitztoya nitzactoc ipan icalixpa nopa tlatzactli, TOTECO nechnojnotzqui ica ompa huan nechmacac más tlajtoli. <sup>2</sup> Quena, TOTECO tlen quichijchijqui tlaltepactli huan quitlali campa quinejqui ma moquetza, nechnojnotzqui huan nechilhui: <sup>3</sup> “Xinechtzajtzili huan na nimitznanquilis huan nimitznextilis tlamantli tlen huejhueyi huan tlen eltoc ixtacatzi tlen ax tijmati. <sup>4</sup> Pampa niininTECO huan niininDios israelitame niquijtohua para tlen hualahuij quixolehuase nochí caltini ipan ni altepetl. Quixolehuase icaltlanahuatil nopa tlanahuatijquetl quema quiyahualose ni altepetl huan quitehuise. <sup>5</sup> Huan yonque

sequin israelitame quintehuisse nopa caldeos, nopa caldeo tlacame calaquise huan quinmictise tlacame tlen ni altepetl huan quitemitise ni altepetl ica inintlacayohua mijcatzitz. Pampa na niquintlahuelcajtoc tlen ehuani nica ipampa inintlajtlacolhua huan yeca ax niquintlasojtlas quemá nechtajtlanise tlapalehuili.

<sup>6</sup> “Pero teipa ajsis tonali quemá na nijchicahuas altepetl Jerusalén huan nochí itlacajhua itztose ica cuali. Huan nijmacas ni altepetl tlasehuilistli huan nijchihuas nochí ma itztoca ica temachtli nopano. <sup>7</sup> Pampa na sampa niquinhualicas ipan tlali Judá huan ipan tlali Israel nochí nopa israelitame tlen itztoque ipan seyoc tlali. Huan sampa itztose queja achtohuiya. <sup>8</sup> Huan niquinyolpajpacas tlen nochí inintlajtlacolhua tlen ica nechixpanoque huan niquintlapojpolhuis. <sup>9</sup> Huan elis se hueyi paquelistli para na pampa yajuanti nechhueyitlepanitase, nechhueyichihuase huan nechhueyitlalise iniixpa nochí tlaltini. Huan nochí tlacame ipan tlaltepactli quiitase nochí nopa tlamanli tlen cuali tlen niquinchihuilá notlacajhua huan huihuipicase ica majmajtli.”

<sup>10</sup> Huan TOTECO quijtohua: “Imojuanti inquijtose para nochí altepetini ipan tlali Judá huan nochí calles ipan Jerusalén san sosolijtoque huan queja se huactoc tlali. Huan inquijtose ax quiipyi tlacame, niyon tlapiyalime. Huan quena, melahuac tlen inquijtose. <sup>11</sup> Pero nimechilhuía para teipa sampa caquistis paquelistli huan huicatl nica. Sampa caquistis inintos tlen paquij ipan ininnenamictilis nopa telpocame huan ichpocame. Sampa nechpaquilismacase na niinin-

TECO Tlen Niquinyacana Noelhuicac Ejcahua Ma Tlatlanitij pampa na niitztoc cuali huan nochipa nitetlasoijla. Huan caquistis tlacame tlen quihualicase tlacajcahualistli ipan nochaj para nechtlascamatise pampa niquinhualicatoc nopa tlacame tlen quinhuicatoyaj ipan seyoc tlali huan nica itztose queja achtohuiya. Queja nopa niimoTECO niquijtoohua.”

<sup>12</sup> Huan nojquiya TOTECO Tlen Quinyacana Ielhuicac Ejcahua Ma Tlatlanitij quijjtohua: “Ipan ni tlali tlen amantzi sosolijtoc huan campa ax aquij tlacame, niyon tlapiyalime; sampa oncas tlamocuitlahuiani tlen quintlamacatinemise ininborregojhua. <sup>13</sup> Huan ininborregojhua sampa momiyaquilise ipan altepetini tlen quiipyaj tepetini huan ipan tlaltini tlen tlatzintla, huan ipan nopa altepetini tlen mocahuaj ica tlani. Momiyaquilise ipan tlali Benjamín, huan ipan nopa tlaltini tlen nechca altepetl Jerusalén huan ipan nochí altepetini tlen tlali Judá. Huan sampa quiitase tlamocuitlahuiani tlen quinmocuitlahuaj huan quinpohuaj inintlapiyalhua.”

<sup>14</sup> Huan TOTECO quijito: “Huan ajsis se tonal quema na niquinchihuilis tlali Israel huan Judá ehuani nochí tlen cuali tlen niquntlajtolcahuili.

<sup>15</sup> Huan ipan nopa tonali nijchihuas para iteipa ix-hui David ma mosehui ipan David isiya yejyectzi. Huan yajaya tlanahuatis xitlahuac huan ica tequihuejcayotl huan quichihuas tlen cuali. <sup>16</sup> Huan ipan nopa tonali nopa tlacame tlen tlali Judá huan altepetl Jerusalén itztose temachme huan quijtose: ‘TOTECO itztoc tlen techchihua tixit-

lahuaque iixpa.’ <sup>17</sup> Huan nimechilhuía xitlahuac: Ax quema polihuis para itztos se iixhui David tlen mosehuis ipan isiya para tlanahuatis ipan tlali Israel. <sup>18</sup> Huan nochipa itztose levitame tlen quitencahuase tlacajcahualistli tlatlatili, tlacajcahualistli tlen harina huan nochí tlamantli tlacajcahualistli para na, niininTECO.”

<sup>19</sup> Teipa TOTECO nechnojnotzqui na, niJeremías, huan nechilhui: <sup>20-21</sup> “Queja axaca hueli quixolehuas nopa tlajtoli tlen nijchijqui ica tonali huan yohuali para ma ayoc tlatlanesis, niyon ayoc tzintlayohuas, nojquiya axaca hueli quixolehuas nopa tlajtolsencahuali tlen nijchijtoc ica notlatequipanojca David para nochipa se iixhui tlanahuatis ipan ilugar. Nojquiya axaca hueli quixolehuas nopa tlajtoli tlen nijchijtoc ica nopa levitame huan totajtzitzi tlen nechtequipanohuaj. <sup>22</sup> Huan queja axaca hueli quinpohua sitlalime, niyon axaca hueli quiyejyecohua nopa xali tlen onca iteno hueyi atl, queja nopa niquinmiyaquilis iixhuihua David huan nopa levitame tlen nechtequipanohuaj hasta axaca huelis quinpohuas.”

<sup>23</sup> Huan TOTECO sampa nechnojnotzqui na, niJeremías, huan nechilhui: <sup>24</sup> “¿Tijcactoc tlachque quiijtohuaj nopa tlacame tlen ax israelitame? Quiijtohuaj para niquintlapejpeni tlali Judá huan Israel ehuani para noaxcahua, pero teipa niquintlahuelcajqui. Yeca yajuanti quipinajtíaj israelitame huan quiijtohuaj para ax quinamiqui niquitas queja se tlali o se tlanahuatijcayotl. <sup>25</sup> Pero nimoTECO niquijtohuaj: Queja ax quema nijpatlas nopa tlanahuatili tlen quinahuatíaj tonali huan yohuali, tlattepactli huan elhuicactli,

<sup>26</sup> nojquiya ax quema niquintlahuelcahuas nopa israelitame, niyon ax nijtlahuelcahuas notlatequipanojca David. Niyon ax nijpatlas nopa tlajtoli tlen nijsencajtoc para nijtlapejpenis se iixhui David para quinnahuatis iixhuihua Abraham, Isaac huan Jacob. Pero sampa niquinhualicas noisraelita tlacajhua ipan inintial huan niquintlasoijtas.”

## 34

### *Tlajtoli para Sedequías*

<sup>1</sup> Quema Tlanahuatijquetl Nabucodonosor tlen tlali Babilonia huan nochí isoldados tlen nopa tlaltini tlen yajaya quinnahuatía quitehuiyayaj altepetl Jerusalén huan nopa altepetini tlen tlali Judá, TOTECO nechnojnotzqui na, niJeremías, huan nechilhui: <sup>2</sup> “Xiya campa Tlanahuatijquetl Sedequías tlen tlali Judá, huan xiquilhuiti para quej ni niimoTECO niquijtohua: ‘Na nijtemactilis ni altepetl imaco nopa tlanahuatijquetl tlen tlali Babilonia huan yajaya quitlamitlatis. <sup>3</sup> Huan ta ax timomanahuis. Mitzitzquise huan mitzhuicase iixpa nopa tlanahuatijquetl tlen tlali Babilonia huan inmoixtlachilise huan inmocamahuise. Huan yajaya mitzhuicas ipan tlali Babilonia. <sup>4</sup> Pero xijtlacaquili ni, Sedequías, tlen titlanahuatía ipan tlali Judá: TOTECO quijjtohua para ta ax timquis ipan tlatehuijcayotl. <sup>5</sup> Ta timquis campa motlacajhua, huan yajuanti quitlatise copali para mitzilnamiquise queja quichijque ica motata. Chocase

mopampa ta huan quijtose: ¡Ay TOTECO, ya mijqui totlanahuatijca! Queja nopa elis pampa niimoTECO niquijtohua para queja nopa nijsencajtoc para ma eli.’ ”

<sup>6</sup> Huajca na, niJeremías, tlen niitiocamanaloja TOTECO, niyyolmelajqui Tlanahuatijquetl Sedequías tlen tlali Judá tlen nochí ya ni ipan altepetl Jerusalén, <sup>7</sup> ipan nopa tonali quema nopa soldados tlen tlali Babilonia quiyahualojtoyaj altepetl Jerusalén. Nojquiya quiyahualojtoyaj altepetini Laquis huan Azeca. San ni altepetini ipan tlali Judá noja quipixqui tepamitl tlen quiyahualohuayayaj pampa aya tleno quinchihuilijtoyaj inincualancaitacahua.

### *Ax quitepanitaque itlanahuatil Sedequías*

<sup>8</sup> Ya ni elqui nopa tlajtoli tlen TOTECO nechmacac na, niJeremías, quema Tlanahuatijquetl Sedequías tlen tlali Judá temacatoya tlanahuatili para ya majcajtoque nochí israelitame tlatequipanohuani tlen iniaxca se ininteco. <sup>9</sup> Tlanahuatijquetl Sedequías quichijqui se tlanahuatili para sesen israelita ma quinmajcahua itlatequipanojcahua tlen quincojtoyaj, yonque tlacame o sihuame para ayoc aca quipiyas se iisraelita icni para iaxca. Yajaya quijitojtoya para se israelita ax hueli quitequipanoltis seyoc israelita san tlapic, pampa nochí tojuanti tiicnime. <sup>10</sup> Huajca nopa tlayacanani huan nochí nopa tlacame tlen quiselijtoyaj nopa tlajtoli tlen quichijtoya nopa tlanahuatijquetl, quinmajcajque inintlatequipanojcahua tlen eliyayaj iniaxcahua.

Pero ya nopa elqui san para se tlalochtli. <sup>11</sup> Teipa moyolcuepque huan quinfuerzajhuique para sampa ma quintequipanoca san tlapic queja achtohuiya.

<sup>12</sup> Yeca TOTECO nechnojnotzqui na, niJeremías, huan nechilhui: <sup>13</sup> “Quej ni niininTECO huan niininDios israelitame niquijtohua: Na nijchijqui se tlajtoli inihuaya imohuejcapan tatahua quema niquinquixti ipan tlali Egipto campa tlatequipanohuayaj san tlapic. <sup>14</sup> Huan niquinilhui para tlen hueli israelita tlen inmechtequipanojtos chicuase xihuitl, monequi inquimajcahuase quema onpejtos chicome xihuitl, pero yajuanti ax quichijque, niyon ax nechtlepanitaque. <sup>15</sup> Pero ama imojuanti nelía cuali inquichijtoque pampa inquinmajcajque imotequipanojcahuasenquistoc queja nimechnahuati, pampa ipan notiopa inquitlajtolcajque para queja nopa monequi inquichihuase. <sup>16</sup> Pero ama imojuanti ax inquinequij inquichihuase, huan innechmahuispolojoque na huan notoca pampa inquiixpanoque nopa tlajtoli tlen inquichijque. Sampa inquinfuerzajhuijtoque imotequipanojcahuas tlen ya inquinmajcajtoyaj ma inmechtequipanoca san tlapic queja achtohuiya.

<sup>17</sup> “Huajca ama niimoTECO quej ni niquijtohua: Pampa ax inquinequij innechtlepanitase, niyon ax inquinequij inquinmajcahuase imoicnihua tlen inmechtequipanohuaj san tlapic, huajca ama nimechtemactilis para inmiquise ipan tlatehuijcamotl, huan ica mayantli huan ica

cocolistli. Huan nochí tlaltini ipan tlaltepactli inmechpinajtise. <sup>18-19</sup> Huan pampa ama inquiixpanotoque nopa tlajtoli tlen inquichijque nohuaya quema inquihuejhueloqque nopa becerro huan inquitlajcoitaque huan inpanoqque tlajtajco para inquichihuase temachtli nopa tlajtoli, ama ihuical njchihuas imohuaya tlen inquichijque nopa becerro. Nochi imojuanti tlen intlayacanani, intequitini, intotajtzitzi huan nochí sequinoc imojuanti nimechtemactilis ipan tlatehuijcayotl, pampa inquiixpanoqque nopa tlajtoli tlen intlaquejquetzque para inquitlepanitasquíaj. <sup>20</sup> Nimechtemactilis ininmaco imocualancaitacahua para ma inmechmictica huan imotlacayohua niquinmacas nopa tzopilome huan tecuanime para ma quincuaca. <sup>21</sup> Huan Tlanahuatijquetl Sedequías tlen tlali Judá huan nochí itlapalehuijcahua, niquintemactilis ininmaco inincualancaitacahua tlen quinequi quinmictise. Quena, niquintemactilis ininmaco isoldados nopa tlanahuatijquetl tlen tlali Babilonia, yonque amantzi mohuejcatlalijtoque tlen imojuanti san para se tlalochtl. <sup>22</sup> Pampa na sampa niquinnotzas nopa soldados tlen tlali Babilonia para ma quitehuiquij ni altepetl. Quiyahualoquij huan quitlatiquij. Nojquiya njchihuas para quintlamixolehuas nochí altepetini tlen tlali Judá hasta mocahuas queja se huactoc tlali huan ax mocahuas niyon se tlacatl.”

## 35

*Nopa recabitame tlen tlaneltocaque*

<sup>1</sup> Quema Joacim, icone Josías tlanahuatiyaya ipan tlali Judá, TOTECO nechnojnotzqui na, ni-Jeremías, huan nechilhui: <sup>2</sup> “Xiya ipan inialtepe nopa recabita tlacame huan xiquinnotza para ma yaca ipan notiopa. Huan quema itztose nopano, xiquinhuica ipan se cuarto tlen eltoc calijtic tlen nopa caltiopamitl huan xiquinmaca xocomeca atl.”

<sup>3</sup> Huajca na niyajqui niquitato Jaazanías, icone se tlacatl tlen nojquiya itoca Jeremías, huan iixhui Habasinías. Huan nijhuicac ya huan nochí iicnihua tlen eliyayaj ifamilia Recab, <sup>4</sup> ipan itiopa TOTECO, ipan nopa cuarto tlen quiaxcatijtoyaj nopa tiocamanalojquetl Hanán, icone Igdalías, se tlacatl tlen quitequipano TOTECO. Ni cuarto tlatzquitoya ihuaya nopa cuarto tlen quitequihuiyayaj nopa tlayacanani ipan caltlanahuatili huan mocajqui itzontla nopa cuarto tlen quitequihuiyaya Maasías, icone Salum tlen tlamocuitlahuiyaya ipan ipuertajyo nopa tiopamitl.

<sup>5</sup> Huan iniixpa nopa recabita tlacame nijtlali tazas huan xarros tlen temitoque ica xocomeca atl. Huan niquinilhui: “Xiquica ni xocomeca atl”, <sup>6</sup> pero yajuanti ax quinejque huan quijijtoque: “¡Axtle! Tojuanti ax tiquise xocomeca atl pampa tohuejcapan tata Jonadab tlen elqui icone tohuejcapan tata Recab techilhui ma ax quema tiquica xocomeca atl, niyon tojuanti, niyon toconehua. <sup>7</sup> Huan nojquiya techilhui ma ax tiquinchihuase caltini, niyon ax tijtocase tomilhua, niyon ax tiquintocase xocomeca miltini, niyon ax tijcohuase tlaltini. Techilhui para san ma tiitztose ipan yoyon caltini. Huan techil-

hui intla tijtlepanitase tlen techilhui, huajca tipiyase se cuali yolistli huan tihuejcahuase ipan ni tlaltepactli campa san tipaxalohuaj. Queja nopa techilhui. <sup>8</sup> Huan tojuanti tijtlepanitztoque ipan nochí ni tlamatli. Ax quema tiquitoque xocomeca atl, tojuanti, niyon tosihuajhua, niyon totelpocahua, niyon toichpocahua. <sup>9</sup> Nojquiya ax timochihuilitoche caltini para ipan tiitztose, niyon ax tipiyaj xocomeca miltini, niyon tlaltini campa huelisquía tijtocase toxinach. <sup>10</sup> San tiitztoque ipan yoyon cali huan senquistoc tijtlepanitztoque nochí tlen technahuati tohuejcapan tata Jonadab. <sup>11</sup> Pero quema Tlanahuatijquetl Nabucodonosor tlen tlali Babilonia, hualajqui ipan ni tlali, tojuanti timomajmatijque huan timoilhuijque para más cuali tihualase tiitztose ipan altepetl Jerusalén para timomanahuise. Huan yeca tiitztoque nica.”

<sup>12</sup> Huajca TOTECO nechnojnotzqui na, niJeremías, huan nechilhui: <sup>13</sup> “NiimoTECO Tlen Niquinyacana Noelhuicac Ejcahua Ma Tlatlanitij huan na tlen niininteco israelitame nimitznahuatía: ‘Xiya xiquincamahuiti nopa tlacame tlen tlali Judá huan tlen altepetl Jerusalén huan xiquinilhuiti para quej ni niimoTECO niquijtohua: Xijtlepanitaca notlajtol queja quichihuaj nopa tlacame tlen ifamilia Recab. <sup>14</sup> Yajuanti ax quijj xocomeca atl pampa ininhuejcapan tata quinmacac tlanahuatili ma ax quichihuaca. Pero na nimechnojnotztoc ajachica huan ax inquinequij innechtlaquilaise, niyon ax inquinequij innechtlepanitase. <sup>15</sup> Na

nimechtitlanilijtoc miyac notiocamanalojcahua tlen inmechyolmelajtoque para xijcahuaca nopa fiero ojtli tlen inquitoquiliyayaj. Nimechilhuijtoc para ayoc xiquinhueyichihuaca totiotzitz huan teteyome para huelis nimechcahuilis initztose ica paquillistli ipan ni tlali tlen nimechmacac imojuanti huan imohuejapan tatahua. Pero imojuanti ax inquinejque innechtlaquiline, niyon ax inquinejque innechtlepanitase. <sup>16</sup> Nopa familias tlen Recab senquistoc quitlepanitztoque nopa tlanahuatili tlen quinmacac ininhuejapan tata, pero imojuanti ax innechtlepanitztoque.

<sup>17</sup> “ ‘Huajca ama na niimoTECO Tlen Niquinyacana Noelhuicac Ejcahua Ma Tlatlanitij huan niimoTeco israelitame niquijtohua: Pampa ax inquinequij innechtlaquiline, niyon ax innechnanquiláj quema nimechnojnotza, na nijtitlanis ipan tlali Judá huan Jerusalén nochí nopa tlatzacultili tlen niquijtojtoc nijtitlanis.’ ”

<sup>18-19</sup> Huajca na, niJeremías, niquincamahui nopa recabita tlacame huan niquinilhui: “Quej ni quijtohua TOTECO Tlen Quinyacana Ielhuicac Ejcahua Ma Tlatlanitij, yajaya tlen toDios tiisraelitame: ‘Pampa inquitlepanitaque imohuejapan tata Jonadab ipan nochí tlamantli, huajca ama se tlen imojuanti tlen iniihxuihua Jonadab nochipa nechtequipanos tiopan calijtic.’ ”

## 36

*Joacim quitlati tlen Baruc quipojqui*

<sup>1</sup> Quema Joacim, icone Josías yahuiyaya para nahui xihuitl tlanahuatis ipan tlali Judá, TOTECO nechnojnotzqui na, niJeremías, huan nechilhui:

<sup>2</sup> "Xijcui se amatl huan ipan xiquijcuilo nochí nopa tlajtoli tlen nimitzilhuijtoc ica tlachque inin-pantis tlali Judá, Israel huan nochí nopa sequinoc tlaltini. Xiquijcuilo nochí tlen nimitzilhuijtihualajtoc hasta quema tlanahuatiyaya Josías huan hasta ama. <sup>3</sup> Huan queja nopa quema yajuanti quiitase ijcuilijtoc nochí nopa huejhueyi tlaijiyohuilistli tlen nimoilhuijtoc niquinchihuialis, huelis moyol-cuepase tlen nochí inintlajtlacolhua. Huan huajca na niquintlapojpolhuis."

<sup>4</sup> Huajca na, niJeremías, nitlatitlanqui ma quinotzatij Baruc, icone Nerías. Huan quema ajisco, na niquilhuijtiyajqui nochí tlen TOTECO nechilhuijtoya huan Baruc quiijcuiloftiyajqui ipan se amatl.

<sup>5</sup> Quema Baruc tlanqui quiijcuilohua nochí tlen niquilhuiyaya, na quej ni niquilhui: "Na niitztoc nica ipan tlatzactli huan ax hueli niya ipan itiopa TOTECO. <sup>6</sup> Pero xiya ta ipan nopa tiopamitl ipan nopa tonali quema israelitame mosahuaj huan xiquinpohuiliti ni amatlajcuiloli. Ipan nopa tonali nopano mosentilise tlahuel miyac tlacame tlen tlali Judá. <sup>7</sup> Huan huelis yajuanti moyol-cuepase tlen nochí inintlajtlacolhua huan quit-lajtlanise TOTECO ma quintlapojpolhui amantzi quema noja onca tonali. Pampa TOTECO tlahuel cualantoc ica yajuanti huan quisencajtoc quintit-lanilis huejhueyi tlatzacuiltyli."

<sup>8</sup> Huan Baruc, icone Nerías, quichijqui queja na nitiocamanalojquetl Jeremías nijnahuatijtoya.

Yajaya yajqui ipan itiopa TOTECO huan quipojqui tlamiyacapa nopa tlajtoli tlen TOTECO nechmacatoya huan ama ijcuilijtoya ipan nopa libro.

<sup>9</sup> Ya ni panoc ipan nopa tonali quema israelitame mosajque iixpa TOTECO ipan nopa chicnahui metzli ipan toisraelita calendario [36:9 Ipan noviembre o diciembre ipan 604 a.C. ipan tocalendario tlen ama.] quema Joacim, icone Josías, yahuiyaya para macuili xihuitl tlanahuatis ipan tlali Judá. Huan quena, ipan nopa tonali hualajque tlacame tlen nochí tlali Judá para mosahuase ipan itiopa TOTECO. <sup>10</sup> Huan Baruc yajqui ipan nopa cuarto ipan itiopa TOTECO campa mocahua Gemarías, icone nopa tlajcuilojquetl Safán. Ni cuarto mocahuayaya huejcapa ipan nopa tiopamitl ipan se lado tlen nopa hueyi cuarto campa mosentiliyayaj nochí tlacame nechca nopa Yancuic Puerta.

<sup>11</sup> Huan quema Micaías, icone Gemarías, tlen elqui icone Safán, quicajqui nochí itlajtol TOTECO, <sup>12</sup> yajqui ipan icuarto nopa tlajcuilojquetl ipan ichaj nopa tlanahuatijquetl. Huan nochí nopa tlayacanani mosentiliyoyaj nopano. Nopano itztoya nopa tlajcuilojquetl Elisama. Nojquiya itztoya Delaía, icone Semaías; Elnatán, icone Acbor; Gemarías, icone Safán; Sedequías, icone Hananías huan nochí nopa tlacame tlen quipiyayayaj tequihuejcapotl. <sup>13</sup> Huan Micaías quinpohuili nochí nopa tlajtoli tlen quicactoya ipan nopa amatlajcuijoli tlen Baruc quipojtoya iniixpa nopa tlacame. <sup>14</sup> Huajca nopa tlayacanani quititlanque Jehudí, icone Netanías, tlen icone Selemías, tlen icone Cusi, para ma quiuhuiti Baruc ma huala huan ma quiuhualica nopa amatlajcuijoli tlen

quipojtoya iniixpa nopa tlacame. Huajca Baruc quicuic nopa amatlajcuiloli huan yajqui quinิตato. <sup>15</sup> Huan yajuanti quiilhuijque:

—Ximosehui huan xitechpohuili nopa amatlajcuiloli tlen tijpojqui iniixpa nopa tlacame.

Huan Baruc quinpolhuili.

<sup>16</sup> Pero ipan nopa tlalochtli quema quicajque nochí nopa tlajtoli, pejqui mosisiníaj se ica seyoc huan nochí tlahuel momajmatijque. Huajca yajuanti quej ni quiilhuijque Baruc:

—Monequi tijpohuilise nochí ya ni nopa tlanahuatijquetl para ma quimati. <sup>17</sup> Pero achtohui xitechilhui quejatza tiquijcuilo nochí ya ni quema Jeremías camatiyaya.

<sup>18</sup> Huan Baruc quinilhui:

—Jeremías nechilhuijtiyajqui sesen tlajtoli huan na niquijcuilojtiyajqui ipan ni amatl.

<sup>19</sup> Huajca nopa tlayacanani quiilhuijque Baruc:

—Ta huan Jeremías xiyaca ximotlatitij huejca campa axaca inmechpantis. Huan axaca xiquilhuica canque initztoque.

### *Joacim quitlati nopa tlajcuiloli*

<sup>20</sup> Teipa nopa tlayacanani quiajcojque nopa amatlajcuiloli ipan icuarto nopa tlajcuilojquetl Elisama huan yajque quicamahuitoj nopa tlanahuatijquetl.

<sup>21</sup> Huan nopa tlanahuatijquetl quititlanqui Jehudí para ma quicuiti nopa amatlajcuiloli. Huajca Jehudí quicuito nopa amatlajcuiloli ipan icuarto nopa tlajcuilojquetl Elisama huan quipohuili nopa tlanahuatijquetl iniixpa nochí nopa tlayacanani tlen itztoyaj nopano. <sup>22</sup> Huan

nopa tlanahuatijquetl itztoya ipan se cuarto tlen huejcapa ipan nopa caltlanahuatili tlen quitequihui ipan nopa metztli tlen tlasesecayotl. Huan eliyaya ipan metztli diciembre huan yajaya mosehuijtoya iixmelac se tlixictli pampa tlahuel tlaseseyayaya. <sup>23</sup> Huan sesen huelta quema Jehudí tlamiyaya quipohua se parte tlen nopa tlajcUILoli ipan nopa mimilijtoc amatl, nopa tlanahuatijquetl quitejTECTiyahuiyaya ica se cuchillo huan quimajcahuayaya ipan tlitl. Huan queja nopa quichijqui hasta tlanqui nochí nopa amatlajcUILoli. <sup>24</sup> Pero nopa tlanahuatijquetl huan nopa tlayacanani ax momajmatijque quema quicajque ni tlajtoli. Niyon axaca mocueso para quilhuis nopa tlanahuatijquetl ma ax quitlati. <sup>25</sup> San Elnatán, Delaía huan Gemarías quiilhuijque nopa tlanahuatijquetl ma ax quitlati, pero yajaya ax quinchihuili cuenta.

<sup>26</sup> Huajca nopa tlanahuatijquetl quinahuati Jerameel iconē Hamelec; Seraías, iconē Azriel; huan Selemías, iconē Abdeel, ma quiitzquitij nopa tlajcuilojquetl Baruc huan na nitiocamanalojquetl Jeremías. Pero TOTECO techatlati.

### *Jeremías quijcuilo seyoc amatl*

<sup>27</sup> Teipa quema nopa tlanahuatijquetl quitlatijtoya nopa amatlajcUILoli, TOTECO nechnojnotzqui na, niJeremías, huan nechilhui: <sup>28</sup> “Xijtemo seyoc amatl huan sampa xiquijcuilo nochí queja tiquijcuilojtoya achtohuiya ipan nopa achtohui amatl tlen quitlati Tlanahuatijquetl Joacim tlen tlali Judá. <sup>29</sup> Huan xiquilhui nopa tlanahuatijquetl: ‘Quej ni niDIOS

niquijtohua: Ta tijtlati nopa amatl pampa nopano ijcuilijtoya para nopa tlanahuatijquetl tlen tlali Babilonia quixolehuaqui ni tlali huan quintzontlamiltis nochi tlacame huan tlapiyalime. <sup>30</sup> Cualtitoc, pero ama niDIOS quej ni nimitzilhuía tiTlanahuatijquetl Joacim tlen tlali Judá. Ax tijpiyas niyon se mocone tlen mosehuis ipan isiya Tlanahuatijquetl David para tlanahuatis quema ta timquis. Huan mitzmictise ta nojquiya huan motlacayo mocahuas huetztoc tlalchi huan axaca quitlapachos. Huan tonaya, tonati tlahuel quitlatis motlacayo huan ica tlayohua quiajsis miyac asetl, <sup>31</sup> pampa nimitzlatzacultis ta, mofamilia huan motlayacancahua ipampa nochi imotlajtlacolhua. Na nimechtitlanilis nochi nopa huejhueyi tlatzacultili tlen nimechtolcahuilijtoc nijtitlanis. Nojquiya nijtitlanis nopa tlatzacultilistli ipan altepetl Jerusalén huan ipan nochi tlali Judá pampa ta tiTlanahuatijquetl Joacim huan motlapalehuijcahua ax inquinejque innechtlaquilaque quema nimechcamahuiyaya.' Queja nopa xiquilhuiti."

<sup>32</sup> Huajca na, niJeremías, nijcuic seyoc amatl huan nijmacac notlajcuilojca Baruc. Huan yajaya quijcuilojtiyajqui nochi tlen niquilhuijtiyajqui queja eltoya ipan nopa achtohui amatl tlen Tlanahuatijquetl Joacim quitlati. Pero nojquiya niJeremías niquilhui más miyac tlajtoli ma quijcuilos.

*Quitzajque Jeremías*

<sup>1</sup> Quema mijqui Joacim tlen elqui tlanahuatijquetl tlen tlali Judá, icone, tlen itoca Conías, quitoquiliitosquía ipan itequi. Pero Tlanahuatijquetl Nabucodonosor tlen tlali Babilonia ax quinejqui Conías ma eli tlanahuatijquetl. Huajca yajaya quitlapejpeni Sedequías, icone Josías huan quitlali queja tlanahuatijquetl ipan tlali Judá. <sup>2</sup> Pero Tlanahuatijquetl Sedequías, itlayacancahua huan nopa tlacame tlen noja mocajtoyaj ipan nopa tlali, ax quitlacaquilijque itlajtol TOTECO tlen na, niJeremías, niinintiocamanaloja niquinmacac. <sup>3</sup> Pero Tlanahuatijquetl Sedequías quititlanqui Juical, icone Selemías, huan nopa totajtzi Sofonías, icone Maasías, para nechilhuitij ma nimomaijto ininpampa yajuanti. <sup>4</sup> Huan na, niJeremías, nine-miyaya campa hueli pampa noja aya nechtzacuayabaj.

<sup>5</sup> Huan ipan nopa tonali isoldados nopa Faraón tlen itoca Hofra hualajque tlen tlali Egipto huan monextijque ica tlani tlen tlali Judá para quimanahuise altepetl Jerusalén. Huan huajca nopa soldados tlen tlali Babilonia mijcuenijque ipan altepetl Jerusalén huan yajque quintehuitoj nopa soldados tlen tlali Egipto.

<sup>6</sup> Huan TOTECO nechnojnotzqui na, niJeremías, huan nechilhui: <sup>7</sup> “Na tlen niininTECO huan niininDIOS israelitame niquijtohua: Xijnanquili nopa tlanahuatijquetl tlen tlali Judá tlen hualajqui para nechtlahtlanis tlachque panos: ica ni tlajtoli: ‘Nopa Faraón huan isoldados tlen hualajtoque nica tlen Egipto para mitzpalehuise, cholose huan mocuepase ipan inintlal. <sup>8</sup> Huan

nopa Babilonia ehuani sampa hualase huan quiyahualoquij ni altepetl Jerusalén huan moaxcatise huan quitlatise. <sup>9</sup> Huajca amo ximocajcayahua, niyon amo xiquijto para nopa Babilonia ehuani ya mohuejcatlalijque tlen ta pampa ax queja nopa elis. <sup>10</sup> Huan yonque tiquintzontlamiltisquía nochí nopa soldados tlen tlali Babilonia huan san mocahuasquíaj se quesqui tlen cocojtoque, yajuanti motlalanasquíaj ica yolic para mitztlanise huan quitlatise ni altepetl.' Queja nopa xiquilhuiti."

<sup>11</sup> Huan quema nopa soldados tlen tlali Babilonia mohuejcatlalijque tlen altepetl Jerusalén para quintehuise isoldados Faraón, <sup>12</sup> na, niJeremías, njchijqui campeca para niquisas Jerusalén huan niyas ipan tlali Benjamín para niquitas nopa tlali tlen njcojtoya. <sup>13</sup> Pero quema niajsito ipan nopa puerta ipan nopa tepamitl tlen itoca Benjamín, niquitac itztoya nopano se tlayacanquetl tlen soldados tlen itoca Irías, tlen icone Selemías, iixhui Hananías. Huan yajaya nechitzqui huan nechilhui:

—Ta tiyas para timosejcotilis ininhuaya nopa Babilonia ehuani.

<sup>14</sup> Huajca na niquilhui:

—¡Axtle! Na ax quema nimoilhuijtoc para nimosejcotilis ininhuaya nopa caldeos.

Pero Irías ax nechtlacaquili. Yajaya nechitzqui huan nechhuicac iniixpa nopa tlayacanani. <sup>15</sup> Huan nopa tlayacanani tlahuél cualunque ica na. Yeca tlanaahuatijque ma nechhuítsequica miyac. Teipa nechtzajque ipan nopa tlatzactli ipan tlen achtohuiya eliyaya

ichaj nopa tlajcuilojquetl Jonatán, pero ama quitequihuiyaj queja se tlatzactli. <sup>16</sup> Huan nopano tlalijtic campa más fiero nechtlali ipan tlen eliyaya queja se caja huan nopano nechpixtoyaj para miyac tonali.

<sup>17</sup> Pero teipa, Tlanahuatijquetl Sedequías tlanahuati ma nechquixtca ixtacatzi huan ma nechhuicaca ipan icaltlanahuatil. Huan yajaya nechtatlani:

—¿Tijpiya se yancuic tlajtoli tlen TOTECO?

Huan na niquilhui:

—Quena, TOTECO quijtohua para mitztemac-tillis imaco nopa tlanahuatijquetl tlen tlali Babilonia.

<sup>18</sup> Huan nojquiya na, niJeremías, nijtlatlani Tlanahuatijquetl Sedequías para tlen nechtzajqui, niquilhui:

—¿Tlachque tlaixpanoli nijchijqui ica ta, o ica motlayacancahua, o ica nochí tlacame para tinechtzajqui? <sup>19</sup> Huan, ¿canque itztoque nopa tiocamanalohuani tlen mitzilhuijque para nopa tlanahuatijquetl tlen Babilonia ax hualasquía para inmechtehuis? <sup>20</sup> Huajca Tlanahuatijquetl, xijtlacaquili tlen na nimitztlatlani: Xinechchihuili se hueyi favor, amo xinechtitlani sampa ipan nopa fiero tlatzactli tlen eltoc ipan ichaj nopa tlajcuilojquetl Jonatán para ax nimquis nopano.

<sup>21</sup> Huajca Tlanahuatijquetl Sedequías tlanahuati ma nechhuicaca ipan nopa tlatzactli tlen eltoc calixpa tlen nopa caltlanahuatili, huan tlanahuati para mojmostla ma nechmacaca se pedazo pantzi tlen yancuic quicojtoque campa

nopa panchihuani. Huan ijquiyampa quichijque hasta tlanqui nochí pantzi ipan nopa altepetl. Queja nopa nechpixtoyaj ipan nopa tlatzactli tlen eltoc calixpa tlen nopa caltlanahuatili.

## 38

### *Quicalaquijque Jeremías ipan se ameli huactoc*

<sup>1</sup> Huan Sefatías, icone Matán; Gedalías, icone Pasur; Jucal, icone Selemías, huan Pasur, icone Malquías, quitlacaquilijtoyaj nochí tlen na, ni-Jeremías, niquijtohuayaya iniixpa nopa tlacame. Niquinilhuía ya ni: <sup>2</sup> “Quej ni quijjtohua TOTECO: ‘Nochi tlen mocahuase ipan ni altepetl, miquise ipan tlatehuijcayotl, o ica mayantli o ica cocolistli, pero nochí tlen motemactilise ica nopa caldeos, momanahuise.’ <sup>3</sup> Pampa TOTECO quijjtohua: ‘Ni altepetl Jerusalén huetzis ininmaco isoldados nopa tlanahuatijquetl tlen tlali Babilonia huan yajaya moaxcatis.’”

<sup>4</sup> Huajca nopa tlayacanani yajque quiitatoj nopa tlanahuatijquetl huan quiilhuijque:

—Ma tijmictica ni tlacatl pampa yajaya quintemajmatía nochí nopa tlacame huan nopa soldados tlen noja mocajtoque ipan ni tlali. Ni tlacatl ax quitemohua tlen cuali para ni tlali; yajaya quitemohua tlen fiero.

<sup>5</sup> Huajca Tlanahuatijquetl Sedequías quiilhui:

—¡Cualtitoc! Xijchihuaca tlen imojuanti inquinequij ica ya. Na ax huelis nimechtzacuilis.

<sup>6</sup> Huajca yajuanti nechquixtique na, niJeremías, campa niitztoya huan nechilpíjque ica laso. Huan nechcalaquijque ipan se ameli huactoc

tlen eltoya calixpa tlen nopa caltlanahuatili huan elqui iaxca nopa tlayacanquetl Malquías, icone Hamelec. Nopa ameli ax quipiyayaya atl, san quipixtoya miyac soquitl huan nicalajqui huan nimasic ipan nopa soquitl.

*Quisencahuaj tlen quinchihuilise nopa Gedalías*

<sup>7</sup> Huan quema Ebed Melec tlen eliyaya se hueyi tlayacanquetl ipan nopa caltlanahuatili, quicajqui para na nechcalaquejtoyaj ipan nopa ameli, <sup>8</sup> motlalojtejqui huan yajqui campa Ipuerta Benjamín campa mosehuijtoya nopa tlanahuatijquetl, huan quiilhui:

<sup>9</sup> —Tinotlanahuatijca, nopa tlacame quichijtoque tlen ax cuali, pampa quicalaquejque Jeremías ipan ameli. Huan nopano miquis ica mayantli pampa ayoc onca pantzi ipan ni altepetl.

<sup>10</sup> Huajca nopa tlanahuatijquetl quinahuati Ebed Melec ma quinhuica 30 tlacame para nechquixtitij ipan nopa ameli para ax nim quis nopano.

<sup>11</sup> Huan quena, Ebed Melec quinhuicac 30 tlacame huan yajqui ipan nopa caltlanahuatili huan calajqui ipan nopa cuarto campa tlaajcocuiyayaj huan quipanti sequin yoyomitl tlen ayoc quitequi-huíaj. Huan quiquixti nopa yoyomitl tlen sosoltic huan quihuicac campa nopa ameli. Huan ica se laso quitemohui nopa yoyomitl hasta tlatzintla campa niitztoya. <sup>12</sup> Huan Ebed Melec tlen ehuayaya tlali Etiopía nechtzajtzili huan nechilhui:

—Ximotlalili ni yoyomitl tlen sosoltic moeltzala para ax mitztequis ni laso.

Huajca na nijchijqui queja nechnahuati.  
 13 Huan nechquixtijque ica laso ipan nopa ameli  
 huan nechcajque ipan nopa tlatzactli tlen eltoc  
 icalixpa nopa caltlanahuatili.

*Sedequías quinotzqui Jeremías*

14 Se tonali, Tlanahuatijquetl Sedequías  
 tlanahuati ma nechhualicaca iixpa para camatis  
 nohuaya campa eltoc nopa expa puerta tlen nopa  
 tiopamitl. Huan nechilhui:

—Nijnequi nimitztlajtlanis se tlamatli. Amo  
 xinechtlatili niyon se tlamatli. Xinechilhui tlen  
 melahuac.

15 Huan na niquilhui:

—Intla nimitzilhuis nochi tlen melahuac, ta tit-  
 lanahuatis ma nechmictica. Huan intla nijnequis  
 nimitztlalnamictis para tijmatis tlachque mon-  
 equi tijchiwas para timomanahuis, ta ax tinecht-  
 lacaquilis.

16 Huajca Tlanahuatijquetl Sedequías ixtacatzi  
 quitestigojquetza TOTECO huan nechilhui:

—Na nijtestigojquetza TOTECO tlen  
 nechchijchijqui huan tlen quihiya nochi  
 chicahualistli para ax nitlanahuatis ma  
 mitzmictica, niyon ax nimitztemactilis ininmaco  
 tlen quinequij mitzmictise.

17 Huajca na, niJeremías, niquilhui Sedequías:

—TOTECO Tlen Quinyacana Ielhuicac Ejcahua  
 Ma Tlatlanitij, yajaya tlen toTeco tiisraelitame  
 quej ni quiijtohua: ‘Intla ta huan mofamilia  
 nimantzi inmotemactilise ica nopa tlanahuatij-  
 quetl tlen tlali Babilonia, huajca inquimanahuise  
 imonemilis huan ax quitlatise ni altepetl. 18 Pero

intla ax timotemactilis ica nopa tlanahuatijquetl, huajca nopa soldados tlen tlali Babilonia, quitlatise ni altepetl huan ta ax timomanahuis ininmaco.'

<sup>19</sup> Pero Tlanahuatijquetl Sedequías nechilhui:

—Na nimajmahui para nimotemactilis ica nopa Babilonia ehuani pampa huelis nechtemactilise ininmaco nopa israelitame tlen mosejcotilijtoque inihuaya huan nechtlaajilhuise huan tlen hueli nechchihuilise.

<sup>20</sup> Huajca na niquilhui:

—Ax mitztemactilise. San xijchihua tlen TOTECO quinequi, huan queja nopa tijmanahuis moyolis huan tiquisas cuali. <sup>21</sup> Pero intla ta ax tijnequis timotemactilis, huajca ya ni tlen TOTECO quiijtohua para panos: <sup>22</sup> Nochi nopa sihuame tlen mocahuase ipan mocaltlanahuatil, quinquixtise huan quintemactilise ininmaco nopa soldados tlen tlali Babilonia. Huan nopa sihuame mitzpinajtise huan quiijtose: ‘Mitzcajgayajtoque mohuampoyohua. Ax tleno ininpati nopa egiptome. Mitzilhuijque mitzpalehuise, pero ya mitzcajtejque.’

Huan nojquiya niquilhui:

<sup>23</sup> —Huan nochi mosihuajhua huan mocone-hua quinquixtise huan quintemactilise ininmaco nopa Babilonia ehuani, huan ta nojquiya ax timomanahuis. Nopa tlanahuatijquetl tlen tlali Babilonia mitzitzquis huan quitlatise ni altepetl.

<sup>24</sup> Huajca Sedequías nechilhui:

—Axaca xipohuili tlen tinechilhuijtoc para ax timiquis. <sup>25</sup> Huan intla notlayacancahua quimatisse para nicamatitoc mohuaya huan hualase

campa ta huan mitzilhui: ‘Xitechilhui tlachque tiquilhui nopa tlanahuatijquetl. Intla ax tinechilhuis, timitzmictise. Nojquiya xitechilhui tlachque mitzilhui nopa tlanahuatijquetl.’<sup>26</sup> Intla queja nopa mitzmajmatise, huajca ta quej ni xiquinilhui: ‘Na nijtlajtlani nopa tlanahuatijquetl para ma ayoc nechcalaqi sampa ipan nopa tlatzactli tlen eltoc campa ichaj Jonatán para ax nimquis nopano.’ Queja nopa xiquinilhui.

<sup>27</sup> Huan ax panoc miyac tonali quema nochí nopa tlayacanani hualajque campa niitztoya, huan nechtlajtlanijque tlachque tlajtoli niquilhui o nechilhui nopa tlanahuatijquetl quema nechnotzqui. Huan na niquinnanquili senquistoc queja nopa tlanahuatijquetl nechilhuijtoya ma niquinnanquili. Huajca yajuanti mocuepque, niyon ax quimatque tlen melahuac, pampa axaca nechtlacaqilijtoya quema nicamatqui ihuaya nopa tlanahuatijquetl.<sup>28</sup> Huan na nimocajqui nopano ipan nopa tlatzactli ipan icalixpa nopa caltlanahuatili hasta ipan nopa tonali quema nopa Babilonia ehuani sampa quiyahualo jque altepetl Jerusalén.

## 39

### *Nabucodonosor quiyahualo Jerusalén*

<sup>1</sup> Ipan metztli majtlactli ipan toisraelita calendario [39:1 Ipan 15 itequi enero ipan 588 a.C. ipan tocalendario tlen ama. Xiquita nojquiya Jer. 52:4.] quema Sedequías yahuiyaya para chicnahui xi-huitl tlanahuatis ipan tlali Judá, Nabucodonosor

tlanahuatijquetl tlen tlali Babilonia huan isoldados hualajque ipan altepetl Jerusalén huan sampa quiyahualojque para quitehuise. <sup>2</sup> Huan ome xihuitl huan tlajco teipa quema Tlanahuatijquetl Sedequías yahuiyaya para majtlactli huan se xi-huitl ipan itequi, ipan 9 itequi nopa metztli nahui ipan toisraelita calendario [39:2 Ipan 18 itequi julio, 586 a.C. ipan tocalendario tlen ama.], quicoj-coyonijque nopa tepamitl tlen nopa altepetl huan calajque, huan queja nopa huetzqui nopa altepetl. <sup>3</sup> Huan nochí nopa tlayacanani tlen soldados tlen tlali Babilonia, calajque ipan nopa altepetl huan mosehuijque campa nopa puerta tlen eltoc tlatlajco. Huan ya ni inintoca nopa tlayacanani: Nergal Sarezer, Samgar Nebo, nopa hueyi tequi-hue Sarsequín huan nopa seyoc Nergal Sarezer tlen eliyaya iachtohui tlayacanca nopa tlanahuatijquetl.

<sup>4</sup> Huan quema Tlanahuatijquetl Sedequías huan isoldados quiitaque para ya huetzqui nopa altepetl, yajuanti quisque ica tlayohua ipan ipuertajyo nopa tepamitl tlen eltoc iiaca nopa xochimili, huan cholojque. Yajque ipan nopa ojtli tlen pano ipan nopa tlamayamitl tlen eltoc nechca atemitl Jordán. <sup>5</sup> Pero nopa soldados tlen tlali Babilonia quitepotztoaque Tlanahuatijquetl Sedequías huan quiitzquitoj ipan tlamayamitl Jericó. Huan quihuicaque ipan altepetl Ribla ipan tlali Hamat campa itztoya Nabucodonosor, nopa tlanahuatijquetl tlen tlali Babilonia, huan nopano quitlatolsencajqui huan quijito tlachque elis itlatzacultil. <sup>6</sup> Huan nopa tlanahuatijquetl tlen tlali Babilonia, nopano quiquetzqui Sedequías para

ma quintlachilijto iconehua quema quinquechtzontequise ihuaya nochi nopa tlayacanani tlen tlali Judá. <sup>7</sup> Teipa quiixtiyolquixti Sedequías huan quiilpi ica cadenas huan quihuicac ipan tlali Babilonia.

<sup>8</sup> Huan nopa soldados tlen tlali Babilonia quilitatijque nopa caltlanahuatili huan nochi caltini tlen oncayaya ipan altepetl Jerusalén huan qui-huelonijque nopa tepamitl tlen quiyahualojtoya. <sup>9</sup> Huajca Nabuzaradán, nopa hueyi tlayacanquetl tlen soldados, quinhuicac ipan tlali Babilonia nochi nopa tlacame tlen noja mocajtoyaj ipan nopa altepetl huan nochi tlen motemactilijtoyaj ica yajuanti. <sup>10</sup> Pero ipan nochi tlali Judá san quincajqui se quesqui tlacame huan inijuanti itztoyaj tlen más teicneltzitzí huan tlen ax tleno quipiyayabaj. Huan quinmacac tlali huan xocomeca miltini ma quitequihuica.

### *Nabucodonosor quimocuitlahui Jeremías*

<sup>11-12</sup> Huan Tlanahuatijquetl Nabucodonosor, quinahuatijtoya Nabuzaradán, nopa hueyi tlayacanquetl tlen soldados ma nechtemo na, niJeremías. Quiilhuijtoya: “Xijtemo Jeremías huan xijpiya miyac cuidado para ax ipantis tlen fiero. Xijmocuitlahui cuali huan xijmaca nochi tlen mitztlajtlanis.”

<sup>13</sup> Huajca Nabuzaradán nopa hueyi tlayacanquetl tlen soldados, huan Nabusazbán tlen inintlayacanca nopa tlacame tlen quincaparojtoque, huan Nergal Sarezer tlen quiconsejomacayaya nopa tlanahuatijquetl huan nochi nopa tlayacanani mocualtlalijque

para quichihuase senquistoc queja quinnahuati nopa tlanahuatijquetl. <sup>14</sup> Huan quintitlanque miyac soldados para ma nechquixtica ipan nopa tlatzactli huan nechtemactilijque imaco Gedalías, icone Ahicam, tlen icone Safán, para ma nechhuica nochaj. Huan queja nopa na niitztoya tlatlajco noisraelita tlacajhua tlen noja mocajtoyaj ipan nopa tlali.

### *Nopa tlajtoli para Ebed Melec*

<sup>15</sup> Pero quema na, niJeremías, noja niitztoya ipan tlatzactli, huan quema aya hualayabaj nopa soldados tlen tlali Babilonia, TOTECO nechno-jnotzqui huan nechilhui: <sup>16</sup> “Xitlatitlani para quej ni ma quiilhuitij Ebed Melec tlen ehua Etiopía. Ma quiilhuitij: ‘Quej ni na niquipjohua, nimoTECO, Tlen niquinnyacana Noelhuicac Ejcahua Ma Tlat-lanitij huan na tlen niininTeco israelitame: Na nijchihuas nochí tlen niquipjotoc nijchihuilis ni altepetl. Nijchihuilis tlen fiero huan ax tlen cuali. Nijxolehuas moixpa, <sup>17</sup> pero ta nimitzmanahuis. Ax timquis ininmaco nopa tlacame tlen tiquim-imacasi. NimoTECO niquipjohua. <sup>18</sup> Na nij-manahuis moyolis huan nimitzmaquixtis. Huan ya ni elis queja motlaxtlahuil pampa timotemachi ipan na. Queja nopa nimoTECO niquipjohua.’ ”

## 40

### *Jeremías mocajqui ihuaya Gedalías*

<sup>1</sup> Ya ni nopa tlajtoli tlen TOTECO nechmacac na, niJeremías, quema ya nechmajcrajqui ipan altepetl Ramá huan nechcrajqui ma nimocuepa ipan

Jerusalén. Nabuzaradán, nopa hueyi tlayacanquetl tlen soldados, nechpanti niilpitoc ica tepos cadenas ica sequinoc israelitame tlen quinquixti-jtoyaj ipan tlali Judá huan ipan altepetl Jerusalén huan quinhuicayayaj ipan tlali Babilonia.

<sup>2</sup> Huan nopa tlayacanquetl tlen soldados nechnotzqui huan nechilhui: “MoTECO Dios quiyolme-lajqui para quihualicas ni tlatzacuiltli ipan ni tlali, <sup>3</sup> huan quichijtoc ma pano senquistoc queja quijto quichihuasquía pampa ni tlacame tlahuel tlajtlacolchijtoyaj ica moTECO huan ax quitla-caquilijque quema quincamahuiyaya. Yeca ama hualajtoc nochí ni tlamantli. <sup>4</sup> Xiquita, ama ni tonali na nimitzquixtilis nopa tepos cadenas tlen ica mitzilpitoque huan nimitzcahuilis xiya. Intla tijnequi tihuales nohuaya ipan tlali Babilonia, huajca xihuala nohuaya huan na nimitzmocuitlahuis. Pero intla ax tijnequi tihuales nohuaya, huajca ximocahua. Huan xiquila, nochí ni tlali eltoc moixpa huan huelis tijtlapejpenis campa más mitzpactía para tiitztos. <sup>5</sup> Intla timoilhuiá timocahuas, huajca xiya campa itztoc Gedalías, tlen Tlanahuatijquetl Nabucodonosor tlen tlali Babilonia quitlalijtoc queja gobernador ipan ni tlali Judá, huan xiitztoti inihuaya nopa tlacame tlen yajaya quinnahuatía. Ta xijtlapejpeni canque tijnequi tiyas. Xiya campa más mitzpactía.”

Huan Nabuzaradán, nopa hueyi tlayacanquetl tlen soldados, nechmacac miyac tlacualistli huan tomi huan nechnahuatijtejqui. <sup>6</sup> Huajca na, ni-Jeremías, niyajqui campa Gedalías huan niitztoya inihuaya nopa tlacame tlen noja mocajtoyaj ipan ni tlali.

**7** Pero nopa tlayacanani tlen israelita soldados tlen nemiyayaj cuatitla, quimatque para nopa tlanahuatijquetl tlen tlali Babilonia quitlalijtoya Gedalías queja gobernador ipan ni tlali para quin-nahuatis nopa teicneltzitzitl tlen noja mocajtoyaj tlen ax quinhuicatoyaj Babilonia. **8** Yeca yajaya yajque quiitatoj Gedalías ipan Mizpa campa quipiyayaya se hueyi cali para soldados. Ya ni intocata nopa tlayacanani tlen yajque quiitatoj: Ismael, icono Netanías; Johanán huan Jonatán, iconehua Carea; Seraías, icono Tanhumet; iconehua Efai tlen ehuaj Netofa; huan Jezanías, icone tlen se maacateo tlacatl. Nochi ni tlacame yajque ica ininsoldados para quiitatij Gedalías.

**9** Huan Gedalías tlatestigojquetzqui huan quinilhui: “Amo ximomajmatica, ximotemacaca nica para inquitequipanose nopa tlanahuatijquetl tlen tlali Babilonia huan inquisase cuali ipan nochitlamantli. **10** Huan na nimocahuas nica ipan Mizpa huan nicamatis imopampa imojuanti quema hualase nopa Babilonia ehuani para quitlachilise notequi. Ximochantica ipan tlen hueli altepetl campa imojuanti inmechpactía, huan ximopanoltica ica nochitlamantli tlen eli ipan ni tlali. Xijtequica itlajca nopa xocomeca miltini, huan inintlajca cuatini, huan aceite, huan xicajcocuica ipan imochaj.”

**11** Huan teipa nochitlamantli Judá ehuani tlen mochololtijtoyaj ipan tlali Moab, Amón huan Edom huan nochitlamantli itztoyaj ipan sequinoc tlaltini nojquiya quimatque para sequinoc tlali Judá ehuani mocajtoyaj ipan tlali Judá, pampa nopa

tlanahuatijquetl tlen tlali Babilonia ax quinhuicatoya nochí ipan itlal. Huan quimatque nojquiya para nopa tlanahuatijquetl tlen tlali Babilonia, quitlalijtoya Gedalías queja gobernador. <sup>12</sup> Huajca yajuanti quisque ipan nopa tlaltini campa mochololtijtoyaj huan mocuepque ipan tlali Judá. Huan ajsicoj ipan Mizpa campa itztoya Gedalías para camatise ihuaya. Teipa yajque ipan nopa huejhueyi xocomeca miltini huan quitejque miyac itlajca para quichihuase xocomeca atl. Huan nojquiya quisentilijque miyac tlamantli cuatlactli.

<sup>13</sup> Pero teipa, Johanán, icone Carea, huan nochí nopa sequinoc tlayacanani tlen soldados, yajque quiitatoj Gedalías ipan Mizpa, <sup>14</sup> Huan quiilhuijque:

—¿Ax tijmati para Baalis tlen inintlanahuatijca nopa amonitame, quitlantoc Ismael, icone Netanías para ma mitzmictiqui?

Queja nopa quiilhuijque, pero Gedalías ax quinnetoquili.

<sup>15</sup> Huajca Johanán camatqui ixtacatzi ihuaya Gedalías, huan quiilhui:

—Xinechcahuili niyas njmictiti Ismael huan axaca quimatis ajqueya quimicti. Ax hueli tijcahuilise para ma mitzmicti. Pampa intla mitzmictis, huajca nochí nopa tlali Judá ehuani tlen mosejcotilijtoque ica ta, mopasolose sampa huan quinmictise nochí nopa tlacame tlen noja mocajtoque nica ipan tlali Judá.

<sup>16</sup> Pero Gedalías quiilhui:

—Amo xijmicti Ismael pampa san tiquistlacahuía.

**41***Ismael quimicti Gedalías*

<sup>1</sup> Pero ipan nopa metztli chicuase [41:1 Ipan metztli octubre o noviembre ipan 586 a.C.], Ismael, icone Netanías, tlen icone Elisama, tlen hualayaya ipan nopa familia tlen tlanahuatiani huan tlen eliyaya se itlayacanca nopa tlanahuatijquetl, hualajqui ipan Mizpa. Huan ihuaya ya hualajque seyoc majtlactli tlacame. Huan Gedalías quinnotzqui para tlacuase sentic. <sup>2</sup> Huan quema tlacuayayaj, Ismael huan nopa majtlactli tlacame tlen hualajtoyaj ihuaya, moquetzque huan quiqixtijque ininmachete, huan quimictijque Gedalías, icone Ahicam, tlen icone Safán tlen nopa tlanahuatijquetl tlen Babilonia quitlalijtoya queja gobernador ipan tlali Judá. <sup>3</sup> Teipa quisque tlen nopano huan quinmictijque nochí nopa tlayacanca Judá ehuani huan nochí nopa tlayacanani tlen soldados caldeos tlen itztoyaj ihuaya Gedalías.

<sup>4</sup> Huan hualmostla quema aya aca quimatiyyaj para Ismael quimictijtoya Gedalías, <sup>5</sup> queja 80 tlacame tlen ehuayayaj ipan altepetl Siquem, Silo huan Samaria hualajque ipan Mizpa para quihueytlatiquij TOTECO ipan itiopa. Nochi yajuanti quitejtectoyaj inintentzo, quitzayantoyaj ininyoyo, mococojtoyaj ipan inintlacayo huan quihualicayayaj tlacajcahualistli huan copali para quitlatisquíaj iixpa TOTECO. <sup>6</sup> Huan Ismael quisqui ipan Mizpa chocatiyajqui. Huan ipan ojtli quinamiquito nopa tlacame. Huajca Ismael quincajcayajqui huan quinilhui:

—;Xihuala huan xiquitaca tlachque quipanotoc Gedalías, icono Ahicam!

<sup>7</sup> Pero quema yajuanti ajsicoj ipan altepetl Mizpa, Ismael huan isoldados, quinmictijque nopa tlacame huan quincalaquijque ipan se ameli tlen ax quipiyayaya atl. <sup>8</sup> Pero majtlactli tlen nopa tlacame ax quinmicti, pampa yajuanti quiilhuijque Ismael: “Amo xitechmicti huan timitzhualiquilise trigo, cebada, aceite huan nectli tlen tijtlatijtoque cuatitla.” Huajca Ismael ax quinmicti. <sup>9</sup> Nopa ameli tlen Ismael quitemiti ica inintlacayohua nopa tlacame tlen quinmicti eliyaya nopa hueyi ameli tlen Tlanahuatijquetl Asa huejcajquiya quichijchijqui para quinmanahuis nopa tlacame tlen altepetl Mizpa quema quintehuiyaya Tlanahuatijquetl Baasa tlen tlali Israel.

<sup>10</sup> Huan Ismael quinitzqui iichpocahua nopa tlacatl tlen achtohuiya eliyaya tlanahuatijquetl nopano. Nojquiya quinitzqui nochí nopa tlacame tlen Nabuzaradán, nopa hueyi tlayacanquetl tlen soldados quincajtoya imaco Gedalías nopa gobernador para ma quinnahuati. Huan Ismael quinhuicac nochí nopa tlacame queja tlatequipanohuani huan pejqui ipan ojtli para inintla nopa amonitame.

<sup>11</sup> Huan quema Johanán, icono Carea, huan nochí nopa tlayacanani tlen soldados tlen itztoyaj ihuaya quimatque nochí tlen Ismael quichijtoya, <sup>12</sup> quinsentilijque nochí ininsoldados huan quitepotztocaque Ismael para quiajasitij. Huan quiajasitoj campa nopa pileta tlen eltoc nechca altepetl Gabaón. <sup>13</sup> Huan quema nopa tlacame tlen

quinhuicayaya Ismael quiitaque Johanán huan nochi nopa tlayacanani tlen soldados, tlahuel yolpajque.<sup>14</sup> Huan mochololtijque huan motlalojque quinnamiquitoj Jonatán huan pejque quipalehuíaj.<sup>15</sup> Pero Ismael huan chicueyi isoldados, cholojque huan yajque ipan tlali Amón.

<sup>16</sup> Huajca Johanán huan nochi isoldados quinhuicaque nochi nopa soldados, sihuame huan coneme. Nojquiya quinhuicaque nopa tlacame tlen quincaparottoyaj para mochihuase huejhueyi tequihuejme huan tlen Ismael quinquixtijtoya ipan altepetl Mizpa quema quimictijtoya Gedalías, icono Ahicam.<sup>17</sup> Huan nochi yajque ipan altepetl Gerut Quimam, nechca altepetl Belén, para mocualtlalise para yase ipan tlali Egipto.<sup>18</sup> Yajuanti majmahuiyayaj tlachque quichihuasquía nopa caldeos quema quicaquisquía para Ismael, icono Neganías quimictijtoya Gedalías, icono Ahicam, tlen nopa Tlanahuatijquetl tlen Babilonia quitlalijtoya queja gobernador ipan tlali Judá.

## 42

### *Johanán quitemohua Jeremías huan TOTECO*

<sup>1</sup> Teipa nochi nopa tlayacanani tlen soldados huan Johanán, icone Carea, huan Jezanías icone Osaías, huan nochi tlacame tlen huejhueyi huan tlen pilsiltzitzi, nochi hualajque campa na, ni Jeremías,<sup>2</sup> huan nechilhuijque:

—Timitztlajtlaníaj se hueyi favor. Tijnequij ximomaijto ica TOTECO topampa tojuanti, pampa ta tijmati cuali para achtohuiya tieliyayaj tlahuel

timiyaqui tiisraelitame, pero ama san tiitztoque se quesqui tlen noja timocahuaj tiitztoque ipan ni tlali. <sup>3</sup> Xijtlajtlanili TOTECO ma technextili canque tiyase huan tlachque tijchihuase.

<sup>4</sup> Huajca na niquinilhui:

—Cualtitoc, na nijtlajtlanis TOTECO imopampa imojuanti huan teipa nimechilhuis nochi tlen yajaya nechilhuis. Ax tleno nimechtlatilis.

<sup>5</sup> Huan yajuanti nechilhuijque:

—Ma TOTECO techtelchihua intla ax tijchihuase nochi tlen technahuatis. <sup>6</sup> Intla techpactis o amo techpactis tlen TOTECO technahuatis, tojuanti titlepanitase huan tijchihuase tlen yajaya technahuatis. Yeca timitztlajtlaníaj ximomaijto ica ya topampa tojuanti, pampa tijmatij cuali, intla titlepanitase, huajca nochi tlen tijchihuase quisas cuali.

### *Momaijto Jeremías huan TOTECO quinanquili*

<sup>7</sup> Huan quema panotoya majtlactli tonali, TOTECO nechnojnotzqui na, niJeremías huan nechnanquili tlen nijtlajtlaniyaya. <sup>8</sup> Huajca na nijnotzqui Johanán iconē Carea, huan nopa tlayacanani tlen isoldados huan nochi nopa tlacame tlen huejhueyi huan tlen pilsiltzitzi, <sup>9</sup> huan niquinilhui: “Imojuantiinnechtitlanque iixpa TOTECO tlen toDios tiisraelitame, para ma nimomaijtoti imopampa imojuanti, huan ama quej ni tlen yajaya nechilhui ma nimechilhui: <sup>10</sup> ‘Ximocahuaca ipan ni tlali. Intla inmocahuase, huajca na nimechtiochihuas huan axaca inmechcuatotonis. Tlahuel nimocuesohua ipampa nochi nopa tlatzacuiltoni

tlen nimechtitlanili. <sup>11</sup> Ayoc xiquimacasica nopa tlanahuatijquetl tlen tlali Babilonia, pampa na niitztos imohuaya para nimechmanahuis imaco. <sup>12</sup> Huan na nimechtlasojtla huan nijchihuas para yajaya nojquiya ma inmechinelis. Ax inmechmictis, niyon ax inmechfuerzajhuis para xielica intlatequipanohuani. Huan inmechcahuilis xiitztoca nica ipan imotlal.’

<sup>13</sup> “Pero huelis imojuanti ax inquinequise inquitlepanitase TOTECO. Huelis inquijtose: ‘Tojuanti ax timocahuase ipan ni tlali. <sup>14</sup> Tojuanti tiyase ipan tlali Egipto pampa nepa ax tiquitase tlatehuijcayotl, niyon mayantli, niyon ax tijcaquise tlapitzali.’ <sup>15</sup> Huajca intla queja nopa inquijtose, xijtlacaquilica tlachque TOTECO inmechilhuía inquesqui imojuanti tlen noja inmocajtoque ipan tlali Judá. TOTECO Tlen Quinyacana Ielhuicac Ejcahua Ma Tlatlanitij huan tlen ininDios tiisraelitame quijjtohua: ‘Intla imojuanti inquisenhuiquilise inquinequise inyase ipan tlali Egipto para initztotij nepa, <sup>16</sup> huajca nepa inmechajsis tlatehuijcayotl huan mayantli tlen imojuanti tlahuel inquimahuilíaj. Huan nepa inmiquise. <sup>17</sup> San ya nopa quinchiya nochí tlen quinequij yase ipan tlali Egipto. Nopano miquise ipan tlatehuijcayotl, ica mayantli huan ica cocollistli. Niyon se ax momanahuis tlen nopa tlatzacuiltyli tlen nijtitlanis nepa.’

<sup>18</sup> “TOTECO Tlen Quinyacana Ielhuicac Ejcahua Ma Tlatlanitij huan yajaya tlen ininDios israelitame, quijjtohua: ‘Queja nijtitlanqui nohueyi cualancayo ipan altepetl Jerusalén, queja nopa nojquiya nijtitlanis imopani quema inyase

ipan tlali Egipto. Huan inmechselise ica cuesoli huan ica cualantli. Inmechtelchihuase huan inmechpinajtise. Huan ayoc quema inquiitase imotlal.’ <sup>19</sup> Pampa TOTECO quej ni inmechilhuía: Imojuanti tlen noja inmocajtoque ipan tlali Judá, amo xiyaca ipan tlali Egipto. Teipa niquinilhui: ‘Ax quema xiquilcahuaca ni tlajtolí tlen nimechilhuijtoc ama. <sup>20</sup> Intla inyase ipan tlali Egipto, huajca temachtli inmiquise. Pampa nijmati san inistlacatique quema innechilhuijque ma niya nimomaijtoti imopampa imojuanti huan innechilhuijque para ma nimechilhui tlachque quijjohua TOTECO huan imojuanti inquichihuasquíaj pampa ax neli. <sup>21</sup> Huan ama na nimechyolmelajtoc senquistoc queja TOTECO nechnahuati ma nimechilhui. Pero imojuanti ax inquinequij inquitlepanitase. <sup>22</sup> Huajca xijmatica cuali para melahuac inmiquise ipan tlatehuijcayotl, ica mayantli huan ica cocolistli ipan tlali Egipto campa imojuanti tlahuel inquinequij inyase.’ ”

## 43

### *Quihuicaque Jeremías ipan Egipto*

<sup>1</sup> Quema na nitlanqui niquinpohuilá nopa tlacamé itlajtol TOTECO ininDios, <sup>2-3</sup> Azarías, icone Osaías, huan Johanán, icone Carea, huan nochí nopa sequinoc tlacamé tlen tlahuel mohueyimati, nechilhuijque: “¡Tiistlacat! TOTECO Dios ax mitznahuatijtoc para xitechilhui ma ax tiyaca ipan Egipto. Nochi ya nopa mitzilhui Baruc, icone Nérías, pampa yajaya quinequi ma timocahuaca nica para ma techmictica nopa caldeos o para

ma techhuicaca ipan tlali Babilonia para titlate-  
quipanotij san tlapic.”

<sup>4</sup> Huan Johanán, huan nopa tlayacanani tlen soldados huan nochí nopa tlacame, ax quitlepanitaque TOTECO, niyon ax quinejque mocahuase ipan tlali Judá. <sup>5</sup> Yeca Johanán huan nopa tlayacanani tlen soldados quinsentilijque nochí nopa tlacame tlen mocajtoyaj ipan tlali Judá, huan nochí tlen mocueptoyaj tlen sequinoc tlaltini, huan quincuitejque huan yajque ipan tlali Egipto. <sup>6</sup> Quinhuicaque tlacame, sihuame huan coneme, iichpocahua nopa tlanahuatijquetl, huan nochí nopa tlacame tlen Nabuzaradán, nopa hueyi tlayacanquetl tlen soldados, quincajtoya ipan itlanahuatil Gedalías, icone Ahicam, icone Safán. Huan hasta na nitiocamanalojquetl Jeremías huan Baruc, icone Nerías nojquiya techchihuaultijque ma tiyaca ininhuaya. <sup>7</sup> Huajca nochí tojuanti tiyajque ipan tlali Egipto huan tiajsitoj ipan altepetl Tafnes pampa yajuanti ax quinejque quitlepanitase TOTECO.

*Tlanextili tlen nopa tetl tlen eltoc ixtacatzi*

<sup>8</sup> Huan ipan altepetl Tafnes, TOTECO nechnojnotzqui huan nechilhui: <sup>9</sup> “Xiquinsentili nopa tlacame tlen tlali Judá, huan iniixtla, xijcui se ome tetl tlen huejhueyi huan xiquintlalpacho tlatlajco nopa tetl ipan nopa piso tlen tetl campa eltoc ipuertajyo icaltlanahuatil Faraón nica ipan Tafnes. <sup>10</sup> Huan quej ni xiquinlhui nopa tlacame tlen tlali Judá: ‘TOTECO Tlen Quinyacana

Ielhuicac Ejcahua Ma Tlatlanitij huan tlen inin-Dios israelitame, quijtohua: Temachtli nijhualicas nica ipan tlali Egipto notlatequipanojca Nabucodonosor, tlanahuatijquetl tlen tlali Babilonia. Huan yajaya quitlaliqui isiya para tlanahuatis campa ni tetini tlen niquintlapachojtoc. Huan nica quichihuas ichaj. <sup>11</sup> Huan yajaya quitlamixolehuaqui ni tlali Egipto. Huan quinmictis nochí tlen na niquistos para ma quinmicti, huan quinitzquis tlen na niquistos ma quinitzqui para quinhuicas ipan tlali Babilonia huan miyac miquise ica cocolistli. <sup>12</sup> Nojquia quintlatis intiopa nopa totiotzitzí tlen tlali Egipto, huan quintlatis nochí nopa teteyome huan quinhuicas nopa tlacame ilpitoque para itlal. Yajaya quitlamitlaxtequilis tlali Egipto, queja se tlamocuitlahuijquetl quinquixtia tecpime ipan iyoyo. Pero axaca hueli quichihuilis tlen. <sup>13</sup> Huan quintlapanas nochí nopa huejcapantique teteyome tlen Heliópolis, huan quintlatis nochí nopa tiopantini tlen nopa totiotzitzí tlen quinhueyimatiipan tlali Egipto.’”

## 44

### *Tlatzacuiltili para israelitame ipan Egipto*

<sup>1</sup> TOTECO nechmacac itlajtol na, niJeremías, para nochí nopa israelitame tlen tlali Judá ehuani tlen itztoyaj ica norte ipan tlali Egipto ipan nopa altepetini Migdol, Tafnes, Menfis huan Patros huan ipan nochí altepetini tlen mocahuaj ica tlani ipan tlali Egipto, nechilhui: <sup>2</sup> “TOTECO

Tlen Quinyacana Ielhuicac Ejcahua Ma Tlatlanitij huan yajaya tlen toTeco tiisraelitame quej ni inmechilhuía: <sup>3</sup> ‘Imojuanti inquiitaque nochí nopa tlatzacuiltli tlen njtitlanqui ipan altepetl Jerusalén ehuani huan tlen ehuani nochí nopa altepetini tlen tlali Judá. Ama nochí yajuanti sosolijtoque ipampa inintlajtlacolhua huan axaca itztoc nopano. Na tlahuel nicualanqui ica tlen nopano inehuani pampa inquinhueyichijque se-quinoc dioses tlen imojuanti huan imohuejcapan tatahua ax quema quinixmatque.

<sup>4</sup> “ ‘Na ajachica niquntitlanili notiocamanalo-  
jcahua para ma quinilhuica ma ax quichihuaca  
nopa fiero tlamantli tlen ax nijnequi niqutas.  
<sup>5</sup> Pero notlacaiahua ax quinejque nechtlaquiline,  
niyon ax quicajque nopa ojtli tlen ax cuali.  
Quisenhuiquilijque quinmacaj tlacajcahualistli  
nopa totiotzitzi tlen ax tleno ininpati. <sup>6</sup> Huan  
yeca nohueyi cualancayo huetzqui queja tlitl  
ipan nopa altepetini tlen tlali Judá huan ipan  
nochí calles tlen altepetl Jerusalén. Huan yeca  
mocahuaj queja huactoc tlali hasta ama.

<sup>7</sup> “ ‘Huan ama niimoTECO Tlen Niquinyacana  
Noelhuicac Ejcahua Ma Tlatlanitij huan tlen  
niininTeco israelitame, quej ni nimechilhuía:  
¿Para tlen inmotemolíaj miquistli ica  
imoseltitzitzi? Pampa melahuac niyon se  
tlen imojuanti ax mocahuas yoltoc. Ax  
momanahuis niyon se tlacatl, niyon se sihuatl,  
niyon se conetl huan niyon se conetzi tlen  
noja chichi tlen ehuaj ipan tlali Judá huan  
hualajtoque nica ipan tlali Egipto. <sup>8</sup> ¿Para tlen  
inquinchijchihuaj totiotzitzi huan inquintlatilíaj

copali queja se tlacajcahualistli huan tlahuel innechcualancamacaj? Ica imotlajtlacolhua innechchihuaj ma nimechtzontlamiltis huan ma nimechchihuas intlatelchihualme. Inmechtlaijilhuise tlacame ipan nochi tlaltini.

<sup>9</sup> ¿Huelis ya inquiilcajque inintlajtlacolhua imohuejcapan tatahua, huan inintlajtlacolhua nopa tlanahuatiani huan sihua tlanahuatiani tlen tlali Judá? Xiquilnamiquica imotlajtlacolhua huan inintlajtlacolhua imosihuajhua tlen inquichijque ipan tlali Judá huan ipan altepetl Jerusalén. <sup>10</sup> Pampa hasta ama, ax inmoechcapanojtoque, niyon axaca mocueptoc ica na. Axaca tlen imojuanti inmotemacatoque para inquitoquilise nopa tlanahuatili tlen nimechmacac imojuanti huan imohuejcapan tatahua.

<sup>11</sup> “ Yeca ama niimoTECO Tlen Niquinyacana Noelhuicac Ejcahua Ma Tlatlanitij huan tlen ni-inDios israelitame, niquipjohua: Na tlahuel nicualantoc huan yeca nijsencajtoc nimechtzontlamiltis sesen imojuanti tlen inehuaj tlali Judá.

<sup>12</sup> Na nimechtzontlamiltis nochi imojuanti tlen noja inmocahuayayaj ipan tlali Judá quema quinhuicatoyaj sequinoc huejca huan teipa inhualajque nica ipan tlali Egipto. Nochi inmiquise nica ipan Egipto ica mayantli huan ica machete. Miquise nochi imojuanti tlen inpilsiltzitz hasta tlen inhuejhueyi. Huan tlahuel inmechcualancaitase nochi imojuanti, huan inmechpinajtise, inmechtelchihuase huan inmechijiyase. <sup>13</sup> Pampa na nimechtlatzacuiltis ipan tlali Egipto queja nimechtlatzaculti ipan altepetl Jerusalén: ica

tlatehuijcayotl, ica mayantli huan ica cocolistli.  
<sup>14</sup> Huan niyon se imojuanti ax momanahuis tlen nocualancayo. San momanahuise yajuanti tlen moilhuise para más cuali ax hualajtosquíaj ipan tlali Egipto huan cholose para yase sampa ipan inintla.’”

<sup>15</sup> Huajca nochí nopa sihuame tlen itztoyaj nopano huan nopa tlacame tlen quimatiyayaj para ininsihuajhua quintlatiliyayaj copali nopa teteyome huan nochí nopa sequinoc israelitame tlen tlali Judá ehuani tlen mocahuayayaj ica tlani ipan tlali Egipto, nochí mosentilijtoyaj huan nech-nanquilijque huan nechilhuijque:

<sup>16</sup> —Tojuanti ax tijchihuilise cuenta tlen tiquijtohua pampa tlen titechilhuijtoc, ax huala tlen TOTECO. <sup>17</sup> Tojuanti tijchihuase tlen techpactía. Tijtlatilise copali nopa sihua tlanahuatijquetl tlen elhuicac huan tijtoyahuase tlacajcahualistli atic iixpa huan tijchihuase tlen techpactía. Queja nopa quichihuayayaj tohuejcapan tatahua, totlanahuatijcahua huan totlayacancahua tlen tlali Judá ipan nochí calles tlen altepetl Jerusalén. Huan ipan nopa tonali tijpiyayayaj miyac tlacualistli, tipaquiyayaj huan amo techajsic niyon se tlamantli tlen ax cuali. <sup>18</sup> Pero hasta ipan nopa tonali quema tijcrajque tijtlatilíaj copali nopa sihua tlanahuatijquetl tlen elhuicac huan ayoc tijhueyichijque, niyon ayoc tijmacaque tlacajcahualistli tlen quitoyahua, hasta huajca pejqui para techpolohua nochí tlamantli. Huan ajachica techajsi tlaijiyohuclistli huan techtzontlamiltíaj ica machete huan ica mayantli.

<sup>19</sup> Huan nojquiya nopa sihuame quijtojque:

—Tojuanti tijhueyichihuayabaj nopa sihua tlanahuatijquetl tlen elhuicac. Tijmacayabaj tlacajcahualistli tlen tijtoyahuayabaj. Huan tijchihuayabaj tlaxcali huan ipani tijchihuayabaj iixcopinca nopa sihua tlanahuatijquetl. Pero ax quema tijchijque toseltitzitzi. Tohuehuejhua quimatiyabaj huan techpalehuiyabaj.

<sup>20</sup> Huajca na niquinnanquili nopa tlacame huan sihuame tlen quiijtojtoyaj ya nopa huan niquinilhui:

<sup>21</sup> —¿Huelis inmoilhuíaj para TOTECO ax quimatiyaya para imojuanti, imohuejcapan tatahua, imotlanahuatijcahua, imotlayacancahua huan nochi nopa sequinoc tlacame inquitlatiyabaj copali para teteyome ipan nochi altepetini tlen Judá huan ipan nochi calles tlen altepetl Jerusalén? <sup>22</sup> Huan TOTECO ayoc hueli quiijiyoqui nochi imotlajtlacolhua tlen inquichihuayabaj, huan yeca quixolejqui imotlal. Huan quicajqui queja se huactoc tlali tlen tlahuel temajmati. Nojquiya quichijqui ma eli tlatelchihuali huan yeca ayoc aca itztoc nopano hasta ama. <sup>23</sup> TOTECO inmechtitlanilijtoc ni huejhueyi tlatzacuiltli pampa inquintlatilijque copali nopa teteyome huan intlajtlacolchijque ica ya huan hasta ama, ax inquinectoque inquitlepanitase.

<sup>24</sup> Teipa quej ni, niJeremías, niquinilhui nopa sihuame huan nochi nopa tlacame:

—Xijtlacaquilica itlajtol TOTECO nochi intlacame tlen tlali Judá tlen initztoque ipan tlali Egipto. <sup>25</sup> TOTECO Tlen Quinyacana Ielhuicac Ejcahua Ma Tlatlanitij, huan tlen

Toteco tiisraelitame, quijjtohua: 'Imojuanti huan imosihuajhua inquijjtojtoque para ax quema inquitlahuelcahuase nopa sihua tlanahuatijquetl tlen elhuicac, niyon ax quema inquicahuase inquimacase tlacajcahualistli.' Huan ica tlen inquichihuaj inquinextiáj para melahuac ax inquitlahuelcahuase nopa sihua tlanahuatijquetl. Cualtitoc, xijmacaca tlen inquitlajtolcahuilijtoque inquimacase huan nochi tlen intlaquejquetztoque inquichihuilise.

<sup>26</sup> Pero nochi imojuanti inisraelitame tlen inehuani tlali Judá huan ama initztoque ipan ni tlali Egipto, xijtlacaquilica notlajtol niDios: Na nijtestigojquetza ica na notoca, huan niquijjtohua para san tlapic yonque noja inquitemose notlapalehuil huan notlatiochihual, huan intlatestigojquetzaj huan inquijjtose: ¡Na niquijjtohua tlen temachtli queja temachtli itztoc TOTECO Tlen Más Quipyia Tlanahuatili! Pero yonque queja nopa intlatestigojquetzaj, ax nimechpalehuis. <sup>27</sup> Pampa na nimechtachilis para nimechtlatzacultis huan ax para nimechchihuilis tlen cuali. Na nijchihuas ma huala imopani miyac tlamantli tlen ax cuali huan intzontlamise ica tlatehuijcayotl huan ica mayantli.

<sup>28</sup> "San mocuepase se quesqui Judá ehuani tlen momanahuise tlen nohueyi cualancayo. Pero nochi tlen ax quinequise mocuepase, pero quinequise quisenhuiquilise itztose ipan ni tlali Egipto, quimachilise ajqueya camati xitlahuac, intla na o yajuanti. <sup>29</sup> Huan ya ni elis nopa tlanextili tlen inmechnextilis

para melahuac panos queja niquijtojtoc huan para melahuac nimechtlatzacuiltis ipan ni tlali: <sup>30</sup> Nijtemactilis nopa Faraón tlen itoca Hofra, tlen itztoc tlanahuatijquetl tlen tlali Egipto ininmaco icualancaitacahua tlen quinequij quimictise queja nijtemactili Sedequías, tlanahuatijquetl tlen tlali Judá, imaco Nabucodonosor, tlanahuatijquetl tlen tlali Babilonia para ma quimicti.”

## 45

### *Jeremías quiyoltlali Baruc*

<sup>1</sup> Quema Baruc ya quijcuilojtoya nochí nopa tlajtoli tlen achtohuiya niquilhuijtiyajqui, na, ni Jeremías, sampa nijpohuili Baruc ni sequinoc tlajtoli quema Joacim, icone Josías, yahuiyaya para nahui xihuitl para tlanahuatis. Niquilhui: <sup>2</sup> “Baruc, ya ni tlen TOTECO huan toDios tiisraelitame mitzilhuía: <sup>3</sup> ‘Baruc, ta tiquijtohua para nelía titecnelti pampa TOTECO tlahuel mitztlaijiyohuilitjtoc. Huan ama tiquijtohua para TOTECO noja más tlaohuijcayotl mitzmacas. Tiquijtohua tlahuel tisiyajtoc ica cuesoli huan ax tipantía tlasiyajcahualistli.’ Queja nopa tiquijtohua. <sup>4</sup> Pero ama Baruc, TOTECO quijijtohua: ‘Na nijxolehuas ni tlali tlen nijchijchijqui huan nijtlamiltis nochí tlen nijtlali. <sup>5</sup> ¿Huelis tijtemohua huejhueyi tlamatli para ta? ¡Ax quej nopa xijchihua! Pampa yonque na nijhualicas huejhueyi tlatzacuiltili ipan nochí ni tlacame, ta nimitzmanahuis campa hueli campa tiyas.’ ”

**46***Tlajtoli para tlen ax israelitame*

<sup>1</sup> TOTECO nechnojnotzqui na, niJeremías, huan nechmacac itlajtol para nopa tlaltini campa tla-came tlen ax israelitame.

*Tlajtoli para Egipto*

<sup>2</sup> Ya ni nopa tlajtoli tlen TOTECO nechmacac na, niJeremías, para tlali Egipto ipan nopa xi-huitl quema Joacim, icone Josías, yahuiyaya para nahui xihuitl tlanahuatis ipan tlali Judá [46:2 Ipan 605 a.C. ipan tocalendario tlen ama.]. Elqui ipan nopa tonali quema oncac tlatehuijcayotl ipan Carquemis, nechca atemitl Jordán. Huan ipan tlatehuijcayotl Nabucodonosor, tlanahuatij-quetl tlen Babilonia, quintehuijqui nopa Faraón tlen itoca Necao tlen elqui tlanahuatijquetl tlen tlali Egipto. Huan Nabucodonosor quitzont-lamilti ya huan isoldados. <sup>3</sup> Huan TOTECO nechilhui para quej ni ma niquinilhui Egipto ehuani: “Ximotlalilica imoteposhua huan xiyaca ipan nopa tlatehuijcayotl. <sup>4</sup> Xiquintlalilica siya imocahuayos huan ximocualtlalica para intlej-cose ininpani. Ximotlalilica imotepostzontzajca huan xijtentica imomachetes. Huan ximotlalilica se tepostli para inmotzacuase ipan imoyolixco. <sup>5</sup> ¡Xiquitaca! Nopa soldados tlen tlali Egipto cholo-huaj ica majmajtli. Hasta nopa soldados tlen tlahuel motemacaj nojquiya motlalohuaj, niyon ax moicancuepaj. Campa hueli onca majmajtli. <sup>6</sup> Pero axaca momanahuis yonque tlahuel hueli motlalohua o yonque tlahuel motemaca. Pampa

nepa ica norte nechca atemitl Éufrates, motepotlamise huan huetzise.

**7** “¿Ajqueya yajuanti ne soldados tlen tlahuel tetique? Motlalanaj queja atemitl Nilo quema tlatemi huan quitemítíaj nochí nopa tlali. **8** Ya nopa, nopa soldados tlen tlali Egipto. Yajuanti motlepanitaj pampamoilhuíaj quitemitise ne tlali queja atl huan quintzontlamiltise nochí inincualancaitacahua. **9** Huajca ma hualaca nopa cahuayos, cuacarros huan nopa tlatehuiani tlen tlahuel tetique tlen tlali Egipto. Ma hualaca nochí nopa tlacame tlen tlali Etiopía huan Libia tlen tlahuel huelij quitequihuíaj machete huan cuahuitoli. **10** Pampa ni tonali eltoc noaxca na nIDIOS Tlen Niquinyacana Noelhuicac Ejcahua Ma Tlatlanitij. Ama ni tonali niquinmacuepas nocualancaitacahua. Nopa machete quinmictis tlacame hasta ayoc hueli más. Eltos queja ihuintis ica inieso. Pampa ama na nijselis se tlacajcahualistli ama. Oncas se hueyi miquistli nepa ipan nopa tlali tlen mocahua ica norte, nechca atemitl Éufrates.

**11** “Senquistoc inmechtlanque huan inmechcocojtoque, intlacame tlen tlali Egipto. Xiyaca ipan tlali Galaad xijtemotij nopa pajtli tlen bálsamo. Pero yonque inquitequihuise tlahuel miyac pajtli, ax inmochicahuase. **12** Nochi tlaltini quicactoque tlen imopinahualis. Ipan nochí ni tlali caquisti choquistli huan tzajtzilistli pampa ya inmechtlanque. Imosoldados tlen tlahuel tetique motepotlamíaj se ica seyoc huan san sejco huetzij.”

<sup>13</sup> Huan quema nopa Nabucodonosor, tlanahuatijquetl tlen tlali Babilonia hualajqui para quitehuis tlali Egipto, TOTECO nechnojnotzqui na, ni Jeremías, huan nechilhui: <sup>14</sup> “¡Xitlayolmelahua chicahuac ipan tlali Egipto! Xitepohuilica tlen ininpartis ipan altepetini Migdol, Menfis huan ipan Tafnes. Quej ni xiquinilhui: ‘Ximocualtlalica para intlatehuise pampa yajaya tlen huala ica nopa machete tlen tetzontlamiltía quinmictis nochí tlacame tlen itztoque yahualtic Egipto.’ <sup>15</sup> ¿Para tlen cholo ica majmajtli mototiotzi, Apis, tlen tiquijtohuayaya para tlahuel tetic queja se toro? Cholo pampa niDIOS nijmajcahua iniixpa icualancaitacahua. <sup>16</sup> Tlahuel miyac tlacame huetzise. Huan huajca nopa israelitame tlen tlali Judá ehuani quiijtose: ‘¡Xihuala, ma timocuepacá ipan tlali Judá campa titlacatque! ¡Ma timochololtica tlen ni miquistli!’

<sup>17</sup> “Xipatlaca itoca nopa Faraón tlen itoca Hofra huan xijtocaxtica: ‘Nopa tlacatl tlen tlajtoli hueyi, pero ax quipyia chicahualistli.’

<sup>18</sup> “Na niTlanahuatijquetl huan niDIOS Tlen Niquinyacana Noelhuicac Ejcahua Ma Tlatlani-tij nimechilhuía para temachtli hualas ipan tlali Egipto, se tlen tlahuel huejcapantic queja tepetl Tabor o queja tepetl Carmelo tlen eltoc nechca hueyi atl. Queja nopa elis imocualancaitaca tlen huala. <sup>19</sup> Xijcualtlalica imotlamantzitzí huan ximocualchijchihuaca para inyase ipan seyoc tlali, nochí imojuanti tlen inehuaj ipan tlali Egipto. Pampa quitlamixolehuase altepetl Menfis hasta mocahuas cactoc queja huactoc tlali huan ax moc-

ahuas niyon se tlacatl. <sup>20</sup> Egipto nelía eliyaya yejyectzi queja sebecerra, pero cholos quema hualas nopa tetzontlamiltijquetl tlen ehua ipan nopa tlali tlen mopantía ica norte. <sup>21</sup> Hasta nopa isoldados tlen sequinoc tlaltini tlen Egipto quintlaxtlahuía para tlatehuise, nojquiya cholose ica majmajtli queja becerros tlen tomahuaque. Tlahuel motlalose pampa ama eli se tonali tlen majmajtli para tlali Egipto, huan se tonali tlen tlatzacuilton. <sup>22</sup> Quema calaquiquij inincualancaitacahua para quintzontlamiltiquij ica hachas nopa Egipto ehuani cholose ixtacatzi queja se cohuatl tlen mohuahuatatzla. Hualase tlahuel miyac soldados hasta axaca huelis quinpohuas. <sup>23</sup> Huan yajuanti quinhuejuelose nopa egip tome queja tlacame tlen quitzontequiv cuatini ipan cuatitlamitl. Quipiyaj ininmiyaca queja chapoltzitzi. <sup>24</sup> Quinpinahualtise nopa Egipto ehuani huan quintemactilise ininmaco nopa tlacame tlen hualahuíj ica norte huan ax huelis momanahuise.”

<sup>25</sup> TOTECO Tlen Quinyacana Ielhuicac Ejcahua Ma Tlatlanitij huan yajaya tlen ininteco israelitame, quijjohua: “Na nijtlatzacuilton Amón, nopa tlaixcopincayotl tlen inindios nopa tlacame tlen altepetl Tebas huan nochí nopa sequinoc totiotzitzi ipan tlali Egipto. Nojquiya niqquintlatzacuilton Faraón huan nochí itlayacancahua huan nopa tlacame tlen motemachíaj ipan ya. <sup>26</sup> Na niqquintemactilis imaco Nabucodonosor, tlanahuatijquetl tlen tlali Babilonia huan ininmaco isolados. Pero teipa quema ya panotos miyac tonali, Egipto sampa temis ica tlacame queja achtohuiya.

Queja nopa niDIOS niquijtohua.

*TOTECO quinmaquixtis itlacajhua*

<sup>27</sup> “Pero imojuanti innoisraelita tlacajhua [46:27 Jacob huan Israel eltoc seyoc inintoca israelitame tlen tlali Israel ica norte.] amo ximajmahuica. Ximosemacaca, pampa yonque ama inmopantíaj huejca, na nimechmanahuis. Sampa nimech-hualicas imojuanti huan imoconehua ipan imot-lal huan inquipyase tlasehuilistli huan ax tleno inmechtemajmatis. <sup>28</sup> Amo ximajmahui innoisraelita tlatequipanojcahua, pampa na niitztoc imohuaya. Na niqintzontlamiltis tlen ehuani nochí nopa tlaltini campa nimechtitlani, pero imojuanti ax nimechtzontlamiltis. San nimitzlatzacuiltis queja quinamiqui ipampa tlen in-quichijtoque pampa ax hueli nimechcahuas san quiaja.”

## 47

*Tlajtoli para filisteos*

<sup>1</sup> Quema Faraón aya quixolejtoya altepetl Gaza, TOTECO nechmacac na, niJeremías, ni tlajtoli para niquinyolmelahuas nopa filisteos.

<sup>2</sup> Yajaya quijito: “¡Xiquitaca! Nopano ica norte hualahuij miyac soldados tlen nesij queja quema tlatemi se atemitl. Nopa atl quipachos nopa tlali campa itztoque nopa filisteos. Huan nopa atl quintzontlamiltis nochí tlacame tlen itztoque ipan nopa altepetini huan nochí tlamantli tlen moscaltiyayaj nopano. Nopa tlacame tlen te-tique tzajtzise ica majmajtli. Huan nochí tlacame ipan nopa tlali chocase ica tlahuel miyac cuesoli.

<sup>3</sup> Nochi quicaquise nopa caquisti tlen iniistihua nopa cahuayos huan nopa caquisti tlen cuacarros. Huan huajca nochi nopa tetatme cholose, niyon ayoc quinchihuilise cuenta ininpilconehua.

<sup>4</sup> “Pampa ya ajsic tonali para TOTECO quintzontlamiltis nopa filisteos huan nochi inintlapalehuijcahua tlen ehuaj ipan altepetl Tiro huan Sidón. Pampa na niqintzontlamiltis nochi nopa filisteos tlen yajque itztotij ipan nopa piltlaltzi tlen itoca Caftor tlen mopantía iteno hueyi atl.

<sup>5</sup> Nijtlamixolehuas altepetl Gaza huan Ascalón huan mocahuase alaxtique queja se tepexitl. Huan nochi iixhuihua Anac quipiyase se hueyi choquistli huan se hueyi cuesoli.

<sup>6</sup> “Intzajtzise: ¿Hasta quema mosiyajcahuas imachete TOTECO? ¿Hasta quema sampa mosiyajcahuas huan quicalaquis ipan icuetlax? <sup>7</sup> Pero ¿quejatza huelis nijcalaque nomachete quema nijtitlantoc para ma quichihuaqui itequi? Pampa nochi tlacame tlen altepetl Ascalón huan nochi tlen itztoque iteno hueyi atl, monequi tzontlamise.”

## 48

### *Tlajtoli para tlali Moab*

<sup>1</sup> Ya ni nopa tlajtoli tlen TOTECO Tlen Quinyacana Ielhuicac Ejcahua Ma Tlatlanitij huan tlen ininTeco israelitame nechmacac para tlali Moab, quijito: “¡Teicneltique nopa altepetl Nebo ehuani pampa mocahuas xolejtoque inialtepe! Huan nopa altepetl Quiriataim nojquia quiyahualose huan quihuelonise itepa. <sup>2</sup> Ayoc oncas paquilitli ipan tlali Moab, pampa

ya tlasencahuali para quitzontlamiltise. Nepa ipan altepetl Hesbón quisencahuase quejatza quixolehuase tlali Moab. Quijtose: ‘Xihuala, huan ma tiquixpolihuiltica nopa tlali.’ Huan ipan altepetl Madmena, nopa tlacame ayoc molinise. <sup>3</sup> Teipa ipan altepetl Horonaim nojquiya caquistis tlahuelchihualistli tlen tlatehuijcayotl, <sup>4</sup> pampa nochi tlali Moab ya mocajtos xolejtoc. Huan caquistis para chocase nochi tlen pilsiltzitzi nopano. <sup>5</sup> Huan nochi tlacame chocatiyase huan ixtlejcose ipan altepetl Luhit para momanahuitij, pampa ipan nopa altepetl tlatzintla campa quisque quicaquise tlen tzajtzij ica miyac tlaijiyohuclistli huan huejhueyi majmajtli. <sup>6</sup> ¡Ximochololtica nochi tlen inhuelij huan ximotlatica ipan huactoc tlali! <sup>7</sup> Pampa inmotemachijque ipan imotomi huan ipan nochi tlamantli tlen inquipiyayaya, intzontlamise. Huan imodios tlen itoca Quemos, huan imototajtzitzi huan nochi nopa tlayacanani, quinhuicase huejca ipan seyoc tlali.

<sup>8</sup> “Nochi tlacame huan altepetini tlen mopantíaj campa tlaixtlejcolis o campa tlamayamitl, quintlamixolehuase; pampa queja nopa quiijtojtoc TOTECO. <sup>9</sup> Nelcuali elisquía intla tlali Moab ehuani quipiyasquíaj inieltlapalhua para patlanise huan mochololtise, pampa ipan altepetini nopano, ax mocahuas niyon se tlacatl.”

<sup>10</sup> Tlatelchihuali ma eli nopa tlacatl tlen ax quinequi quichihuas ica paquelistli nopa tequitl tlen TOTECO quinahuatijtoc ma quichihua. Huan tlatelchihuali ma eli nopa tlacatl tlen ax quinequis quinmictis ica imachete tlen TOTECO quiilhuía.

<sup>11</sup> Tlali Moab nochipa mocajtoc ica tlasehuilistli. Ax quema monequiyaya itlacajhua ma mochololtica hasta sequinoc tlaltini huan mocahuase. Nochipa tlali Moab eltoya queja se xocomeca atl tlen san quicahuilijtoya ma mosehui huan ax quema quitectoyaj ipan seyoc cuetlaxtli huan ax quipolojtoya iajhuiyaca.

<sup>12</sup> Pero TOTECO quiijo: “Nimantzi ajsis nopa tonali quema TOTECO quintitlanis tetlaijiyohuilitani tlen quinchihuilis tlacame ipan Moab ma yaca ipan sequinoc tlaltini. <sup>13</sup> Huan huajca tlali Moab ehuani mopinahuase ipampa ininteteyo tlen itoca Quemos queja nopa israelitame mopinajque ipampa nopa becerro tlen tepostli tlen quichijchijque ipan altepetl Betel para ipan motemachise.

<sup>14</sup> “¿Ax inquiilnamiquij quejatza inmohueymatiyayaj huan inquiijtohuayayaj? Inquiijtohuayayaj: ‘Tojuanti tlahuel timotemacaj huan tipiyaj miyac chicahualistli para titlatehuise.’ <sup>15</sup> Pero ama quitlamixolehuase tlali Moab ininhuaya nochí ialtepehua, pampa ya huala tlen quitzontlamiltise. Nochi itelpocahua tlen más tlapejpenilme ya eltoque para quinmictise. Queja nopa na niquijtohua ninopa Tlanahuatijquetl tlen notoca niDÍOS Tlen Niquinyacana Noelhuicac Ejcahua Ma Tlatlanitij. <sup>16</sup> Huan nopa tlatzacuiltyli chicahuac ajsitihuala para nimantzi ajsis ipan tlali Moab. <sup>17</sup> Nochi imojuanti tlen initztoque nechca tlali Moab, ximocuesoca huan xichocaca ipampa nopa tlali. ‘Xiquitaca quejatza ya tzontlanqui tlali Moab yonque eliyaya tlahuel yejyectzi huan tetic.’

<sup>18</sup> “Huan imojuanti intlacame tlen altepetl Dibón, xijcajtehuaca imosiya yejyectzi huan ximosehuica tlalchi, pampa yajuanti tlen quixolehuaj tlali Moab nojquiya quixolehuase altepetl Dibón huan quihuelonise nochi nopa caltini tlen huejcapantique. <sup>19</sup> Nopa tlacame tlen altepetl Aroer moquetzaj ojteno para tlachiyase huan quintzajtzilíaj chicahuac nochi nopa tlacame tlen cholohuaj tlen altepetl Moab, quinilhuíaj: ‘¿Tlachque panotoc nepa?’ ”

<sup>20</sup> Huan yajuanti quinnanquilíaj quej ni: “Moab ya tlamisosolijtoc. Ximocuesoca huan xichocaca ipampa ni tlali. Xiquinpo huilitij nopa tlacame tlen itztoque iteno atemidl Arnón para tlali Moab quitlamixolejquejya.”

<sup>21</sup> Nochi nopa altepetini tlen mopantíaj campa tlaixtlejcolis ya tlamisosolijtoque pampa nopa tlatzacuiltili tlen TOTECO quititlanqui, huetzqui ipan nopa altepetini: Holón, Jahaza, Mefaat, <sup>22</sup> Dibón, Nebo, Betdiblataim, <sup>23</sup> Quiriataim, Betgamul, Betmeón, <sup>24</sup> Queriot, Bosra huan nochi sequinoc ialtepehua Moab tlen mopantiyayaj huejca huan tlen mopantiyayaj nechca.

<sup>25</sup> Huan Toteco quiijto: “Tlanqui ichicahualis tlali Moab. Eltoc queja se tlacatl tlen quipostequilijtoque iajcol. Quej ni niimoTECO niquijtohua. <sup>26</sup> Huajca ma huetzi tlali Moab huan nochi itlacajhua. Ma momimiloca ipan iniisotlal queja ihuintini, pampa yajuanti mosisinijtoque ica na, niDIOS, huan yeca ama nochi tlen quinpantise quinpinajtise. <sup>27</sup> Pampa Moab ehuani inmechpinajtiyayaj inisraelitame huan inmechcualan-

caitayayaj queja intetlaxtequiliyayaj huan yeca mopinajtiyayaj ica ininselti.

<sup>28</sup> “Intlacame tlen tlali Moab, xicholoca tlen imoaltepehua huan xiitztotij ipan tepexitl queja palomas tlen motepasoltíaj iteno nopa tepexitl.

<sup>29</sup> Tojuanti tijcactoque para tlali Moab ehuani tlahuel mohueyimatiyayaj. Tijmatij motlepanitayayaj, itzcuintime eliyayaj huan tlahuel mosisiniyayaj ica na. <sup>30</sup> Na niquixmati Moab ehuani huan nijmati para tlahuel mosisiníaj. Pero san tlapic mosisinise, pampa yonque mohueyimatiy huan quipiyaj miyac chicahualistli, ax tleno quinpalehuis. Queja nopa niimoTECO niquijtohua. <sup>31</sup> Yeca nichoca ipampa Moab huan nimocuesohua ipampa nopa tlacame tlen altepetl Kir Hares.

<sup>32</sup> “Intlacame tlen altepetl Sibma, imojuanti inquipixque tlahuel miyac xocomeca mili. Na más nichoca imopampa imojuanti que nopa tlacame tlen altepetl Jazer, pampa nopa tetzontlamiltijquetl quitzontejqui nochí nopa cuamayitl tlen moscaltiyayaj huejca huan quitejqui itlajca imoxocomeca. Huan nojquiya quitejqui nochí tlamatli cuatlactli. Huan inmechcajque san imoma. <sup>33</sup> Ayoc caquisti paquelistli, niyon huetzquistli ipan mili tlen tlali Moab. Nochi xocomeca atl tlanqui huan tlanqui nopa tzatzilistli tlen paquelistli tlen caquistiyaya quema quipatzcayayaj nopa xocomecatl itlajca. Amantzi onca tzatzilistli huan ax paquelistli. <sup>34</sup> Nochi nopa tlacame tlen itztoque ipan nopa tlali tzatzij pampa nochí tlahuel tlaijiyohuíaj. Ininchoquilis caquisti tlen altepetl Hesbón hasta Eleale huan Jahaza, huan tlen Zoar hasta Horonaim huan Eglad

Selisiya, pampa nochí nopa potreros tlen Nimrim, tlamihuactoque.”

<sup>35</sup> Pampa TOTECO quijtohua: “Na niqintzontlamiltis nochí nopa tlacame tlen tlali Moab tlen quintlatiliyayaj copali nopa teteyome huan nochí nopa totiotzitzi tlen ax tleno ininpati tlen yajuanti quinhueyimatiyayaj.” <sup>36</sup> Yeca ama na nimocuesohua ipan noyolo ipampa tlali Moab ehuani huan nopa tlacame tlen altepetl Kir Hares, pampa nochí ininricojo quipolojque. <sup>37</sup> Nochi tlacame motlamiximaj huan quihuataníaj inintentzo ica cuesoli. Nojquiya mococojtoque ipan inintlacayo huan moquentíaj ininyoyo tlen quinextíaj para mocuesohuaj. <sup>38</sup> Ipan nochí caltini tlen tlali Moab huan ipan nochí calles, onca choquistli huan cuesoli. Pampa na nijmajcahuili nohueyi cualancayo huan yeca njtlapanqui tlali Moab queja se comitl tlen ax tleno ipati. <sup>39</sup> ¡Mocajtoc xacuáltic tlali Moab! Huan ama tlahuel mochoquilíaj huan mopinahuaj itlacajhua. Huan nochí nopa sequinoc tlaltini tlen mopantíaj inechca momajmatíaj huan mopinahuaj.

<sup>40</sup> Huan TOTECO quijtohua: “Icuálancaitaca Moab huala queja se cuajtli. Huan yajaya quipatlahuas ieltlapal ipan nochí nopa tlali. <sup>41</sup> Ialtepehua ya huetzque huan nopa huejcapantique caltini, ya huetzque ininmaco inicuálancaitacahua. Huan nopa soldados tlen tlali Moab tlen más motemacaj, huihuipicaj queja se sihuatl tlen coneipiya. <sup>42</sup> Huan tlali Moab ayoc quema elis se país, pampa yajaya tlahuel mosisinijtoc ica na.”

<sup>43</sup> TOTECO quijtohua para inMoab ehuani inquipantise majmajtli huan tlaquetztl tlen inmechmasiltise. <sup>44</sup> Pampa nochitlen cholose, huetzise ipan se tlaquetztl; huan tlen momanahuise tlen nopa tlaquetztl, huetzise ipan se ostotl. Axaca momanahuis pampa ya ajsic hora para inquiselise tlatzacuiltylistli. Queja nopa niDIOS niquijtohua.

<sup>45</sup> “Nochi yajuanti cholose huan yase ipan tlali Hesbón pampa ax huelise yase más huejca. Pero ipan tlali Hesbón, tlen iaxca Tlanahuatijquetl Seón, quisas se hueyi tlitl. Huan quitlatis nochitlen nopa tlali tlen se lado hasta seyoc, inihuaya nochitlen nopa mosisiniyca tlacame.

<sup>46</sup> “¡Teicneltique tlali Moab ehuani! Pampa nopa tlacame tlen quihueyimatiyayaj nopa dios tlen itoca Quemos, ya tzontlanque. Huan quihiucase inintelpocahua huan iniichpocahua ipan sejcoyoc para tlatequipanotij san tlapic. <sup>47</sup> Pero teipa, ica miyac tonali, na sampa niquinhuaticas nopa Moab ehuani nica.” Queja nopa quijto TOTECO.

Hasta nica tlami nopa tlatzacuiltyli tlen quinamiqui para tlali Moab.

## 49

### *Tlajtoli para tlali Amón ehuani*

<sup>1</sup> TOTECO quej ni quinilhuía tlali Amón ehuani: “¿Tlachque inquichihuaj? ¿Para tlen initztoque ipan nopa altepetini campa itztoque israelitame tlen ehuaj tlali Judá? ¿Ax inquiitaj para nopa altepetini ya temitoque ica israelitame tlen tlali Judá

ehuani? Huajca ¿para tlen imojuanti tlen inquihueyichihuaj nopa totiotzi Milcom inmoaxcatijtoque tlali Gad huan noch ialtepehua?”<sup>2</sup> TOTECO quijto: “Ajsis tonal nimechtlatzacuiltis ica tlen inquichijtoque huan nixolehuas imoaltepe Rabá. Huan teipa Rabá mocahuas queja se tlamontomitl tlen tetl. Huan noch i nopa sequinoc altepetini tlen mopantíaj huejca, quintlamitlatise. Huan huajca nopa israelitame hualase huan sampa moaxcatise inintlal. Quena, nopa israelitame inmechtanaxtequilise pampa imojuanti nojquia inquintlaxtequilijque. Queja nopa niininTECO niquijtohua.

<sup>3</sup> “Intlacame tlen altepetl Hesbón, xichocaca pampa ya quixolejtoque altepetl Hai. Insihuame tlen altepetl Rabá, xichocaca. Ximoquentica yoyomitl tlen quinextis para inmocuesohuaj. Xichocaca huan ximotlatica campa cuatini, pampa quihuicase imototiotzi Milcom ipan sejcoyoc inihuaya nopa totajtzitzi huan tlayacanani. <sup>4</sup> Imojuanti tlahuel inmohueyimatij ipampa nopa tlamayantini tlen tlahuel tlaeliltíaj, pero nimantzi quintlamixolehuase. Imojuanti inmotemachiyayaj ipan imotomi huan inmoilhuiyayaj para axaca inmechchihuilisquia tlen fiero. <sup>5</sup> Pero xiquitaca, na nimechtitlanilis hueyi majmajtli, queja nopa quijtohua TOTECO Tlen Quinyacana Ielhuicac Ejcahua Ma Tlatlanitij. Huan noch i nopa tlacame tlen itztoque imonechca, inmechquixtise tlen imotlal. Huan axaca niyon se tlacatl tlen inmechpalehuis quema inmechquixtis. <sup>6</sup> Pero teipa, na sampa nimechhualicas inamonitame ipan imotlal. Queja nopa niDIOS niquijtohua.”

*Tlatzacuiltili para tlali Edom*

<sup>7</sup> TOTECO Tlen Quinyacana Ielhuicac Ejcahua Ma Tlatlanitij, quiijtohua: “¿Tlachque ininpanic nopa tlacame tlen tlalnamiquij? ¿Ax mocajqui niyon se tlen tlalnamiqui ipan nochí altepetl Temán? <sup>8</sup> Huan imojuanti intlacame tlen tlali Dedán, xicholoca huan ximotlatitij ipan huactoc tlali pampa quema niquintlatzacuiltis nopa Edom ehuani, nojquiya nimechtlatzacuiltis imojuanti. <sup>9</sup> Quema quitequij itlajca xocomecatl, nopa tlacame quicahuaj se quesqui para ma quitequica tlen teicneltzitz. Niyon tlaxtequini ax quihuicaj nochí tlamantli quema tlaxtequij. <sup>10</sup> Pero ax queja nopa nijchihuas ica nopa tlali Edom campa iteipa ixhuihua Esaú. Na nijcahuas tlali Edom cactoc queja huactoc tlali. Huan ax oncas niyon se lugar campa huelise motlatise. Niquintontlamiltis nochí inincone hua, iniicnihua huan inicalnechcahua. <sup>11</sup> Pero nopa coneme tlen icnotzitz tlen mocahuase, na niquinmocuitlahuis. Huan nopa cahual toahuime motemachise ipan na.”

<sup>12</sup> TOTECO quej ni quiilhuía tlali Edom ehuani: “¿Intla tlaijiyohuise tlacame tlen ax quinamiqui ma tlaijiyohuica, inmoilhuíaj para inmomanahuise tlen tlatzacuiltilstli? ¡Axtle! ¡Ax inmomanahuise! Melahuac inquiise tlen eltoc ipan nopa caxitl huan inquiselise nopa tlatzacuiltili. <sup>13</sup> Pampa noselti nimotestigojquetztoh huan niquijtohua para nijchihuas tlali Bosra queja se tlamontomitl tlen tetl. Huan nochí quipinajtise huan quitechihuase. Huan nochí ialtepehuela mocahuase sosolijtoque para nochipa, queja

nopa niDIOS niquijtojtoc para panos.”

<sup>14</sup> Huan na, niJeremías, nijselijtoc se tlajtoli tlen TOTECO huan yajaya nechilhuijtoc para quititlantoya se itlayolmelajca ipan nochí tlaltini para quinilhuis ma mosentilica para quitehuise tlali Edom huan ma quitlamixolehuaca. <sup>15</sup> Na niquechcapantlalis tlali Edom huan nijchihuas para nochí tlaltini ma quipinahualtica, queja nopa niDIOS niquijtohua. <sup>16</sup> Inmohueyimatiij miyac huan inmocajcaya jtoque. Inmotlepanitaj huan inmoilhuiáj para axaca inmechtlanis pampa inquipiyaj imochaj ipan nopa tepetini tlen huejcapantique. Pero yonque initztoque tlahuel huejcapa queja nopa cuajtli, na nimechtemohuis tlen nopano, queja nopa na niDIOS niquijtohua.

<sup>17</sup> “Senquistoc quixolehuase tlali Edom hasta nochí tlen panose nopano momajmatise huan quitlapose inincamac ica tlen quiitase. <sup>18</sup> Panos ihuical ica tlali Edom queja panoc ica altepetini Sodoma huan Gomorra huan nopa altepetini tlen eliyayaj nechca. Edom nojquiya mocahuas cactoque altepetini huan axaca itztos nopano. Queja nopa niDIOS niquijtohua. <sup>19</sup> Na niyas campa tlali Edom ipan se tlalochtli queja quisa se león ipan cuatitlamitl nechca atemitl Jordán hasta nopa tlamayamitl tlen yejyectzi para quiitzquis se pilborrego jtzi, queja nopa na tlalochtli nicalaquis ipan tlali Edom huan nijchihuas ma cholojtehuaj tlen inintlatl. Teipa se tlanahuatijquetl tlen na nijtlapejpenis tlanahuatis nopano. Pampa axaca seyoc queja na huan axaca huelis nechnotzas iixpa se juez para nechtla jtlanis cuentas. Axaca quipiya chicahualistli para moquetzas noixpa

para nechtzacuilis tlen nijchihuas.

<sup>20</sup> “Huajca xijcaquica cuali tlen niDIOS nijsencajtoc para temachtli niquinchihuilis nopa fiero tlacame tlen tlali Edom huan ialtepe Temán. Hasta nopa piloquichpiltzitzi nojquiya quinhuicase ipan seyoc tlali para tequipanotij san tlapic huan ininchajchaj mocahuase cactoc. <sup>21</sup> Elis queja nochí tlali mojmolinis quema huetzis Edom. Nopa tlacame tlahuel tzajtzise, huan caquistis hasta ipan nopa Hueyi Atl Tlen Chichiltic. <sup>22</sup> Inincualancaitaca patlantihuas queja se cuajtli, huan ieltlapal quipatlahuas ipan altepetl Bosra. Huan huajca nopa tlatehuiani tlen tlali Edom tlen más motemacaj, huihuipicase queja se sihuatl tlen coneziya.” Queja nopa quijito TOTECO.

### *Tlatzacuiltli para altepetl Damasco*

<sup>23</sup> Ya ni nopa tlajtoli tlen TOTECO nechmacac tlen Damasco: “Se hueyi majmajtli quinitzquis nopa altepetini Hamat huan Arfad, pampa ya quicactoque para hualas tlen quintlatzacultis. Ininyolo mojmolinis ica majmajtli queja mojmolinía nopa atl ipan hueyi atl quema huala se ajcomalacatl. <sup>24</sup> Altepetyl Damasco ehuani majmahuise hasta tlamis ininchicahualis, huan nochí cholose. Tlahuel majmahuise, mocuesose huan cuajcualose queja se sihuatl tlen coneziya. <sup>25</sup> Nopa altepetl tlen yejyectzi huan tlen temacayaya paqulistli, tlamisosolihuis huan nochí quitlahuelcahuase. <sup>26</sup> Ipan nochí calles tepejtose inintlacayohua nopa telpocame huan nopa soldados tlen quintzontlamiltijtoque

san ipan se tonal. Queja nopa na niquipijtohua niDIOS Tlen Niquinyacana Noelhuicac Ejcahua Ma Tlatlanitij. <sup>27</sup> Huan na njichihuas ma yoli se hueyi tliltl campa inepe altepetl Damasco huan ma quitlati nochí caltlanahuatili tlen Ben Hadad.”

*Tlatzacuiltyli para Cedar huan Hazor*

<sup>28</sup> Ya ni nopa tlajtoli tlen TOTECO nechmacac tlen nopa hueyi familia Cedar huan tlen nopa tlanahuatijcayotl tlen tlali Hazor tlen Nabucodonosor, tlanahuatijsquetl tlen tlali Babilonia quintzontlamiltis. Yajaya quijito para quititlanis Nabucodonosor para ma quintzontlamilti nochí tlen itztoque ica campa quisa tonati. <sup>29</sup> Huan quincuilis nochí ininborregojhua, ininchajchaj huan nochí tlen quipiyaj. Queja nopa TOTECO quijito. Huan nojquiya quincuilise inincamellos. Campa hueli oncas tzajtzilistli huan tlacame quijitose: “Tocualancaitacahua techyahualojtoque huan techchihuijáj tlen fiero.”

<sup>30</sup> Huan Toteco quijito: “Intlacame tlen tlali Hazor, xipanquisaca nochí imojuanti tlen inhuelij huan ximochololtica. Xiyaca ximotlatitij ipan huactoc tlali, pampa Nabucodonosor, tlanahuatijsquetl tlen tlali Babilonia, quisencajtoc tlen fiero para imojuanti huan mocuallalía para inmechtzontlamiltiqui.

<sup>31</sup> “Pampa na niDIOS niquilhuijtoc Tlanahuatijsquetl Nabucodonosor: Xiya, xiquestehuiti nopa tlacame tlen itztoque ica campa quisa tonati. Yajuanti itztoque ininseltitzitzi, niyon ax quema quipantíaj cuesoli. Nojquiya ax onca sequinoc

altepetini ininnehca. Itztoque temachme, niyon ax moilhuíaj intla monequi tepamitl o puertas. <sup>32</sup> Nochi inincamellos huan ininhuacaxhua, elis imoaxcahua. Huan nopa tlacame niqquintitlanis campa hueli ipan nochi tlaltepactli. Huan campa hueli campa itztotij, quinajsis huejhueyi majmaji tlen campa hueli hualas. <sup>33</sup> Huan tlali Hazor elis ininchaj tepechichime. Ayoc aca itztos nopano pampa mocahuas xolejtoc para nochipa.”

### *Tlatzacuiltyli para tlali Elam*

<sup>34</sup> Quema Sedequías pejqui tlanahuatía ipan tlali Judá, TOTECO nechnojnotzqui na, niJeremías, huan nechmacac ni tlajtoli para tlali Elam ehuani. Nechilhui: <sup>35</sup> “Na niDIOS Tlen Niquinyacana Noelhuicac Ejcahua Ma Tlatlanitij, niquijtohua: Na niqquintontlamiltis nopa soldados tlen tlali Elam. <sup>36</sup> Huan niqquintitlanis nopa tlacame tlen tlali Elam campa hueli. Quena, niqquintitlanis ipan campa hueli tlaltini ipan nochi tlaltepactli. <sup>37</sup> NiDIOS niquijtohua para nijchihuas para Elam ehuani ma momajmatica iniixpa incualancaitacahua tlen quinequise quinmictise. Huan nijchihuas ma quintlamiixpathohuiltica nopa Elam ehuani pampa tlahuel nicualani ininhuaya huan niqquintlamiltis. <sup>38</sup> Huan niDIOS niquijtohua para na nijtlalis nosiya para nitlanahuatis ipan tlali Elam. Huan nijtzontlamiltis inintlanahuati-jca huan inintlayacancahua. <sup>39</sup> Pero teipa ipan san iyojya tonali, sampa niquinhualicas nopa tlacame tlen tlali Elam ipan inintlal. Queja nopa niDIOS niquijtohua.”

# 50

## *Tlatzacuiltili para tlali Babilonia*

<sup>1</sup> Ya ni nopa tlajtoli tlen TOTECO nechmacac na, niJeremías, niitiocamanalojca para tlali Babilonia, inintlal nopa caldeos. Nechilhui:  
<sup>2</sup> “Xiquinyolmelahua nochi tlaltini para se tonali huetzis tlali Babilonia huan elis tlamixolejtoc. Inintotiotzi tlen itoca Marduc huetzis ipan hueyi pinahualistli. <sup>3</sup> Pampa motlalanase tlacame tlen se tlali tlen eltoc ica norte huan hualase para quintzontlamiltiquij Babilonia ehuani hasta ax mocahuas niyon se tlacatl, o niyon se tlapiyali, pampa nochi tlacame huan tlapiyalime cholose.”

## *Israelitame mocuepase ipan inintlal*

<sup>4</sup> Huan TOTECO quijtohua: “Huan ipan nopa tonali, nopa israelitame tlen ehuayayaj tlali Israel huan tlen ehuayayaj tlali Judá mosejcotilise huan mochoquilijtihualase, huan sentic nechtemose ni-ininTECO Dios. <sup>5</sup> Huan israelitame tlatzintocase catlí nopa ojtli tlen huala para altepetl Jerusalén. Huan quema quinnextilijtose nopa ojtli, yajuanti quitoquilijtihualase huan ajsise ipan nopa altepetl. Huan quijtose: ‘Ma tiyaca timosentilise ica TOTECO. Ma tijchihuaca se tlajtoli ihuaya tlen huejcahuas para nochipa huan tlen ayoc quema tiquixpanose.’

<sup>6</sup> “Notlacajhua itztoque queja borregojme tlen mocuapolojtoque. Inintlamocuitlahuijcahuia quincuapolojque huan teipa quintlahuelcajque ipan cuatitlamitl. Huan yajuanti más mocuapolojque huan ayoc quimatque quejatza mocuepase ipan inincorral. <sup>7</sup> Huan campa hueli

campa quinpantiyayaj inincualancaitacahua, quinmictiyayaj huan quijtohuayayaj: ‘Tojuanti tijpiyaj tlanahtuati para tiquintehuise israelitame queja tojuanti techpactía, pampa yajuanti tlajtlacolchijtoque ica ininTECO, yajaya tlen xitlahuac huan tlen ipan mochiyyayaj ininhuejapan tatahua.’

<sup>8</sup> “Pero ama notlacajhua, xicholoca tlen tlali Babilonia campa itztoque nopa caldeos. Xiquisaca sesen imojuanti ipan inintlal queja tieliyaya nopa tlayacanquetl tlen titlayacancuiliyaya nochí sequinoc. <sup>9</sup> Pampa xiquitaca, na niquintlalanas miyac soldados tlen nopa tlaltini tlen mocahuaj ica norte huan niquinhualicas para ma quitehuiquij tlali Babilonia. Huan nochí yajuanti cuali quiixmatij para quitequihuise cuatlamintli. Huan quema quimajcahuase inincuatlaminhua, nochipa ajsise campa quinequiyayaj. <sup>10</sup> Huan inincualancaitacahua quitlaxtequilise tlali Babilonia hasta quipiyase nochí tlen quinequise. Queja nopa niDIOS niquijtohua.

### *Tlatzacuiltyli para tlali Babilonia*

<sup>11</sup> “Incaldeos tlen inquintlaxtequilijque notlacajhua, inyolpactoque. Inmotomajque queja huacaxme tlen tlacuaj campa onca cuajcuali sacatl, huan intzajtzij ica paquili queja oquich cahuayoyme. <sup>12</sup> Pero imotlal campa intlacatque huetzis ipan se hueyi pinahualistli, pampa se país tlen más fiero tlen nochí sequinoc. Mocahuas cactoc queja huactoc tlali campa ax tleno eli. <sup>13</sup> Tlali Babilonia mocahuas queja se huactoc tlali ipampa nohueyi cualancayo niDIOS. Nochí tlacame tlen

panose nopano momajmatise huan quipinajtise ipampa nochi nopa tlatzacuiltli tlen quiseli.

<sup>14</sup> “Nochi intlacame ipan nopa tlaltini tlen mocahuaj yahualtic tlen tlali Babilonia, ximocuallalica para inquitehuise. Huan nochi imojuanti tlen inhuelij inquitequihuáj nopa cuahuitoli, xiquinmajcahuilica imocuatlaminhua para ma quiajsis Babilonia huan tlen nopano ehuani, pampa tlajtlacolchijtoc noixpa.

<sup>15</sup> Xitzajtzica chicahuac tlen nochi lados huan xiquijtoca: ¡Ya motemamac Babilonia! ¡Ya huetzqui nopa tepamitl tlen ica moyahualojtoya! TOTECO ya momacuepqui ica ya. Quena, xiquinchihuilica Babilonia ehuani senquistoc queja quinchihuiljtoque sequinoc. <sup>16</sup> Nochi tlacame tlen tlatocayayaj huan tlapixcayayaj ipan mili ipan Babilonia ma choloca tlen nopa tlali. Ma quisaca ipan nopa tlali ininhuaya nochi sequinoc tlen achtohuiya ehuayayaj sequinoc tlaltini, pampa ya monechcahuía nopa tlatzacuiltli para nopa tlacame tlen tlali Babilonia.”

### *Israelitame mocuepque inintla*

<sup>17</sup> TOTECO quijjtohua: “Israelitame itztoque queja borregojme tlen quintojtocatiyohuij tecuanime hasta quinsemanaj campa hueli. Eltoc queja achtohui nopa tlanahuatijquetl tlen tlali Asiria quincuajqui, huan teipa Nabucodonosor, tlanahuatijquetl tlen tlali Babilonia, quinpostequili iniomiyohua. <sup>18</sup> Yeca ama niininTECO Tlen Niquinyacana Noelhuicac Ejcahua Ma Tlatlanitij huan tlen niininTeco israelitame, niquijtohua: Na nijtlatzacuiltis

nopa tlanahuatijquetl tlen tlali Babilonia huan nochí ipan itláli ihuical queja nijtlatzacuilty nopa tlanahuatijquetl tlen tlali Asiria. <sup>19</sup> Huan sampa niquinhuálicas nopa israelitame ipan inintial para ma tlacuaca ipan nopa tepetl Carmelo huan ipan Basán: huan para sampa ma itztoca ica paquilitli ipan tepetl Efraín huan ipan Galaad. <sup>20</sup> Huan ipan nopa tonali, axaca huelis quipantis se inintlajtlacol israelitame ipan tlali Israel o tlali Judá, pampa na niquintlapojpolhuis nopa quentzi tlacame tlen noja niquincajtos para itztose. Queja nopa niinTECO niuijtohua.

### *TOTECO quitlatzacuility Babilonia*

<sup>21</sup> “¡Innotlatehuijcahua, xiyaca xijtehuitij tlali Babilonia [50:21 O Merataim tlen elqui seyoc itoca Babilonia. Merataim quinequi quijitos ‘Ome hueltas quintlatzacuilityse.’] huan nopa tlacame tlen Pecod [50:21 Se altepetl ipan Babilonia. Pecod quinequi quijitos ‘Lugar tlen tlatzacuility.’]! Quena, xiyaca ipan tlali Babilonia campa itztoque nopa tlacame tlen mosisiníaj. Xiquintlatzacuilityca huan xiquintlamiixpohuiltyca senquistoc queja na nimechnahuatijtoc. Queja nopa niimoTECO niuijtohua.” <sup>22</sup> Ma caquisti tlahuelchihualistli tlen tlatehuijcayotl ipan nopa tlali, huan ma tzajtzica nopa tlacame tlen quiselíaj tlatzacuility. <sup>23</sup> Tlali Babilonia tlen eltoya queja se hueyi martillo tlen quintepachoyaya nochí tlaltini, ama ya huetztoque huan itlacajhua tepejtoque tlalchi. Tlali Babilonia ya sosolijtoc huan mocahua iselti tlatlajco tlen nochí tlaltini. <sup>24</sup> Na niquintlalili se tlaquetztlí nopa Babilonia ehuani pampa

tlahuel motehuijque nohuaya na, niDIOS, huan ax momacaque cuenta quema masique.

<sup>25</sup> “Na nijlapo nopa cuarto campa nicajcocui nochí notepos para ica nitlatehuis. Huan ipampa nohueyi cualancayo na nijquixtijtoc noteposhua tlen ica nitlatehuía pampa na, niDIOS Tlen Niquinyacana Noelhuicac Ejcahua Ma Tlatlanitij, nijpiya tequitl para nijchihuas ipan tlali Babilonia. <sup>26</sup> Huajca nochí imojuanti tlen initztoque huejca, xihualaca xijtehuiquij. Xijlapoquij nochí nopa caltini campa quiajcocui miyac tepostli. Xijhueloniquij itepa huan nochí caltini ipan ni altepetl hasta mocahuas queja se tlamontomitl tlen tetl. Huan xiquintlamimictica nopa tlacame. Ma ax mocahua niyon se. <sup>27</sup> Xiquinmictica nochí ininsoldados. Xiquintzontlamiltica. Niyon se tlacatl tlen tlali Babilonia ax momanahuis. Monequi nochí ma miquica pampa ya ajsic hora para quitlamixolehuase tlali Babilonia.

<sup>28</sup> “Xijtlacaquilica tlen quijtohuaj nopa tlacame tlen cholotejque tlen Babilonia huan momanahuijque. Tepohuilitij quejatza TOTECO Dios quintlatzacuiltijtoc nopa Babilonia ehuani tlen quixolehuacoj itiopa.

<sup>29</sup> “Xiquinnotzaca nochí tlen huelij quitequi-huijaj cuahuitoli para quimajcahuase cuatlamintli huejca. Ma quitehuiquij tlali Babilonia. Ma quiyahualoca nopa altepetl para axaca huelis cholas. Xiquinchihuili Babilonia ehuani senquistoc queja yajuanti quinchihuiljtoque sequinoc. Pampa Babilonia ehuani tlahuel mohueyimatque noixpa na tlen nitlatzejzelotic huan niininTECO

israelitame. <sup>30</sup> Huajca nochí inintelpocahua Babilonia huetzise ipan calles huan miquise, huan nochí nopa tlatehuiani tlamimi quise.”

<sup>31</sup> Huan niimoTECO Tlen Niquinyacana Noelhuicac Ejcahua Ma Tlatlanitij niquijtohua: “Intlali Babilonia ehuani, tlahuel inmohueyimati huan huajca na nimochijtoc niimocualancaitaca. Huan ya ajsic hora para nimechtlatzacuiltis. <sup>32</sup> Nochi imojuanti ipan imotlal tlahuel inmohueyimati huan temachtli inmotepotlamise huan inhuetzise inihuaya nochí imoaltepehua. Axaca inmechtلالانas, pampa TOTECO quitlicuiltis se hueyi titl ipan tlali Babilonia huan quintlatis nochí imoaltepehua.”

<sup>33</sup> Quej ni quijtohua TOTECO Tlen Quinyacana Ielhuicac Ejcahua Ma Tlatlanitij: “Nopa israelitame tlen tlali Israel huan Judá tlaijiohuíaj chicahuac pampa inincualancaitacahua quinhuicaque ipan sejcoyoc para tlatequipanotij san tlaptic huan ax quinequij quinmajcahuase ma yaca. <sup>34</sup> Pero na, niinintlamahanuijca, israelitame nijpiya miyac chicahualistli. Na notoca niDIOS Tlen Niquinyacana Noelhuicac Ejcahua Ma Tlatlanitij. Na niquinpalehuis huan nijchihuas ma quinmajcahuase para yase huan niquinhualicas ipan tlali Israel para ma mosiyajcahuase. Pero Babilonia ehuani tlahuel majmahuise.”

<sup>35</sup> Huan TOTECO quijtohua: “Nopa tlatehuijcayotl huetzis ipan nochí nopa caldeos huan ipan nochí Babilonia ehuani. Huan niyon se tlayacanquetl huan tlalnamijquetl ax momanahuis. <sup>36</sup> Nochi nopa istlacatrica tiocamanalohuani miquise ica machete. Huan

nochi nopa tlatehuiani tlen más motemacaj, majmahuise quema ajsise tlacame ica machete para quintzontlamiltise. <sup>37</sup> Nopa tlatehuijçayotl quintzontlamiltis inincahuayojhua huan inincuacarros. Huan nopa soldados tlen sequinoc tlaltini tlen mosentilijtoque ihuaya Babilonia para quipalehuise, elise ax tetique queja sihuame. Huan tlen hualase quintehuiquij quinchtequilise nochí tlen quipiyaj. <sup>38</sup> Huan hasta nopa atl ipan Babilonia nojquiya tlamihuaquis. ¿Para tlen queja nopa elis? Queja nopa elis, pampa nochí nopa tlali temitoc ica tlaixcopincayome huan teteyome tlen nopa tlacame tlahuel quinhueyimatiij.

<sup>39</sup> “Yeca ni altepetl Babilonia elis ininchajchaj nopa totome tlen ax tlapajpactique queja avestruces huan nopa tepechichime. Nopano quichihuase ininchajchaj nochí nopa tecuanime tlen itztoque ipan huactoc tlali. Ayoc quema itztoquij tlacame nepa pampa nopano mocahuas xolejtoc para nochipa. <sup>40</sup> Temachtli nijxolehuas Babilonia queja huejcajquiya niquinxolejqui altepetini Sodoma huan Gomorra huan nochí sequinoc altepetini tlen eltoyaj nechca. Huan queja ipan nopa altepetini ayoc aca itztoc, queja nopa nojquiya elis ica tlali Babilonia. Ayoc aca itztos nopano. Queja nopa niimoTECO niquijtohua.

<sup>41</sup> “Hualase tlahuel miyac soldados tlen nopa tlali tlen mopantía ica norte. Huan ininhuaya hualahuij miyac tlanahuatiani tlen niimoTECO niquinnotztoc tlen campa hueli tlaltini. <sup>42</sup> Nochi yajuanti mocualtlalijtoque ica inintepos huan hualahuij para quichihuaquij se hueyi miquistli.

Yajuanti tlahuel mosisiníaj, niyon ax tetlasoijt-laj. Inintlahuejchihualis caquisti nelchicahuac queja quema molinía nopa hueyi atl. Teicnel-tique tlali Babilonia ehuani, pampa nochí ya-juanti hualahuij ipan inincuacarros para quinte-huise.<sup>43</sup> Pero quema nopa tlanahuatijquetl tlen tlali Babilonia quimatis tlen panos ipan itlal, mo-majmatis huan tlamis ichicahualis. Huan pehuas tlaijiyohuis queja se sihuatl tlen coneipyia.

<sup>44</sup> “Na nihualas queja se león tlen quisa ipan cuatitlamitl nechca nopa atemitl Jordán huan tlalochtzi huitoni ipan nopa borregojme tlen itz-toque nopano ipan potrero. Huan niquntojtocas Babilonia ehuani tlen inintlal huan nijchihuas ma quinnahuati se tlanahuatijquetl tlen na nech-pactis. Pampa axaca seyoc queja na. Axaca hueli nechnotzas na iixpa se Juez para nechtlahtlanis cuenta. Axaca se tlanahuatijquetl tlen huelis mo-quetzas noixpa.

<sup>45</sup> “Xijtlacaquilica tlachque quisencajtoc TOTECO para tlali Babilonia huan nopa caldeo tlacame campa itztoque nopano. Hasta tlen noja conetzitzti nojquiya quinhuicase ipan sejcoyoc. Huan ininchajchaj mocahuase cactoc huan nochí tlahuel majmahuise.<sup>46</sup> Nochi tlaltepacatl mojmolinis quema huetzis Babilonia. Huan ininchoquilis caquistis hasta ipan nochí sequinoc tlaltini.”

## 51

*Quintzontlamiltise Babilonia ehuani*

<sup>1</sup> Quej ni quijtohua TOTECO: “Na nijtitlanis ipan tlali Babilonia se tlaxolejquetl para ma quintzontlamilti nochí nopa caldeo tlacame. <sup>2</sup> Hualase tlacame tlen seyoc tlali ehuani tlen quintzejzelose nopa Babilonia ehuani queja quitzejzelohuaj trigo para ma quinhuica ajacatl itlasolo. Hualase tlen campa hueli tlaltini huan motlalanase para quitehuise ipan nopa tonali tlen tlaijiyohuilistli ipan tlali Babilonia. <sup>3</sup> Huan ni tlatehuiani quinmajahuase nopa soldados tlen tlali Babilonia ica incuatlaminhua. Huan niyon se Babilonia ejquetl ax momanahuis. Miquise huehuentzitzi huan telpocame, huan quintlamimictise nochí ininsoldados. <sup>4</sup> Campa hueli ipan nopa tlali nochí caldeos mocahuase mictoque. Huan ipan nochí calles tepejtose tlen miquise ica cuatlamintli. <sup>5</sup> Pampa ax niquntlahuelcajtoc israelitame tlen tlali Israel, niyon tlali Judá. Na noja niitztoc niinin-Dios. Na niitztoc niininTECO Tlen Niquinyacana Noelhuicac Ejcahua Ma Tlatlanitij. Nopa caldeo tlacame tlahuel tlajtlacolchijtoque ica na tlen nitlatzejzelotic huan niininTECO israelitame.

<sup>6</sup> “Xquisaca ipan tlali Babilonia huan ximochololtica nochí imojuanti tlen inhuelij. ¡Amo ximocahuaca nopano! Intla inmocahuase, huajca nojquiya intzontlamise quema nimomacuepas ica nopa Babilonia ehuani. Pampa na niimoTECO niquntlaxtlahuis queja quinamiqui ipampa nochí inintlajtlacolhua. <sup>7</sup> Babilonia eliyaya queja se caxitl tlen oro nomaco niDIOS tlen nijtequihui para nochí tlaltini ipan tlapactli ma quiica tlen nocualancayo huan moihuintise hasta molocojchihuase.

<sup>8</sup> Pero ama, ipan se tlalochtli, huetztoc tlali Babilonia huan mochijqui cuechtic. Huajca xijchoquilica. Xijmacaca pajtli pampa huelis noja mochicahuas.” <sup>9</sup> Huan nopa tlacame tlen sequinoc tlaltini quijtohuaj: “Ya tijpajtijque Babilonia, pero ax hueli mochicahuas pampa ayoc quipiya pajtli. Huajca xijcahuaca huan xitechcahuilis sesen tojuanti timocuepase ipan totlal campa tihualajque pampa TOTECO quititlanilitoc tlatzacuiltli ipan Babilonia huan ajsi hasta nepa elhuicac. <sup>10</sup> TOTECO techchihuilijtoc tlen xitlahuac. Ma tiyaca huan ma titlayolmelahuatij ipan altepetl Jerusalén nochi tlen cuali quichijtoc TOTECO DIOS.”

<sup>11</sup> ¡Xijtentica nopa cuatlamintli! Xiquincuallalica imoyolixtzajcahua tlen tepostli pampa TOTECO quinnojnotztoc nopa tlanahuatiani tlen tlali Media para ma quixolehuatij tlali Babilonia. TOTECO quincuepilis pampa yajuanti quintlaijiyohuiltijque itlacajhua huan quijtlacojque itiopa. <sup>12</sup> Xijtlalanaca nopa bandera iixco itepa Babilonia. ¡Xiquintlalica tlamocuitlahuiani ipan tepamitl! Xiquintlalica soldados campa hueli, pampa TOTECO quichihuas nochi tlen quijtojtoc quichihuas ica tlali Babilonia.

<sup>13</sup> Babilonia eliyaya se altepetl nechca miyac atemitl. Quipixqui miyac ricojyotl. Pero ya ajsic hora para tlamis. <sup>14</sup> TOTECO Tlen Quinyacana Ielhuicac Ejcahua Ma Tlatlanitij, motestigoquetztoc iselti huan quijtojtoc: “Ialtepehua Babilonia temis ica inincualancaitacahua queja elisquía se mili tlen temitoc ica chapolime. Huan quema

inincualancaitacahua ya quintlantose, yajuanti tzajtzise ica paquelistli. Huan nopa tzajtzilistli caquistis hasta elhuicac.”

*Se huicatl para TOTECO*

<sup>15</sup> TOTECO quichijchijqui ni tlaltepactli ica ihueyi chicahualis. Quiquetzqui campa eltoc ica itlalnamiquilis. Huan quipatlahjqui elhuicactli ica itlaixmatilis. <sup>16</sup> Quema yajaya camati, tlatomoni nepa elhuicac. Yajaya tlen quichihua ma motlalana apostli ipan nochi tlaltepactli huan ma mochihua mixtli. Yajaya quichihua ma tlapetlani quema tlaahuetzi huan quiqxintia nopa ajacatl ipan icuarto campa quiajcocui huan quititlani campa quinequi. <sup>17</sup> Quema tlacame quiita tlen TOTECO hueli quichihua, nochi nesij tlahuvel huihuitique. Nesi queja tlapiyalime tlen ax quipiyaj inintlalnamiquilis, pampa axaca tlalnamiqui queja ya. Tlacame quinchijchihuaj tlaixcopincayome huan teteyome, pero tlen quinchijtoque tlahuvel mopinahuaj pampa san tlacajcayahuaj. Quijtohuaj para nopa teteyome elij dioses, pero ax neli. Ax quipiyaj yolistli, niyon ax quipiyaj niyon se chicahualistli. <sup>18</sup> Nopa teteyome ax tleno ininpati. Nochi eltoc san istlacayotl. Huan se tonali TOTECO hualas quintlachiliqui huan quintlamixolehuas. <sup>19</sup> Pero TOTECO tlen ininDios israelitame, yajaya ax se teteyotl. Yajaya eli Dios tlen quichijchijqui nochi tlen onca, huan quintlapejpeni israelitame para elis iaxcahua tlen más quinicneli. Yajaya itoca: TOTECO Tlen Quinyacana Ielhuicac Ejcahua Ma Tlatlanitij.

*TOTECO quitequihui Babilonia para quitlatza-cuultis sequinoc*

<sup>20</sup> TOTECO camati tlen Babilonia: “Babilonia eltoc queja se hacha tlen ica nitlatehuis huan queja nomachete. Quena, elis queja notepos para ica niquinxolehuas tlaltini huan para niqintzontlamiltis tlanahuatiani. <sup>21</sup> Na njitequihuis Babilonia para quintzontlamiltis soldados, cahuayos huan tlacame tlen cahuajtlejcotoque. Quinxolehuas cuacarros huan tlen carrojtlejcotoque. <sup>22</sup> Huan nojquiya njitequihuis para niqintzontlamiltis tlacame tlen huehuentzitzi huan telpocame. Quintzontlamiltis coneme huan ichpocame, <sup>23</sup> tlamocuitlahuiani huan ininborregojhua, tlacame tlen quipoxahuaj tlali huan inintorojhua tlen tlapoxahuaj, tlayacanani tlen soldados huan tlanahuatiani.

*Tlatzacuiltyli para tlali Babilonia*

<sup>24</sup> “Huan teipa imoixpa innoisraelita tlacajhua, niqintlaxtlahuis nopa caldeo tlacame huan nochí Babilonia ehuani ipampa nochí nopa fiero tlamantli tlen quichihuilijque notiopa ipan Jerusalén. Queja nopa niimoTECO niquijtohua.

<sup>25</sup> “¡Ay inBabilonia ehuani! Na niitztoc nimocualancaitaca. Initzyoque queja se tepetl tlen tlahuatl tetic huan inhuelij inqintzontlamiltíaj sequinoc tlaltini. Pero na nimomatlatlanas para nimechtlatzacuultis huan nimechtepexihuas tlen nopano tlahuatl huejcapa campa ama initzyoque. Huan nimechchihuas queja se tepetl tlen tlamitlatlatoc. <sup>26</sup> Imoaltepe mocahuas xolejtoc para

nochipa. Huan niyon se ayoc quitequihiuse nopa tetini para calchihuase. Nelía imoaltepe elis queja tlasoli para nochipa. Queja nopa niDIOS niquijtohua.

<sup>27</sup> “Xijtlalanaca se bandera queja se tlanextili para ma mocualtlalica para quitehuise tlali Babilonia. Xijpitzaca tlapitzali para ma panquisaca nopa soldados tlen tlali Ararat, Mini huan Azkenaz. Xijtlalica se tlayacanquetl para quinyacanas nopa soldados huan xiquinhualicaca tlahuel miyac cahuayos. <sup>28</sup> Xiquintitlanica miyac tlaltini ininsoldados huan tlayacanani para quintehuitij tlali Babilonia. Ma yaca inintlanahuatijcahua Media ica ininsoldados huan inintlayacanahua nochí nopa tlaltini tlen mocahua ininmaco.”

<sup>29</sup> Nochi tlali Babilonia mojmolinis huan mohuijhuisos ica tlacuajcualocayotl pampa TOTECO quichihuas senquistoc queja quiijtojtoc quichihuilis. Babilonia mocahuas cactoc queja huactoc tlali. Niyon se tlacatl ayoc itzlos nopano. <sup>30</sup> Nopa soldados tlen tlali Babilonia tlen más motemacayayaj ayoc tlatehuíaj. San mocaltzactoque ipan nopa hueyi cali tlen quitequihiúaj soldados. Tlanqui ininchicahualis, huan ama majmahuij queja sihuame. Inincualancaitacahua ya quitlatijque ininchajchaj. Huan nochí puertas tlen nopa altepetl ya quitlapanque. <sup>31</sup> Miyac tlayolmelahuani hualahuij tlen campa hueli huan quilhuij nopa tlanahuatijquetl tlen altepetl Babilonia para icualancaitacahua ya quiitzquitoque ialtepe. <sup>32</sup> Nochi ojli campa

quipano nopa atentli ya quinitzquitoque inincualancaitacahua. Ya quintlicultijtoque nopa huejcapantique caltini para tlajtlachiyase. Huan quiilhuíaj nopa tlanahuatijquetl para se hueyi majmajtli quinitzquitoc nopa soldados tlen tlali Babilonia.

<sup>33</sup> Pampa TOTECO Tlen Quinyacana Ielhuicac Ejcahua Ma Tlatlanitij huan yajaya tlen ininTeco israelitame quijtohua: “Nechcatitoc para hualase inincualancaitacahua Babilonia ehuani huan qui-huitequise queja elisquía trigo para quiqxtilise itlasolo.”

<sup>34-35</sup> Nopa israelitame tlen tlali Judá ehuani tlen itztoque ipan tlali Babilonia, quijtohuaj: “Nabucodonosor, tlanahuatijquetl tlen tlali Babilonia quitlamilti tochicahualis huan techtolojtoc queja se hueyi tlapiyali. Yajaya mocuili nochí toricojyo huan techquixti tlen totlal. Huajca ama, ma tlaijiyhui tlali Babilonia ipampa nochí tlen techchihuili. Ma quiseli se tlaxtlahuili queja quinamiqui ipampa quinmicti toicnihua.”

<sup>36</sup> Huan TOTECO quinilhui Jerusalén ehuani: “Na nimechtenpalehuis huan niyuincuepilis imocualancaitacahua ipampa nochí tlen inmechchihuilijque. Na nijchihuas ma huaqui ininhueya huan nochí iniamel campa meya atl. <sup>37</sup> Huan tlali Babilonia mocahuas queja se tlamontomitl tlen tetl campa itztose tepechichime. Nochi tlen quiitase tlahuel momajmatise huan niyon se tlacatl ayoc itztos nopano.

<sup>38</sup> “Amantzi nopa Babilonia ehuani tlahuel tlaij ipan iniilhuihua huan nanalcaj queja leones huan

queja ininpilconeuhua. <sup>39</sup> Huan quema noja ihuin-titose ica tlaili, na niquincualtlalilis seyoc ilhuitl. Niquinchihuas ma tlaica hasta huetzise tlalchi queja mictoque. Huan cochise para nochipa. Ayoc quema isase. Queja nopa niDIOS niquijto-hua. <sup>40</sup> Huan niquinhuicas nopa Babilonia ehuani queja pilborregojtzitzi, oquich borregojme huan oquich chivojme ipan nopa lugar campa quin-quechtzontequise.”

<sup>41</sup> Ya huetzqui Babilonia, nopa hueyi altepetl tlen quihueyimatiyaya tlacame tlen nochi tlaltini. Ama nochi ipan tlaltepactli momajmatíaj huan ax hueli quineltocaj intla melahuac ya huetzqui Babilonia. <sup>42</sup> Eltoc queja nopa hueyi atl motlalantoc huan hualajqui quitemítico tlali Babilonia. <sup>43</sup> Nochi ialtepehua ya tlamisosolijtoque. Mocajtoc queja huactoc tlali campa axaca itztoc huan campa ax panoj paxalohuani.

<sup>44</sup> “Na nijtlajtolsencahuas nopa teteyotl Bel, intotiotzi nopa Babilonia ehuani. Huan nijquixtilis nochi tlen mocuilijtoc para iaxca. Huan nochi tlacame tlen sequinoc tlaltini ayoc hualase para quihueyichihuase. Hasta nopa tepamitl tlen quiyahualohua tlali Babilonia, nojquiya huetzis.

<sup>45</sup> “Innotlacajhua, xiquisaca ipan nopa altepetl Babilonia. Xicholoca para inmomanahuise tlen nohueyi cualancayo quema nitetlatzacuiltis nopano. <sup>46</sup> Pero amo ximomajmatica quema achtohui inmechilhuise para monechcahuíaj nopa tlatehuiani, pampa sesen xihuitl inquicaquise miyac tlamtli tlen fiero. Teipa nopa gobernadores tlen tlali Babilonia

mocualanise huan motehuise. <sup>47</sup> Huajca monechcahuía tonali para nijtlatzacultis nopa hueyi altepetl huan nochi iteteyohua. Quena, huetzis ipan se hueyi pinahualistli huan nopa mijcatzitzí tepejtose ipan calles campa hueli. <sup>48</sup> Nochi tlen itztoque ipan elhuicactli huan tlaltepactli paquise quema nopa soldados tlen nopa tlali tlen mopantía ica norte hualase quitehuiquij tlali Babilonia. Queja nopa niimoTECO niquijtohua. <sup>49</sup> Queja Babilonia ehuani quinmictijque nopa israelitame huan sequinoc campa hueli ipan ni tlaltepactli, queja nopa nojquiya miquise yajuanti.”

*Tlajtoli para Judá ehuani ipan Babilonia*

<sup>50</sup> Nochi imojuanti tlen inmomanahuijque tlen nopa tlatehuijcayotl, amo ximoquetzaca. Xicholoca amantzi quema noja onca tonali. Xiquilnamiquica TOTECO huan xiquilnamiqui altepetl Jerusalén huan ximocuepaca nica. <sup>51</sup> Imojuanti inquijtohuaj: “Tojuanti tlahuel timopinahuaj pampa nopa Babilonia ehuani quiijtlacojtoque itiopa TOTECO.”

<sup>52</sup> Pero TOTECO quiijtohua: “Quena, pero ajsis tonali para niquinxolehuas nochi nopa teteyome tlen tlali Babilonia. Ipan nochi nopa tlali caquistis ininchoquilis nopa tlacame tlen quincojtoque. <sup>53</sup> Huan yonque Babilonia tlejcosquía hasta elhuicac huan quipiyasquía tlahuel miyac chicahualistli, na niquintitlanisquía tlaxolehuani para ma quitzontlamiltica.”

*Quixolehuase tlali Babilonia*

<sup>54</sup> Xijcaquica quejatza tzajtzij nopa tlacame tlen quintzontlamiltíaj ipan tlali Babilonia campa itztoque nopa caldeos. <sup>55</sup> Pampa amantzi TOTECO quixolehua tlali Babilonia. Nopa tlatehuiani quitemitijtoque nopa tlali huan hualahuij chicahuac queja atl tlen mosisinía. <sup>56</sup> Nopa soldados ajsij ipan tlali Babilonia huan quintzontlamiltíaj nochi nopa tlacame tlen tlahuel motemacaj. Nochi inintepos tlen ica momanahuíaj, quinpostequilíaj, pampa TOTECO itztoc nopa Dios tlen nelía tlaxtlahua cuali huan quintlaxtlahuía sesen nopa Babilonia ehuani queja quinamiqui ipampa inintlajtlacolhua.

<sup>57</sup> Huan TOTECO quiijtohua: “Na niquinihuintis nopa tlayacanani, tlalnamiquini, gobernadores, tlayacanani tlen soldados huan tlatehuiani tlen Babilonia. Huan cochise para ayoc quema isase. Queja nopa na niquistohua ninopa tlanahuatijquetl tlen notoca: nopa DIOS Tlen Quinyacana Ielhuicac Ejcahua Ma Tlatlanitij.

<sup>58</sup> “Huan niimoTECO Tlen Niquinyacana Noelhuicac Ejcahua Ma Tlatlanitij niquistohua: Nopa tepamitl tlen tilahuac tlen quiyahualohua tlali Babilonia, quitlamihuelonise. Huan nojquiya quitlatisse nopa huejhueyi puertas. San tlamic tequitique nopa tlacame sequinoc tlaltini, pampa noch i tlamanli tlen quichijchijque, tlamitlatlas.”

### *Quititlani itlajtol Jeremías ipan tlali Babilonia*

<sup>59</sup> Quema Tlanahuatijquetl Sedequías yahuiyaya para nahui xihuitl tlanahuatis quipixqui itlapalehuijca tlen itoca eliyaya Seraías huan elqui icones Nerías, tlen elqui icones

Maasías. Huan na, niJeremías, niquilhui Seraías tlen ma quichihua pampa yajaya yahuiyaya tlali Babilonia ihuaya nopa Tlanahuatijquetl Sedequías tlen tlali Judá. <sup>60</sup> Na, niJeremías, niquijcuilojtoya ipan se amatl nochí nopa huejhueyi tlatzacuiltli tlen TOTECO quiijtojtoya amantzi quititlanis ipan tlali Babilonia huan nochí sequinoc tlamantli tlen Babilonia. <sup>61-62</sup> Huan na, niJeremías, niquilhui: “Quema tiajsiti ipan tlali Babilonia, xijpohuas nochí tlen niquijcuilojtoc nica huan xiquijto: ‘TOTECO, ta tiquijtojtoc para tijxolehuas altepetl Babilonia hasta ax mocahuas niyon se tlacatl huan niyon se tlapiyali nica, huan ni tlali mocahuas sosolijtoc para nochipa.’” <sup>63</sup> Huan teipa, quema ya tijtlamipojtos ni amatl, xiquilpili se tetl huan xijmajcahuas ipan nopa atemitl Éufrates. <sup>64</sup> Huan tiquijtos: ‘Quej ni amatlapohuali atzonpolihuis, nojquiya tlali Babilonia temos hasta tlatzintla huan ayoc quema motlalanas sampa ipampa nochí nopa huejhueyi tlatzacuiltli tlen nijhualicas ipan ya.’”

Hasta nica tlami nopa tlajtoli tlen Jeremías quiseli tlen TOTECO huan tlayolmelajqui.

## 52

### *Tlanahuatijquetl Sedequías*

<sup>1</sup> Sedequías quipiyayaya 21 xihuitl quema pejqui tlanahuatía ipan altepetl Jerusalén huan tlanahuati majtlactli huan se xihuitl. Inana itoca eliyaya Hamutal huan eliyaya iichpoca Jeremías tlen ehua altepetl Libna. <sup>2</sup> Pero Sedequías

quichijqui tlen ax cuali iixpa TOTECO queja nojquiya quichijtoya Joacim tlen achtohuiya eliyaya tlanahuatijquetl. <sup>3</sup> Huan TOTECO tlahuel cualanqui ica nopa tlacame tlen altepetl Jerusalén huan tlali Judá huan quinquixti tlen iixpa. Quichijqui para nopa tlanahuatijquetl tlen Babilonia ma quinquixti tlen inintla huan ma quinhuica ipan tlali Babilonia. Huan teipa Tlanahuatijquetl Sedequías mosisini ica nopa tlanahuatijquetl tlen tlali Babilonia.

<sup>4</sup> Huan ipan 15 itequi nopa metztli majtlactli ipan tocalendario israelita [52:4 Ipan 15 itequi enero ipan 588 a.C. ipan tocalendario tlen ama.] quema Sedequías yahuiyaya para chicnahui xihuitl para tlanahuatis, Nabucodonosor, tlanahuatijquetl tlen tlali Babilonia, yajqui ica nochis isolados ipan altepetl Jerusalén huan quiyahualotoj nopa altepetl huan quitemitijque tlamon-tomitl tlen tlali hasta itzonpac nopa tepamitl para hueli calaquisquíaj ipan nopa altepetl. <sup>5</sup> Huan quiyahualo Jerusalén para ome xihuitl hasta Sedequías yahuiyaya para majtlactli huan se xihuitl tlanahuatis.

<sup>6</sup> Huan ipan 9 itequi nopa metztli nahui [52:6 Ipan 18 itequi julio 586 a.C. ipan tocalendario tlen ama.] tlen nopa xihuitl, senquistoc tlanqui nochis tlacualistli ipan nopa altepetl huan oncac se hueyi mayantli. <sup>7</sup> Huajca nopa tlacame tlen calijtic ipan altepetl Jerusalén quicoyonijque nopa tepamitl. Huan ica tlayohua cholojque nochis nopa israelita soldados huan panoque ipan nopa puerta tlen eltoya tlatlajco nopa ome tepamitl nechca nopa xochimili tlen iaxca nopa tlanahuatijquetl. Huan

quisque tlen nopa altepetl yonque yahualtic itztoyaj nopa caldeos. Huan motlalojtejque para quipanose nopa miltini para ajsisquíaj ipan nopa tlamayamitl nechca atemitel Jordán [52:7 O Arabá. Arabá eltoc seyoc itoca nopa tlamayamitl nechca atemitel Jordán.]

<sup>8</sup> Pero nopa caldeo soldados quitepotztocaque Tlanahuatijquetl Sedequías huan quiitzquitoj ipan se tlamayamitl nechca altepetl Jericó, pampa nochí isoldados ya quitlahuelcajtoyaj. <sup>9</sup> Huan quihuicaque Sedequías ipan altepetl Ribla ipan tlali Hamat campa itztoya Nabucodonosor, tlanahuatijquetl tlen tlali Babilonia. Huan nopano quitlajtolsencajqui huan quiijto tlachque elis itlatzacuiltil. <sup>10</sup> Huan nopano ipan altepetl Ribla, Nabucodonosor quichijqui para Sedequías ma quintlachilijo iconehua quema quinquechtzontequivayaj. Huan nojquiya iixpa quinquechtzontejque nochí nopa tlayacanani tlen tlali Judá. <sup>11</sup> Teipa Nabucodonosor tlanahuati ma quiixtiyolquixtica Sedequías. Huan teipa quilpijque ica tepos cadena huan quihuicaque ipan tlali Babilonia. Huan nopano quitzajque hasta mijqui.

### *Quitlatijque tiopamitl*

<sup>12</sup> Huan ipan 10 itequi nopa metztli macuili ipan nopa calendario israelita [52:12 Ipan 17 itequi agosto 586 a.C. ipan tocalendario tlen ama.], quema Nabucodonosor yahuiyaya para majtlactli huan chicnahui xihuitl para tlanahuatis ipan tlali Babilonia, Nabuzaradán, nopa hueyi tlayacanquetl tlen soldados hualajqui

ipan altepetl Jerusalén. <sup>13</sup> Huan quitlati itiopa TÓTECO huan nopa caltlanahuatili huan nochí huejhueyi caltini. <sup>14</sup> Huan nopa Nabuzaradán quinnahuati nopa caldeo soldados tlen hualayayaj ihuaya ma quihuelonica nochí nopa tepamitl tlen quiyahualo altepetl Jerusalén. <sup>15</sup> Teipa Nabuzaradán quinhuicac ipan tlali Babilonia sequin nopa tlacame tlen teicneltzitzti, huan nochí tlen momanahuijque tlen nopa tlatehuijcayotl. Nojquiya quinhuicac nochí tlen motemactilijtoyaj ica nopa tlanahuatijquetl tlen tlali Babilonia huan nochí nopa tlacame tlen quimatiyayaj quichihuase tlen hueli tequitl. <sup>16</sup> Pero sequin nopa tlacame tlen más teicneltzitzti quincajqui para ma quichihuaca xocomeca miltini huan ma quipoxahuaca nopa tlali.

<sup>17</sup> Huan nopa soldados tlen tlali Babilonia quitlapanque nopa ome huejhueyi tlaquetzali tlen bronce tlen eltoya campa ipuertajyo nopa tiopamitl. Huan nojquiya quitlapanque nopa piletas tlen bronce campa quitecayayaj atl huan nopa huacaxme tlen bronce tlen eltoyaj queja inintlaquetzalhua huan nochí quihiuicaque ipan tlali Babilonia. <sup>18</sup> Nojquiya quihiuicaque nochí nopa chachapali tlen bronce, huan nopa palas tlen ica quiijcueniyayaj cuanextli ipan nopa tlaix-pamitl; huan nochí cucharas, huejhueyi tazas huan nopa huitzcucharas huan nochí tlamatli tlen bronce tlen quitequihuiyayaj ipan tiopamitl quema quimacayayaj tlacajcahualistli. <sup>19</sup> Huan nojquiya quihiuicaque nopa tlixictli, tlahuil quetzali huan nopa tazas huan platos tlen senquistoc oro huan plata.

**20** Nopa bronce tlen nopa ome huejhueyi tlaquetzali tlen Salomón quichijqui, huan nopa piletas huan nopa huacaxme tlen eliyaya tlazintla elque tlahuatl etique hasta axaca huelqui quinyejyechua ietica. **21** Sesen tlaquetzali quipiyayaya 9 metros huan 45 centímetros ihuejcapanca. Huan inintomajca eliyaya 6 metros huan 30 centímetros. Nopa tlaquetzali eliyaya cacahuatique huan inintilajca quipiyayaya 8 centímetros. **22** Huan inintzonatipa nopa tlaquetzali quiyyocatlalijtoyaj pano 2 metros. Huan ipan nopa lugar quinixcopintoyaj miyac granadas. **23** Oncayaya 96 granadas ipan sesen lado huan seyoc 100 granadas quiyahualo-jtoyaj nopano huejcapa.

*Quinhuicaque israelitame campa huactoc tlali*

**24** Huan nopa hueyi tlayacanquetl tlen soldados quihuicac Seraías tlen eliyaya nopa hueyi totajtzi huan Sofonías, nopa totajtzi tlen eliyaya itlapalehuijca, huan eyi tlacame tlen quimocuitlahuiyayaj nopa tiopamitl. **25** Huan tlen nopa tlacame tlen noja motlatiyayaj ipan nopa altepetl, quinhuicac se hueyi tlayacanquetl tlen soldados, huan chicome tlacame tlen quitlalnamictiyayaj nopa tlanahuatijquetl. Huan quinhuicac nojquiya nopa tlayacanca tlajcuilojquetl tlen quinnahuatiyaya nopa soldados tlen tlali Judá huan 60 huejhueyi tlacame tlen motlatijtoyaj ipan Jerusalén. **26** Huan Nabuzaradán, nopa hueyi tlayacanquetl tlen soldados, quinhuicac nochí yajuanti ipan altepetl Ribla iixpa nopa tlanahuatijquetl tlen tlali Babilonia. **27** Huan nopano, nopa tlanahuatijquetl tlanahuati ma quinhuitequica

huan ma quinmictica. Huan queja nopa, quintlamiquixtijque nochí Judá ehuani tlen inintlal.

<sup>28</sup> Huan nopa tlacame tlen tlali Judá tlen quinhuicaque ipan tlali Babilonia quema Nabucodonosor yahuiyaya para chicome xihuitl para tlanahuatis, elque para nochí: 3 mil 23 tlacame. <sup>29</sup> Huan quema yahuiyaya para majtlactli huan chicueyi xihuitl ipan itlanahuatil Nabucodonosor, Nabuzaradán quinhuicac 832 tlacame tlen altepetl Jerusalén. <sup>30</sup> Huan quema yahuiyaya para 23 xihuitl ipan itlanahuatil Nabucodonosor [52:30 Ipan nopa xihuitl 581 a.C. ipan tocalendario tlen ama.], Nabuzaradán, nopa hueyi tlayacanquetl tlen soldados quinhuicac 745 tlacame. Huajca para nochí tlen quinhuicaque ipan tlali Babilonia elque 4 mil 600 tlacame tlen tlali Judá huan altepetl Jerusalén.

### *Quiquixtijque Joaquín ipan tlatzactli*

<sup>31</sup> Teipa quema Joaquín, tlanahuatijquetl tlen tlali Judá, quihiucayaya 37 xihuitl para quihiucatoyaj ipan tlali Babilonia, pejqui tlanahuatía ipan tlali Babilonia, Evil Merodac. Huan ipan 25 itequi nopa metzatlí majtlactli huan ome ipan calendario israelita [52:31 Ipan 31 itequi marzo, 561 a.C. ipan tocalendario tlen ama.], Evil Merodac quitlasoxtlac Joaquín huan quiqxiti ipan nopa tlatzactli. <sup>32</sup> Huan quichihuili tlen cuali huan quichijqui ihuampo huan más quipacti tlen nochí nopa sequinoc tlanahuatiani tlen itztoyaj ihuaya ipan tlali Babilonia. <sup>33</sup> Nojquia quimacac se yoyomitl tlen yancuic queja quinamíqui para se

tlanahuatijquetl. Huan Joaquín tlacuayaya mojmostla ihuaya nopa tlanahuatijquetl ipan imesa.  
<sup>34</sup> Huan nojquiya mojmostla quimacayaya nochitlen itechmonequi. Huan queja nopa quichihuili nochipa hasta quema mijqui.

**Itlajtol toteco: Santa Biblia  
Bible without Deuterocanon in Nahuatl, Huasteca  
Oriental (MX:nheBI:Nahuatl, Huasteca Oriental)**

copyright © 2005 Wycliffe Bible Translators, Inc.

Language: Nahuatl, Huasteca Oriental

Dialect: Huasteca Oriental

Translation by: Wycliffe Bible Translators, Inc.

Náhuatl, Huasteca Oriental [nhe], Mexico

**Copyright Information**

© 2005, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The Bible without Deuterocanon**

in Nahuatl, Huasteca Oriental

**© 2005, Wycliffe Bible Translators, Inc.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

---

PDF generated using Haiola and XeLaTeX on 11 Nov 2022 from source files  
dated 29 Jan 2022  
6e359f6d-e93f-5d56-819d-a3feae810a1b